



UNIVERSITY OF TORONTO



3 1761 00180801 3



Digitized by the Internet Archive
in 2012 with funding from
University of Toronto

MUSEUM ITALICUM

S E U

COLLECTIO VETERUM SCRIPTORUM
EX BIBLIOTHECIS ITALICIS,

*Eruta a D. JOHANNES MABILLON, & D. MICHAËLE
GERMAIN presbyteris & monachis Benedictina Cong. S. Mauri.*

TOMUS I.

IN DUAS PARTES DISTINCTUS.

PRIMA PARS COMPLECTITUR EORUMDEM
ITER ITALICUM LITTERARIUM: altera vero varia Patrum
Opuscula & vetera monumenta, cum Sacramentario & Pœnitentiali
Gallicano.



· LUTECIÆ PARISIORUM,

Apud

{ Viduam EDMUNDI MARTIN,
JOHANNEM BOUDOT,
& STEPHANUM MARTIN. }

in via. Jacobea,
ad Solem aureum.

Anno M DC LXXXVII.

CUM PRIVILEGIO ET SUPERIORUM PERMISSU.

BX
880

M3
1687a
t. 1




855815



ILLUSTRISSIMO ECCLESIAE PRINCIPI
**CAROLO MAURICIO
 TELLERIO**

REMORUM ARCHIEPISCOPO DUCI,
 PRIMO FRANCIAE PARI,
 S. SEDIS APOSTOLICAE LEGATO NATO,
 GALLIAE BELGICAE PRIMATI &c.



EVERSIS ex Italico itinere, cujus tu ipse auctor, PRIMAS ILLUSTRISSIME, ac patronus esse dignatus es, longe alius modo animus, quam cum iter illud iniremus aut persequeremur, nobis inest, longe alia mentis agitatio. Ita enim totius nostrae profectionis seriem ac modum, quae tua providentia

E P I S T O L A.

est, disposueras, ut ipsos itineris & studiorum, qui passim devorandi erant, labores prompto atque hilari animo subiremus, dum nobis arridere ac patere omnia, nihil nisi blandum ac jucundum occurrere cerneremus. Nunc autem perfecto demum itinere, ventum est ad partem destinati operis longe gravissimam; nosque altior tenet sollicitudo & anxietas, ne scilicet rei exitus tuæ de nobis ac publicæ expectationi non respondeat.

Cum enim in hanc peregrinationem nos induxeris, simul ut aliquid utilitatis Ecclesiæ, rei que litterariæ inde accederet; simul ut conquisitis regiæ Bibliotheca libris fieret locupletior: nulli quidem diligentia, quo minus injuncto nobis officio fieret satis, nos defuisse existimamus: an vero aliquid tanto molimine dignum retulerimus, tuum erit aliorumque judicium, quod merito reformidamus. Atque utinam tibi uni hujusce negotii rationem reddituri essemus. Sane adduceremur in certam spem, opellam nostram tibi, pro tua in nos benignitate, non ingratham fore. At quoniam in gratiam rei publicæ litterariæ id aggressus es, profecto verendum est, ne, qui hoc beneficio tibi obstricti esse debent, litterati homines nobis succenseant, quasi nostras partes non satis gloriose simus exsecuti. Nam etsi non deerunt, ut sperare licet, æqui rerum aestimatores, qui nostros conatus, nostramque industriam æqui bonique consulant: erunt fortasse etiam morosiores

E P I S T O L A.

nonnulli, quibus hæc, quæ modo in lucem edimus, non satis illustria & exquisita videbuntur; nosque parum idoneos, qui tantum opus tractaremus, censere, vel etiam dicere non dubitabunt. Quasi in nostra fuerit potestate, ut res omnium præclarissima, vel ad cujusque gustum accommodata nobis occurrerint: ac perinde sit res ipsas nobis, atque nos ipsis rebus defuisse.

At illud in primis nos sollicitat, quod LUDOVICI MAGNI jussu, te suggerente, in hanc provinciam inducti sumus: quod regiis sumtibus totum illud iter confecimus: quod denique nihil nisi magnum ac præclarum sub talibus auspiciis edendum est. Et sane non satis tanti Nominis dignitatem intelligeremus, nisi ex hoc maxime oneris nostri magnitudinem metiremur: ac pene desperaremus officiis nostris bene consultum iri, nisi te, quo itineris auctore gloriamur, eundem quoque assertorem ac vindicem haberemus.

*Nunc itaque res postulat, ILLUSTRIS-
SIME PONTIFEX, ut tuum de nobis tueare judicium: ne quod ad Ecclesiæ, litterarumque profectum te inspirante susceptum est, præcipiti quorundam censura obscuretur, aut concepto fructu careat. Non soles imperfecta deferere opera tua: quin immo ea constanti ac firmo proposito ad absolutam perfectionem urges ac perducis. Hoc quippe præclara illa Cleri tui forma, quem tuis legibus in pristinum*
â iij

E P I S T O L A.

splendorem restituisisti : hoc Pastorum , sacrorumque ministrorum pia institutio , accuratissimus delectus , ac probati mores : hoc Seminarii in urbe tua primaria per te novis substructionibus instaurati atque dotati ; Et alterius apud Sedanum erecti exacta disciplina : hoc tua in proselytos pervigil cura Et pastoralis sollicitudo : hoc denique assertæ judiciis tuis in provincia Remensi ecclesiasticæ regulæ , satis superque omnibus testatum ac manifestum reddunt. Nulli obices , nulla difficultates infractum animum tuum a suscepto semel opere avocant , aut retardant. Pressis constanter insistas vestigiis : atque ita rerum agendarum consecutiones cernis , ut promptum facilemque exitum res omnes , quantumlibet arduæ , te duce inveniant.

Quod si ea est in rebus difficillimis virtus Et auctoritas tua , longe tibi facilius erit his laboribus nostris gratiam conciliare apud omnes. Jam nostram in libris comparandis , quibus ad tria fere millia Bibliotheca regia aucta est , operam approbasti. Perge selectis a nobis veterum monumentis suffragari. Tu nobis unus instar multorum millium eris ; nec alii minime morosi ac tetrici suffragium audebunt suum denegare , ubi tuum præcessisse intellexerint. Ceterum id optamus , non tam ut plausum , a quo prorsus alieni debemus esse , nobis conciliemus , quam ut ne te suscepti pro Ecclesia , pro litteris negotii aliquando peniteat.

E P I S T O L A.

Quamquam non ita abjecte forsā ac timide de rebus nostris sentire debemus, ut aqua & propitia de his cordatorum hominum judicia nobis sperare non liceat. Difficile enim est, ut in tanta rerum varietate unusquisque aliquid pro suo captu gustuque vel in his, vel in illis, quæ postmodum edituri sumus, non inveniat: & cum in utrisque nonnulla sint, quæ Ecclesiæ, tum universæ, tum maxime Gallicanæ, opportuna & fructuosa fore non dubitamus; fieri vix potest, ut litterati etiam homines aliquem ex his fructum non capiant. Verum ea nostra est de tua beneficentia opinio, PRÆSUL ILLUSTRISIME, ut cum etiam perfecimus quod valemus; minus nobis fecisse videamur quam debemus. Tuum erit de tua benignitate quod nobis, de tua auctoritate supplere quod operi deest.



AD STUDIOSOS LECTORES.

I. **H**ABES in hoc libro, STUDIOSE LECTOR, Italici nostri Itineris primitias in specimen aliorum librorum, qui subinde, favente Deo, subsequuntur. Quid in hoc primo volumine contineatur, subjectus index assignabit. In aliis collectio sacrorum rituum ecclesiæ Romanæ, variorum Patrum, veterumque auctorum descriptiones, clarorum virorum epistolæ, atque id genus alia, quatuor aut quinque voluminum materiam suppeditabunt. Titulum operi imponimus, MUSEUM ITALICUM, aliis fere omnibus jam occupatis. Hujusce inscriptionis causas, quando satis per se ipsæ patent, exponere otiosum fuerit.

II. Primum hunc librum tribuimus in partes duas. Priorem obtinet Itineris nostri descriptio, quam aliquanto fusiolem, suadentibus amicis, fecimus: posteriorem minutiora opuscula, cum prolixiora in tam brevi spatio congerere non liceret. In Itinere describendo ea quæ ad litteras, cum sacras, tum profanas pertinent, præcipue consuectamur: aliis mores populi, res civiles ac politicas, descriptiones regionum atque urbium permittimus. Nobis vero bibliothecæ,

P R Æ F A T I O.

vetera monumenta & cimelia, inscriptiones, viri doctrina & eruditione præstantes, narrationis argumentum subministrabunt. Aliquando etiam signis, statuisque contemplandis tantisper immorabimur: quorum illa inanibus gentilium diis; hæ præclaris illustribusque viris proprie conveniunt. Picturis etiam & tabellis nonnumquam locus erit. Habent enim res hujusmodi non parum momenti ad rem litterariam. Bibliothecas diligentius perferutur, quarum vel rudem notitiam exhibere, vel quamdam memoriam conservare juvat. Sunt enim sua fata etiam bibliothecis. Jam ex iis quas aliquando perlustravimus, duas non sine magno rei litterariæ detrimento igni corruptas accepimus, nempe Gemblacensem in Belgio ante aliquot annos; & apud Venetias sancti Antonii in Castello Canonorum regularium sancti Salvatoris, post nostrum ex illa urbe discessum. Harum bibliothecarum ne unum quidem folium superesse, cum utraque vetustis atque optimæ notæ codicibus abundaret, magnopere dolemus.

III. De viris litteratis, quos in Italia novimus, audire non ingratum erit iis, qui aliquam cupiditatem habent notitiæ clarorum virorum: nec iisdem displicebunt epitaphia mortuorum illustrium, nondum vulgata, quæ identidem referimus. Unum est Stephani Platynæ, (ita enim scribere nomen suum amat cum y græco, quemadmodum Johannes exarchus, cognomento *Platyn* in vita Sergii papæ primi appellatur.) Prædictum epitaphium Platyna ejus frater, celebris scriptor, composuit, ac sibi etiam commune esse voluit, Baptista passim, Bartholomæus Trihemio aliisque appellatus. Quod idcirco hoc loco retractamus, ne qua errandi occasio ex-
Pag. 66. iis, quæ in Itinere nostro diximus, incautis pateat. Porro

P R Æ F A T I O.

ut veteres inscriptiones non raro adducereimus, auctores nobis fuerunt magni viri, qui vel ex illis integra volumina condiderunt, vel de earum usu atque utilitate scripserunt. Hos inter Antonius Augustinus, Hispanorum decus, nonum dialogum hoc de argumento constituit ex illis undecim, quos de Nummis veterum composuit.

IV. Quod attinet ad tabellas & picturas, observatione dignæ sunt picturæ illæ de Baptismo, quas ex tumulo quodam Neapolitano exhibemus. Ex his probatur Baptismi ritus per immersionem simul ac superfusionem: ita utmerso in aquam ad collum usque corpore, aqua ex urceo in caput effunderetur. Huic tamen ritui obstat quod Luciferianus apud Hieronymum *per traditionem in ecclesiis* observatum ait, *in lavacro ter caput mergitare*. Verum fortasse non ubique, aut non semper receptum: sed aliquando indultum majoris facilitatis causa, ut super capita baptizandorum aqua superfunderetur. Sed hæc peculiarem tractationem exigunt, quam in aliud tempus magis opportunum reservamus. De sacra Christi effigie, quæ Veronicæ vulgo tribuitur, nonnulla item in nostro Itinere observantur: ubi testimoniis veterum ostendimus, ipsam effigiem *Veronicam* ab antiquis solitam appellari: quibus adde Matthæum Parisium initio vitæ Henrici tertii. De hac effigie egit Gretserus in Syntagmate de Imaginibus non manu-factis cap. xvii. ubi scite advertit, hanc effigiem ab Anastasio Bibliothecario *acheropitam* seu ἀχρηπιντον dici in vita Stephani tertii, id est non manu-factam. Hanc imaginem cum aliis ex suæ sectæ præjudicio recens impugnavit Johannes Reiskius in Exercitationibus historicis, quæ Jenæ ante biennium in lucem prodierunt.

Pag. 73.

Pag. 88.

P R Æ F A T I O.

V. In altera hujusce voluminis parte primas tenent Homiliæ duodecim ineditæ sancti Maximi episcopi Taurinatis. Has homilias ipsi vindicat Præfatio, quam iisdem homiliis suo loco præmisimus. In homilia octava, quæ est de Natali Domini, reperitur totidem verbis fragmentum illud, quod Augustini sermoni undecimo de eodem festo insertum fuisse in nova editione observatum est. Exstat Ambrosii consimilis locus apud Cassianum relatus in libro VII de Incarnatione Domini capite XXV. sed cum hoc tamen discrimine, quod Ezechielis versus de *porta semper clausa*, neque in nostra editione, neque in fragmento Augustiniano reperitur.

Pag. 38.

VI. Non est quod multum ceteris recensendis immeremur, quando singula opuscula vel monumenta præfixæ Admonitiones, aut subjunctæ Observationes satis illustrant. Nonnulla tamen, quæ nobis exciderunt suis locis, hic paucis indicare juvat. In vita Hadriani papæ primi nihil deest ad hæc verba, ubi is Romanus dicitur, *ex regione via Lata*. Nam viam Latam etiam regioni suæ, (quæ nunc alio nomine *Trevii* appellatur) vocabulum dedisse constat, cum ex ipsius Hadriani actis apud Anastasium, tum ex actis Valentini & Stephani sexti, qui *ex regione via Lata* oriundi perhibentur. De Hadriani loco sepulturæ non consentit auctor noster cum Anastasio, qui Pontificem in *basilica beati Petri apostoli* sepultum fuisse scribit: cum noster eundem in Nonantulano monasterio tumulum habuisse commemoret.

Pag. 37.

VII. Narratio contentionis de cella sanctæ Mariæ in Minione, quæ inter Farfenses monachos & cœnobitas sanctorum Cosmæ & Damiani in Mica-aurea inter-

P R Æ F A T I O.

cessit , multa continet de moribus illius ætatis , scitu non indigna. Cœnobium sancti Cosmæ Romæ situm erat in vico-aureo trans Tiberim , sancto Francisco Assisinati traditum à monachis nostris sancti Pauli in Urbe , in quorum manus devenerat ; nunc domus Clarissarum , vulgo dicta *S. Cosmate in Trastevere*. quam notitiam ab illustrissimo Ciampino nuper accepimus.

VIII. In epistola Gauderici Veliterni episcopi legitur, Pag. 72.
ecclesiam beati Clementis titulo apud Veliternum tunc exstitisse ; & Johanni Diacono , qui vitam Gregorii M. quatuor libris absolvit , cognomentum fuisse H Y M O N I D E M. quod utrumque Anastasii Bibliothecarii testimonio comprobari posse postea deprehendimus. Is enim de Leonis tertii rebus gestis agens ait , cum dono dedisse sacram vestem *in ecclesia beati Clementis , quæ ponitur in Velitris*. Idem in Hadriano secundo testatur , *Episcopum Velitriensem* , nempe prædictum Gaudentium , & Stephanum Nepefinum , sed & JOHANNEM cognomento H Y M M O N I D E M , quos Ludovicus Augustus , eo nomine secundus , ex falsa criminatione proscripserat , ejusdem Hadriani rogatu ab exilio fuisse revocatos.

IX. Postremo loco , ut cetera omittamus , habetur SACRAMENTARIUM GALLICANUM , seu verus Liturgia Gallicana , quam nobis suppeditavit codex Bobienlis , ante annos mille exaratus. Desunt in eo Missarum Canones illi quotidiani , quales in Missali Gothico exhibuimus , nempe in libro de Liturgia Gallicana. Unus hic pro omnibus est Canon Romanus , qui ante admissum Romanum Missæ Ordinem a Gallis receptus fuit. Atque adeo in hoc Sacramentario desiderantur illa testimonia , quæ pro vera ac reali Christi corporis & sanguinis in Sacramento præsentia retuli-

P R Æ F A T I O.

mus in Præfatione ad Liturgiam Gallicanam. Non desunt tamen hic alia ad eandem veritatem confirmandam, ut in Contestatione secundæ Missæ quadragesimalis. *Hunc Panem, Domine, nobis ministrare non desinas, quem ut sitiamus indefinenter hortaris: cujus CARNE a te ipso sanctificata dum pascimur, roboramur; & SANGUINE dum potamur, abluimur.* Item in Contestatione Missæ in Symboli traditione: *Per istum immolatum Panem & Sanguinem nos repara.* ubi *Panis* nomine caro Christi intelligitur, ut patet ex subjuncta *Sanguinis* mentione. Sed illud in primis probat veterum Gallorum de Eucharistia persuasionem, quod, si quando hæc casu in terram vel in quemlibet extra altare & vasa sacra locum cecidisset; id tanta cautione & religione (ut in Pænitentiali, quod Sacramentario nostro adjunctum est, advertere licet) expiabant, ut fungos fuisse necesse sit homines illos, qui id agebant, nisi aliquid aliud in Eucharistia præter vacuam inanemque figuram crediderint. Porro ex eodem Sacramentario, aliisque Gallicanis Liturgiis alias a nobis editis, probatur etiam Missæ Sacrificium, invocatio Sanctorum, sacrarum reliquiarum veneratio, preces & suffragia pro defunctis. Insignis est locus de suffragiis Sanctorum in Contestatione Missæ de uno Confessore. Cui *INSPIRA, misericors Deus, intercedere tibi pro nobis: ut quem fecisti de sua felicitate securum, facias pro nostra liberatione sollicitum.* Atque adeo inspirantis est gratiæ divinæ, ut Sancti in cælo pro nobis solliciti sint. qui locus catholicam sententiam mire illustrat. Postremo ex eodem Sacramentario per antiquo, aliisque similibus probatur linguæ Latinæ usus in rebus sacris, in quibus nulla usquam alia primis illis temporibus recepta fuit apud Latinos. Unde mi-

Pag. 394.
& 395.

Pag. 348.

P R Æ F A T I O.

rum est, heterodoxos, qui nos ad veterem Ecclesiam provocare solent, linguæ vulgaris usum in sacra nostra velle inducere. *Sed quid dicam, Fratres? Non eis irascamur: sed pro eis oremus, ut det eis Dominus intellectum, quia forte hoc nati sunt. Quid est, hoc nati sunt? Hoc acceperunt a parentibus suis quod tenent. Preponunt genus veritati. Fiant quod non sunt, ut possint servare quod sunt, hoc est, FIANTE CATHOLICI, ut possint servare quod homines sunt. Ut non in illis pereat Dei creatura, accedat Dei gratia. Quod quidem totis votis & animis optamus.*

*Augustin.
serm. 139.
ad popul.
num. 5.*

X. Quod si forte minus hæc alienæ communionis hominibus profecerint; saltem, Deo juvante, speramus, opus nostrum cessurum in usus catholicæ Ecclesiæ, cui nos laboresque nostros jam dudum consecravimus.





INDEX CONTENTORUM

IN DUPLICI HUIUS TOMI PARTE.

IN PARTE I.

I TER ITALICUM LIT- TERARIUM. pag. I.	<i>Casinese & Sublacense,</i>	119
<i>Taurinum, Vercella, Novaria,</i>	<i>Roma secundo,</i>	130
<i>Mediolanum,</i>	<i>Sena,</i>	158
<i>Brixia, Verona, Vicentia,</i>	<i>Florentia, &c.</i>	160
<i>Patavium,</i>	<i>Bononia,</i>	195
<i>Venetia,</i>	<i>Patavium, & Venetia secundo,</i>	203
<i>Ravenna, &c.</i>	<i>Mantua, Parma, Placentia,</i>	207
<i>Roma,</i>	<i>Mediolanum secundo,</i>	210
<i>Neapolis, &c.</i>	<i>Ticinum, & Bobium,</i>	215
<i>Monasterium Cavense,</i>	<i>Dertona, Genua, Taurinum,</i>	223
	<i>&c.</i>	

IN PARTE II.

I N S. Maximi episcopi Tauri- nensis homilias Prefatio, pag. I	XII De corpore Domini,	30
Homilia I De Barbaris non ti- mendis,	Libri Diurni Romanorum Pontifi- cum supplementum,	32
II Eiusdem argumenti,	Hadriani Papae vita, auctore ano- nymo monacho Nonantulensi,	38
III Item eiusdem,	Capitularia quadam,	44
IV De Ninivitis,	Præceptum Luponis Ducis Spole- tani,	50
V De Kalendis Ianuariis,	Placitum eiusdem,	52
VI De defectu luna,	Adalhardi abbatis, Missi Domi- nici in Italia, Placitum,	54
VII Dictum ante Natale Do- mini,	Contentio de Cella S. Maria in Minione,	57
VIII De Natali Domini,	Index Ducum Spoletanorum, & Abbatum Farfensium,	63
IX Post Natale Domini,	Iohannis Diaconi epistola ad Ce- narium virum illust.	
X De hæreticis peccata venden- tibus,	Gauderici episcopi Veliterni epis- tola,	
XI Quod non debent clerici negotia ri,		

INDEX CONTENTORUM.

<i>sola,</i>	78	<i>de filiis clericorum,</i>	128
<i>Anastasi Bibliothecarii varia</i>		<i>Historia belli sacri sub Urbano</i>	111
<i>epistole,</i>	80	<i>auctore anonymo aquali,</i>	130
<i>Concilium Romanum in causa</i>		<i>Stephani Comitis Carnotensis</i>	
<i>Formosi,</i>	86	<i>epistola ejusdem argumenti,</i>	237
<i>Gezonis abbatis epistola de cor-</i>		<i>Epistola formata,</i>	240
<i>pore & sanguine Domini,</i>	89	<i>Synodus Verulanensis sub Pas-</i>	
<i>Pauli & Gebhardi Canonorum</i>		<i>chale</i>	11, 242
<i>Ratisponensium epistola tres de</i>		<i>Gracorum confessio de Eucharistia,</i>	
<i>ritu Ambrosiano,</i>	95	<i>edita in Concilio Florentino,</i>	
<i>Martini Thesaurarii Ambrosiani</i>			243
<i>de eodem argumento,</i>	98	<i>Acta sanctorum martyrum Ni-</i>	
<i>Observationes ejusdem argumen-</i>		<i>candri & Marciani,</i>	247
<i>ti,</i>	99	<i>Fabiani Bencii vita, auctore</i>	
<i>Index vetustissimus Episcoporum</i>		<i>Augustino Patricio episcopo</i>	
<i>Mediolanensium,</i>	109	<i>Pientino,</i>	251
<i>Manasse archiepiscopi Remensis</i>		<i>Descriptio adventus Friderici</i>	111
<i>Apologia,</i>	117	<i>in Urbem, ex eodem auctore,</i>	
<i>Noviomensium clericorum epistola</i>			256

SACRAMENTARIUM GALLICANUM.

P <i>Refatio in Sacramentarium</i>		<i>In Cathedra S. Petri,</i>	297
<i>Gallicanum,</i>	273	<i>In Missa sancta Maria,</i>	298
<i>Lectioes cotidiana,</i>	278	<i>In assumptione sancta Maria,</i>	300
<i>Missa Romensis cotidiana,</i>	279	<i>Initio Quadragesima,</i>	301
<i>Lectioes & Missa de Adventu</i>		<i>Alia Missa in Quadragesima,</i>	303
<i>Domini,</i>	283	<i>& seqq.</i>	
<i>Missa in vigilia Natalis Domi-</i>		<i>In Symbolum ad aurium aper-</i>	
<i>ni,</i>	289	<i>tionem,</i>	310
<i>Missa in Natali Domini,</i>	290	<i>Missa in traditione Symboli,</i>	313
<i>Missa in festo sancti Stephani,</i>		<i>In Cena Domini,</i>	315
	291	<i>Legenda in Parasceve,</i>	317
<i>Missa de sanctis Innocentibus,</i>		<i>Officium Sabbati sancti,</i>	319
<i>ibid.</i>		<i>Benedictio cerei,</i>	321
<i>Missa de sanctis apostolis Iohanne</i>		<i>Ordo Baptismi,</i>	322
<i>& Iacobo,</i>	293	<i>Missa in vigiliis Pasche,</i>	325
<i>ssa in Circumcisione,</i>	294	<i>Die sancto Pasche,</i>	327
<i>De Epiphania,</i>	295	<i>Alia Missa Paschales,</i>	329

INDEX CONTENTORUM.

& seqq.	faciendum.	386
<i>Missä in Inventionē sanctæ Cru-</i>	<i>Oratio in domo</i>	387
<i>cis ,</i>	<i>Oratio ad consecrandas mona-</i>	
332	<i>chas ,</i>	ibid.
<i>In Letaniis ,</i>	<i>Ad velandum Virginem ,</i>	388
334	<i>Benedictio Abbatissæ ,</i>	ibid.
<i>In Ascensione ,</i>	<i>Benedictio super viduam veste</i>	
336	<i>mutandam</i>	ibid.
<i>In Quinquagesimo seu Pentecoste ,</i>	<i>Oratio thalami super nubentes ,</i>	
337	ibid.	
<i>Missä sancti Iohannis ,</i>	<i>Oratio super eos qui secundo nu-</i>	
339, 341.	<i>bunt ,</i>	389
<i>Post Missam sancti Iohannis ,</i>	<i>Benedictio de omni quod in eccle-</i>	
340	<i>sia offertur ,</i>	ibid.
<i>In eyslem Passione ,</i>	<i>Benedictio calicis, patenæ, & tur-</i>	
341	<i>ris ,</i>	ibid.
<i>In natali apostolorum Petri &</i>	<i>Benedictio super eum qui in ec-</i>	
<i>Pauli ,</i>	<i>sia primitus tondetur ,</i>	ibid.
342	<i>Benedictio super puteum ,</i>	ibid.
<i>Missä Sigismundi regis ,</i>	<i>Benedictio super vas immun-</i>	
344	<i>dum ,</i>	390
<i>Missä de communi sanctorum</i>	<i>Benedictio palma & oliva ,</i>	ibid.
<i>Martyrum ,</i>	<i>Benedictio agni in Pascha ,</i>	ibid.
345	<i>Benedictio pomorum ,</i>	ibid.
<i>De communi unius Martyris ,</i>	<i>Benedictio ad mensam & post</i>	
346	<i>mensam ,</i>	391
<i>De uno Confessore ,</i>	<i>Orationes vespertina & matuti-</i>	
347	<i>na ,</i>	ibid.
<i>In depositione sancti Martini ,</i>	<i>Exorcismus & benedictio olei ,</i>	
348	392	
<i>De una Virgine ,</i>	<i>Liber Penitentialis ecclesiæ Gal-</i>	
350	<i>licanæ ,</i>	ibid.
<i>In dedicatione ecclesiæ ,</i>	<i>Ratio institutionis divinarum of-</i>	
351 & seq.	<i>ficiarum ,</i>	395
<i>Missä pro infirmis ,</i>	<i>Symbolum Apostolorum ,</i>	396
351	<i>Canon librorum sacrorum ,</i>	ibid.
<i>Missä in honore sancti Michaëlis</i>		
356		
<i>Pro iter agentibus ,</i>		
ibid.		
<i>Missä Sacerdotis pro se ipso ,</i>		
357		
<i>Missä omnimoda ,</i>		
359		
<i>Missä votivæ ,</i>		
360 & seqq.		
<i>Missä pro vivis & defunctis ,</i>		
363		
<i>Missä Dominicales ,</i>		
364 & seq.		
<i>Missä pro Principe ,</i>		
378		
<i>Alia Missä Dominicales ,</i>		
379		
& seqq.		
<i>Missä in depositione Sacerdotis ,</i>		
384		
<i>Item Missä pro defunctis ,</i>		
385		
<i>Exorcismus ad salis sparsum</i>		

PRIVILEGE DU ROY.

L OUIS PAR LA GRACE DE DIEU ROY DE FRANCE ET DE NAVARRE : A nos amés & feaux Conseillers, les Gens tenans nos Cours de Parlement, Maistres des Requestes ordinaires de nôtre Hôtel, grand Conseil, Baillifs, Senéchaux, Prevosts & leurs Lieutenans, & à tous autres Justiciers & Officiers qu'il appartiendra, SALUT. Nôtre cher & bien amé Dom JEAN MABILLON Religieux Benedictin de la Congregation de saint Maur, Nous a fait représenter que dans le voyage qu'il vient de faire en Italie où il a esté par nôtre Ordre, pour rechercher dans les anciennes bibliothèques de ce pays-là, ce qu'il pourroit y découvrir d'utile pour l'Eglise & curieux pour l'histoire : Il auroit trouvé une tres grande quantité de pieces rares non encore imprimées, & dont la publication seroit tres avantageuse au public, lesquelles il feroit volontiers imprimer s'il Nous plaisoit luy accorder nos Lettres de permission pour ce nécessaires. A CES CAUSES voulant favorablement traiter ledit Exposant, en consideration desdites pieces & des autres ouvrages qu'il a déjà mis en lumiere, qui ont esté bien receus du Public; Nous luy avons permis & permettons par ces presentes de faire imprimer le recuël des diverses pieces qu'il a apportées d'Italie, sous le titre de *Museum Italicum, seu collectio veterum scriptorum ex bibliothecis Italicis*, par tel Libraire & Imprimeur qu'il luy plaira choisir, en tels volumes, marges & caracteres, en autant de volumes & tout autant de fois que bon luy semblera, pendant le temps & espace de quinze années, à compter du jour que chacun desdits volumes aura esté achevé d'imprimer pour la premiere fois, pendant lequel temps Nous avons fait & faisons tres-expresses inhibitions & deffenses à tous Libraires & Imprimeurs de nostre Royaume, pays, terres & seigneuties de nostre obeïssance, & à toutes autres personnes de quelque qualité & condition qu'elles puissent estre, d'imprimer ou faire imprimer vendre ny debiter lesdits volumes sans le consentement exprez de l'Exposant, ou de celuy ou ceux qui auront droit de luy, sous pretexte de changement de titre, augmentation, impression estrange, notes, additions marginales, ny autrement, en quelque sorte & maniere que ce puisse estre, sur peine de dix mil livres d'amande, applicable un tiers à Nous, un tiers à l'hôpital general de Paris, & l'autre tiers à l'Exposant, où à celuy ou ceux qui auront droit de luy, de confiscation des exemplaires qui se trouveront contrefaits, & de tous dépens, dommages & interêts, à la charge neanmoins de mettre deux exemplaires de chacun desdits volumes, en nôtre cabinet du château du Louvre, & un autre dans celle de nôtre trescher & feal le Sieur Boucherat, Chevalier Chancelier de France, avant que de les exposer en vente, & à condition aussi de faire imprimer ledit Livre en beau caractère & sur de bon papier conformement à nos reglemens; & faire registrer ces presentes es registres de la Communauté des marchands Libraires de nôtre ville de Paris, à peine de nullité des presentes : du contenu desquelles Nous vous mandons & enjoignons de faire jouïr & user plai-

nement & paisiblement l'Exposant, & celuy ou ceux qui auront droit de luy, cessant & faisant cesser tous troubles & empeschemens. Voulons aussi qu'en mettant au commencement où à la fin desdits volumes copie ou extrait des presentes, elles soient tenuës pour dûment signifiées, & que foy y soit ajoutée, & aux copies d'icelles collationnées par l'un de nos amez & feaux Conseillers Secretaires, comme à l'original. Commandons au premier nôtre Huissier ou Sergent sur ce requis de faire pour l'exécution des presentes tous exploits, significations, deffenses, saisies, & autres actes requis & necessaires sans pour ce demander autre permission, nonobstant clameur de Haro, chartre Normande, Edits, Declarations, Arrests, Reglemens, Statuts & confirmation d'iceux, oppositions ou appellations quelconques, dont si aucuns interviennent & contraventions à ces presentes, nous reservons la connoissance à Nous & à nôtre Conseil, & l'interdisons à tous autres Juges, CAR tel est nôtre plaisir. DONNE' à Versailles le neuvième Janvier l'an de grace mil six cens quatre-vingt sept, & de nôtre regue le quarante-quatrième. Par le Roy en son Conseil, GALLOYS.

Registré sur le Livre de la Communauté des Libraires & Imprimeurs de Paris le 17 Janvier 1687 suivant l'Arrest du Parlement du 8 Avril 1653 & celuy du Conseil privé du Roy du 27 Février 1665.

Signé, C. ANGOT Syndic.

Ledit R. P. Mabillon a cedé son droit audit Privilege au sieur Boudot, suivant l'accord fait entr'eux, en date du 3. Avril 1687.

Achevé d'imprimer pour la premiere fois en vertu des Presentes le 23. Juillet 1687.

M O N I T U M.

I Tineris Italici pag. 231 de duabus illis figuris, quæ extremæ sunt in musivo sancti Theodori suspendendum est judicium, dum ampliorem de his notitiam habuerimus. Incertum quippe est, num potius Regem ac Reginam exhibeant, quam Pontificem ac Regem: nec lilia in veste apparent secundæ imaginis, nec corona radiata, ut ex amicis accepimus, qui rogatu nostro hanc picturam examinarunt.

ITER

I T E R
I T A L I C U M
L I T T E R A R I U M

Annis M D C LXXXV & M D C LXXXVI.



ITER ITALICUM LITTERARIUM.

DE rebus Italiae nec silere officii ratio; nec fere nova scribere, nobile quidem, sed tritum ac vulgare argumentum nos finit. Quid enim de Italia dicturi sumus, quod sexcenti ante nos auctores, tam antiqui, quam recentiores, non retulerint: aut quod itinerum scriptores, ipsique adeo peregrini non decantent? Nulla Italiae, non dico regio vel civitas, sed nec ulla villa tantisper insignis sine suo scriptore aut praecone; immo nullus fere lapis sine interprete reperiri potest. Quod si de bibliothecis agitur, Italicas omnes, aut prope omnes, inspexerunt, excusserunt, & tantum non expilarunt viri omnium gentium eruditissimi & curiosissimi: ita ut nihil ab eis relictum videri possit, nisi quod aut consulto praetermissum, aut reservatum in aliud tempus, aut denique a possessoribus impetratum non fuit. Dabunt itaque veniam, si nota quandoque ac vulgata scribimus, qui nos ad scribendum impellunt, litterarum amatores: quibus prorsus indignum videtur, praesentes ac posteros fraudare commemoratione beneficii, quod publica res litteraria, si non per nos, certe in nobis ab itineris nostri auctore accepit.

Prima hujusce itineris cogitatio incidit in mentem illustrissimi Remorum Antistitis CAROLI MAURICII TELLERII, cui jucundissimum fuit publicum hoc dare testimonium sui in litteras amoris, quem multis jam argumentis testatus erat. Is aliquando REGI cum suggessisset, se, siquidem suae Majestati placeret, indu-

xisse animum, ut quemadmodum in Germaniam ante bien-
nium ab illustrissimo Colberto litterarum causa regiis impensis
directi fueramus; ita etiam in Italiam ad lustrandas illarum par-
tium bibliothecas nos ipse iisdem impensis mitteret; laudato
ejus consilio, Rex libenter id præstare se velle dixit, non modo
ut Italiæ lustrarentur bibliothecæ, sed etiam ut in regiæ sup-
plementum libri novi ex illis regionibus compararentur. Sic ni-
hil LUDOVICI MAGNI providentiæ subducitur: qui ita
summa & maxima curat, ut nec minora dedignetur.

Tanti Principis jussis pro modulo incunctanter ac sedulo pa-
ruimus. Italiæ bibliothecas, veteres ac novas, perlustravi-
mus, ipsasque adeo librariorum officinas: ex quibus Biblio-
theca regia non mediocrem accessionem cepit. Nunc vero de
toto nostro itinere à nobis reddenda ratio est, & proferenda
in lucem, quæcumque tum ex publicis monumentis, tum ex
privatis scriniis exprimere potuimus. In hac autem narratione
si quædam ab aliis jam dicta repetere ipsa cogit itineris series; in
ceteris tamen conabimur aliam inire viam: dabimusque operam,
ut rebus edendis delectus & utilitas pretium, aut novitas gra-
tiam addat & varietas. Porro is præcipuus hujusce narratio-
nis scopus ac fructus erit, ut Italicarum notitiam bibliotheca-
rum exteris hominibus, qui litteras amant, præbeamus. quæ
res ab eis, qui Italica itinera scripserunt, leviter delibata, &
quasi integra relicta est. Faciemus etiam, quoad in nobis erit,
ut viri litterati, quos quidem in Italia novimus, in nostrorum
cognitionem veniant: quo non solum ex mortuorum scriptis
& recordatione, sed etiam ex vivorum notitia narratio nostra
evadat, uti certe optamus, jucundior ac fructuosior.

ANN. 1685.
APRILII.

I. **I**gitur in Italiam profecturi, ego scilicet ac noster Mi-
chael Germanus, prima die Aprilis anni M DC LXXXV.
quæ dies Quadragesimæ Dominica quarta erat, Lugdunum
versus iter instituimus, perfecimusque intra quinque dies, par-
tim celeri rheda, partim Araris secundo flumine: in exscensu
è navicula excepti, atque in ædes Anissonianas adducti ab hu-
manissimo viro Johanne Anissonio, cive ac bibliopola Lugdu-
nensi, qui nobis fratrem suum Jacobum itineris comitem, ut
in conquirendis comparandisque libris adjutor esset, ex illustris-
simi Remorum Archiepiscopi voluntate adjunxit. Post triduum,
quod parandis rebus itineri necessariis insumentum est, conductis

ITER ITALICUM.

in sex dies equis Augustam Taurinorum contendimus.

I X. Et primo quidem * Saxiacum prætergressi, sub vesperum in opido, quod * Turris-pinus appellatur, ægre hospitium impetrare potuimus, propter adventum Ducis Genuensis: qui, obsequium imperatum Reipublicæ suæ nomine Regi persolurus, tum in Galliam accedens, ipso die cum suo comitatu ibidem pernoctavit.

X. A Ponte * Belli-vicini, sito ad fluviolum Guiam, qui Delphinates à Sabaudis dirimit, per quadriduum nos immerimus in altissimas, & perpetuis nivibus opertas Alpes: & pertransito vico, quem Sclarum vocant, penetravimus in sectam rupem, vulgo *la Grotte*, quam permeabilem fecit serenissimus quondam Princeps Carolus Emmanuel Sabaudia Dux, eo nomine secundus. Is *publica felicitate parta, singulorum commodis intentus*, ut præfert inscriptio ibidem lapidi incisa, auctore Emmanuele Theiâuro, *breviorem, securioremque viam regiam, à natura oclusam, Romanis intentatam, dejectis scopulorum repagulis, equata montium iniquitate, qui cervicibus imminebant, præcipitia pedibus substernens, æternis populorum commerciis patefacit anno MDC LXX.* Hæc via ducit * Cameriacum, Allobrogum caput. Ibi arx Principis visitur cum sacra æde, quam Amedeus Dux piissimus una cum sua conjuge Yolanda stirpis Francicæ construxit, & duodecim Canonicis, præter Dëcanum & Archidiaconum, regendam concessit. Illic sancti Josephi baculum ostendunt; ibidemque sudarium, quod Christi Domini esse credunt, olim assertatum, inde postmodum Taurinum translatum est: quod antea in collegiata beatæ Mariæ de Lira, Trecensis diœcesis, ecclesia repositum fuisse Johannes Jacobus Chiffletius probat.

XI. * Montis Meliani arcem munitissimam postridie mane ad-equitantibus nobis, facta est frequens bellicarum machinarum displosio ob diem natalem serenissimæ Principis Mariæ Johanne Baptistæ à Sabaudia, regnantis Ducis almæ parentis. Ab * Aquis-bellis * Cameram ipso die pervenimus, vicum ad amnem Arcam, qui postea in * Iseram devolvitur. Ubique videas inter concava rupium querulos rivos, summisque de montibus magno cum sonitu cadentes aquas, maxime per æstatem, qua nives ex solis ardore colliquefcunt. Indigenæ passim gutturosi fiunt ex ejusmodi aquarum potu, quem valde insalubrem esse Muretus scite observat ex antiquis.

XII. Apud urbem sancti Johannis Mauriennam sollemnes &

A üj

Ann. 1685.
APRILI.
* Sessieux.
* La Tour
du Pin.

* Pont de
Beauvoisin.

* Chambery

Chifflet de
sacris linteis
cap. 17.
* Mont-
Melian.

* Aigues-
belles.
* la Cham-
bre.
* l'Iscere.

Muret. var.
lect. lib. 9.
cap. 9.

AN. 1685.
APRILI.

* *Brament.*

* *le Mont
Genis.*

frequentissimæ pro loco nundinæ erant feria quinta ante Dominicam Palmarum, cum eo accessimus. In ecclesia cathedrali sancti Johannis Baptistæ duodecim exstant Canonici, veste violacea, ut in plerisque Italiæ majoribus ecclesiis, utentes. Illinc ad vicum sancti Michaelis, deinde * Bramentum profecti, sequenti die pervenimus Laneburgum, qui vicus situs est ad radices * Cinisii montis majoris. Hujus montis ascensum difficilem reddunt ejus altitudo, nives fere perpetuæ, quibus is, uti & omnes alii circumstantes, tegitur; denique venti, qui ibidem plerumque vehementissimi & frigidissimi grassantur. Cinisio monti conscendendo adhibentur à Laneburgo in ascensu, & in summa montis planitie Marones vel muli; in descensu ad Novaliciam Marones, quos *camelos humanos* lepide vocat in suis epistolis Bentivolius Cardinalis. Incolæ sunt illarum partium, qui incredibili velocitate & pernicitate viatores humeris sublatis in sella ex vimine gestatoria portant. Mirum sane spectaculum: homines impediti & onusti arduum ascensum tanta celeritate superant, ut potius volare, quam progredi videantur: in descensu vero per abrupta præcipitia, per lubrica & declivia saxa immania tam firmis passibus defiliunt, ut eorum pedes atque gressus non magis titubent aut vacillent, quam si in æquabili planitie procederent. Traharum ususest in descensum montis, cum ejus terga nivibus operta sunt. In summo lacus est satis amplus, tum casæ aliquot cum xenodochio ac cœmeterio in gratiam peregrinorum, qui quandoque frigore & inedia illic enecti deficiunt ac pereunt. In medio versus Taurinum descensu occurrit Ferraria vicus; ad radicem montis * Novalicia opidum: à quo non longe distat celebre quondam ejusdem nominis monasterium, in declivi montis situm, quod in reditu ex Italia obiter vidimus.

* *la Novate.*

* *Suse.*

Baron ad
ann. 1027.

XIII. Quinque millibus passuum a Novalicia occurrit * Segusium, urbs nobilis, quondam Taurinatum colonia; uti Jonas monachus, ejusdem urbis alumnus, scribit in actis Attalæ Bobiensis abbatis. Illius urbis ecclesia major, sancto Justo dicata, Canonicoꝝ est regularium, in qua corpus ejusdem sancti Martyris, itemque sancti Mauri abbatis asservari dicitur. Quid de illis Justi reliquiis Glaber Rodulfus, quid Baronius sentiant, non est hujus loci enarrare. Ibi arcum in Augusti Cæsaris honorem erexit. S. P. Q. R. quod ejus ductu auspiciisque gentes Alpina omnes, quæ à mari supero ad inferum pertinebant, sub imperium populi Romani sunt redactæ.

Exarata est inscriptio in lamina ærea : sed vix dimidia nunc legi potest. Hanc integram Plinius refert, & ex eo Albertus; dimidiatam Emmanuel Thesaurus in Theatro Sabaudiaë.

AN 1689.
APRILI.

TAURINUM, VERCELLÆ, NOVARIA.

XIV. Opidum Bossolenum ad Dorian, itemque vici sancti Ambrosii & sancti Georgii, quem *Joarium* corrupte appellant, tum Saltus-Odæ, Velianum, & Rivoltum Principis ædibus insigne, viam nobis * Augustam Taurinorum præbuerunt: ubi Jacobum Anissonium, ex Italia in occursum nostri reuersum, offendimus. * *Turin*

XV. Dominica Palmarum Princeps in frequenti aulicorum confessu supplicationi & sacris interfuit in metropolitana sancti Johannis Baptistæ ecclesia, ubi sanctum Christi Domini sudarium (ut præmisimus) asservant, nempe in testudineo sacello, quod Emmanuel II. elegantissime ex marmore concinnari curavit, operi præsidente in primis Patre Guarino Theatino: qui etiam suppeditavit ideam ecclesiæ sui Ordinis, sub titulo sancti Laurentii in octanguli formam exstructæ, quæ palatio adhæret, sicut ecclesia metropolitana. Hæc nec multum ampla, nec valde magnifica, excepto præclaro illo sacello, sub quo Principum conditorium est. Novum palatium inter præcipua Europæ censerî posset, si suprema operi manus esset imposita. Victoris Amedei equestris ex ære statua in scala, quæ in magnum excelsumque atrium ascenditur, spectabilis est, cum subiecto Ducis brevi elogio, auctore Emmanuele Thesauero.

DIVI VICTORIS AMEDEI BELLICAM FORTITUDINEM
ET INFLEXUM JUSTITIÆ RIGOREM
METALLO EXPRESSUM VIDES.
TOTUM ANIMUM VIDERES,
SI EJUS VELOX INGENIUM FLEXIBILEMQUE CLEMENTIAM
EXPRIMERE METALLUM POSSET.

In porticu, ædi sancti Johannis proxima, exquisitæ picturæ. Urbis novæ ambitus, ad Padum usque protensus, amplissima & insignia palatia habet. Ingressus in urbem magnificus, cum aperto & jucundissimo prospectu à porta nova usque ad palatium Principis, cujus curia elegantiam & majestatem Gallicanam æmulatur. Montes intermedio Pado proximi, ecclesia Capucinorum, quæ cathedralis loco esse potest, vinetis &

AN. 1685.
APRIL.

præclaris ædibus innumeris ornati, gratissimum urbi spectaculum præbent.

Bibliotheca palatii multis referta est codicibus variarum linguarum, sed qui in acervum cum editis congesti sunt ob nuperum incendium, quod multos libros corrumpit. Inter eos quos sub auspiciis illustrissimi Abbatis Gualterii nobis videre licuit, unum est opus insigne *Pyrrhi Ligorii* Romani, Patricii Neapolitani, viginti sex voluminibus constans: quorum in primis exprimuntur, atque italice explicantur numismata latina & græca, tum variæ inscriptiones, statuarum, aliæque id genus repræsentantur, una cum Dictionario in sex volumina distributo, in quo vocabula geographica, exotica, ac cetera explicantur. Vivebat auctor initio hujus sæculi, tempore Caroli Emmanuelis I. Sabaudiarum Ducis, qui hoc opus autographum octodecim millibus ducatorum comparavit. Ejusdem operis pleraque volumina Romæ habentur in bibliotheca Christianæ Reginae. Inter alios Taurinensis, de qua loquimur, bibliothecæ codices, vidimus etiam e latinis *Hegeſippi libros V.* de excidio Jerosolymitano, scriptos ante annos septingentos; *Terulliani Apologeticum* annorum sexcentorum: e Græcis *Ménologium* duobus tomis, qui annos sexcentos superare videntur. Tabula Isiaca, in qua Isis profana sacra exhibentur, in Principis museo asservatur.

Altera quam Taurinum accessimus die invisimus excellentissimum Regis Oratorem Abbatem de Strada, à quo humanissime non semel accepti sumus.

XVIII. Savilianense Ordinis nostri monasterium, quod Taurino distat decem leucarum intervallo, adivimus. Conditores Abellonius, & Ameltruda ejus conjux exstiterere sub Conrado I. rege, cujus anno secundo cœnobii fundamenta jacta sunt sub titulo sancti Petri. Nullæ ibi veterum codicum reliquæ.

XIX. Reversi Taurinum, ibidem sacros exegimus dies. Sub noctem feriæ sextæ, in qua Christi Domini Passio celebrari solet, variæ Poenitentium sodalitates in ecclesiam cathedralē convenerunt ad percurrentes urbis stationes. Flagellationibus tota res peracta. Inceptum a majore ecclesia, ubi dum Princeps exspectatur, lentis ictibus humeros flagellabant poenitentes. Mora vix fuit minor, quam dimidiæ horæ. Adveniente Principe, ictuum grandine in humeros jam laceros denuo

denuo favitum. Ita ex ecclesia processum est. Pia institutio, si publicæ pœnitentiæ animo ex sincero dolore, & non ad spectaculum fieret.

AN. 1685.
APRIL.

XXIII. Postridie Paschæ Taurino discessimus in cimba usque Casalium, firmissimum Montisferrati præsidium. Montes ad dexteram Padi fluminis ripam, florēscētibz arboribus onusti, gratum præbebant, ut in Vere aspectum. Sed remisit hæc voluptas accedendo Casalium: cujus urbis portas sub noctem occlusas cum offendissemus, in navicula militari cum excubiis exterioribus noctem egimus incænati. Sic nobis nauticum hospitium cubile fuit; fames & tabaci fœtor pro cœna, pro somno musica militaris. Proximo die mane in cathedrali sancti Evasii episcopi & martyris ecclesia Missam celebravimus, ubi antiquissima Christi Domini crucifixi imago ex argento cum quatuor clavis & oblongo semicinctio visitur. Sed cum nihil aliud ibidem nos remoraretur, ipsâ die Vercellas adivimus.

XXV. Vercellis, quæ urbs ad Seriam fluvium sita est, insigniores sunt ecclesiæ, episcopalis sancti Eusebii, primitus Theonesti; sancti Andreæ canonicorum regularium congregationis Lateranensis; & beatæ Mariæ Majoris, cujus pavementum ex opere musivo historiam Judithæ & Holophernis repræsentat. Ap̄sis ecclesiæ cathedralis nova est, sed antiquissima navis cum duobus hinc inde marmorearum columnarum ordinibus, quæ in summa omnes sunt quadraginta. Ingressis ad lævam se se offert vetus baptisterium ex marmore, duo habens altrinsecus sedilia, an pro episcopo & patrino. In sacratio ejusdem ecclesiæ asservatur veterrimus codex membranceus, Evangelia sancti Matthæi & sancti Marci continens: quî a sancto Eusebio episcopo & martyre illo generosissimo, quem tantopere vexarunt Arriani, scriptus, atque huic ecclesiæ concessus creditur. Certe membrana situ fere corrupta est, characteres pæne fugientes ac semideleti, tantisper à Romana scriptura degenerant. Littera A ad modum græcæ Α, M littera superne clausa a semicirculo incipit: aliæ litteræ Romanis fere similes. Codicis operculum ex argento, a Berengario Imperatore ab annis fere octingentis instauratum, ex una parte Salvatoris effigiem; ex alia sanctum Eusebium exhibet: ad cujus caput hi versus adscripti leguntur.

*Præsul hic Eusebius scripsit, solvitque vetustas:
Rex Berengarius sed reparavit idem.*

AN. 1685.
APRILI.

In infima verò parte ad pedes Eusebii :

*Argentum postquam fulvo decompsit & auro ,
Ecclesiæ Prasul obtulit ipse sue.*

Ambros.
ep. 25. ad
Vercell.

Carolus Bartholomæus Theobaldus Canonicus una cum ejusdem ecclesiæ Capellano sacrarium nobis commonstrari curavit ; atque aliquot libellos dedit. Archivum ecclesiæ cathedralis lustrare magnopere avebamus , tum propter Agronis episcopi opera , quæ a nostro Acherio ex imperfecto codice vulgata sunt ; tum propter alia , si qua restarent , vetera monumenta : sed nihil impetrare potuimus. Ceterum in illa ecclesia (neque enim id nobis præterire licet) *primus in Occidentis partibus diversa inter se Eusebius sanctæ memoriæ (uti Ambrosius loquitur) conjunxit : ut in civitate positus instituta monachorum teneret , & ecclesiam regeret jejunii sobrietate.* Unde idem Ambrosius infert. *Quod si in aliis ecclesiis tanta suppetit ordinandi sacerdotis consideratio : quanta cura expetitur in Vercellensi ecclesia ? ubi duo pariter exigi videntur ab episcopo , monasterii continentia , & disciplina ecclesiæ.* Sed iter persequamur.

Eodem die , post meridiem Novariam tendimus , cujus loci episcopus fuit Benedictus Odescalcus , qui nunc Ecclesiæ universæ sanctissime præest : succëssoremque habuit germanus : suum Julium Mariam Odescalcum ex nostro Ordine , virum pientissimum , cujus vita & mors cælitum albo dignæ sunt. Ecclesia Novariensis primaria in honorem beatissimæ Virginis dedicata , separatim habet insigne baptisterium sancti Johannis Baptistæ , uti Romæ , Florentiæ , Pisis , Parmæ , Patavii , aliisque in locis nonnullis : ubi , præterquam Romæ , in solis ecclesiæ cathedralis baptisteriis infantes sacris aquis intingui solent. Sane olim Baptisma nonnisi ex mandato Episcopi celebratum , teste Ignatio in epistola ad Smyrnenſes. Unde in ecclesia solum , qua Episcopus sedebat , erat baptisterium. Attamen Romæ primitus in omnibus fere basilicis baptisterium erat , ut ad sanctum Petrum , ad sanctum Paulum , ad sanctum Laurentium in Damaso , ad sanctam Agnetem , ad sanctum Pancratium , & in aliis passim celebrioribus urbis ecclesiis. Novariæ in exteriori parte vasis rotundi , quod sacras aquas continet , exstat profana Umbrenæ Pollæ memoria , quam refert Carolus ejus loci episcopus , historiæ Novariensis diligens scriptor. Alia est insignis sancti Gaudentii collegiata ecclesia , ejus tumulo illustis , eodem sita in loco , ubi is sanctus Episcopus eam

inchoavit, perfecitque Agapius ejus successor.

AN. 1685.
APRIL.

MEDIOLANUM.

XXVI. Mediolanum non ita cursim prætereundum fuit, non tam propter urbis frequentiam & magnitudinem, quam propter templa & res sacras ex ritus Ambrosiani præscripto, & propter veterum librorum copiam, quos urbs illa abunde suppeditat. Quindecim dies vix nobis ad hæc suffecerunt. Incœpinus a bibliotheca Ambrosiana, quæ omnes Italicas longe superat, si Vaticanam excipias, sive ædificii elegantiam, sive librorum multitudinem, aliaque ornamenta spectes; sive facilem accessum. Nam singulis diebus mane & vespere quibusvis patet. Hanc probante Clemente VIII. à fundamentis erexit Federicus Borromæus, sancti Caroli ex fratre nepos, eamque elegantissimis ædificiis, libris omnigenis, picturis, tabellis, signis seu statuis instruxit, legibus communivit: eidemque nobile collegium sexdecim Doctorum, qui litteras & pietatem colerent, adjunxit. Nec eum spes fefellit. Nam ex illo collegio jam prodierunt multi viri doctissimi, Josephus Ripamontius, Franciscus Bernardinus Ferrarius, Franciscus Collius, Josephus Vicecomes, Petrus Puricellus, omnes libris editis clari; & Petrus Paulus Boscha, qui de hac bibliotheca libros V. scripsit. Alios recentiores mittimus. Hoc monumentum in gentis Borromææ perenne decus erigere videbatur Federicus: sed alio mentem vertit innata illi genti HUMILITAS, in antiquis ædificiis ubique impressa: quæ id effecit, ut totum istius institutionis honorem ad Ambrosium Mediolanensis civitatis patronum referret, atque ab ejus nomine Ambrosianam Bibliothecam, Ambrosianumque Collegium appellaret: quem titulum fronti bibliothecæ imprimendum curavit. Sita est in urbis fere meditullio, prope ecclesiam sancti Sepulcri. Post vestibulum se se offert vas amplissimum, in latum cubitos sexdecim, in longum quadraginta, in altum quinos videnos habens: quod in laquear pictura variegatum desinit, ad duodequadraginta millia voluminibus refertum, simul computatis codicibus manu-scriptis, qui in adjuncto museo reconditi sunt, interjecto peristyllo. In hoc museo cernuntur clarorum virorum selectæ imagines. Succedit hortulus, & post hortulum aula statuarum artis a dextris; & exquisitarum picturarum altera a sinistris: quæ exercitationis materiam utriusque artis professoribus, sin-

AN. 1685.
APRILI.

gulis septimanis præbent. Ad hanc bibliothecam locupletandam nullis pepercit sumtibus Federicus: sed missis quaquaversum viris litteratis, libros & veteres codices undequaque conquisivit, nempe ex Italia per diversos, ex Græcia & toto Oriente per Gratium civem Senensem; ex Gallia, Germania & Belgio per Olgiatum. Omnes certatim Federici generosis consiliis obsecundabant. Bobienses nostri vetustiores codices latinos suppeditarunt; Ambrosiani Cistercienses pretiosissimum inter alia volumen ex charta Ægyptiaca seu papyrus, sed mutilum, continens aliquot libros Flavii Josephi de antiquitatibus Judaicis, Rufino interprete. Scriptus est codex, si Boschæ credimus, ab annis mille trecentis; si quid in his sapimus, ante annos mille & centum, haud multo post Rufini ætatem. Scriptura codicis non quadrata, sed minutior est, qualis ævo Justiniani obtinebat, formæ fere similis ei, quam ex charta Ravennensi retulimus in lib. V. de re Diplomatica, sed lectu facilior. Codex in parvo folio nullas habet membranas insertas: in principio & in fine mutilus, ab imperito novo compactore male habitus est, confuso ordine librorum. Primo enim occurrat fragmentum ex libro VII. Josephi de antiquitatibus Judaicis; deinde quædam ex libro VIII. tum ex libro VI. rursus ex VII. denique ex IX. & X. Liber septimus; ut titulus præfert, *continet tempus annorum quadraginta: octavus tempus annorum centum sexaginta trium: decimus tempus annorum centum octoginta duorum, mensium sex, dierum decem.* Quod quam ob rem observemus, norunt eruditi, quibus compertum est hos numeros in antiquis codicibus & in editis variare. Hæc de codice venerandæ antiquitatis notare visum est: quem utique cum edita Rufini versione libenter contulissimus, si eam Mediolani recuperare nobis licuisset.

Existat in eadem bibliotheca aliud opus ingentis molis & pretii, sed recentioris ætatis, italico idiomate, continens in voluminibus duodecim autographum Leonardi Vincii, civis Mediolanensis ac pictoris excellentissimi; quem tanti fecit Franciscus primus rex Galliarum, ut brachiis morientem amplexus sit. Operis pretium illud arguit, quod Jacobus I. Angliæ rex unum ex his voluminibus, quod bellicas machinas veterum complectitur, ingenti pretio a Galeatio Archonato operis possessore redimere voluit: sed hic generose id detrectavit, maluitque illum codicem cum aliis ejusdem auctoris voluminibus bibliothecæ

Ambrosianæ consignare, præferentem aureis litteris titulum operis, ac nomen Pompeii Leonii, qui dispersas ac dissipatas Vincianæ manus paginas eo volumine concluderat, uti sequens inscriptio docet, majoribus litteris in pariete expressa.

AN. 1685.
APRIL.

LEONARDO. VINCI

MANU. ET. INGENIO. CELEBERRIMI
LUCUBRATIONUM. VOLUMINA. XII.

HABES. O. CIVIS

GALEAZ. ARCHONATUS

INTER. OPTIMATES. TUOS

BONARUM. ARTIUM. CULTOR. OPTIMUS
REPUDIATIS. REGIO. ANIMO.

QUOS. ANGLIÆ REX. PRO UNO OFFEREBAT
AUREIS. TER. MILLE. HISPANICIS

NE. TIBI. TANTI. VIRI. DEESSET. ORNAMENTUM
BIBLIOTHECÆ. AMBROSIANÆ. CONSECRAVIT

NE. TANTI. LARGITORIS. DEESSET. MEMORIA
QUÊM. SANGUIS. QUEM. MORES

MAGNO. FEDERICO. FUNDATORI
ADSTRINGUNT

BIBLIOTHECÆ. CONSERVATORES
POSUERE

ANNO. M. DC. XXXVII.

Multi sunt alii codices reverendæ antiquitatis. Ex græcis *Gregorii Nazianzeni*, seu ut veteres scribunt, *Nazaneni* opera cum figuris, ante annos mille exarata: *Chrysostomi homiliae in Genesim: Acta Martyrum* bonæ notæ; *Menologium* antiquum ex Chio advectum. Ex latinis *Concilium Chalcedonense* mutilum, a mille annis scriptum in cœnobio Bobiensi: *Homiliaria duo* ex eodem loco, antiquissima: quorum unum, alicubi lacerum, homilias octoginta octo continebat, nomine sancti Severiani inscriptas. Has inter una est de natali seu ordinatione Grati episcopi, in qua hæc verba leguntur. *Grata vobis & votiva sollempnitas ad vestrum me conventum invitat... Læta dies & serena temperies, ornatior ecclesie facies, simulque beatissimi Papæ gratus aspectus. Quis enim tam ferus est, aut religioni ingratus, ut Gratum pontificem non requirat? in quem gratia nomen contulit, & meritum signanter expressit.* Notissimus est Gratus episcopus Carthaginiensis, qui Concilio Serdicensi interfuit: sed an de eo interpretanda sit hæc homilia, alii judicent. In alio codice exstat

AN. 1685.
APRILI.

Boniſonis Sutrini Episcopi liber de *Sacramentis* ad Galterium Leonensis monasterii abbatem: quo in libro auctor meminit alterius opusculi sui contra Ugonem schismaticum. Leve est, sed tamen haud reticendum, quod liber de ritibus ecclesiasticis, qui *Gemma animæ* inscribitur, auctore Honorio Augustodunensi, nomen *Honorii solitarii* præfert in Ambrosiano codice annorum quingentorum.

Unum addere juvat de vulgatis quinque Hegeſippi libris ex veterrimo codice, qui in eadem bibliotheca asservatur. Primus liber, initio mutilus, in fine hanc clausulam habet: EGESIPPI LIBER PRIMUS EXPLICIT. tum, INCIPIT SECUNDUS. *Ambrosius episcopus de Græco tranſtulit in Latinum.* Tres sequentes sine titulo: sed in multis foliis libri quinti is apponitur in capite paginarum, JOSEPPi LIBER QUINTUS. Fuerit ergo hic Hegeſippus (si non fallit codex antiquissimus, litteris partim Langobardicis, partim Romanis majusculis scriptus) alter ab Hegeſippo, qui temporibus Apostolorum floruit, qui ex Josepho forsan opus suum, maxime librum quintum compilarit, & quidem græce, si Ambrosius secundum e græco latine reddidit. Quidquid sit, auctorem aut compilatorem vixisse, non post Nicephorum Phocam Imperatorem, id est post sæculum decimum, ut Miræus & Vossius putant; sed ante iaculum septimum; ex Ambrosiani, itemque ex Taurinensis codicis antiquitate facile demonstrari potest. Recentiora sunt, sed tamen ob auctoris gravitatem non omittenda scripta quædam *Johannis-Petri Puricelli, Historia Berengarii hæretici: Sententia Ruperti Abbatis de Eucharistia exposita & vindicata: de Ambrosianæ basilicæ Decumanis*, & alia ejusdem auctoris, quæ inferius pro nata occasione commemoranda erunt.

Hæc de bibliotheca Ambrosiana, cujus primus præfectus fuit Antonius Olgiatus; secundus Franciscus Bernardinus Ferrarius; tertius Petrus Paulus Boscha, nunc archipresbyter apud * Modoëtiæ; quartus Nicolaus Rubinus; quintus modo Andreas Pusterla, vir humanissimus & doctus, uti & duo ejus collegæ nobis amicissimi.

XXVIII. Convenimus in museum illustrissimi Francisci Septalæ, ecclesiæ sancti Nazarii canonici, plurimis rebus curiosis refertum, atque a Manfredo Septala ejus patruo instructum. Inter alia visitur speculum quod ignem concipit ex solæ radiorum solis, non refractione, sed reflexione. Ibi indicena.

* Monza.

reliquiarum, quæ Romæ tempore Gregorii M. exstabant, in charta Ægyptiaca exaratum legimus, & descripsimus. De hoc museo liber singularis Dertonæ vulgatus est.

AN. 1685.
APRILI.

XXIX. Dominica in Albis, sollemni Missæ Ambrosiano more cum musica & organis celebratæ interfuimus in ecclesia majori (Domum vocant) in honorem Virginis Deiparæ & sanctæ Teclæ dedicata, quæ tota ex marmore, gothico opere, a Johanne Galeatio Duce constructa est, nulli post Vaticanam & forte Florentinam magnitudine inferior. Ex innumeris intus atque extus statuis, quas ad quatuor millia numerant, alias omnes antecellit statua sancti Bartholomæi, cutem detractam gestantis. In Missa post hymnum angelicum dictum est *Kyrie eleison* ter, lectio duplex pro epistola; concio post Evangelium per unum Olivetanum; Oblatio panis & vini facta per duos seniores seu Vetulones, totidemque Vetulonissas, qui ex canone ecclesiæ pie & caste vivunt; Symbolum post oblationem; lotio manuum proxime ante consecrationem: cetera fere more nostro. Altera concio, quæ *Lectio* dicitur, ad Vesperas singulis diebus Dominicis & festis itidem fieri solet, in qua aliquis Scripturæ locus exponitur secundum triplicem sensum.

A meridie illustrissimus Comes Mezabarba, cujus honesta in nos officia, quamdiu Mediolani versati sumus, assidua fuere, ambos in sua rheda deduxit in basilicam. Ambrosianam ad portam Vercellensem, quæ basilica sancti Ambrosii Majoris appellatur. Ambrosianam vocant, non solum Augustinus & Paulinus, sed etiam ex recepto jam usu Ambrosius ipse, qui eam in honorem sancti Laurentii condidit, eodemque corpora sanctorum Gervasii & Protasii transtulit ex basilica Faustæ, quæ postea vocabulo sanctorum Vitalis & Agricolæ insignita est. Ambrosianam olim monachi nostri possidebant: nunc vero canonici, & monachi Cistercienses divina vicissim in ea officia peragunt. Conventus pridie ab illustrissimo Comite archivista Cisterciensium, penes quos veterum ejus loci instrumentorum potestas est, operam suam pollicitus erat: sed re ad suos delata, cum id eis non placere intellexisset, domo se subduxerat. Comes factum indigne tulit: sed hoc in reditu resarcivimus. Interim ecclesiam lustramus, vota nostra Deo facturi ad tumulum sancti Ambrosii, cujus corpus in crypta subterranea sub altari majori latere creditur. Ibidem sepulta est ejus soror Marcellina virgo

AN. 1685.
APRIL.
Grut. pag.
M LV n. 6.

in tumulo prominente, cujus vetus epitaphium à Grutero est relatum. nam id quod nunc gypseo sepulcro appositum legitur, recentius est. Altare majus auro decoratum ab Angilberto Archiepiscopo; ciborium (tribunam vocant) a Gaudentio abbate ab annis fere nongentis ornatum est, a Puricello æri incisum in Historia basilicæ Ambrosianæ. In parte anteriori Christus Dominus Petro ad sinistram claves, Paulo ad dextram librum tradit: posterior sanctum Benedictum in Diaconi (ut videtur) habitu cum Gaudentio in dextra tribunam offerente; & altero monacho in sinistra, utroque cucullato: ad lavam sanctus Ambrosius cum tiara in capite, medius inter duos homines coronatos: ad dexteram sancta Scholastica, super cujus caput columba insidet, cum duabus hinc inde sanctimonialibus. Scio hæc aliter a Puricello explicari: sed hæc sunt nostræ conjecturæ, quas aliorum judicio permittimus. In basilicæ navi super columnam erectus est serpens ex ære, quem Moïsis esse ferunt, quod alii rident. Sed illud magis ridendum ac improbandum, quod ad hunc serpentem Mediolanenses matronæ, teste Ughello, feria secunda Paschæ solent infantes suos sistere morbo laborantes. In horto monasterii Ambrosiani exstat sacellum sub titulo sancti Remigii, eo (ut credunt) in loco, ubi Augustinus hoc oraculum audivit, *Tolle & lege*. Ad australem basilicæ partem haud longe ab eadem ecclesia aliud exstat sacellum, in quo Augustinum a sancto Ambrosio baptismum accepisse tradunt.

In Capitolio (ut vocant) id est in veteri Capitulo monachorum, cujus exigua tantum pars superest, tumulatus est Bernardus Italiæ Rex, Pippini filius, cum epitaphio, quod alii retulerunt. Ibidem etiam legitur metricum Petri abbatis epitaphium, qui obiit anno Inc. DCCC. prid. Id. Octob. Ind. III. post regiminis annos XLI. Ad dextram portæ aquilonaris, qua sæculares basilicam adeunt, visitur M. Antonii Majoragii sepulcrum & epitaphium, hominis suo tempore latinis græcisque litteris perpoliti, quas etiam publice docuit. Jacet in vestibulo ejusdem basilicæ bonus ille senex Petrarchæ amicus, quem cum triduo ante mortem solito tristior convenisset; causamque rogatus: Hodie, inquit, quintum atque octogesimum ætatis expleo. Quantulum putas vitæ superest? Quinque forsan & viginti annos ad vivendum habeo. Breve tempus! Ad hæc subridens Petrarcha: Ne dubita, inquit, triginta complebis.

His

Petrarch. lib.
II. ep. 12.

His lætior senex ; Bene habet , inquit , satis est.

AN. 1685.
APRIL.

Prope hanc sancti Ambrosii basilicam insigne & amplissimum est Olivetanorum cœnobium sub titulo sancti Victoris , tria peristylia , totidemque monachorum ædificia habens , elegantia non vulgaris , sicut Ambrosianum. Sancti Victoris basilica , ævo Ambrosii extramurana , a conditore *Portiana* vocabatur : quam sibi Arriani , Auxentio incentore , & Justina duce , vindicare tanto molimine conati sunt.

Duæ sunt in eadem urbe nostri Ordinis abbatia , sancti Simpliciani , & sancti Petri de Glaciate : cujus historiam composuit Placidus Puccinellus decanus Casinensis , antiquitatis studiosus indagator. Mirum quantum eo in loco vigeat devotio in sanctum Maurum abbatem , uti Parmæ & Florentiæ. De hac pietate in sanctum Maurum , quæ in ecclesia Glaciatensis monasterii celebratur , libellum edidit idem Puccinellus , quem mox laudato Julio Mariæ Odescalco , tunc Priori Parmensi , nuncupavit : ubi eum non tantum ob generis claritatem , sed maxime ob morum probitatem laudat. In ipso monasterio Glaciatensi Ambrosius Cruceus abbas humanissimus nobis ostendit præclarissimum volumen , Virgilii opera omnia continens , scriptum elegantissime ante annos ducentos jussu & impensis cujusdam e gente Rospiliosorum , cujus gentilitium symbolum in acathe nativis coloribus feliciter insculptum est. In ecclesia jus sepulturæ habet gens Borromæorum.

I. Ad sanctum Ambrosium sacra fecimus : & post meridiem ostensum est nobis archivum ecclesiæ metropolitanæ , quod est penes illustrissimum ac reverendissimum Antonium Reynam Cancellarium , ejusque collegam Andreæ Raudium ejusdem ecclesiæ canonicos. In eo multi codices reperiuntur ritus Ambrosiani , Missales , libri Psalmorum , & alii ejusdem generis : quales etiam in bibliotheca Ambrosiana nonnulli asservantur.

M A I O.

II. FERIA IV. sancto Athanasio sacra , Missam ad corpus sancti Caroli celebravimus , in crypta subterranea , quæ jacet sub gradibus , quibus ad presbyterium majoris altaris ascenditur. Ex superiore navis parte prospectus in subjectum sancti Caroli sacellum per cratem ferream patet. Theca altari imposita , in qua sacrum ejus corpus reconditum est , constat ex auro & argento , atque perlucidissima crysallo : sacelli parietes argenteis laminis vestiti. Corporis facies aperta media cry-

AN. 1685.
M A I O.

stallo videtur: cutis desiccata ossibus inhærens, nasi acumen exesum, dentes integri.

III. Festo die Inventionis sanctæ Crucis, clavus (ut creditur) unus ex iis, quibus Christus cruci suffixus fuit, sollemni pompa de more ex ecclesia metropolitana per urbem delatus est ab eminentissimo Cardinale & archiepiscopo Vicecomite, præcedentibus pænitentium sodalitiis supra triginta diversis, religiosis, monachis & canonicis, id est universo clero civitatis, promiscua vulgi multitudine infinita comitante.

Ipsa die adivimus collegium Patrum Soc. Jesu, eo in loco institutum, ubi olim versabantur Humiliati: cujus Ordinis historia (ut id in transcurso moneamus) exstat manu descripta in bibliotheca Ambrosiana, auctore Puricello. Collegio magifico necdum manus suprema imposita est. R. P. Monelia, qui ante biduum nos inviserat cum P. Cardano, litteras nobis dedit ad Patres Aronenses: ut nobis copiam facerent exemplaris librorum de Imitatione Christi, qui sub nomine Johannis Gersenis abbatis antiqua manu scripti sunt.

VI. Dominica frequentes per urbem supplicationes factæ, tam virorum, quam mulierum, discreto sexu ad septem urbis stationes, qui omnes alta voce rosarium, psalmos atque hymnos recitabant. Hæ supplicationes ex instituto sancti Caroli singulis Dominicis fiunt; sed frequentiores prima cujusque mensis Dominica. Septem illæ stationes sunt in ecclesiis metropolitana, sancti Ambrosii, sancti Simpliciani, sancti Victoris, sancti Nazarii, sancti Laurentii, & sancti Stephani. Eodem die vidimus pretiosa cimelia musei illustrissimi Comitis Mezabarbæ, qui nobis librum suum de Numismatibus liberaliter dedit. Inter infimi æris numismata unum est Zachariæ Papæ quadratum, ex una parte nomen ZACHARIÆ, ex altera PAPÆ titulum exhibens. Alterum item Caroli VIII. de Pisanorum liberatione: cujus ex una parte symbolum gallicum trium liliorum cum hac inscriptione, CAROLUS REX PISANORUM LIBERTAS: ex alia imago beatissimæ Virginis cum his verbis in circuitu, PROTEGE VIRGO PISANOS.

VIII. Hieronymum Josephum Semenzium, virum doctum & probum ex Ordine Somascorum, qui nos pridie convenerat, salutavimus, virum inquam litteris cum latinis, tum græcis expolitum, in mathesi versatum, Theologiæ in Universitate Ticinensi lectorem.

Post meridiem Mezabarba (sic virum illustrissimum appellare liceat compendii causa) nos deduxit ad Cisterciensium monasterium , quod *Caravallis* dicitur , quarto milliari ab urbe disparatum extra portam Romanam. Mendose passim vocatur *Claravallis* ; quod mendum irrepsit in Bernardi epistolas , quarum una est *ad Novitios Clarevallenses de Mediolano*. At legendum esse *Caravallenses* , argumento sunt primaria quæque loci instrumenta , itemque inscriptio vetus claustrî parieti insculpta in hunc modum: *Anno gratiæ M. C. XXXV. XI. Kal. Febr. constructum est hoc monasterium à beato Bernardo Clarevallensi. M. CC. XXI. consecrata ecclesia ista a domino Henrico Mediolanensi archiepiscopo VI. Non. Maii in honore sanctæ Mariæ CARAVALLIS*. Ecclesiæ subsellia , miro artificio sculpta , totam sancti Bernardi vitam repræsentant. In cœmeterio monachorum quidam sunt nobilium tumuli super quatuor lapides erecti , atque in his unus erat Guillelmæ seu Guillelminæ Boëmæ , impudentissimæ præstigiatrix : quæ cum ante annos quadringentos specie sanctitatis toto vitæ suæ tempore multos ludificasset , atque post obitum , qui anno M. CC. LXXXI. contigit , ut sancta per aliquot annos apud vulgus habitâ fuisset ; tandem compertis ipsius præstigiis , cadaver exhumatum , atque in favillas redactum est anno M. CCC. Tumulus disiectus , sed vacuus adhuc arcus in pariete cœmeterii , quem in locum post sex a morte menses hæc translata fuerat ex primo loco suæ sepulturæ , nempe ex cœmeterio sancti Petri ad Hortum intra civitatem. De hac Guillelmina ejusque secta & affectis Johannes Petrus Puricellus , vir doctus & accuratus , longam dissertationem scripsit : contenditque contra Donatum Bossium atque ejus sequaces , Guillelminæ sectam non fuisse spurcitiis , uti Donatus ante omnes vulgavit , infamem : sed impiis deliramentis , quæ mentem tantum , non etiam corpus afficerent , ac inficerent : idque probat Puricellus ex publico instrumento , quod Inquisitores anno M. CCC. confecerunt , rei gestæ summam continente. Ex hoc instrumento patet , Guillelminam , aut certe ejus affectas primarios , (nam id ipsa ex ficta modestia pernegare visa est) Andreæ Saramitam & Mayfredam Pirovanam , deprædicasse , Quod ipsa Guillelma esset Spiritus sanctus in sexu femineo incarnatus e Constantia Boëmæ Regis uxore : Quod ipsa esset mortua tantum secundum carnem , sed resurrectura ante universalem resurrectionem , & discipula

AN. 1685.
M A I O.

videntibus ascensura in cælum : Quod sibi reliquisset in terris vicariam Mayfredam Ordinis Humiliatorum monacham, quæ Missam celebratura esset ad tumulum Guillelminæ ; & demum Romæ occupatura Sedem apostolicam, indeque ejectione Cardinales ; habitura etiam quatuor sapientes, qui Evangelia nova scriberent. Hæc nefanda & auditu execranda scelera prolixo commentario exponit Puricellus : cujus cum liber non sit editus, nec fortasse edendus, visum est hac digressionem ejus notitiam prælibare. Porro Guillelminæ tria festa ad ipsius tumulum celebrabant quotannis ejusdem sectarii : unum in festo sancti Bartholomæi, quo die ipsa obierat : alterum in mense Octobri, cum ejus corpus Caramvallem translatum est : tertium in die Pentecostes. sed tandem nefandæ huic superstitioni post annos à Guillelmæ obitu novemdecim finis impositus est. Non multum dissimilia de Spiritu-sancto quidam Dulcinius Vercellensis jactitasse memoratur in continuatione Chronici Nangiani ad annum M. CCC VI.

I X. Ex Caravalle Mediolanum reversi, ad Lazaretum, portæ urbis orientali suburbanum, cum humanissimo abbate Serta nos contulimus. Locus est amplissimus quadrati operis pro peste affectis, aquis irriguus, habens domunculas numero CCC LXVIII cum suo quamque camino ; atque more Cartusienfi claustrum, quo cingitur pratum ingens cum sacello medio, in quod prospectus est ex omnibus cellis, ut facile sacerdos ad altare ab omnibus videri possit. Aliud in urbe xenodochium, in quadri formam itidem constructum, cum duplici porticu, superiori & inferiori, quam sustinent elegantissimæ columnæ : ut potius amplissimi palatii, quam xenodochii speciem præferat. Non longe ab hoc xenodochio abest collegiata sancti Nazarii, quæ & Apostolorum vocatur, perantiqua basilica, cujus pavementum Serena, Stiliconis Comitissæ uxor, libycis marmoribus stravit, ut vetus inscriptio docet. In atrio ecclesiæ sublimes visuntur loculi Trivultiorum, quorum corpora in subjectam humum sanctus Carolus religionis causa infodi jussit : ratus hunc modum, nempe ut in sublimi consistant, solis beatorum reliquiis competere. Quamquam in Italia sublimibus viris id non raro tribui solet. De Johanne Jacobo Trivultio, Franciæ quondam Marefcallo, in illo atrio legitur : *Qui numquam quievit, quiescit : tace.*

X. Aronam partim navigio, scilicet per canalem Navilium

a Francis productum: partim pedestri itinere contendimus: quam urbem a Sexto opido dirimit Verbanus lacus, quem recentiores Majorem appellant. E regione Aronæ, quæ in declivi montis sita est, intermedio lacu visuntur Borromæorum ædes, quas describit Bartholomæus Scala in libello de Vitaliano Borromæo. Is Aronam ex parvo quondam vico ad eam, quæ nunc est, ædificiorum magnitudinem perduxit. Aronæ olim conditum est monasterium nostri Ordinis sub titulo sanctorum Gratiniani & Felini, quod sanctus Carolus, tum loci abbas, Patribus Soc. Jesu attribuit. Ex eo tempore istic asservatur celebris ille codex Aronensis, eo delatus a Patre Rossignolio, cum societati nomen daturus esset, id est anno M D LXXIX. Cum Aronam venissemus, Patres recreationis causa domo aberant, excepto Rectore, qui tum Mediolanum abiturus erat, nihilque se de illo codice rescire significavit. Reverfis Patribus, idem asseruit alius Pater, ad quem litteras ex Monelia habebamus, qui nobis hospitium in proximam noctem humaniter obtulit. Verum dum re infecta egressi ad portum cimbam opperimur, accurrunt duo Patres, Gibellinus & Leoninus, qui repertum codicem afferunt, obtestanturque ut apud se nocte proxima subsisteremus: majorem fore commoditatem propius inspiciendi codicis. Non poterat honestior offerri conditio, nec honestiori modo. Eam tamen in aliud tempus differre consultius nobis visum est, contentis in ipso articulo codicem inspicere, de cujus titulo & antiquitate tantummodo controversia esse potest. In eo vero omnia deprehendimus, quæ de ejus antiquitate & inscriptione, quinquies sub nomine *Johannis Gersen abbatis* repetita, nostri observaverant. In reditu Mediolanum ejus copia nobis ex mandato R. P. Provincialis facta est, ejus Secretario & R. Patre Monelia faventibus.

XIII. Mediolano discessimus, muniti litteris commendatiis, quas non solum Comes Mezabarba, sed etiam eminentissimus Cardinalis Casanata, atque illustrissimus Magliabecus, audito nostro in Italiam itinere, ad suos amicos scripserant. Canonica opidum, ad fluvium Adam, in prandium occurrit, ad vesperum Bergomum civitas, in edito colle sita ad Alpes, quæ Rætiam ab Italia determinant. Ibi R. P. Benvenutum, Augustinianorum vices gerentem, convenimus, Magliabeci amicum, qui nos multa comitate ad hospitandum apud se invitavit. Vidimus Ambrosii Calepini, qui ibi religiosus fuit, auto-

AN. 1685.
MAIO.

graphum, & alia nonnulla, quantum temporis angustia tulit. Quippe nox imminens, & hospitii situs extra urbem, nos pridie summo mane discessuros diutius illic morari non sinebant.

BRIXIA, VERONA, VICENTIA,

XIV. Brixia itidem ad Alpes, sed in solo æquabili sita, nobis hospitium præbuit. Conventus a nobis illustrissimus Julius Antonius Averoldus cum litteris Mezabarbæ, vir in litteris humanioribus & in numismatum scientia maxime versatus: is, qua humanitate est, nos ad eos omnes deduxit, penes quos aliquid litterarum esse noverat. Per hunc vidimus bibliothecam illustrissimi episcopi Brixienfis, Hermetem Lontanam, nobilem Brixiensem ac litteratum; & Fortunatum Vinacesium, mercatorem quidem, sed qui multas linguas & libros callet. Ecclesia cathedralis beatissimæ Deiparæ antiquissima est, in terram depressa, cujus loco nova modo ædificatur. Duo in urbe Ordinis nostri cœnobia, alterum sanctæ Euphemie, alterum sanctorum Faustini & Jovitæ. Huc profecti sub vesperum, cum matutinos eo tempore (nam is fere in Italia recentior mos est) Patres recitarent, vocatus e choro Prior adesse non potuit, quod e divinis officiis quemquam exire Abbas non pateretur. Id longe magis probabile est, quam præpostera illa nocturni officii sub ipsius solis oculis recitatio. Nihil in monasterio repertum pro studiis nostris. Ad portam majorem ecclesiæ duæ sunt Romanæ inscriptiones, sed inversæ, litteris supine conversis ab architecto recentiore. Una est VALERIE VARIANÆ. Altera M. AVRELII PISONIS & VITALIÆ SILVIÆ. In urbis compitis fontes antenissimi e canalibus fluunt.

XV. Gardam lacum amplissimum, & Pischeriam opidum valde munitum, quod a Scaligeris Veronæ tunc Principibus conditum tradunt, prætergressi, Veronam accessimus. Suburbanum sancti Zenonis monasterium nostri Ordinis antiquum est, antiqua item ecclesia a Pippino Italiæ Rege, ut creditur, exstructa: qui Pippinus in adhærente sancti Proculi cœmeterio sepultus est in crypta, in quam tredecim gradibus fit descensus. Sub tuguriolo quatuor columnis innixo exstat tumulus cum operculo ex rudi lapide: aqua ex superioribus stillans in loculum, infirmis non raro propinatur. Adjunctum est aliud cujusdam magnatis sepulcrum ad soli æqualitatem, sed mar-

moreum. Portæ ecclesiæ sancti Zenonis ex ære cum figuris : fornix in apside ecclesiæ, alibi tabulatum. Sub majori altari est crypta subterranea, in qua corpus sancti Zenonis pone altare in lapide marmoreo conditum est. Ad portam ecclesiæ ingens conspicitur labrum porphyreticum, habens in orbem pedes viginti sex, quod ad sancti Zenonis tempora referunt. In archivo monasterii vidimus authenticum diploma Henrici I. Imperatoris cum plumbea bulla, *datum anno M. XIV, imperii ejus primo*. Nihil librorum superest in bibliotheca, quam sacrorum voluminum copia refertam Ambrosius Camaldulensis aliquando viderat. Monasterium olim Teutonicis concessum est ab Imperatoribus Germaniæ : nunc loca monachorum Venetis plerumque a sæculari abbate non sine præmio conceduntur. Monasterium aliud sancti Nazarii Casinensium est. Ecclesia cathedralis Deiparæ Virginis titulo insignita : cujus Canonici quatuor & viginti a ditione episcopi soluti, Patriarchæ Aquileiensi proxime subiecti sunt. Duplex in illa ecclesia est ordo subselliorum : unus apsidem coronat : alter continuus est usque ad cancellos ferreos, qui navim à choro dirimunt. Sacerdos sacra faciens conversam habet faciem ad populum, renes apsidei obversos. Olim in illa ecclesia celeberrima bibliotheca erat, id est *plurima volumina miræ vetustatis*, testante Ambrosio Camaldulensi : qui tamen nihil singulare in illis invenit. Et quidem antiquissimum Cypriani exemplar quondam ibidem asservabatur, cujus contenta Romæ apud Patres Oratorii vidimus : sed nullos in illa ecclesia libros modo superesse nobis assertum est. Postmodum istum codicem, majusculis litteris ante annos mille perscriptum, a canonicis Veronensibus Carolo Borromæo dono datum fuisse, ex Aldi Ortographia didicimus, verbo *cultita*.

In quodam codice Christinæ reginæ Suecorum statutum legitur Veronæ editum, quod hoc loco referri non ab re erit ad patriæ nostræ historiæ illustrationem. *In urbe Veronensi ab Urbano Papa tertio, de communi fratrum suorum consilio institutum fuit & sancitum, ut in hac ecclesia & universis totius regni Franciæ ecclesiis, XIII. Kal. Octob. vespere & mane pulsatis campanis, LUDOVICI, piæ recordationis quondam illustris Francorum regis, anniversarium annis singulis sollempniter & devote celebraretur. Actum anno ab Incarnatione Domini M C LXXXVI, regnante Philippo victorioso ejus filio, regni sui anno VIII.* Hæcenus vetus codex.

AN. 1685.
MARIO.

XVI. Litteras a Mezabarba detulimus ad illustrissimum Comitem Franciscum Moscardum, qui nobis locupletissimum suum museum ostendit, multis vetustis monumentis & inscriptionibus refertum, ut liber hac de re vulgatus partim docet. Quicquid ad profana veterum sacrificia pertinet, ibidem invenitur. Inter res sacras, unum est vas ex marmore albo, quod vetus baptisterium esse putant ad usum Græcorum; alii vas aquæ lustralis. Figuræ est orbicularis in angustius column desinens, quam ut pro baptizandis usui esse potuerit, & in summa etiam minus quam par esset. Habet altitudinis ternos pedes cum duobus pollicibus; in orbem, ubi major est capacitas, unicum pedem & pollices novem. Inscriptio græca, quæ usum ejus sacrum fuisse indicat, hujusmodi est: *Ἀντλήσαστε ὕδωρ μετὰ ὠφροσύνης, ὅτι φωνὴ κυρίου ἔστι ἐπὶ τῆς ὑδατῶν*. Id est, *Haurite aquam cum gaudio, quia vox Domini super aquas*. Descripsimus ex eodem museo vetustissimum omnium, quod quidem umquam viderimus, authenticum instrumentum, *consulatu Theodosii junioris & Albini*, id est anno cccc xliv confectum in gratiam Sisinnii, cui res a Tranquillo extortæ fuerant, sed per Pyrrhum tribunum jussu Imperatoris restitutæ. Optandum esset, ut tria hac de re Imperatoris communitoria, quæ in charta Ægyptiaca scripta sunt, integra essent. Ex variis ejusdem musei inscriptionibus duas tantum profereamus.

X. VALIIRIUS. SII. X. P.

SIBI. IIT. SIICUNDAII

•VALERIAII. M. P.

UXORI.

Hæc inscriptio confirmat Alciati observationem, qui veteres loco vocalis E duo II scribere solitos fuisse annotavit. Altera inscriptio mentionem facit de victis Cimbris a Gaio Mario.

D.

F.

G. M. TRUCIDATIS

CIMBRIS. IN. F. ITA. A. V.

R. R. OB. INSIGNEM. EJUS

MEMORIAM.

S.


P.

Q.

R.

Idem Moscardus nos in academiam musicorum (Philarmonicos appellant) deduxit, ubi multæ item veteres inscriptiones:

tum



tum in amphitheatrum, quod tempore Augusti a Veronensibus constructum est. Quadraginta quatuor in orbem subselliorum ordines continet, in quibus sex supra viginti hominum millia in arenam commodè prospicere poterant. Opus insigne ac fere integrum a Veronensibus magna diligentia servatum. Utinam Romanum, cui nullum in orbe par est, eodem studio curatum fuisset, non tam profanum, quam sacrum opus, Martyrum & Confessorum sudore elaboratum.

AN. 1685.
M A I O.

XVII. Adeundo Vicentiam per amœnum ejus agrum, nobis obvium in suburbio fuit sancti Felicis Ordinis nostri monasterium, cujus ecclesiam & regulares officinas in transcursu lustravimus. Omnia non multis abhinc annis instaurata, emundata, exornata, magnum ubique nitorem præferunt. In crypta subterranea corpora sanctorum Felicis & Fortunati intra arcam marmoream asservantur. Ad singulas ecclesiæ aras (qui ritus in omnibus Italiæ basilicis passim observatur) singulæ appensæ sunt lampades. In claustro nonnullæ veteres exstant inscriptiones. Nulla illic præter hæc vetera monumenta.

In urbe illustrissimus Comes Carolus Æmilius Gonzata, ad quem litteras ex Mezabarba habebamus, nullum humanitatis in nos officium prætermisit, & tantum non coëgit, ut apud se hospitaremur. Ab eo per urbem deducti, primum quidem in majorem beatissimæ Virginis ecclesiam, cujus chorus elegantissimus est, navis latissima sub fornice humiliori: deinde in palatium prætorianum; ubi decem magistratus jus dicunt. Prætorii aula amplissima diversa habet tribunalia, in quibus unum est Equi (sic vocant) pro mercatorum causis. Tribunal Potestatis omnibus superius. In porticu sinistra parieti insertus est lapis antiquus cum inscriptione in honorem Gordiani Cæsaris *ex liberalitate Matidiarum*, quæ inscriptio apud Gruterum legitur. Hunc lapidem prope forum frumentarium humo defossum X^{vi}ri reip. Vicentinæ eo in loco conspicuo poni curarunt anno M D LXXXVI. Dum in prætorio versaremur, nobis adjuncti multi viri nobiles, ad alia loca se se nobis comites præbuerunt, nempe ad vetus amphitheatrum, cujus unicus fornix superest ex lapidibus coctis; & ad novum, auctore Andrea Palladio Vicentino, nobili in primis architecto, qui prætoriani palatii, aliorumque duorum formam delineavit.

Grut. pag.
CCLXXII.

Non longe a Vicentia Theobaldus ex Comitibus Campa-

AN. 1685.
MAIO.

nix aliquando solitariam vitam duxit, in loco cui *Sallaniga* nomen indidit antiquitas: sepultus postea in monasterio Vicentiae proximo, *Vangadicia* dicto, quod olim nostri Ordinis, nunc Camaldulensium est. Hæc idcirco notamus, quod apud Vicentinos nulla Theobaldi supersit notitia, saltem apud viros doctos, quos de illo percontati sumus. quo minus mirandum est, antiquarum rerum notitias ex hominum memoria jam evanuisse. His antiquitatibus, quæ quidem ad Vicentiam pertinent, revocandis atque colligendis incumbit vir antiquitatis studiosissimus Johannes Martius Cerchiarus, a quo cum nonnulla petissemus, hoc responsum accepimus.

Voracissima temporis injuria Vicentina monumenta adeo attrita sunt, ut nunc prisca decoris perexigua supersit notitia. Irrita sane mortalium vota, quæ præclare gesta marmoris fastis consignant, quasi ruderum mole non tumulentur sepulcra, quasi fatorum atrocitate immunes non moriantur & lapides. Opere itaque pretium me facturum duxi, si in unum colligerem ea, quæ sparsim agris disjecta, suisque Manibus revulsa vagabantur: ut iterum hoc novo, licet insulso, opere, venerabunda patrie reflorescat antiquitas. Ad vos igitur, Patres religiosissimi, qui litterario bono præsidetis, inscriptionem a me quesitam transmitto. Credite etiam in marmore nunc pignus obsequii perennabit, & si Deus annuerit, ut patrie monumenta in unum opus congeram, meam erga vos observantiam facundius eloquentur.

Inscriptionem illam, de qua loquitur vir doctus, hoc loco prætermittimus, quod sit vulgata apud Gruterum.

PATAVIUM.

* *Fadonii*

XVIII. * Patavium, urbs magna, sed parum culta pro sitis amœnitate, academiam habet celeberrimam, cujus scholares, plerique exteri, magna licentia fruuntur. Episcopus loci eminentissimus Cardinalis Barbadicus, ad quem literas ex Cardinale Casanata habebamus, tunc extra urbem versabatur. In reditu magnam ejus in nos dignationem, quanta major esse nequit, experti sumus. Ecclesiæ cathedralis bibliothecam interim vidimus. Hanc Jacobus Zenus episcopus Patavinus compluribus codicibus, & manu conscriptis, & a primordio typographicae artis impressis, confertissimam sibi comparavit, apoplexia subito extinctus nulli reliquit intestatus. Petrus Folcarus Cardinalis ejus successor, eandem ob

tumultuosum funus distractam, direptamque, vigilantī sollicitudine conquisitam & redemptam, Patavinæ ecclesiæ Canonicis dono dedit anno M CCCC LXXXI. Johannes Baptista Verus canonicus locum ornavit paucis abhinc annis. In illa bibliotheca exstant *Sexti Frontini stratagematum* libri tres: item codex unus, varia continens *acta Caroli de Malatestis* in Concilio Pisano cum ejusdem Concilii historia: alius *Roberti VValturi* libros XII. de re militari *ad Sigismundum Pandulsum Malatestam, Ariminensem Regem ac Imperatorem*, egregie scriptos. Hi libri non semel excusi sunt: sed memoratu dignum est id quod in libro X. refertur de invento cujusdam machinæ bellicæ ad ignitarum * glandium similitudinem, quod inventum Sigismundo tribuit VValturius. Sed hæc bellica mittimus, ut aliquid breviter observemus de alio ejusdem bibliothecæ codice, nempe de historia a fratre Ptolomæo de Luca, Ordinis Prædicatorum, scripta ad Guillelmum de Baïona, tituli sanctæ Cæciliæ presbyterum cardinalem, qui auctor libri XVI. cap. VIII. hæc habet de Leone IV. cui Johannam Papissam nonnulli successisse fabulantur. *Omnes quos legi, præter Martinum, tradunt post Leonem IV fuisse Benedictum III. Martinus autem Polonus ponit Johannem Anglicum VIII.* Hinc patet, quod ab aliis jam probatum, Martinum Polonum, qui Nicolai III Pœnitentiarius, dein Gnesnensis in Polonia archiepiscopus, obiit anno M CC LXXVIII. primum esse hujusce fabulæ, si non auctorem, saltem narratorem. Certe in sinceris Mariani Scoti & Sigeberti exemplaribus de illa mentio nulla est. Ejus occasione in mentem venit alia fabula, cujus meminit Herchempertus, somnium videlicet Arechisi principis Beneventani, cui noctu a dæmone revelatum fuerit, Patriarcham, qui Constantinopoli nuper electus fuerat, feminam esse, sexum Constantinopoli masculinum sub clerici veste mentitam. Quocirca expergefatum Arechisum suos nuntios Constantinopolim misisse, per quos factum scribit auctor, ut tam turpi & pernicioso errore sublato, feminaque a patriarchali sede dejecta, pestis etiam, quam tanto sceleri expiando Deus in eam urbem im miserat, sedata sit. Huc fortasse spectavit Leo Papa IX in epistola ad Michaëlem Cerularium CP. episcopum, scribens, id fama constante ad se perlatum, multos eunuchos in eo patriarchatu sedisse, immo etiam unam feminam. quod postea Græci etiam in Romanos regesserint. De pseudopa-

AN. 1685.
M A I O,

* bombes

AN. 1685.
MAIO.

piſſa Johanna plura inferius.

XIX. Sabbato ſanctæ Juſtinæ inſigne Ordinis noſtri cœnobium vidimus, cui vix par alterum in tota Italia reperias. Inde inſtauratio religionis ante annos ferme trecentos per totam non ſolum Italiam, ſed Europam propagata. Eccleſia ampliffima, novi, ſed eximii operis, octo habet teſtudines ſeu rotundas turres. Interiora ſacellorum ornamenta nondum penitus abſoluta. In uno jacet corpus beati Arnaldi Abbatis; ſanctæ Juſtinæ in crypta ſubterranea. Arnaldi epitaphium, quod in veteri codice legimus, inter alia ſic canit.

Hic aderam Paſtor, me perfidus ille tyrannus

Miſit captivum fallax Ecelinus Aſylum,

Et longus carcer vita ſpoliavit ibidem.

Aſylum opidum eſt in pago Tarviſino. Aliud ejusdem Arnaldi epitaphium habet, Arnaldum ex vico *Limina*, qui ſeptem millibus paſſuum ab urbe diſtat, ortum fuiſſe. Bernardinus Scardeonius ejusdem obitum ad annum M C C L I I I I refert. In illo cœnobio triplex peristylium ſive clauſtrum, & triplex ſuper unumquodque ordo cellarum. Bibliothecæ codices antiqui ad ſexaginta, partim græci, partim latini. Ex græcis *Baſilii homilia in Pſalmos*, itemque aliæ homiliae *de Barlaamo martyre* & al' s. *Commentarius in Evangelium Johannis*, *Philoſtratus* &c. Ex latinis *Salvianus de providentia*, & codex librorum quatuor *de Imitatione*, ſcriptus anno M C C C C X X X V I. cujus codicis titulum veterem nonnemo vitiavit, & nomen *Gerson*, alias *Thomæ de Campis* appoſuit. Ludovici de Venetiis abbatis ſanctæ Juſtinæ epistoſas Mediolani vidimus in bibliotheca Ambroſiana.

Aliæ ſunt bibliothecæ Patavinæ, apud Canonicos regulares monaſterii ſancti Johannis in Viridario, apud Auguſtinianos, & Minoritas ad ſanctum Antonium, quem abſolute *Sanctum* appellant. Hujus eccleſia magnifice conſtructa & ornata eſt: ubi viſitur mauſoleum Octavii Ferrarii ex marmore albo exquiſito. In ſummo Famæ effigies: ſubtus Ferrarius dimidiato corpore; a dextris Pallas, a ſiniſtris Mercurius: ſub icone urna Ferrarii oſſa comprehendens cum hoc epitaphio.

OCTAVIO FERRARIO MEDIOLANENSI,

In quo ornando & extollendo magni Reges ac Principes certarunt. Veneta Reſp. præter alia decora menta bis mille

florenorum honorario auxit. LUDOVICUS MAGNUS Francorum Rex sponte annuorum quingentorum congiarium diu indulgit : Christina Augusta equestri insigni extulit. Ille Regum opes ac munera animo æquans , facundia , fide & consilio , invidiam aut vicit , aut gloria incitamentum habuit. Septem & quadraginta annos cum admiratione auditus est : quinto & septuagesimo obticuit , quamdiu litteris honor constabit , scriptis apud posteros locuturus.

JULIUS FERRARIUS P. M. M. P. ANNO

M. DC. LXXXIV.

Nullus hætenus tanti viri cathedram , quæ de politiori litteratura est , occupat , ut ejus desiderium & meritum inde au-geatur. Eandem academiam scriptis & doctrina sua illustrat eruditus e nostratibus Carolus Patinus , Equitis titulo a Rep. donatus : qui nobis pretiosa sua cimelia ostendit , librumque dono dedit ab se editum in inscriptionem græcam Smyrno al-latam , cujus prototypon vidimus. Non procul ab urbe , in villa Arqua tumulus est Francisci Petrarchæ , qui politiores litteras suo tempore , uti omnes norunt , excitavit. Ea de re sibi ipse gratulatur in epistola ad Johannem Olmutiensem epis-copum , qui cum inepto blanditiarum modo , ut hodie quoque nonnulli faciunt , Petrarcham plurali numero compellasset , respondet Petrarcha , se non mediocri stupore affectum , ob insolitum ejus stilum ; *modernorum blanditias & meras ineptias execrari* ; gloriari vero , quod *stilum illum patrum , hac in parte femineum & enervum* , unus ipse , seu primus per Italiam immu-tasse videatur.

Petrarch. lib.
12. ep. 14.

An vero prætermitemus Titum Livium , magnum illud Pa-tavii ornamentum ? cujus scripta præclara si tanta cautione , at-que ejus cineres servassent concives , hodie quoque omnes ejus decades integras haberemus. Sed antiquior est illa jactura , quam ut modo resarciri possit , quidquid nugivenduli nescio qui jactitent. Hanc quippe jacturam jam suo tempore deplo-rabat mox laudatus Petrarcha , qui ita Livium alloquitur. *Te in libris tuis video , non equidem totum , sed quatenus nondum sæculi nostri desidia periiisti. Centum quadraginta duos rerum hu-manarum libros edidisse te novimus : heu quanto studio , quantis*

idem lib.
ult. epist. 4.

AN. 1685.
MALO.

laboribus vix triginta ex omnibus supersunt. Ita Petrarcha: qui addit se tum Patavii, in vestibulo *Justine virginis*, ante ipsum Liviani *sepulcri lapidem* habitasse, VIII. Kal. Martias anno a Christi ortu MCCC L. Huic vitio vertit Mapheus Vegius in libro tertio de educatione puerorum, quod laureandorum poetarum merem invexit primus. Ad Livium ut redeat oratio, dimidia ejus statua erecta cernitur in majori civitatis aula pratoriana, qua vix ulla magis ampla reperiri potest. Habet quippe longitudinis pedes CC LVI. latitudinis absque pilis LXXXVI. cum tabulato affabre elaborato, & tecto ex laminis plumbeis. Ad hanc aulam quatuor scalis magnificis ascenditur.

XX. Dominica die itum ad monasterium beatæ Mariæ de Pratalea Ordinis nostri, situm in collibus Euganeis ad sextum milliare extra mœnia. Ibi ad triginta monachi: ecclesia elegans in aggere sita: dormitorii cellæ solo ecclesiæ æquatæ: triplex claustrum: bibliotheca nitidissima, libris antiquo ritu dispositis referta, atque picturis ornata est.

XXI. Patavio iter est Venetias viginti quinque millium secundum Brentam fluvium ejusque canale. Ex utraque ripa continua villæ & magnifica palatia nobilium Venetorum. Medio itinere apud Miram hæc inscriptio legitur in ædibus Contarenianis.

HENRICUS VALESIVS REX, CUM E POLONIÆ REGNO, QUOD EJUS SUMMÆ VIRTUTI MERITO FUERAT DELATUM, IN GALLIAM, CAROLO FRATRE IX REGE VITA FUNCTO, AD PATRIUM ET AVITUM IRET, HAC ITER FACIENS, ULTRO AD HAS ÆDES DIVERTIT, TOTA FERE ITALIA COMITANTE, ANNO SALUTIS M D LXXIV. VI. KAL. SEXTILES.

TANTÆ HUMANITATIS MEMOR FEDERICUS CONTARENUS * D. M. P. FUNDI DOMINUS M. P.

* D. Marci
Procurator.

VENETIÆ.

Fossinæ vicus est ad oram lacus, unde Venetias per quatuor aut quinque millia naviculis itur. Urbem hanc toto orbe celeberrimam & maxime singularem reddunt ejus situs, ædium

forma & elegantia, frequentia civium & advenarum, copia omnium rerum, libertas modusque vivendi, qualis nusquam locorum invenitur. Sita est in mediis aquis, quæ ad mariniæ astus accessum & recessum crescunt ac decrescunt, nec admit- tendis magnis navibus satis idoneæ, nec inutiles ad convehen- das merces. Illic in mediis aquis videas surgere innumeras ædes & permulta palatia, quorum elegantia & magnificentia cer- tant ex æquo. Hæc fundamentum habent in mobili & palu- doso solo, quod mille mæandris aqua ita interfecat, ut tota civitas per solidas vias adiri & circumiri; atque per liquidas seu canales itidem tota enavigari possit ope & subsidio scapha- rum rostratarum, *gondollas* vocant, quæ ad quatuordecim mil- lia ea in urbe huic officio inserviunt, ea celeritate & facilita- te, ut in locis, quantumvis angustis & intricatis, adversa- rum cymbarum occursum & concursu nequaquam impediuntur. Infiniti per urbem pontes, sed insignior qui super majorem canalem conditus est, a Rivo-alto vulgo *Realte* nuncupatus: cujus unicus ex marmore arcus ambas ripas conjungit, longus pedes c. xx. cum duplici ordine officinarum. In eam urbem nocte ac die facilis ingressus & ex ea egressus, nullis portis murorumve præsiidiis, nullis portoriorum exactoribus, nullis excubiis: & nihilo minus plena securitas, maxima item liber- tas, sed ad licentiam usque, modo ne quid contra Rempubl. Nulla, excepto habitu, distantia inter nobilem & plebeium: omnes absque famulorum satellitio publice procedunt.

Plurima templa præclara sunt in illa urbe, sed præ ceteris san- cti Marci. Ejus structura est græcanici operis ab anno M LXXI. non ita excelsa, quam magnifica & ornata. Constat quinque testudinibus dispositis in formam crucis, & plumbo tectis. Pa- rietes marmore exquisito intus & foris incrustati, portæ ex ære, quinque in facie primaria. His supereminet quatuor miræ venustatis equi ex ære cyprio deaurati, qui a Constantino Ro- ma (forte ex tumulo Hadriani Augusti) Constantinopolim, indeque Venetias per Remp. anno M CC VI. translati sunt. Supra hos equos Leonis deaurati effigies pro symbolo Reip. Ad principem portam exstant, præter alias multas, (ad quingen- tas numerant, tum porphyreticas, tum marmoreas) columnæ quatuor ex ophite seu lapide serpentino, quibus templum Sa- lomonis olim ornatum fuisse ferunt. Ante eandem portam, in- ter atrii ostia, lapidi magno rubeo quadrato infixæ est lamina,

AN. 1685.
M A I O.

* Fala

in qua Alexander tertius, qui apud Venetias asylum invenit, Frederici Ænobarbi collo pedem imposuisse dicitur, his litteris incisus, *Super aspidem & basiliscum ambulabis*. Pavimentum variis marmoris & pretiosorum lapidum segmentis tessellatum: fornix eodem modo picturis emblematisque distinctus est. In pavimento, quod a Joachimo abbate illo fatidico delineatum aiunt, varia symbola exprimuntur: in his duo galli gallinacei vulpem excutientes. quod de Carolo VIII & Ludovico XII Francorum regibus interpretantur, qui Ludovicum Sfortiam Ducatu Mediolanensi injuste occupato spoliarunt. Altare majus ornant tabula inferior seu antependium ex argento; tum * pallium (ut vocant) seu tabula superior, Sacerdotis oculis obiecta ex auro solido & gemmis pretiosissimis; atque ciborium, quod baldachinum appellant, innixum quatuor columnis ex vario marmore affabre sculptis. Pone majus altare adicula est, in qua reconditum asservatur sanctissimum Sacramentum, cum umbella super aram instar ciborii, quam quatuor columnæ ex alabastrite instar vitri pellucidæ sustinent. Ecclesia in gyrum habet pedes D C C C C L. in longum C C X X. Sacrarium multa continet exquisita & pretiosissima, supellectilem Constantini, ut ferunt, ex achate & crystallo; discum ex uno smaragdo, tres ex achate, unum ex topazio, coronas sex gemmis ornatas, ducalem aliam cum adamante immensi pretii; alterum item adamantem ex dono Henrici tertii Francorum regis. His omnibus longe præferendum esset Evangelium sancti Marci, si (ut ipsi asserunt) propria ejus manu esset exaratum. Alterum ostendunt librum Evangeliorum, quod sancto Johanni Chrysostomo tribuunt, sed ne de rei veritate periculum fiat, hi libri sigillis obsignati sunt, nec cuiquam aperiuntur. De corpore sancti Marci illuc translato testis est in Itinerario suo a nobis edito Bernardus monachus Francus ante annos octingentos. Alia est Patriarchalis ecclesia ad sanctum Petrum, beati Laurentii Justiniani tumulo & corpore insignis: hæc vero sancti Marci Ducalis & collegiata, cujus primam dignitatem obtinet Primicerius, pontificiis insignibus gaudens. Baptisterium ex ære pulcre elaboratum in sacello ad portam, qua aditus est in contiguum palatium Ducis. Ante ecclesiam magna platea cernitur, elegantissimis ædibus circumdata: ante palatium alia non minor, ubi nobiles de rebus maximis discurrendo loqui, & deliberare solent. *Brolium* seu peribolium appellant, quo in loco

loco nullus plebeius iis se adungere audet. Palatium Ducis dextro ecclesiæ sancti Marci lateri adhæret, perquam magnificum, arcis tegulis opertum, tabulis insigniorum pictorum decoratum. Variæ per unam porticum angustis cuniculis patent arculæ, in quas delatores quique schedulas suas conjiciunt, aliæ pro seditiosis, aliæ pro impiis, pro diversis criminum generibus diversæ, maxime in eos, qui in remp. peccant. Proximum est palatio minus armamentarium pro quatuor millibus armatorum: aliud maximum in angulo civitatis.

E regione ducalis palatii visitur bibliotheca sancti Marci, multis codicibus, tam græcis, quam latinis referta: quos ple-rosque, magno studio, magnisque impensis conquisitos, Bessarion Cardinalis Reip. dono dedit, ac basilicæ sancti Marci dicavit anno M CCCC LIX. Hujusce doni rationes ipse commemorat in epistola ad Principem Venetorum Christophorum Morum, & ad inclitum Senatū. Primo quod nullum locum tutiorem invenisset. Deinde quod nullum commodiorem, ac suis hominibus, scilicet Græcis, aptiorem, qui Venetias appulsi, tamquam apud alterum Byzantium degere soliti sint. Denique quod nullus sibi occurrisset alius locus, ubi honestius collocari posset, quam apud eos homines, quibus esset multis obstrictus beneficiis; & in ea civitate, quam sibi, subjugata Græcia, elegisset, & in quam a Venetis accitus, atque honorificentissime receptus fuisset. Hæc epistola inter philologicas a Goldasto vulgata reperitur. In vestibulo istius bibliothecæ multa egregia signa seu statux & imagines: vas ipsum ædificii præclarum cum egregiis picturis; sed cui multum librorum editorum deest ad absolutam bibliothecæ perfectionem. Ejus curator est humanissimus abbas Gualterius, nobilis Scotus. Indicem a Thomafino vulgatum quivis consulere potest. Præcipui sunt græci: quos inter *Photii bibliotheca*, *libri Augustini de Trinitate* græce & latine, *Themistii orationes*: e latinis *commentarius in Pauli epistolas ex libris Augustini*, Petro Tripolitano adscriptus, quod non facile asseruerim: *Sophiani liber de machinis bellicis* ad ipsum Bessarionem Cardinalem. In vacuo folio cujusdam veterrimi codicis exstat inscriptio de Lappæo Cretæ oppido, cum hoc titulo: *Apud Cretam insulam.*

ΔΑΜΠΠΑΙΩΝ. Η. ΠΟΛΙΣ. ΜΑΡΚΟΝ. ΑΥΡΗΛΙΟΝ.
ΚΑΗΣΙΠΠΟΝ. ΤΕΙΜΗΣ. ΚΑΙ. ΜΝΗΜΗΣ. ΧΑΡ.

AN. 1685.

MAIO.

Grut. pag.

M XCI.

Hujus inscriptionis duo tantum priora vocabula leguntur apud Gruterum, & apud eruditum Harduinum in ΑΑΠΠΑΙΩΝ.

XXII. In adversa insula palatio & plateæ ducali respondet insigne monasterium sancti Georgii nostri Ordinis, Majoris appellatum: quod præ omnibus Italiæ cœnobiis apte & concinne ædificatum nobis visum est. Ecclesia ejus minor, quam sanctæ Justinæ Patavinæ, Palladium auctorem habet. Subsællia vitæ sancti Benedicti eximie insculptam repræsentant. In aditu e claustro ad chorum sepultus est anno M C X Petrus Venetus monachus, qui corpus sancti Stephani protomartyris Byzantio illuc advexisse dicitur. Regulares monasterii ædes elegantia nullis cedunt. Claustrum duplex, bibliotheca bene instructa, maxime concinna & ornata. In refectorio pictura exquisitissima Pauli Veronensis, cœnam Canæ repræsentans. Tanta apud nos elegantia magnificentia ve non quærenda: sed optandum esset, ut majori studio nitor & mundities, præsertim in templis nostris, curaretur: ubi sordido pulvere parietes, & fenestrarum anguli telis aranearum inquinati esse solent. Hanc sane incuriam nobis merito exprobrant non solum Itali, sed etiam Germani & Belgæ, apud quos nihil inquinatum & oculis indignum in ecclesiis toleratur. Georgiani monasterii historiam italice ac latine scripsit Fortunatus Ulmus, sed ineditam. Alia est apud Venetos sancti Georgii Græcorum ecclesia, ubi monachi Basiliani schismatici degunt: alia item sancti Georgii in Alga, de qua alias. Propè sanctum Georgium Majorem alia est insula, vocabulo Judæca, ubi in ecclesia sanctæ Crucis, quæ est Ordinis nostri sanctimonialium, magni Athanasii corpus asservari creditur. Ibidem egregia visitur Capucinorum ecclesia, ex voto reip. Salvatori consecrata ob pestem extinctam. In ea voces percussæ gratissimum quasi concentum reddunt. Capucinorum domus nihilo minus ab instituta simplicitate degenerat.

XXIII. Ad sancti Nicolai monasterium e nostris, in Litore dictum, sacra fecimus. Situm est extra urbem in continente. In ecclesiam loci translatum dicitur corpus sancti Nicolai episcopi Myrensis anno M. C. id est anno vigesimo sexto a monasterii conditione. Ibi visitur picta effigies Nicolai Justiniani ejusdem loci monachi, cui prænobilis Justiniana familia alteram sui debet originem; itemque effigies Annæ ejus conjugis, Vitalis secundi Ducis filix. Ille post emissam vitæ monasticæ pro-

fessionem, tempore Alexandri III. cum proles mascula ex sua gente defecisset, Pontificis permissu Annam duxit uxorem: ex qua postquam aliquot liberos suscepisset, in monasterium suum reversus est: Anna vero item monacharum cœnobium ingressa. In ecclesia sancti Nicolai Dux cum Patriarcha & toto suo comitatu die festo Ascensionis, post sollemnem maris desponsationem, sacris a loci abbate celebrandis interest. Apud Franciscanos conventuales magnificum est in primis mausoleum Johannis Pisauri Ducis Veneti. In ecclesia sancti Rochi, ubi ejus corpus asservatur, & in adjuncta consodaliū aula, quam *Scholam* vocant, multæ sunt tabellæ egregie depictæ a Tintoretto: multæ item insignes ex ligno sculptæ per Franciscum Plantam figuræ.

XXV. In mensam suam nos admisit excellentissimus Orator dominus *de la Haye*, & post aliquot dies in armamentarium Venetæ reip. secum duxit. Illustrissimum abbatem Belonium nobilem Venetum convenimus, & clarissimum Jacobum Brachium Doctorem medicum, viros doctos: ex quibus hic nobis libellum physicomedicum largitus est, italico sermone ab se editum de animantibus morientibus ex defectu aëris naturalis aut facticii.

XXVII. Die Dominica apud sanctum Zachariam facta est a Patriarcha sex nobilium Benedictinarum consecratio, quæ aliquot a professione annis fieri solet cum magna pompa & multo apparatu. Post lectam Missæ epistolam Patriarcha ad chorum virginum accedit; & peracto consecrationis ritu, omnes qui in consecratarum virginitatem aliquid tentare ausi fuerint, diris vovet. Factum bene, si mores & habitus ab illa consecratione non discordent.

Post meridiem excellentissimus Procurator Johannes Bapt. Cornelius nos in suas ædes invitavit. Is pater est illius clarissimæ nostri sæculi heroinæ, Helenæ Corneliæ Biscopix, quæ mense Julio anni superioris e vivis excesserat, annos nata xxxviii, apud Patavium, ubi & Doctoris in Philosophia titulum meruerat: sepulta in monasterio sanctæ Justinae inter monachos, uti ipsa moriens optaverat. Omnia ejus scripta multigenæ eruditionis (nam ipsa linguas minimum quinque præter maternam callebat) & alia id genus permulta nobis ostendit amantissimus pater: sed (quod nobis in primis jucundum fuit) testimonium authenticum, quo in numerum Oblatarum a Pa-

AN. 1685.
M A I O.

tribus nostris, sancti Georgii scilicet abbate & monachis, infcio patre suscepta est anno M DC LXXV. Cum enim simplex castitatis votum ab ea factum litteris pontificiis pater, qui eam nuptum dare volebat, rescindi curasset: hæc ad sanctum Georgium profecta, & sub Oblatæ nomine professæ castitatem, numquam ab ea retinenda deterreri potuit, quantumvis splendidis conditionibus ad matrimonium alliceretur. Ejus epitaphium, plumbeæ laminæ intra cupressinam arcam inscriptum, sic habet.

HELENA LUCRETIA CORNELIA BISCOPIA, nobilis Veneta, maximi nominis virgo, & D. Benedicto sponte dicata, Hebraici, Latini, Græcique sermonis attici & neoterici, supra Hispanicum, Gallicum & Italicum peritissima, quos cantus suavitatem mire exornabat; in scientiis omnibus præcellens, Doctorali laurea Patavii anno M DC LXXVIII. XXV Junii publice donatur, & Doctrinx in cathedrali ecclesia declaratur. Cujus fama & scriptis permoti Summus Pontifex INNOCENTIUS XI & JOANNES III. Polonia Rex, litteris apostolicis VI Maii, & regis XIV Junii M DC LXXXIV eandem vistarunt: atque Romanorum Imperator LEOPOLDUS, sed & CAROLUS III. Lotharingiæ Dux mirifice commendarunt, alique Principes summis honoribus cumularunt. At mortalem hanc gloriam eodem anno, die XXVI Julii, hora XVIII. in immortalem commutavit, ut duplicem Virg. & Doct. laureolam susciperet in cælis, ætatis suæ XXXVIII. maestissimo parente JOANNE BAPT. D. MARCI PROCURATORE SUPERSTITE.

Præclarum illustri filix mausoleum nunc pater adornari curat ex marmore. Habet & aliam filiam nuptam, præclaris itidem dotibus ornatam, quæ multas etiam linguas recte caller.

XXIX. & subsequentibus aliquot diebus revolvimus codices bibliothecæ sancti Antonii in castello, Canonicorum regularium sancti Salvatoris, deducente nos humanissimo Patre

Calorio Somaſcho, cui Pater Semenzius ejuſdem inſtituti e Medioloano nos commendaverat. In ea bibliotheca multi ſunt codices græci & hebraici præter latinos: quos inter exſtat *breuiarium operum ſancti Auguſtini* per Henricum abbatem Pompoſianum, qui opus ſuum Raynaldo Archiepiſcopo Ravenneſi nuncupavit. quod opus ipſo iubente ſuſcepit apud Argentam opidum agri Ravenneſis, dum Ferraria civitas bellicis motibus agitaretur. In eadem bibliotheca habetur *Paſſionale* antiquiſſimum bonæ notæ: & *verſio Ptolemai Coſmographia* per Jacobum Angelum. Eccleſia beata Mariæ de Salute, quæ Somaſchorum eſt, fabricæ elegantis ac ſingularis, Reip. voto & magnificentiæ optime reſponder; nec ulla apud Venetias comitior, & ornatior.

XXXI. Aſcenſionis die feſto inſigne & toto orbe famoſum ſpectaculum exhibetur: quo die ſollemni pompa in mare Adriaticum e palatio Dux cum Senatu procedit, ludicram maris deſponſationem celebraturus. Vehitur deaurata navi, quam *Bucentaurum* appellant, adjunctis ſibi Senatoribus in veſte purpurea, & ipſe Ducis inſignibus & ornamentis inſtructus. Subſequitur in minori & humiliori cymba Patriarcha cum ſuo clero concinente, qui, ubi ad maris portum proceſſum eſt, comitante navicularum omnis generis & ſcapharum infinita multitudine, doliolum aqua plenum ad nuptialem Ducis lectum benedicit, tum aquam in mare projicit. Mox Dux novæ ſponſæ, injecto in mare anulo, ſponſaliorum arrham ſolvit his ſollemnibus verbis, *Sponſamus te, Mare noſtrum, in ſignum veri & perpetui dominii*. Deinde in eccleſiam ſancti Nicolai ad litus accedit cum Patriarcha & proceribus: ubi cum eiſdem intereſt feſtivis ſacris, quæ abbas cum monachis mox celebrat. Deum reverſos proceres Dux in palatio ſuo epulis recreat, quarum apparatus magnificus ſpectantium oculos prius recreaverat. De bucentauro, ut id obiter dicam, a Grammatico quodam interrogatus aliquando Mapheus Vegius Laudenſis, ſub Pio II quondam Datarius, unde hanc vocem formatam crederet; reſpondit a magnitudine boum, qui in Italia erant, conſuetudinem factam fuiſſe, ut præpoſita ſyllaba *bu*, magnum quiddam ſemper enuntiaretur. Inde dici *bulimiam* magnam famem, & *bupadas* grandes pueros. Simili ratione *bucentaurus*, quia Principes & magni viri ea vehi ſolent, quaſi *magna centaurus* appellata eſt. Centaurus namque ſignum erat, quod

AN. 1685.
MAIO.

magnæ navi imponebatur. Unde Virgilio, *Centauro invehitur magna*. Hæc Mapheus in libro secundo de educatione puerorum.

Antequam Venetiis discederemus, triste ad nos perlatum est nuntium de obitu optimi senis nostri Lucæ Acherii, de literis bene meriti, quem patris loco semper ego suspexeram. Cum Parisiis egressi sumus, lentus illum coquebat ardor, qui sensim in dies ingravescens, eum de medio sustulit die *xxix* Aprilis, cum natus esset annos fere *lxxvii*. Hæc interim de emerito sene, dum alia se se offerat plura dicendi occasio.

JUNIO.
* Rovigo.

I. Romam versus iter maturavimus, ut ante summos calores urbem attingeremus. Patavium, Mons-silicis, * Rodigium opidum, ubi insignis ecclesia in honorem beatissimæ Virginis, multæ item inscriptiones veteres penes Camillum Silvestrum, nobis procedentibus primum pervia fuere.

III. Dominica Ferrariam ante meridiem accessimus. Magna quidem & præclara civitas, at civium multitudo longe impar. Ecclesia cathedralis beatissimæ Virginis amplissima, plumbo recta, palatii potius formam, quam ecclesiæ exterius habet. Subsellia triplicis ordinis pone altare. Monasterium sancti Benedicti elegans & ornatum. In sacrario duo baculi pastores ex ebore, qui olim fuerunt monasterii Pomposiani, quod modo unitum illi Ferrariensi. Hic sepultus est Ludovicus Ariostus poëta famosus cum epitaphio, quod ab aliis vulgatum est.

R A V E N N A.

Sidon. lib.
1. epist. 5.

IV. Refecti apud Argentam vetus opidum, ex quo duxit originem famosus ille Guibertus antipapa; noctem duximus in opido Lugo. Die sequenti Ravennam attigimus: cujus urbis paludosas & sordidas aquas Sidonius noster multum abhorruit: quia *nusquam vel aqueductuum liquor integer, vel cisterna defecabilis, vel fons irriguus, vel puteus illimis*. Verum ab hoc incommodo nos relevavit illustrissimus ac reverendissimus archiepiscopus Fabius Guinifius, ex præclara Guinifiorum apud Lucenses gente, ad quem litteras ex eminentissimo Cardinale Casanata habebamus. Is enim cum nos apud se remorari non potuisset; in hospitium reversos vino Florentino, aliisque eduliis recreavit, vir litteris, comitate, ac rebus gestis non minus, quam dignitate conspicuus. Idem ipse nobis vetera, quæ supersunt, ecclesiæ suæ authentica instrumenta, nonnulla in cor-

tice scripta, ostendit, ex quibus quædam apud Rubeum edita correximus. Princeps ecclesia urbis elegans, sed non multum ampla. Cingit chorus altare majus, in quo sacerdos versa facie ad populum sacra facit. In capite ecclesiæ primi urbis episcopi in musivo exhibentur. Navim sustinent quatuor ordines columnarum. Baptisterium antiqui operis extra ecclesiam. Bibliotheca nulla ibi superest. Ambrosius Camaldulensis, aliquando eo profectus, vix quicquam digni memoria, ut ipse scribit, præter unum *Cypriani volumen*, invenit, antiquis litteris scriptum, in quo plurima quam usquam antea opuscula notaverat; præterque codicem alterum, in membranis purpureis & litteris aureis exaratum, in quo *Nicani Concilii Fides* contenta erat. Sed hos codices aut aliena manus abstulit, aut temporum injuria.

Non alia apud Ravennates majoris est dignitatis basilica, quam sancti Vitalis, monasterio Casinensium nostrorum insignis. Opus est sive Justiniani Imperatoris, ut recentioribus placeat, seu Juliani argentarii ex mandato Ecclesiæ Episcopi, quod ex vetusta inscriptione Rubeus probat, in octanguli formam constructa, & omni ornatus genere decorata. Ambitum cingunt sextæ versicoloris marmoris tabulæ: columnæque duplici ordine per gyrum altissimæ ex candido & vario marmore molem sustinent. Insigniores sunt quatuor columnæ sapphireæ, gemmeis tessellis distinctæ, quæ presbyterium hinc inde ornant. E regione majoris altaris, quod unum octogoni angulum occupat, visitur ara sancti Vitalis ex pellucido lapide alabastrite: subtus puteus, in quem præceps actus est sanctus Martyr, aquis plenus, super ipsius corpus (ut aiunt) scaturientibus. A dextris majoris altaris aliud est sacellum dictum *Sancta Sanctorum*. Istuc mulieribus ingredi non licet. In medio areæ puteus, in quem projecti Martyres non pauci, ideo *Sanctorum Martyrum* appellatus. Subtus aram ex marmore jacet ECCLESIUS EPISCOPUS: a dextris VICTOR EPISCOPUS, a sinistris VRASICINUS itidem EPISCOPUS. Nihil minus ubique in illa ecclesia, quam musivum opus desideratur. In horto ejusdem monasterii stat antiqua itidem & præclara ædícula, vermiculato opere pulcherrime exornata in honorem sanctorum Nazarii & Celsi: quam pro conditorio extruxit Galla Placidia, Theodosii Cæsaris filia, Arcadii & Honorii soror, Constantii conjux, & Valentiniani tertii mater. Quæ in sacellum ingres-

AN. 1685.
JUNIO.

sis se se primo aspectu offerunt sepulcra duo, Valentiniani & Honorii nutricios sine titulo continere dicuntur: subsequencia duo hinc inde Honorii a dextris, Valentiniani a sinistris. Existimant tamen quidam non sine fundamento, Constantium Placidiae maritum ibi jacere. In fronte conditorii pone aram, tumulus est ipsius Placidiae, quam non more jacentis (ut fit) at sedentis in sella cupressina ibidem repositam fuisse testes oculati perhibent: sed omnia quidam nebulones injecto per foramen igne feruntur dissipasse. Eadem Placidia basilicam sancti Johannis Evangelistae construxit. Inscriptionem testudini primitus appositam Gruterus refert *sanctissimo ac beatissimo apostolo Johanni evangelistae Galla Placidia Aug. cum suo filio Plac. Valentiniano Augusto, & filia sua Justa Grata Honoria Aug. liberationis maris votum solvit.*

Grut. pag.
XLVIII.

Non minoris est antiquitatis ecclesia sancti Apollinaris, a Minoribus, qui a Soccis nomen habent, modo occupata. Haec Theodoricum Gothorum regem auctorem habet, marmoreis columnis Constantinopoli advectis suffulta. In pariete ecclesiae hinc inde depictae sunt ex musivo, a dextris quidem sanctorum, a sinistris sanctarum effigies; in dextro infimae navis pariete Justiniani Imperatoris imago item ex musivo, qualis a Nicolao Alemanno in notis ad Procopii Anecdota expressa est. Parieti cœnobii exteriori insertus est lapis porphyreticus longitudine octo pedum; in quo olim Theodorici Ostrogothorum regis exuviae repositae fuerunt. Eo translata est anno M D IX urna illa, cum obsessa a Gallis Ravenna, bombardae ictu ex summo Theodorici mausoleo dejecta fuit. Existat etiam nunc mausoleum istud extra mœnia urbis, beatæ Mariæ rotundæ modo appellatum, opus Amalasunthæ Theodorici filiae, rude quidem, sed pro illa ætate admirandum. Octanguli in formam conditum est cum duplici fornice. Primus in imo aquis nunc fere oppletus, ut merito cum Sidonio de Ravenna dicere possimus, quod illic *sitiunt viri, natant sepulti*. Secundus mausolei fornix, qui aram modo habet, tectus est ingentis molis marmore granito, quod in diametrum xxxi pedes, in orbem c xiv continet, densitatis quatuor. In summo fastigio positus erat lapis porphyreticus, de quo mox dicebamus, cum Theodorici exuviis, & in duodecim angulis statuæ duodecim Apostolorum: quorum nomina disjectis statuis restant, vetustis litteris gothicis insculpta. Ad hæc insignis est etiam, tamen
in

Sidon. lib.
3. epist. 8.

in speciem rudis ecclesia, quam Spiritus-sancti appellant, modo Theatinorum, ubi primi Ravennensium episcopi undecim indicio columbæ divinitus electi dicuntur. Ibi ostenditur lapideus eorundem suggestus: in quem nemo hodie ascendere audet concionandi causa: cui rei alia cathedra e regione erecta est. Denique in eadem urbe, præter alios viros illustres, extinctus sepultusque est apud Minoritas Dantes poëta, a patria sua, scilicet Florentia, extorris. Ossa demortui post longum temporis spatium Florentini in patriam revocare multa cum dignitate studuerunt. quod tamen impetrare à Ravennatibus non potuere, qui honori sibi merito ducunt, monumenta corporis ejus sua in urbe manere, ut scribit Petrus Victorius in Rhetoricam Aristotelis libro secundo.

VI. Ravenna digressi, per antiquum Classense monasterium, tribus fere passuum millibus ab urbe distitum, in transcurso non sine gemitu vidimus, miserati monasterii ruinas & ecclesiæ solitudinem. Nam locus ab uno converso Camaldulensi administratur, monachis in urbem translatis, qui unum e suis quotidie mittunt ad privatum sacrum in Classensi basilica faciendum. Ad ejus ingressum ordinati sunt hinc inde Ravennatunt Pontificum tumuli. Ad dexteram visitur antiquum mausoleum, ex marmore albo eleganter factum; atque e proximo apposita est parieti vetustissima inscriptio, qua dicitur sancti Apollinaris corpus eo in loco jacuisse, donec per Maximianum archiepiscopum in ecclesiæ adyta translatum est VII Idum Maiarum, Indict. XII. octies post Consulatum Basilii junioris. Nunc subtus majus altare in crypta cernitur sepulcrum ejusdem sancti ex marmore. Inde per piniciam silvam in Cerviam seu Phycuclam opidum episcopale; & per salinas in portum Cæsennaticum profecti ad Rubiconem amnem, Galliæ Cisalpinæ limitem ævo Ciceronis; deinde Cæsenam defleximus. *Furnum potius quam opidum* per ludibrium vocat Sidonius in epistola ad Candidianum, Cæsena oriundum. Ecclesia cathedralis sancti Johannis Baptistæ memoriæ sacra est. Aberat tunc loci episcopus eminentissimus Cardinalis Ursinus, quem postea Neapoli convenimus cum amicis litteris eruditi Natalis Alexandri. Insignis est apud Cæsennates Minoritas conventuales bibliotheca, ex munificentia Malatestæ Novelli, qui fratribus ecclesiam, regulares officinas construxit, & bibliothecæ amplum ædificium, omnium disciplinarum libris manuscriptis pro tempore

AN. 1685.
JUNIO.

Sidon. lib.
1. epist. 8.

AN. 1685.
JUNIO.

instructum. Libri sunt tum græci, tum latini. E græcis opera Gregorii Nazianzeni, Basilii, Demosthenis, Isocratis, & aliorum: ex latinis multa Hieronymi, Augustini, & ceterorum. Bibliothecæ hujusce indicem digessit Angelus Julianus Dominicanus, eumque Lucæ Turregiano antistiti Ravennati nuncupavit: quem quidem indicem Romæ in Alteriana bibliotheca vidimus ac descripsimus. In pavimento bibliothecæ hæc inscriptio legitur non semel: MALATESTA NOVELLUS, PAMPHILI FILIUS, MALATESTÆ NEPOS, DEDIT. Jacet sine mausoleo in loco humili extra ecclesiam, ad parietem viæ publicæ adhærentem. Vivebat medio sæculo xv. Exstat prope eandem urbem in edito colle monasterium nostrorum Calinensium, cujus loci ecclesia beatæ Mariæ frequenti fidelium concursu celebratur. Ibidem lapidi marmoreo inscriptio quondam apposita fuit in honorem M. Lucretii historici & poetæ: cui ob excellentiam ingenii statua condonata est, ac civitati Cæsennæ, Romanæ coloniz, in hoc sacro monte dedicata, ut apud Aldum in Orthographia legitur.*

VII. Ariminum, urbs antiqua, veteri fama & conciliabulo Ariminensi celebratur. Ecclesia major patronam agnoscit sanctam Columbam virginem & martyrem Senonensem, cujus corpus habere se gloriantur, festumque recolunt Ariminenses ultima die Decembris. Sacerdos conversus ad populum sacris operatur, uti & Narniæ, & Oricolis. Supersunt Arimini duo præstantia antiquorum operum monumenta: nempe Ravennam versus pons super flumen Ariminum, quod urbem alluit; & porta vetustissima ex lapidibus quadratis, qua Pisaurum tenditur, in honorem Augusti constructa, ut inscriptionis reliquiæ docent. Pontis structura permagnifica est, marmore undique decorata. Arcubus quinque fluvii ripas conjungit, ad suburbium continuatus, ea latitudine, ut præter marginem ex utraque parte, duæ quadrigæ adverso cursu concitatæ se se non impedian. Hunc pontem (quod litteræ ab utraque sponda incisæ testantur) Augustus & Tiberius condidere. In suburbio non longe ab hoc ponte est monasterium Ordinis, nuper sancti Georgii in Alga, sed extincto per Clementem ix Ordine, locus Patribus Casinensibus absque censu concessus est. Ipso die * Pisauri noctem egimus.

* Cæsare.

VIII. Fanum-fortunæ, ubi reliquiæ veteris arcus in honorem Augusti; Senogallia, cujus loci ecclesia princeps sancti

Paulini titulum habet, & Ancon seu Ancona, urbes episcopales, secundum oram maris nobis occurrerunt. Ad portum Anconis legitur inscriptio in honorem Trajani, qui ex pecunia sua portum tutiorem navigantibus reddidit. Ecclesia cathedralis in edito colle, sancto Cyriaco nuncupata, multis sanctorum reliquiis commendatur.

I X. In perviligio Pentecostes, & ipso die festo in æde Lauretana sacrum fecimus: quo innumera, uti semper mos est, peregrinantium turba confluxerat. De tam celebri ac religioso templo Turselinus & alii scripserunt. Qua parte primum sacra ædes spectari ab adventantibus potest, exstat oratorium, ubi peregrini in terram procumbentes beatissimam Virginem salutant. Ædícula sacra quadrangula ex lapidibus coctis, intra ecclesiam cathedralem sæpto marmoreo inclusa est. Statuæ decem Prophetarum, & impressæ marmorî cælaturæ, Sansovini artem commendant. Tribus portis in ædiculam aditus pater. Ejus partem superiorem ab inferiori dirimit crates ex ferro deaurato. In superiori Deiparæ effigies ex cedro habetur: in inferiori unicum altare. Ibi decem lampades aureæ, totidem argenteæ; variaque dona pretii immensi. In his excellit donum felicitis memoriæ Annæ Austriacæ, Ludovici M. almæ parentis, Angeli scilicet ex argento statua, pusionem ex auro solido gerentis & offerentis. In sacrario alia dona infinita, quibus accensetur castelli * Vicenarum argentea icon ex munere Henrici Borbonii Principis Condæi, in memoriam suæ ex illius castelli custodia educationis. Alia persequi festinantibus non vacat.

* Vincenz

X. Post meridiem urbs Ricina, vulgo Recanatum, nobis hospitium præbuit, quæ sedem episcopalem Laureto detulit honoris causa. Conditorem suum agnoscit Septimium Severum, attestante inscriptione, qua *Colonia Helvia Ricina conditori suo L. Septimio Severo* se gratam exhibet. Edita est apud Gruterum ex marmore apud Maceratam Piceni opidum reperto, & a Dionysio Harduino communicata: sed a quo primum inventa sit, discimus ex membraneo codice Vaticano, in quo hæc inscriptio habetur cum epistola sequente Cyriaci Anconitani ad Johannem Ricinatem Ragusæ pontificem.

AN. 1685.
JUNIO.

IMP. CAESARI. L. VERI. AUG. FIL. DIVI. PII
NEP. DIVI. HADRIANI. PRON. DIVI. TRAJANI. PARTH.
ABNEP. DIVI. NERVAE. ADNepOTI. L. SEPTIMIO. SEVERO
PIO. PERTINACI. AUGUSTO. ARABICO. ADIABENICO
PARTHICO. MAXIMO. P. M. TRIBUNIC. POTEST. XIII
IMP. XI. COSS. III. PP.

COLONIA.

HELVIA.

RICINA.

CONDITORI SUO.

*Epigramma hoc praeclarum, ex me apud Maceretum exacta tempestate compertum, eam ob rem hodie venerationi tuae hoc loco reponendum delegi, venerandissime Praesul, ut ex eo perfacile videas, insignem illum pietate Principem Severum, tuarum decus & specimen legum, antiquam illam in Piceno coloniam condidisse, qua olim eadem in provincia egregia illi patriae civitati tuae, non longe ab se Oenotrio in colle, longo murorum ordine, nostrum & prope Apennini montis promontorium, nomen & primae originem dedisse percipitur. Qua quidem in re sane poteris intelligere, vir diligentissime, vos quoque praeclaros nova ejusdem coloniae cineres, non quemadmodum diu jam incerto nomine consuevistis undique vocitare Raccanateses, quin immo vos rectius Ricinates nuncupari debere. Ex quo patet aperte, dignissime Pater, nos non modo abolita virorum insignia quandoque ab inferis suscitare, quin & civitatum utique nomina arte quippe nostra ab orco in lucem revocari posse. O magnam vim artis nostra ac penitus divinam! Siquidem dum vivimus, qua diu vivis viva & praeclara fuere, & longi temporis labe, longaque semivivum injuria obstrusa penitus & defuncta jacebant, ex ea demum arte diva iterum vivos inter homines in lucem ab orco revocata vivent felicissima temporis reparatione. * T. H. inter Liguras nondum exacto biennio, apud Vercellas antiquam ad Apenninos montes & olim nobilem civitatem, & de qua Hieronymus senior ille noster suis epistolis in ea de septies percussa virgine particula mentionem habet, dum vetustis in sacris adibus, nostro de more, aliquid verenda aeternitatis indagare cepissem, Sacerdoti cuidam ignavo, quanam mea ars esset interroganti, ex tempore equidem respondi: Mortuos quandoque ab inferis suscitare Pythia illa inter vaticinia didici. Et haec ubi dicta, quum ibidem vulgarem incertam obstupefcentemque reliquissem, artem vero meam haud relinquentem putavi. Vale,*

* f. Transacta hieme.

Patri in Christo venerandissimo D. J. Ricinati, Ragusæ Metropolitane ecclesiæ Pontifici B. M.

AN. 1685.
JUNIO.

Kyriacus Anconitanus devotus suus fel.

Hoc epistolium referre visum est eodem modo, quo in codice Vaticano legitur. Inscriptio non in fronte, sed in calce epistolæ, ut hic, apponitur, qualis scilicet super involutam epistolam apponi debebat. Hunc autem ritum observavimus in plerisque Petrarchæ epistolis autographis, quæ in Medicea bibliotheca asservantur. Hunc Cyriacum Poggius Jacobo Foscaro commendat, uti virum *doctum, & bonorum studiosum*: ejusdemque mentionem facit Ambrosius Generalis Camaldulensis in Hodæporico suo ad annum M CCCC XXXIII. quo anno, cum Venetiis esset, *Adiit nos*, inquit, *inter ceteros & Cyriacus Anconitanus; multaque nobis ostendit antiquitatis, cujus studiosissimus indagator erat, monumenta, tum epigrammata vetusta, tum signatos nummos argenteos & aureos, tum signa.* Atqui eo tempore nullus Johannes inter Ragusienses archiepiscopos legitur apud Jacobum de Petro Luccari in annalibus Ragusiensibus, ubi Ragusiensium Antistitum catalogus habetur. Ricinæ sepultus est Gregorius XII.

XI. Tolento transmissio, sequenti die apud * Fulginium sacra fecimus in episcopali sancti Feliciani episcopi & martyris ecclesia: ubi tunc ex mandato summi Pontificis Communio generalis fiebat. Isidorus Clarius Brixienfis, Fulginas episcopus e nostris, multis suæ doctrinæ & pietatis monumentis relictis, in eadem ecclesia sepultus est, mortuus die XXVIII Maii anno M D LV. Sigismundus Fulginas historiam Italiæ sui temporis scripsit, quæ historia reperitur Mediolani in bibliotheca Ambrosiana. Apud Minoritas corpora integra beatarum Angelæ & Angelinæ; apud Augustinianos beati Tomasutii ex tertio ordine sancti Francisci. Antequam urbis mœnia subiremus, obvios habuimus infinitos ovium & pecudum greges, quos pastores in summas montium planities deducebant, ubi pro more gentis per æstivos calores pabularentur. Subsequebatur totus pastorum apparatus, tentoria, lectisternia, ollæ; in summa quicquid ad rusticanam stationem necessarium erat. Fulginio post meridiem accessimus Spoletum: quo die festivi ignes ob novum Episcopum excitabantur. Ecclesia major antiqua & elegans, Deiparæ assumptæ titulo insignis, Francisci Barbarini Cardinalis impensis ob memoriam Urbani VIII. qui

* Foligno

AN. 1685.
JUNIO.

illic episcopus fuerat, decorata est. Ara major in ipso basilicæ centro erecta. Urbem cum vicino monte, in quo Franciscani cum eremitis degunt, pons conjungit non sine admiratione spectandus, quem super profundam interjacentem vallem sustinent pilæ altissimæ.

* Terny

XIII. Inde saxosis viis superatis, apud *Interamnem pransi; postea obiter lustravimus ecclesiam Narniensem, cujus altare egregio baldachino quatuor columnis marmoreis innixo exornatum est. Antè faciem altaris, quæ navi respondet, duplici graduum ordine in cryptam subterraneam descenditur, vitrea fenestra illustratam: ubi sancti Juvenalis episcopi & martyris corpus asservatur. Eodem die venimus * Otricoli, cujus primaria sanctissimæ Deiparæ ecclesia sex Canonicos habet. Ad ejus ingressum sequens legitur inscriptio lapidi in sculpta, qui olim ad aram sancti Fulgentii positus erat.

* Otricoli

PRO. SALUTE. ITUS. AC. REDITUS
D. N. SANCTISSIMI. TI. AUG. AEDICULAM
GONCILII. DEORUM DEARUMQUE.
AURELIUS. FAUSTUS. PROT. DIVINI
LATERIS. AUG. N. EX VISU DEAI
VALENTINAE. S. P. F. C.

Hæc eadem inscriptio habetur apud Smetium & apud Gruterum, sed mendose. nam loco *prot. divini Lateris*, habetur *prot. Divinitate*, quasi legendum esset, *protegente Divinitate*: cum lectio genuina sit, *protector divini Lateris*, scilicet Imperatoris: & pro *Valentinæ* legitur *Valentiæ*. Dum hanc inscriptionem expiscaremur, idem fere nobis accidit, quod Cyriacus Anconitanus sibi contigisse narrat in superiori epistola. Quidam enim clericulus accurate nos observans, petiit a nobis, quid istuc erat quod quæreremus. Audito responso nostro, scilicet nos veteres tantum hæc litteras rimari, ex loquela intellexit nos esse Gallos, moxque subjunxit morem esse Gallorum, ut defossos in Italia thesauros sagarum more investigent, atque in patriam asportent. In via publica alia exstat inscriptio *Juliae Luciliæ, Livii Juliani filiae*, cujus pater thermas *Ocriolanis* (sic scribitur) a solo extruxerat. In subjecta valle, ubi pons supra Tiberim Flaminiam conjunxit, stetit olim urbs Ocrea, cujus rudera etiam nunc visuntur. Benedictus medicus sub Antonino Imperatore & Sebastiano præside martyrium passus est

in civitate Otriculana, VI Kal. Julii: cujus acta Romæ in Valli-
cellana bibliotheca fervantur.

AN. 1685.
JUNIO.

XIV. Prandio sumto apud civitatem Castellanam ad Cremeram, reliquum diei & totam noctem insequentem incænati & insomnes traduximus; Romam tandem appulsi diluculo feriæ sextæ, quæ Junii dies xv erat, frustrato consilio amicorum nostrorum, qui ipsa die sub vespere nobis obviam venire constituerant.

ROMA.

Itaque Junii quinta-decima die, quæ feria sexta erat, Urbem ingressi, divertimus ad hospitium duorum e nostris, qui Romæ versari solent, ad clivum Trinitatis, id est, in monte Pincio; susceptique ab eis sumus plenissimo caritatis & amoris officio, non solum communis patriæ causa & religionis, sed peculiaris necessitudinis, quæ dudum inter nos invicem ratione studiorum intercessit. Unus ex illis Claudius Stephanotius, non semel a nobis alias laudatus, alter Johannes Durandus; ambo virtuti & litteris dediti, qui non tantum Congregationis nostræ negotiis, quæ in Urbe sane exigua sunt, quantum studiis nostris juvandis & promovendis otii impendunt. Apud eos septem ferme a nobis exacti sunt menses, quantum scilicet lustrandis non solum bibliothecis impendere nobis licuit, sed etiam videndis rebus sacris, & vetustis Romanæ urbis monumentis: cujus magnitudinem & præstantiam tum ex ruinis ipsis, tum ex novis ædificiis, majorem esse, quam fama vel auctorum scripta ferebant, intelleximus. Urbem dividebant veteres in sex partes, id est templa, domos, vicos, insulas, plateas, & angiportus. Insulæ, qui inter vicos sunt horti. Domus, publica ædificia, nempe theatra, amphitheatra, circi, balneæ seu thermæ, atque nymphæ, quo nomine formas & aquæ ductus intelligebant. Et in his omnibus quot & quanta olim admiranda Romæ? quot & quanta etiam nunc supersunt post tot clades & ruinas? ut eam Muretus, post Athenæum, hodie quoque *Orbis epitomen* dici posse haud immerito censuerit. Hæc veluti communis omnium mortalium parens, in qua unica totius mundi civitate, ut Sidonii Galli verbis utar, *soli barbari & servi peregrinantur*.

Muret.
Var. lect.
lib. 17. cap.
12.
Sidon. lib.
2. epist. 6.

XVI. Postridie quam eo accessimus, votis nostris ad sancti Petri basilicam persolutis, obsequia nostra, ut decebat, emi-

AN. 1685.
JUNIO.

nentissimo Cardinali Estræo, atque excellentissimo Regis Oratori Duci ejus germano exhibuimus, a quibus benignissime accepti sumus: tum ab amico nostro Francisco Diroyfio Doctore Sorbonico deducti in villam Benedicti, ubi Cardinalis nos sua mensa dignatus est. quod postea factum sæpius ea comitate ac facilitate, ut hæreas quid amplius in eo suspicias, dignitatis eminentiam cum excelitate ingenii ac summa peritia rerum agendarum, an illam benignitatem, qua se ad aliorum modum tam humaniter inclinat. Idem in aliis rebus, quæ ad studia nostra pertinebant, sua nobis auctoritate & amicorum officiis, quamdiu in Urbe morati sumus, numquam defuit.

In reditu e villa Benedicti, ecclesiam sancti Petri in Monte-aureo, & aquam Paulinam, id est integrum lacum seu amnem, e tribus canalibus præcipiti, sed tamen ad spectantium voluptatem composito lapsu decidentem vidimus. In hac sancti Petri ecclesia insignissima est Christi transfigurati pictura, auctore Raphaële Urbinate, qua nullam aliam in toto orbe insigniorem picturam existimant. Eo in loco sanctum Petrum crucifixum tradunt, atque in rei argumentum in claustro oratorium, ubi crux defixa fuerit, ostendunt. Romanus sancti Petri Canonicus id factum scribit *juxta Terebinthum Neronis*, prope ecclesiam sanctæ Mariæ in Transpadina seu Transpontina. Maffeus Veggius ex adverso probat Gaii cujusdam antiqui scriptoris testimonio apud Eusebium relato, sancti Petri tropæa *via regali, quæ ad Vaticanum ducit*, defixa fuisse. qua in via Mons-aureus situs est, non sancta Maria Transpadina. Quidquid sit, Amedeuse Franciscanis Hispanus, cujus novam Apocalypsin ad libros octo, multis somniis scatentem vidimus, ante annos centum & sexaginta, Philippo Rege suppetias ferente, conventum Franciscanorum ecclesiæ sancti Petri in Monte-aureo adjunxit, hactenus a Franciscanis observantioris disciplinæ occupatum.

Eodem die salutavimus eminentissimum Cardinalem Casanatam, cujus recenti apud Italos proceres commendationi, & veteri in nos benevolentia multum debemus; atque illustrissimum Johannem Gualterium Slusium a brevibus secretis, virum, in quo prisca fides morumque candor & integritas cum omnigena eruditione conveniunt.

XVII. Dominica Trinitatis capellæ (ut vocant) pontificiæ interfuimus, a qua Sanctissimus noster, quem dudum, pro nostra in tantum Pontificem veneratione conspiciere optabamus,

banus, aberat. Nullus organorum musicorum usus in ejusmodi sacris, sed sola vocum musica, eaque gravis, cum plano cantu admittitur. Eo die concionem latine habuit juvenis quidem, sed bonis moribus dotibusque præditus abbas Blanchinus, nobilis Veronensis, quem de rebus mathematicis perite loquentem in adibus illustrissimi Johannis Ciampini, cujus postea frequens memoria fiet, alias auscultavimus. Post meridiem eminentissimum Cardinalem Ottobonum invisimus, a quo multum benevolentiae & subsidii in rem litterariam nobis accessit. Senex est, sed in eo viget animus annorum victor. Habitat in palatio sancti Marci, cujus adjuncta ecclesia patriarchalis insignis ciborium habet: sub quo reliquiae sanctorum Abdon & Sennen. Thronus pontificius loco motus est. Hac die tribusque sequentibus frequentes ad nos fuerunt concursus amicorum, non modo ex nostratibus Gallis, sed etiam ex Romanis, qui postea pro nata occasione commemorandi erunt. Alios itidem taceamus, quibus obsequia nostra exhibuimus. Illustrissimos Prælatos & Abbates Gallos, Ervillum Rotæ Auditorem, & Gevreum, nobis etiam silentibus, Romani proceres prædicabunt.

XXI. FERIA quinta sollemnis sanctissimi corporis Christi delatio ex Vaticana sancti Petri basilica in circuitu amplissimæ areæ, ex qua in basilicam prospectus patet, de more facta est. Procedebant post religiosos Ordines & rectores parochiarum Urbis varia sodalitia: deinde Procuratores Ordinum generales; tum Episcopi cum mitris lineis: postremo Cardinales cum suis item ex tela argentea; absente Pontifice. Tota, quanta quanta est, sancti Petri basilica rubeis atque auro segmentatis longissimis aulæis ornata erat: columnata duplex, Alexandri VII. opus magnificum, quæ aream basilicæ objectam claudit, ac porticus pretiosissimis item peristromatibus instructa. Unum ex his, quæ quondam Leonis X impensis facta fuerant, cum a prædonibus quondam furto ablatum, recuperasset Annas de Monte-maurentiaco, id Julio II. restituit anno M D LV. ut in ipso peristromate adscriptum legitur. Mirum vero erat intueri tantam hominum frequentiam, tantamque procerum multitudinem confluentem ad sacram illam, cunctisque orbis miraculis præstantiorem basilicam: quæ, si centies consideretur, toties sui admirationem magis magisque ac venerationem auget. Quippe nec magnitudine sua enormis, nec partium inæquali proportionem aut inelegantia inconcinna, nec totius fabricæ varia

AN. 1685.
JUNIO.

dispositione confusa, nec ornamentorum convenientium expers, nec in tanta vastitate quidquam indecorum aut incultum patiens: sed omnia & singula apta, magnifica, mirifice ornata, nescio quid divinum spirant & inpirant. Area ingens, quam porticus utrimque quadruplici columnarum ordine distincta in semicirculi formam cingit, spectabilem fabricam reddit. Quadraginta columnæ in unoquoque ordine, omnes CCC XX. In medio spatium ad duos currus capiendos. In intermedia area stat obeliscus ex ophite, cujus altitudo pedum CLXX præter basim, quæ continet XXXVII, auctoritate & impensis Sixti V, industria vero Dominici Fontanæ architecti Comensis denuo erectus. Duo hinc inde præclarissimi salientium aquarum fontes spectantium oculos recreant. Duobus graduum ordinibus ad basilicæ vestibulum, quod egregii templi loco esse potest, ascenditur. Habet hoc atrium longitudinis pedes CC XVI. latitudinis XL. Hæc sacra limina Apostolorum: quibus affusi majores nostri tantum honoris ac reverentiæ, ob sacras apostolorum Petri & Pauli reliquias (quarum pars apud sanctum Paulum etiam asservatur, capita in ecclesiâ Lateranensi) impenderunt. Urbem hoc nomine significatam fuisse, ea loquendi figura, qua ex toto pars intelligit, et, vetus Decretalium interpretes scribit. Eodem sensu etiam appellata est Apostolorum ecclesiâ. At strictiori modo hæc *limina* sunt gradus ad basilicam, vel ad eam quam vocant Confessionem. Mos erat Christianis etiam Prudentiæ ævo, ut *Apostolorum & Martyrum exoscularentur limina*, uti ipse in sancto Romano scribit. Unde Pippinus Francorum Rex, ut de aliis fileamus, cum Romam aliquando adiisset, *omnes gradus singillatim ejusdem sacratissima beati Petri ecclesiæ, teste Anastasio, deosculatus est*. Nec desunt etiam nunc qui eadem religione ducantur. Vidimus quippe haud raro mulieres reptando in genia, non solum ad Scalam sanctam, ad quam vix umquam alio modo ascenditur, verum etiam ad sanctam Mariam-majorem ex vicinis domibus progredi. quod antiquæ pietatis vestigium est. Idem in basilica, quæ Ara-cæli appellatur, usivenit. Sed hæc extra viam. A vestibulo per quinque portas in sancti Petri basilicam fit ingressus. Sex alii numerant, forsan computata collateralis. Media a laminis argenteis quibus eam totam cooperuit Honorius Papa I, *Argentea* olim dicta: proxima ad introeuntium sinistram *Ravenniana*: sequens *porta Judicii*, quod per

eam mortui in basilicam inferrentur : ad dexteram *ROMANA*, quæ mulierum Romanarum quondam erat : & *Guidonen* per quam peregrini vexilla seu guidonès gestantes intrabant : ac demum porta *Sancta*, quæ recentior est, nec nisi tempore Jubilei patet. Portam virorum, quæ mulieribus communis non erat, ad sinistram fuisse intelligitur, tum ex Romani Canonici Vaticani veteri libro, tum ex inscriptione, quæ olim in Vaticana ecclesia insculpta erat ad designandam sepulturam Lucilli & Januariæ ejus conjugis, qui jacebant ad *sanctum Petrum apostolum ante regiam in porticu, columna secunda, quomodo intramus sinistra parte virorum*. Nunc etiam viris & mulieribus in ecclesiis distinctæ sedes, maxime in concionibus sacris. Ad basilicæ Vaticanæ vestibulum subsistimus : neque audemus tam divinæ fabricæ majestatem rudi calamo violare. Sunt enim nonnulla, quæ nullo melius modo, quam stupore & silentio laudantur. Veterem basilicam a Constantino ædificatam, quia ruinæ proxima erat, diruere cœpit Julius II. ad novæ fabricæ delineationem Bramante Lazzario architecto celeberrimo usus. Primam ideam Paulus III per Michaëlem Angelum Bonarotium correxit. Suam quisque operam adjecerunt subsequentes Pontifices ad Paulum V. qui supremam fabricæ manum imposuit. Urbanus VII. ornavit, atque altare sancti Petri pretiosissimo mirandæ artis baldachino (ut vocant) decoravit. Ante altare duobus hinc inde gradibus descensus est in Confessionem, quam lampades centum die noctuque illustrant. Ligna sancti Petrii sedes ab Alexandro VII. in fronte basilicæ magnifico opere inter quatuor Ecclesiæ Doctorem, quorum duo latini, totidemque græci, manus erecta est. Capella, ut loquuntur, pontificia ad altare majus celebratur : cœtus Canoniorum sancti Petri in sacello, quod ob præclaram Deiparæ ex marmore effigiem auctore Michaële Bona-rotæ, sanctæ Mariæ de Pietate appellant, divina officia celebrat. E regione sanctissimum Sacramentum cum congruo apparatu asservatur in alio sacello, in quo Sixtus IV sepultus est. Pauli tertii & Urbani octavi superba mausolea ab utroque latere cathedræ sancti Petri ; Alexandri item septimi monumentum super collateralem portam præ aliis contemplanda veniunt. Longa est hæc basilica pedes D LXX. Crux transversa CCCC XXIV. Navis latitudinis habet octoginta pedes. Testudo seu tholus (cupolam vocant) opus immensum Sixti V, qui illud intra duorum ac viginti mensium spatium, centum millibus aureorum singulo

AN. 1635.
JUNIO.

quòque anno consumtis, per operarios homines ad octingen-
tos perfecit; tanta inquam moles, quatuor parastatis fulcita,
a pavimento ad laternam quingentis palmis Romanis constat,
latitudine vero diametrali ducentis: a laterna ad cacumen us-
que pilæ seu globi, cui crux infixæ est, palmis centum. Pila ipsa
ex ære inaurato in diametrum habet duodecim palmos: deni-
que crux superereminens, ænea item & aurata, palmos quin-
que ac viginti. Tota quanta quanta est fabricæ ad globum us-
que altitudo pedum CCC LII. Prope scalam, quæ commo-
dissimum ac facilem ad fastigium ascensum præbet, pæniten-
tes quidam publici, & qui matrimonii cum affinibus contra-
hendi, quam pecunia non valent, licentiã opere pœnali
redimere volunt, lapidibus conterendis & ad calcem commi-
nuendis occupantur.

Exstat hujus admirandæ basilicæ descriptio tabulis æneis tri-
ginta explicata per Johannem Baptistam Costagutum. Anti-
quam basilicam descripserunt Petrus Mallius, ac Romanus
eiusdem basilicæ canonici, & post eos octo libris Onufrius Pan-
vinus. Solius Romani liber editus est: alios habemus manu
descriptos. Innumeri sancti Pontifices, Reges, & Principes in
illa basilica sepulti. Urbanus IV vetuit ne quis citra permissu
Pontificis (quod antiquitus cautum fuisse legimus) in ea tumu-
laretur, ut nos docet ejus diploma Capitulo basilicæ Vaticanæ
directum, in quo conqueritur, quod *erga sanctos, quorum glorio-
sa corpora in eadem basilica requiescunt, sic indevote se gererent,
quod etiam contra canonicas sanctiones mortuorum corpora quasi pas-
sim in ipsa, in qua vix passus pedis vacat sepultura Sanctorum,
presumptione temeraria tumularent, cæca cupiditatis illecebris seducti
potius, quam miseratione pietatis inducti. Inde fieri; ut plerumque
sepulcra reverenda sanctorum, quæ antiquorum Patrum sancta de-
votio debita diligentia consignavit, ausu sacrilego violantes, cum
piis impios, cum justis injustos, & cum sanctis fontes dispari con-
sortio ac societate damnabili impie sociarent.* Duriora quidem ver-
ba, sed tempori & occasioni forsan necessaria. Verum diutius
hic moramur ut in sacratissimo loco, cujus videndi desiderium
& spes animos nostros in via recreabat.

Non minus ardens studium fuit adeundi basilicam sancti
Pauli, quæ altero ab urbe milliaro ad viam Ostiensem sita est:
tum ut gentium Apostolum supplices veneraremur: tum ut re-
verendissimum patrem Abbatem, nobis amicissimum, & Casi-

nates nostros, qui locum incolunt, salutaremus. De horum in nos humanitate multa erit postea dicendi occasio; sed præcipue de reverendissimo patre Procuratore generali Andrea a Neapoli, cujus eximia in nos gratia & benevolentia fuit. Basilica antiquissima & amplissima est, sed absque condigno ornatu, quem a sola supremi Pontificis pietate impetrare poterit. Hæc veterum ecclesiarum formam retinet, qualem sancti Hyppoliti ecclesiam describit Prudentius: qui sancti Pauli basilicam itidem versibus suis celebrat. *Regia pompa loci est, inquit, Princeps bonus has sacravit ades.* Sive hoc intelligat de Constantino, qui primæ basilicæ fundamenta posuisse memoratur; sive potius de Theodosio seniore & Honorio ejus filio, quos novam ecclesiam condidisse antiquissimum distichon probat, etiam apud Gruterum

Theodosius cæpit, perfecit Honorius aulam

Doctoreis mundi sacratam corpore Pauli

Addit Prudentius quaternum fuisse ordinem columnarum, quæ hodie quoque totam molem sustinent, cum striatæ, tum rotundæ: ut sint in universum C XIV. Longitudo basilicæ est pedum CCCC LXXVII. latitudo CC LVIII. Altare summum, in quo solus Pontifex celebrare solet, ciborium quatuor columnis porphyreticis subnixum ornat: apsidem insigne musivum studio Honorii Papæ olim factum, quod Clemens VIII instauravit. Pavimentum resectum ex fragmentis veterum inscriptionum, quas Cornelius Margarinus monachus Casinas in unum volumen collegit. Portæ aeneæ tres *anno millesimo septuagesimo ab Incarnatione Domini temporibus Alexandri Papæ II & Domini Hildebrandi venerabilis monachi & archidiaconi*, constructæ sunt, *adjuvante Pantaleone Consule, qui fieri jussit.* Hildebrandus hic postea Gregorius VII evasit. Ad posterulam, quæ est ad viam Ostiensem, exstat in cœmeterio columna crucem habens superpositam, olim facta pro cereo paschali, ut versus inscripti docent, quos Margarinus refert. Cœmeterium Lucinæ proximum est basilicæ Paulinæ. In archivo adjuncti monasterii aservatur insignis codex Bibliorum, in quo Caroli Francorum Regis effigies præmittitur, Magni an-Calvi, non levis inter Romanos controversia est, suo loco expendenda.

XXIII. In pervigilio sancti Johannis Baptistæ, Christianæ Reginæ bibliothecam lustrare cœpimus, benignissime annuente Regina, quæ litteris ex perpetuo usu, studiisque nostris ex

AN. 1685.
- JUNIO.

gratia favet. Regiæ benignitati in communicandis bibliothecæ & musei cimeliis nemo felicius respondere poterat, quam Petrus Bellorius, scriptis suis clarus; sed morum honestate, bonitate, & modestia non minus commendandus. Bibliothecam hanc locupletant codices antiqui bis mille centum quadraginta quinque ex recensione Lucæ Holstenii, a Regina undequaque, maxime ex Petavio comparati. Vix ulla fuit in tota Italia bibliotheca, ad quam faciliorem habuerimus accessum; nec scio an Romæ ulla alia, ex qua magis profecerimus. In illa codicum multitudine exstat unus annorum octingentorum rarissimus, *Paciani Barcinonensis* episcopi opuscula continens: *Concilium Chalcedonense* optimæ notæ, item *Nicenum secundum* cum epistola prævia Anastasii tralatoris ad Johannem VIII. Ad hæc *Concilium Trosclianum* cum aliis: quæ duo codices olim fuerunt Remigianæ apud Remos bibliothecæ. Nec omittendus est codex *epistolæ Goffridi abbatis Vindoçinensis* complectens, has inter epistolam ad Robertum de Arbriscello, cujus nomen sola prima littera R. designatur. Scriptus est codex ipsius Goffridi ætate. Alterum item exemplar Florentiæ vidimus in bibliotheca sanctæ Crucis. Alius codex vulgatam *sancti* (ut præfertur) *Vilhelmi Pictavorum Comitæ vitam* exhibens, vix duo sæcula superat. *Auctore Theobaldo* recens additamentum est. Habet etiam Regina picturas maxime insignes, & numismatum magnam cum delectu copiam.

XXIV. Dominica die, natali sancti Johannis Baptistæ, ab erudito Laurentio de Zaccagnis, altero Vaticanæ bibliothecæ custode græce docto, deducti ad villam illustrissimi Gabriellii, Romanæ Curia Protonotarii, olim apud Parisios nobis noti, ibidem humanissime ab eo excepti fuimus. Ipso die convenimus in basilicam Lateranensem, quæ Salvatori nuncupata, adjunctum habet præclarissimum baptisterium sub titulo sancti Johannis Baptistæ, ex quo vocabulum etiam basilicæ inditum est. Ibi *propria sedes Apostolicorum*, ut Bernardus monachus Francus in suo Itinerario ante annos octingentos scripto testatur. Pontificii antiqui triclinii reliquiæ supersunt in proximo conventu Patrum Minorum, qui peregrinorum confessiones ad Lateranum excipiunt. Musivum ex illo triclinio in æs incidi curavit Nicolaus Alemannus in libro de parietinis Lateranensibus, ubi Salvator ex una parte cum Silvestro Papa & Constantino hinc inde; ex altera sanctus Petrus cum Leone Papa III. & Carolo

M. repræsentantur. Eo in palatio Romanos Pontifices primis temporibus degere solitos fuisse colligimus ex nova sancti Augustini epistola, quæ est in nova editione xxi. in qua de abrogatis immodicis conviviis, quæ in Sanctorum natalitiis apud Africanos usui erant, ad Alypium scribens, sibi objicit eundem morem in basilica beati Petri Apostoli receptum. Reponit id sæpe fuisse prohibitum: sed quod REMOTUS sit locus ab *Episcopi conversatione*, nondum compesci sedarique potuisse. Ciborium majoris altaris insigne est, in cujus summo duo apostolorum Petri & Pauli capita in duabus ex argento thoracatis statuis asservantur. Has thecas primum fabricari curavit Urbanus v. & ad earum ornamentum Carolus v Francorum rex pretiosa donaria, gemmas & alia id genus contulit, ac lilium in pectore utriusque curavit apponi. Inde est quod in illo ciborio symbola gentilitia Urbani v ex una parte affixa sunt; ex altera Francorum Regis, itemque hæc ad portam australem basilicæ, quæ Regem Christianissimum protectorem agnoscit. Præclara est intus, si qua alia Romæ, Lateranensis basilica, binas hinc inde porticus cum variis continuisque secundum navim sacellis. Laquear picturis & auro decoratum. Innocentius x hanc mirifice exornavit, & tantum-non instauravit. Basilica in longitudinem habet pedes amplius trecentos: pars transversa pedes ducentos viginti duos: navis latitudinis pedes amplius XLVIII. De hac basilica sermo iterum recurret inferius.

XXVI. Illustrissimum Angelum de Nuce, olim abbatem Casinensem, post Rosanensem archiepiscopum, convenimus in Cancellariæ ædibus, ubi hospitatur. Ille nobis ea latine loquendi, qua præditus est, facultate senectutis suæ infortunia exposuit, rerum omnium penuriam in decrepita ætate (est enim fere octogenarius) & cetera quæ inde consequuntur incommoda: se quasi invitum e monasterio protractum ad insulas Rosanenses, postea Cardinalis amici voluntate dignitatem resignasse cum annua pensione, quam mortui resignatarii successor ut solveret, nulla auctoritate hætenus adduci potuerat: mortuo Cardinale sibi omnia deficere. Miserati sumus optimi senis ærumnas, qui sane meliori fortuna dignus erat. Ab eo indicem veterum codicum bibliothecæ Casinensis accepimus, atque anonymi libellum de expeditione sacra sub Urbano secundo.

XXVII. In bibliothecam Alterianam jussu eminentissimi

AN. 1685.
JUNIO.

Cardinalis, qui & palatii & bibliothecæ auctor est, facilem ac liberum nobis aditum concessit vir eximiæ humanitatis Petrus Dominicus de Jarento, Abbas de Cabanis, Massiliensis, Cardinalis auditor & conclavista. Bibliothecæ elegantia palatii dignitati non impar. Eam in ordinem redegit Carolus Cartharius Urbevetanus, Advocatorum sacri Consistorii decanus & apostolici tabularii arcis sancti Angeli præfectus. In præfatione ad triplicem bibliothecæ catalogum describit palatium & bibliothecam. Utriusque architectus Johannes Antonius de Rubéis. Longitudo palatii palmis octoginta sex cum dimidio constat: latitudo palmis quinquaginta tribus cum dimidio: altitudo palmis triginta & amplius. Bibliotheca in summo sita est, ad quam lux per fenestras decem ab oriente & septentrione se infundit, australibus ventis, qui libris obnoxii sunt, interclusis. Duo sunt pluteorum ordines, inferior ac superior. Inferior viginti quinque pluteis distinguitur, quorum unumquodque in septem loculamenta dividitur: superior, ad quem per scalam secretiorem fit ascensus, totidem plutea continet, sed receptacula librorum tantummodo sex, ad quæ pergula ductum præbet. Utriusque ordinis plutea pilastidæ distinguunt, quibus volumina manu descripta & pretiosiores codices reconduntur. Inter alia illic asservatur instrumentum Johannis archiepiscopi Ravennatis, scriptum in charta Ægyptiaca. Multa ex hac bibliotheca collegimus.

XXVIII. Vigilia sancti Petri, quæ in feriam v. incidebat, Princeps Columna, Comes-stabuli regni Neapolitani, nomine Regis Catholici summo Pontifici clientelare obsequium pro regno Neapolitano more solito edidit, oblato equo albo cum septem millibus ducatorum. In processu ad montem Quirinalem, ubi tum Pontifex versabatur, præcedebant Papæ excubitores, deinde nobiles Romani, extremo ordine ministri & satellites ante Principem. Sub noctem arx sancti Angeli festivis ignibus, basilica sancti Petri, palatia, & tota fere civitas lampadibus accensis illustrata est, uti & die sequenti.

XXIX. Festo sancti Petri Missa sollemnis in ara principe Vaticana a Cardinale Cibo celebrata est. Diploma concessæ facultatis per Pontificem, cui soli sacra facere in hoc altari licet, affixum erat ad unam ex quatuor columnis, quæ baldachinum fulciunt. Duo vasa argentea cum vino & aqua in mensula posita erant, ex quibus infusum est vinum, tum aqua in
minores

minores ampullas. Utrumque quidam familiaris Cardinalis celebrantis prægustavit.

AN. 1685.
JUNIO.

Eodem die vesp̄eris apud sanctum Bernardum ad Thermas interfuimus, ubi ad altare versus chorum sub humili lapide jacet piæ memoriæ Cardinalis Bona cum hoc, quod sibi vivens ipse condidit, epitaphio.

D. O. M.

JOANNES BONA PEDEMONTANUS,
CONG. S. BERNARDI MONACHUS,
HUIUS ECCLESIAE, TRANSLATO HUC TITULO
SALVATORIS IN LAURO, PRIMUS PRESBYTER CARD.
VIVENS SIBI POSUIT.
OBIIT AN. M DC LXXIV. DIE XXVIII MENSIS OCTOB.
AETATIS SUAE LXV.

Ibidem extra presbyterii cancellos sepultus est Johannes Barrius, Congregationis Fulienſis auctor. Basilica præclara & elegans ex uno aquarum, quæ ad thermas Diocletiani usui erant, castello adornata est. Ex quo admirabilis illarum thermarum fabrica conjici potest.

Deinde lustravimus ecclesiam Patrum Cartusianorum ad Thermas Diocletiani: quæ præclarissimas stupendi thermarum ædificii reliquias continet, maxime ingentes columnas octo ex marmore granito. In horto Patrum situs est monasterii sancti Cyriaci nostri quondam Ordinis sanctimonialium, quod penitus excisum est. Hujusce monasterii Kalendarium seu Necrologium perantiquum habemus ex codice Vallicellano: in quo Assumptio sanctissimæ Virginis his verbis in Januario notatur. xv Kal. Febr. *depositio sanctæ Mariæ virginis matris domini nostri Jesu - Christi.* In eodem Kalendario triplex sancti Benedicti fit commemoratio. Prima, v. Idus Februarii *adificatio sancti Benedicti abbatis.* quod de constructione seu instauratione monasterii Casinensis, aut alterius sancti Benedicti ecclesiæ interpretamur. Secunda, xii Kal. Aprilis, Benevento, Casino castro, *beati Benedicti abbatis.* Tertia, v Idus Julii, *depositio sancti Benedicti abbatis.* quo die translatio sancti Benedicti in Galliam, seu depositio ejus corporis apud Floriacum consignari solet. Ad hæc ix Kal. Octob. *Romæ depositio sancti Liberii episcopi.* Celebratur item x Kal. Junii *Domnus Johannes patricius.* an is, cui prima sanctæ Mariæ Majoris conditio tribuitur? cujus sepulcrum, an ceno-

AN. 1685.
JUNIO.

taphium ibidem, id est ad sanctam Mariam Majorem, in inferiori navis parte ad lævam ostenditur.

Apud sanctum Petrum in Vinculis officii causa convenimus reverendissimum abbatem Cerrium, Canonorum regularium Congregationis Salvatoris Procuratorem generalem, qui nos prius inviserat. Vir est non mediocriter versatus in doctrina Patrum, maxime sancti Augustini; idemque singulari comitate præditus. De hac sancti Petri basilica plura inferius. Non longe abest sancti Martini in Montibus vetus ecclesia, nunc Carmelitarum, a Philippino eorum generali præfecto eximie decorata. In profunda ejus ecclesiæ crypta reliquiæ sunt veteris Vespasiani ac Titi amphitheatrici, quod Sylvester Papa I in oratorium convertit. Observatione dignæ sunt illius cryptæ picturæ ex musivo antiquissimæ: quas inter visitur beatissimæ Virginis imago, ad quam Sylvester genibus flexis depingitur. Ibidem ejusdem Pontificis thronus superest, in quo nonnullis Conciliis ibidem (ut tradunt) celebratis præsedit.

XXX. Petrum de Sanctis, arte pingendi & cælandi insignem, adivimus cum D. Thuillerio Academiæ regiæ præfecto, ubi quicquid veterum picturarum in antiquis delubris & monumentis reperiri potuit, pictum aut cælatum vidimus: qualis est Ovidii mausoleum, æri ab eodem Petro incisum in variis tabulis, notisque & observationibus illustratum a Petro Bello-rio, quicum tunc eramus. Idem Petrus veterum picturarum reliquias ex Romanis monumentis undequaque collegit, paratus ad eas æri incidendas, si quis laboranti opem ferat. quod a Regis magnificentia sperare jubetur.

JULIO.

I. Dominico die octava sancti Johannis profecti ad Lateranensem basilicam, vidimus in clauetro basilicæ adjuncto tres sedes, confuse cum varia suppellectile conjectas: unam ex marmore albo, olim in porticu basilicæ positam, in qua novum Pontificem collocari mos erat, *Stercorariam* appellatam: alias duas porphyreticas, & quidem perforatas, quæ ante capellam sancti Silvestri quondam exsistebant: in quibus Pontifex recens consecratus itidem sedebat. Quocirca observare juverit, Pontificem novum eo ritu in Lateranensis basilicæ possessionem induci solitum, ut primo ad thronum pontificalem, qui in apside basilicæ exstabat, *omnes Episcopos & Cardinales*, ut loquitur Cencius, ad osculum admitteret: deinde ad sedem lapideam, quæ dicitur *Stercoraria*, stantem in porticu basilicæ collocaretur, ut

AN. 1685.
JULIO.

vere dicatur: SUSCITAT DE PULVERE EGENUM ET DE STERCORE ERIGIT PAUPEREM. postea ductus ad capellam sancti Silvestri prope Lateranense palatium, primo federet ad dextram in una ex illis sedibus porphyreticis, ubi claves basilicæ a Priore sancti Laurentii acciperet in signum regiminis & correctionis: demum ad sinistram in altera sedens, easdem claves eidem Priori restitueret. Ex quo intelligitur, Stercorariam vocabulum traxisse, non ex forma (neque enim pertusa est, ut aliæ duæ) sed ex versu psalmi, qui Pontifice in ea sedente canebatur, & *de stercore erigit pauperem*. Hæc *fæda loco*, non forma, nedum usu, appellatur in libro secundo de coronatione Bonifacii VIII. auctore Jacobo Cardinale, apud Bollandianos tomo IV Maii, ubi totus hic ritus de tribus sedibus metricè describitur. *Fæda* inquam *loco*, nempe quod in porticu basilicæ exteriori constituta esset, ut ex antecedentibus intelligitur. Quando primum harum sedium usus cœperit, non constat. De his nihil invenimus ante sæculum duodecimum, quo tempore illarum fit mentio apud Cencium, uno sæculo ante natam fabulam de pseudopapissa Johanna, id est ante Martinum Polonum, qui primus eam fabulam vulgavit, ut superius vidimus. Tandem ritus ille, qui ad altius insinuantiam novo Pontifici humilitatem primum inductus fuerat, post receptam apud nimium credulos de pseudopapissa fabulam ita infamis evasit, ut ob hoc commentum penitus abrogaretur. quod sæculo superiore post Leonem X factum putamus. Ceterum non alia de causa sedes illas pertusas fuisse veri simile est, quam quod in antiquis Romanorum thermis repertæ, ob materiæ pretium, non ob formam, aptæ judicatæ sunt, quæ ad novi Pontificis sessionem adhiberentur.

Bolland.
tomo 4.
Maii pag.
471.

De baptisterio Lateranensi id tantum observamus, in capella sanctæ Mariæ ad Fontes superesse antiquissimam inter alias beatissimæ Virginis picturam ex musivo, stantis brachiis expansis cum cruce in medio pectore. Hæc pictura, aliæque proximæ diversorum sanctorum, factæ sunt pontificatu Johannis IV. Operæ pretium fuisset ut Rasponus has picturas in æs incidi curasset in historia Lateranensi: quod ab illustrissimo Ciampino exspectamus in opere suo de musivis antiquis.

Existabat quondam apud Lateranum bibliotheca pontificia: sed hæc in Vaticanum a Sixto IV translata est. Præter eam erat & alia Capituli Lateranensis, in qua modo supersunt ali-

AN. 1685.
JULIO.

quot volumina, præcipue unum de actis sanctorum, ex quo Mombritius non pauca descripsit, & tempore Sixti IV typis mandavit. cujus rei testem habemus Dominicum Mairum in Lexico, ad vocem *Birrus*. quem locum nobis illustrissimus Ciampinus indicavit.

Eodem die in monasterio sanctæ Pudentianæ conventus a nobis est optimus senex Pater Julius, hebraicarum litterarum scientissimus & scriba Vaticanæ bibliothecæ emeritus, ob idque annuo stipendio donatus a Pontifice. In ea ecclesia sane per antiqua visitur altare ligneum omnino cariosum, in quo sanctus Petrus Missam celebrasse dicitur. Aliud est in ara principe Lateranensi, cujus videndi copia non facile conceditur. In reditu e Laterano adivimus ecclesiam sancti Clementis, prisco ritu constructam, ubi chorus duplex: unus sacerdotum sub apside musivo decorata, pone majus altare, ob id Presbyterium appellatum: alter, ubi schola cantorum, ante faciem altaris, qui marmoreis ad hominis mensuram cancellis (*peribolum* veteres appellant) cinctus est. Tres sunt in inferiori choro ambones, unus ex parte Evangelii, duo ex parte Epistolæ: quorum alter lectorium habet versus altare pro lectionibus ad chorum Sacerdotum; alter pro epistola Missæ versus populum. Ad illum ambonem, qui pro Evangelio erat, stat columna ad cereum infigendum. Duo hinc inde gradus ad ambonem, unus pro ascensu, alter pro descensu. Hanc basilicam modo occupant Dominici vitæ strictioris.

Non minus antiqua est, basilica sanctorum Cosmæ & Damiani, modo Beguardorum seu tertii Ordinis sancti Francisci; vetus olim fanum: uti & sancti Laurentii in Miranda, olim templum Antonino & Faustinae (quod inscriptio etiam nunc testatur) sacrum. Recentissima vero est basilica sanctæ Martinæ, eximium certe opus Petri Cortonensis, ad primarium exemplar novæ basilicæ Vaticanæ ex idea Michaëlis Angeli a Bona-rotæ.

II. Publicæ de Theologia disputationes factæ sunt a Casinatis nostris ad sanctum Callistum, ad quas per reverendissimum sancti Pauli Abbatem fuimus invitati. Theologiæ prælector Alexander a Perusio, amicus noster, vir doctus & religiosus. Eædem disputationes non sine auditorum plausu sæpius repetitæ. In ejusmodi publicis disputationibus tres argumentari solent. Tum in medium procedens juvenis, quartæ argu-

mentationis materiam aperit: quam alius vir emeritus designatus persequitur. sic tota finitur actio. Disputationes referat de more præloquium; carmina condiunt & absolvunt.

AN. 1685.
JULIO.

Prope sancti Callisti basilicam antiqua existit basilica sanctæ Mariæ trans Tiberim, cujus loci abbas fuit ante annos octingentos Anastasius, quod ipse testatum facit in Præfatione ad miracula Basilii Magni: *URSO venerabili subdiacono S. R. E. seu medico & domestico domini nostri sacratissimi pape Nicolai, Anastasius exiguus abbas monasterii sanctæ Dei genitricis Mariæ virginis, siti trans Tiberim, ubi olim circa Domini nativitatem fons olei fluxit, in Domino salutem.* Porticus basilicæ præclaro musivo decorata est: interiora item decenter ornata. Ad lævam ingredientium sequens epigramma pavimento inscriptum erat, modo fere oblitteratum.

Roma vetus, veteres dum te rexere Quirites,

*Nec bonus * alumnus, nec malus ullus erat.*

Defunctis patribus successit prava juvenus,

Quorum consilio præcipitata jaces.

III. Duplices fiunt Romæ de rebus, quæ ad historiam & doctrinam ecclesiasticam pertinent, collationes, unæ Prælatorum & clericorum sæcularium in collegio de propaganda Fide per singulas quindenæ, vernaculo sermone: alteræ Religiosorum singulis mensibus in ecclesia sancti Cosmæ, latino. In hujusmodi collationibus hic ritus observatur, ut tres ex academia delecti, orationem quisque suam ex schedula recitent: quibus auditis adstantes objiciunt si quid opponendum habuerint. Ad utrasque collationes idemtidem fuimus invitati, immo ad dicendum provocati, maxime per Johannem Pastricum, præfectum collegii de propaganda Fide, qui nos sæpius sua visitatione dignatus est. Is nobis aliquando narravit, Leonem Allatium, amicum suum, qui eundem Pastricum librorum suorum heredem sub nomine Georgii Pastricii testamento instituerat, ex quibus nonnullos ineditos habet, unico calamo usum fuisse ad græce scribendum (quod expeditissime faciebat) per annos quadraginta: & eo tandem amisso tantum non lacrymasse. Eundem ab Alexandro VII. interrogatum, cur sacerdotium non susciperet? festive respondisse, ut semper ad conjugem ducendam esset paratior: cur vero tandem conjugem non duceret? ut ad sacerdotium expeditior. Addebat ille, Patrem Macedonem Minoritam ad impugnandum Cardina-

AN. 1685.
JULIO.

lem Bonam ea ratione fuisse impulsū, quod cum Bona vi-
uentes auctores in suis passim laudaret scriptis, nusquam de
Macedone fecisset mentionem.

IV. Missa apud sanctum Petrum celebrata, bibliothecam
Vaticanam perlustrare cœpimus, favente doctissimo ejus præ-
fecto Emmanuele Schelestrato, nostro jamdudum amico, qui,
quantum res sinebant, nobis opera sua non defuit. V. C. Lau-
rentius de Zaccagnis, custos alter, nostris etiam studiis ob-
secundavit. Bibliothecæ elegantia Sixti v. ingenio & magnifi-
centia digna, qui eam intra unius anni spatium absolvit. Gran-
dis operis inscriptionem, quæ ad ingressum posita est, omitte-
re hoc loco nefas.

SIXTUS. V. PONT. MAX.
BIBLIOTHECAM. AEDIFICAVIT
PORTICUS. CONJUNXIT
AN. M. D. LXXXVIII. PONT. III.

Amplissima illa porticus, *Belveder* vulgo appellata, in cujus me-
dio posita est bibliotheca, ad eandem jucundissimum aditum
præbet. In extrema quingentorum passuum porticu ædes bi-
bliothecæ Præfecti & Magistri sacri palatii. In vicino quadra o
spatio mirabilis illa visitur Laocoontis statua, item Hercules
truncus cum aliis nonnullis, quæ Michaëli Angelo & Peires-
kio nostrati artis miracula visa sunt. Redeamus ad bibliothec-
cam: cujus in exedrio, quod picturæ & emblemata exornant,
describendis codicibus præ vetustate vitiosis incumbunt scri-
ptores annuo stipendio dotati: in his Josephus de Juliis græce
doctus, in collegio de propaganda Fide græcarum litterarum
Professor, nobis amicus. Bibliotheca duobus magnis ædificiis
constat, quorum primum trecentos pedes longitudinis, septua-
ginta latitudinis cum pilis in medio habet. Fenestræ majoris va-
sis ex utraque parte lumen accipiunt. Libri in armariis clausis
asservantur adprehendentis altitudinem: quod reliquum est
vacui in parietibus spatii ornant elegantes hinc Conciliorum,
illinc celeberrimarum Bibliothecarum picturæ, emblematis &
inscriptionibus interjectis. Emblemata, numero XVI, quæ Six-
ti v præcipua gesta repræsentant, singula singulæ inscriptio-
nes, id est singula disticha, explicant, auctore Guillelmo Blan-
co. In hujus vasis capite duæ hinc inde ingentes porticus se se
reflectunt: a dextris codices græci, a sinistris bibliothecæ duæ

AN. 1685.
JULIO.

utrimque, Palatina & Urbinas, ambos porticus occupant parietes. Ad ingressum bibliothecæ antiqua exstat sancti Hyppolithi episcopi & martyris statua cum canone Paschali, quem Scaliger ex hoc monumento vulgavit. Codices membranei ad sexdecim millia numerantur: ex quibus antiquissimi non pauci: multi a tempore Nicolai v. & subsequen-
tium Pontificum. Palatina plerosque veteres habet. Ex codicibus græcis majoris pretii sunt *Bibliorum codex* antiquissimus, in quo testimonium de tribus personis in epistola i. Johannis desideratur. Ad eum codicem accurata est editio L X X interpretum. Aliud est exemplar rarissimum, atque (ut creditur) unicum *Chronici Alexandrini*, Messanæ sæculo superiori comparatum: *Euchologion* item Græcorum optimæ notæ. Ex latinis *Virgilias* quantivis pretii cum figuris, antiqua sacrificia, & alia id genus recondita gentilium eruditionis tam perite & eleganter exprimentibus, ut Constantini M. tempus superare videantur. Has figuras Cardinalis de Maximis in æs incidi curaverat, totum Virgilium itidem genuine expressurus, nisi mors ipsius consilia prævertisset. Littera v quadrata passim illo in codice occurrit. *Terentius* paullo minus antiquus est. Ex recentioribus, Sirleti Cardinalis, itemque Onufrii Panvinii apparatus ad historiam ecclesiasticam, quibus Baronius usus est. Alia mittimus, quæ integrum librum, immo plures exigent. Habentur etiam in eadem bibliotheca Ravennensis ecclesiæ semilacera instrumenta ex charta Ægyptiaca. In summa, pleraque ejusmodi quæ hætenus restant, monumenta ita exarata, ex ejusdem ecclesiæ archivo deprompta sunt. Non pauca excerpimus ex bibliotheca Vaticana, in his *Johannis Diaconi Neapolitani historiam de Archiepiscopis Neapolitanis* ex veterrimo codice, cujus nobis copiam facile concessit humanissimus bibliothecæ præfectus. Is nobis inter alia ostendit primarium exemplar Papæ oblatum ab Henrico VIII Anglorum rege de sacramentis adversus Lutherum, cum autographis item ejusdem Henrici litteris ad Annam Bolenam.

Sub bibliotheca Sixtus v armamentarium constituit cum hac ingeniosa inscriptione:

SUBJECIT ARMA LITTERIS.

Non prætermittendum hoc loco est egregium aliud ejusdem Sixti facinus, nempe typographiæ apostolicæ institutio, ad Concilia generalia sanctorumque Patrum opera imprimenda.

AN. 1685.
JULIO.

Hujusce typographiæ Vaticanæ prima cura demandata est Dominico Basæ Veneto, qui ad instruendam officinam, aliaque in eam rem præstanda, quadraginta aureorum millia expendit. Hæc ars quo primum anno, quove Pontifice Romam inuenta sit, disputant auctores. Polydorus id factum censet anno M CCCC LVIII per Germanum quemdam, nomine Conradum: Volaterranus post annos septem per duos Germanos, qui Augustini libros de Civitate Dei & Lactantii Institutiones primum typis Romanis ediderint. Id Paulo secundo Pontifice, qui anno M CCCC LXIV sedere cœpit, accidisse constat ex Johanne episcopo Alerienti, qui in epistola ad Paulum ipsum, cui primum volumen Hieronymi epistolarum anno M CCCC LXX nuncupavit, eum hac de re laudat. *Tuis certe temporibus ad reliquas Dei gratias hoc etiam felicitatis orbi Christiano munus accessit, ut pauperrimi quique parva pecunia bibliothecas possint redimere. An parva est hac tuæ sanctitatis gloria, ut quæ volumina vix centum aureis emi poterant aliis temporibus; viginti hodie ac minoris, bene exarata, & non mendosissime facta, redimantur? quæ vix viginti aureis lecturi mercabantur, quatuor & vilius etiam nunc emantur?* Et infra. *Hoc quoque magnum est, Pater beatissime, quod tuo tempore non minus valet pane papyrus vacua & nuda, pergameneve, quam hodie optatissimi libri emantur. Gloriantur non immerito sunt Principes nonnulli, quod sæcus non multo pluris ipsis principantibus emeretur, quam triticum; aut quam vinum inanis vehes. Ego posteris in his scriptis constanter, semper admirationi futurum trado, præstantissimos characterum imprimendorum auctores SUB PAULI SECUNDI VENETI PONTIFICATU, Roma artem exercere cœpisse, tanto artificio & industria hominum, gratia nobis hac calitus per divinum Pastorem importata, ut minoris libri emi fere possint, quam alias soleret redimi ligatura. In fine rogat, Paulus ut foveat artis hujus utilissima CONRADUM & ARNOLDUM, Germanos homines, artis imprimendi præstantes advectores. Hæc ex Johanne Alerienti, episcopo, Sixti IV bibliothecario ac secretario, qui multis sanctorum Patrum editis libris clarus, obiit anno M CCCC LXXV. annos natus LVII. ut docet ejus epitaphium in basilica sancti Petri ad Vincula. Parcat lector huic digressioni, quæ ad asserendam Paulo I I gloriam advectæ Romæ typographiæ artis, primosque advectores Conradum & Arnoldum ab oblivione vindicandos necessaria videbatur. Verum quod*

rudi

rudi minerva Romæ primum inchoarunt duo illi Germani, id deinde Nicolaus Jenſon Gallus mirum in modum ibidem illustravit.

AN. 1685.
JULIO.

In reditu e Vaticano, ad illuſtriſſimi Johannis Ciampini ædes proſecti, opus ejus curioſiſſimum de antiquis Muſivis, cui manus extrema nondum impoſita erat, cum magna voluptate vidimus, non minus recreati optimi viri benignitate & cordato in litteras animo, qui nos continuis, dum Romæ fuimus, humanitatis officiis proſecutus eſt. Hunc in adeundis Principum villis ſuburbanis, antiquis ſignis & monumentis contemplandis, læſtitandis inſcriptionibus, aſſiduum cum doctiſſimo Fabretto, paſſim etiam cum Scheleſtrato, quem modo laudavimus, ducem & interpretem habuimus. Titulos honoris, quos habet, ſive litterarum apoſtolicarum Proſummatoris, ſive Magiſtri Brevium, alioſque, unum Ciampini nomen in poſterum, cum bona ejus venia, implebit. quod de aliis etiam dictum volumus, atque æqui bonique conſultum optamus.

VII. Non prætereunda eſt, quam ſæpiſſime frequentavimus, baſilica ſanctæ Mariæ, quæ Major ſeu Liberiana & ſanctæ Mariæ ad Præſepe appellatur: ubi Litaniis, quæ ſingulis ſabbatis ibidem modulatis vocibus ſub veſperum cantari ſolent, non raro interfuimus. Id ſit detractis velis imagini oppoſitis, quam a ſancto Luca depictam tradunt. Porro detectio hæc ſit cum dignitate & modestia, non cum iis ritibus, quos alibi in Italia obſervatos vidimus, non ſatis fortaffe ad gravitatem religionis compoſitos. Ejuſmodi ritus Neapoli nobis ſuperſtitioſis nomine objecerunt quidam Hollandici hæretici, quibus, ut par erat, ſatiſfecimus. Cum vero ea de re ad quemdam pobilem verba haberemus, reſpondit ille non decere, ut quod fidei domeſticos ædificat, in gratiam exterorum & ſegregum facile abrogetur. Prædictæ litanix ad ſanctam Mariam Majorem concinuntur in egregio ſacello Pauli v. E regione viſitur altera capella a Sixto v. ob præſepe Domini ædificata, in qua ipſe cum Pio v. cujus ſepulcrum grati animi cauſa mirifice ornavit, ſepultus eſt. De hoc ſacello à viro fide digno id accepimus, cum Sixtus ante pontificatum illud aggredi voluiſſet, reſtituiſſe Canonicos, ne ſcilicet in medio cœpto præ anguſtia rei familiaris deficeret. Felicem (nam id nominis Cardinali erat) rem tuluiſſe indignanter: ſed a magno Heturriæ Duce petiſſe, ut ſe vadem Canonicis exhiberet. Conditione impetrata, Felicem manum admoſuiſſe operi, quod Pontifex abſolvit.

AN. 1685.
JULIO.

Tunc recurrisse in mentem Sixto, quod Felici acciderat, ac meditari cœpisse quo pacto Canonicos sancti Hieronymi corpore, quod in ea capella asservatur, spoliaret. Ideo sub sancti Doctoris patrocinio ecclesiam, quæ Sixto titulus Cardinalitius fuerat, ad ripam Tiberis a fundamentis instaurasse, ut in eam sacras reliquias transferret. Sed Canonicos fraudem subodoratos, eas in locum secretum abdidisse: sicque dolum dolo fuisse delusum. In illa majori sanctæ Mariæ basilica conditus est optimus Pontifex Clemens IX. Magnificum ibidem prope Francisci Toleti sepulcrum exstat mausoleum Augustini Favoriti Sarzanensis, cum specioso elogio, quod Papebrochius in libro de Pontificibus Romanis retulit. Monumentum illud amico erigi curavit liberalis litteratorum nuper fautor Ferdinandus Furstenbergius, episcopus Paderbornensis & Monasteriensis, dignus ipse aeterno monumento, quod alias suis benefactis sibi exstruxit. Omissum est a Paulo de Angelis in descriptione basilicæ Liberianæ epitaphium Platinæ, quod ad minorem portam basilicæ legitur in hunc modum.

XYSTI IV PONTIFICIS MAX. ANNO VIII. STEPHANO,
QUI VIXIT ANN. XXVII. MENS. VIII. DIES XI.
PLATYNA FRATRI BENE MERENTI POSUIT,
SIBIQUE AC POSTERIS.

QUISQUIS ES, SI PIUS PLATYNAM ET SUOS NE
VEXES. ANGUSTE JACENT, ET SOLI VOLUNTESSE.

Θάρσον ἀδελφὲ, χαλῶς θένεσκον πάλιν φύεται.

Iste Platina, præter alia opera cuivis nota, concinnavit indicem archivi arcis sancti Angeli, cujus exemplum vidimus.

VIII. Burghesiana villa, una ex præcipuis Romanorum procerum, extra portam Pinciam constructa est a Scipione Burghesio Cardinale, Pauli V nepote. In ea sunt multa signa selectissima, uti & in villa Medicea ad montem Pincium, in Ludovisiana, & aliis. Excellunt in Burghesiana duodecim Cæsarium capita, Senecæ in balneo expirantis statua ex lapide lydio. Sed hæc non sunt nostri instituti.

IX. Feria secunda consistorium habitum est Cardinalium XXI, præsentē (uti mos est) Pontifice, quo in consistorio declaratus est Palentia apud Hispanos episcopus Generalis Patrum Minimorum; & quidam alii episcopi propositi ad nonnullos

Italix episcopatus. Ejusmodi nominationes & proclamationes fiunt ceteris exclusis præter Cardinales, qui prius ad Pontificis audientiam secretam singuli palam admittuntur.

AN. 1685.
JULIO.

XIV. Patrum Oratorii Romani Vallicellana ecclesia domusque, sæpissime a nobis magno cum fructu, nec minori voluptate frequentata, fabricæ dignitate, concinnitate ac decore eximia est, sed religione ac pietate inhabitantium præstantior. Illic quatuor de rebus sacris adhortatorii sermones in dies fiunt magna cum pietate, & simplicitate vere apostolica, quæ in illius instituti hominibus integra etiam nunc viget. Hac die post concionem Patris Marchesii, viri non minus pii quam docti, religiosissimus Pater Leander Colloredus, noster in primis amicus, nos deduxit in cellam sancti Philippi Nerii, quæ integra translata est in novam Oratorii domum una cum ejus suppellectile, lecto scilicet, armariolo & confessionali; atque conversa in capellam: in qua cum Missam aliquando celebrarem, nobis Colloredus ipse (quamquam id referre pudor est) ministrare voluit. Erant vero cum bonis illis Patribus sermones nostri, quales amantium inter sese, & benevolentium esse solent, familiaritate dulces, & simplicitate aperti. Ab eo tempore venerabili loci Præposito, viro piissimo, cum Patre Leandro bibliothecario, benigne annuente, sæpius frequentavimus ejusdem loci bibliothecam, sane instructissimam, qua illustrissimus Cardinalis Baronius, & post eum Odolricus Raynaldus, illius domus alumni, suo tempore usi sunt. Multi in ea codices antiqui, multa item exempla veterum codicum. ex quibus non pauca in rem nostram collegimus. Hanc bibliothecam locupletarunt sanctus Philippus Neri, Achilles Statius Lusitanus, qui obiit anno M D LXXXI. die XVI Septembris; Nicolaus Lilius, Antonius Gallonius, & Thomas Bozius, ambo Oratorii presbyteri; Silvius Antonianus cardinalis, Petrus Molina theologus Parisiensis, & (ut alios omittamus) Scipio de Rubeis, hoc onere imposito, ut bis mille Missæ post ejus mortem pro eo celebrarentur. Unus ex antiquioribus codicibus *Apostolorum Acta, Epistolas canonicas, & Apocalypsin* continet litteris quadratis, cum hocce brevi prologo in Acta. *Nudam quidem sonare videntur historiam, & lactantis Ecclesie infanziam texere: sed si noverimus scriptorem eorum Lucam esse medicum, cujus laus est in Evangelio; animadvertemus pariter omnia verba illius anima languentis esse medicinam.* Acta dividuntur in

capitula LXXIV. quæ præmittuntur. Epistolis canonicis præfigitur absque auctoris nomine Hieronymi prologus, conquirentis, quod in prima Johannis epistola testimonium de unitate Trinitatis *ab infidelibus translatoribus* sit prætermissum. Et tamen in ipsius epistolæ contextu (quod mirere) hoc testimonium omittitur. Post Apocalypsin sequitur commentarius in eandem, incipiens ab his verbis: *Fundata per Apostolos Ecclesia &c.* JUVENIANUS HUMILIS SUBDIACONUS librum offert sancto Laurentio martyri, manipulum gestans in dextro pollice. Hic codex ante annos mille calamo exaratus est. Ibidem ex dono Statii habetur *codex Bibliorum*, ab Alcuino dicatus Carolo M. uti versus ad calcem adscripti testantur.

Nomine Pandecten proprio vocitare memento.

Hoc corpus sacrum, lector, in ore tuo.

Quod nunc à multis constat Bibliotheca dicta

Nomine non proprio, ut lingua Pelasga docet.

Et post pauca:

Codicis istius quot sunt in corpore sancto

Depicta formis litterula variis:

Mercedes habeat Christo donante per ævum

Tot Carolus rex, qui scribere jussit eum.

Tum,

Prome, quisque legas versus, orare memento:

Alcuine dicor: tu sine fine vale.

Beda *codex de circulo lunari & de sex ætatibus mundi*, cui breve *Martyrologium* præmittitur, ex bibliotheca Lugdunensi combusta ereptus, emtusque est à Johanne Boscio Calistino. In cyclo paschali hæc ad marginem leguntur, de Agobardo indubie interpretanda.

DCC LXXVIII. *Hoc anno natus sum.*

DCCLXXXII. *Hoc anno ab Hispaniis in Galliam Narbonensem veni.*

DCC XCII. *Hoc anno Lugdunum à Gothis primum....*

DCCC IIII. *Benedictionem indignus suscepi.*

DCCC XVI. *Iste cathedra potitur anno octavo.*

DCCC XL. *Hoc anno sanctæ memoriæ Agobardus Lugdunensis episcopus obiit VIII Id. Junii. Ludovichus quoque Imperator defunctus est XII Kal. Julii: & memorabile atque insigne opus, quod Forum-vetus vocabatur, Lugduni corruit ipso die intrantis autumnii, quod steterat à tempore Trajani per annos fere DCC.*

DCCC XLI *Amolo, præfati episcopi diaconus, ordinatus episcopus Lugduno XVII Kal. Februarii.*

In hoc codice Bedæ liber de divisione temporum auctorior est editis. Ad hæc *Ordo Romanus*, sæculo nono scriptus, itidem vulgaris amplior. Sed antiquius *Sacramentarium Romanum*, in quo hæc notanda. *Mense Junio die XXII sanctorum Martyrum mille CCCC LXXX. quorum vigilia cum silentio & jejunio est celebranda: & concessum est eis pro illo uno die annum dimittere in penitentia.* Hoc antiquum Indulgentiæ concessæ exemplum. *Eodem die sancti Jacobi apostoli Alphæi.* Non parvi momenti est aliud *Sacramentarium* Sublacensis monasterii, nunc Vallicellanae bibliothecæ, in quo etiam habetur vetus *Necrologium*: qui codex anno M LXXV scriptus est, præcipiente Johanne Abbate, ut docet inscriptio in hæc verba. *Anno ab Inc. Domini nostri Jesu-Christi M LXXV. Indiēt. XIII. presidente Gregorio VII. papa in cathedra apostoli Petri anno II. ob honorem Dei & amorem beati Benedicti sanctissimi abbatis & beatissima virginis Scholasticæ, hunc Sacramentorum libellum, jubente domino JOHANNES gloriosissimo abbate ex monasterio sancti Benedicti, qui ponitur in Sublaco, ob memoriam sui nominis, remediumque sue animæ, à quodam scriptore, nomine VVittone, exaratum est.* Johannes iste studiosissime eruditus fuit in venerabili monasterio sanctæ Dei genitricis Mariæ, quæ ponitur in Farfa; filius vero Johannis Comitis Ottonis, quemadmodum legitur in *Necrologio*, ubi ejus decessores recensentur. His adde præclarum ingensque volumen, continens collectionem variorum Conciliorum editorum, cum insignibus emendationibus. In eo epistola secunda Siricii Papæ, non *Episcopo Mediolanensi*, ut in editis, sed *universis Episcopis* missa dicitur. In alio codice varii sermones LUCULENTI. Volumen XVIII Crisconii collectionem comprehendit, in cujus medio hæc inserta sunt mendoſa quidem, sed tamen observatione digna. *Concordia canonum à Cresconio Africano episcopo digesta sub capitulis trecentis.* Iste nimirum Cresconius bella & victorias, quas Johannes * Des. Patricius apud Africam de Saracenis gessit, hexametris versibus descripsit sub libris . . . Postremo *Catena græca in Johannem optimæ notæ, & Vita sancti Erasmi martyris* auctore Johanne subdiacono & monacho Casinensi, qui postea Pontifex fuit sub nomine Gelasii secundi. Hactenus de bibliotheca Vallicellana.

Sancti Andreæ de Valle, quæ Theatinorum, basilica est una ex ornationibus Urbis. Porta major, picturæ tholi per Lanfrancum, sacella, Pii secundi ac Pii tertii monumenta, curiosorum oculos mirifice oblectant ac recreant.

AN. 1685.
JULIO.

Invisimus ipsa die eminentissimum Cardinalem Casanatam, à quo volumina quædam de ritibus Baptismi & Ordinationum, ex Calabria recens ad se allata, accepimus, cum aliquot hominibus & actis sanctorum. Idem nobis multa communicavit ad rituum Romanorum collectionem, quam brevi, Deo dante, sumus edituri: multa item ad ritum Baptismi & Ordinationum cum suis figuris ex duobus rotulis seu voluminibus Landulfi episcopi (ut putamus) Capuani, qui ante annos septingentos in vivis erat. Sic undequaque vetera monumenta colligit studiosissimus Cardinalis, qui editorum librorum præclaram bibliothecam sibi comparavit.

XVI. Illustrissimus Archiepiscopus Rossanensis nos secum duxit in monasterium sancti Callisti, ubi nostri ex sancto Paulo Casinates per ætatem degunt ob male sanam alterius loci per illos æstus temperiem. Istuc ex sancti Pauli archivo allatus est pretiosus codex Bibliorum, cui præmissa est, ut superius meminimus, Caroli Francorum regis effigies, Magni an Calvi, an alterius, apud Romanos non levis disceptatio est. Archiepiscopus Rossanensis cum Nicolao Alemanno in libro de parietinis Lateranensibus, ubi hanc effigiem retulit, uti & Cornelius Margarinus in collectione inscriptionum, quæ apud sanctum Paulum exstant, Caroli M. effigiem esse existimant, quæ de re mox laudatus Archiepiscopus dissertationem edidit singularem. Præcipua ejus argumenta sunt, quod habitus depicti Regis optime conveniat cum illa vestium descriptione, quam Eginhardus affert. Deinde quod Ingobertus *referens & scriba*, de quo fit mentio in versibus post effigiem adjunctis, sit ille Ingobertus Comes, qui tempore Caroli M. & Ludovici Augusti vixit, ut ex vita Ludovici Pii & ex aliis discimus. Sed cum bona venia illustrissimi viri indubie existimamus, hanc esse Caroli Calvi effigiem: tum quia facies oblonga, aliaque vultus lineamenta apprime respondent illi Caroli Calvi imagini, quæ apud eruditum Baluzium in tomo secundo Capitulorum ex codice Mettensi proponitur: tum quia scriptura codicis prorsus convenit cum illa, quæ Caroli Calvi tempore usitata erat: tum quia multos Bibliorum ejusmodi libros similes describi curavit idem Rex, quales sunt Mettensis, Ratisponensis, & alii. Hanc effigiem lectorum oculis denuo subjicimus, ut de hac cujus sit sententiam ferant.

Apud Alemannum illud deficit, & quod Regis corona super-

Capitul. 10.
x. col 1276.
& seq.



ne clausa non sit, & quod litteræ globo inscriptæ apud eum desiderentur. Apud Margarinum vero, Caroli uxor non ita vetula est in autographo, & armigeri duo plus virilis ætatis præferunt.

Quoniam vero ad gentis nostræ historiam plurimum interest, ejusmodi picturarum non modo specimina habere, sed etiam explicationes; non ab re erit, paucis hanc Caroli imaginem interpretari, eum ad modum, quo præstantissimus Cangius alias duas Lotharii & Caroli Calvi figuras interpretatus est in Glossario, ubi Armigerorum officia exponit. Hic igitur exhibetur Carolus in throno sedens, vultu oblongo, rasoque mento, attonsis crinibus, cum corona in capite, gemmis ornata & supernè clausa; dextra protensa sceptrum pectori apprimens, sinistra globum tenens cum litteris, quæ OE dipum quærunt. In cuspide prima est littera C. Littera proxima potius K quam R nobis videtur, nam similis littera K in tomo secundo Capitularium ad effigiem Lotharii imperatoris exprimitur. Si tamen litteram R quis esse contendat; tres superiores litteræ C R S cum laterculo, & tres aliæ, quæ a latere ad dextrant legentis sunt, Caroli regis monogramma constituere videntur, ut legendum sit, CAROLUS REX. De aliis nihil solidi nobis occurrit: alii fortasse melius divinabunt. Regis toga cærulei coloris, aureis floribus respersa; pallium rubeum fibula dextro humero adstrictum: utriusque limbus opere phrygio exornatus. Tibialia absque fasciis illis, quales Monachus sancti Galli in libro primo de vita Caroli M. ipsi attribuit. Calcei *Romano more formati*, ut Eginhardi verbis utamur. Supra caput Regis quatuor virtutes cardinales. A sinistris Caroli conjux cum una puella ad famulatum. Reginæ toga purpurea texturam operis phrygii in medio & in extremis habet: pallium ex panno lineo subtilissimo a capite ad ima defluit a tergo; pars ima circum brachia convolvitur. Armigeri duo a dextris, cum sagulis, quæ ad genua non pertingunt; tibias etiam seminudas habent. Unus utraque manu oblique jacentem gestat enssem regium, cujus capulus cum triplici quadruplicive retinaculo, crucis instar, efformatur. Alter denique hastam cum clypeo gerit. Hæc fere omnia rudi minerva exprimunt adscripti verius, quos cum multis aliis Margarinus refert.

*Rex cæli Dominus solita pietate redundans,
Hunc CAROLUM Regem terre dilexit herilem*

AN. 1686.
JULIO.

*Ibid. col.
2279.*

AN. 1685.
JULIO.


*Tanti ergo officii ut compos valuisset haberi ,
Tetraſti implevit virtutum quattuor almo.
Imminet hic capiti de vertice cuncta refundens.
Denique ſe primum tunc omnia rite gubernat ,
Prudenter , juſte , moderate , foriditer , atque
Hinc inde angelico ſeptus tutamine ſacro ,
Hoſtibus ut cunctis exultet pace repulſis.
Ad dextram armigeri prætendunt arma miniſtri ,
Eccleſiam Chriſti invictus deſenſor in ævum ,
Armipotens magnis quis ornet ſæpe triumphis.
Nobilis ad levam conjux de more venuſtat ,
Qua inſignis proles in regnum rite paretur.*

Deinde ſequitur prologus totius libri , apud Margarinum inter-
ger relatus , in quo de Carolo itidem hæc leguntur.

*Hæc namque invenies præſenti pagina libro ,
Quem tibi quemque tuis Rex Carolus ore ſerenus
Offert Chriſte tuiſque cliens & corde fidelis.
Ejus ad imperium devoti pectoris artus.
INGOBERTUS eram referens & ſcriba fidelis ,
Graphidas Auſonios æquans ſuperanſve tenore
Mentis , ut auricomum decus illi creſcat in ævum :
Quem fecit præſcos Chriſtus tranſire Monarchas ,
Et ſibi cognovit duce Chriſto ſceptra tenere.*

Ex his verſibus nihil certi elicitur pro Carolo Magno , nec ſane
pro Calvo. Nam quod *præſcos monarchas* rex ipſe anteſſe
dicitur , poëtica exaggeratio eſt. Ingobertum , non Comitẽ
aut Referendarium , ſed amanuenſem fuiſſe nullatenus dubita-
mus.

XIX. Michael Molinus , Hiſpanus præſbyter , ob ſuſpectam
in rebus moralibus doctrinam , comprehenſus eſt juffu Roma-
næ Inquiſitionis , aliis aliter atque aliter de eo opinantibus. Li-
ber ejus , qui *Manuductio ſpiritualis* inſcribitur , hiſpanice pri-
mum , deinde italice multoties Romæ editus eſt , libellis ſcriptis
atque editis impugnatus , quos in indicem cenſores retulerunt.
Inde inferunt conjectores , Molinum , non ob libri vulgati doc-
trinam (tametiſi poſt comprehenſum auctorem ab Hiſpani-
ca Inquiſitione proſcriptus eſt , Romana ægre ferente , quod
occupatum eſſet ejus rei ab aliis judicium) ſed ob ſcriptas ad di-
verſos epistolæ , aut certe ob pravæ ipſius ſententiæ interpre-
tationes a ſuis aſſectis factas , in carcerem fuiſſe conjectum , ex
quo



quo non facile se extricabit.

Ipso die cum ad hortos Montaltenses Ciampinus & Fabretus nos deduxissent; Ciampinus nobis dono dedit delineatas cujusdam tumuli, prope Neapolim reperti, figuras duas, quibus repræsentatur baptismus per immersionem simul & superfusionem collatus ab homine laico. Langobardos aut Græcos esse quorundam barba prolixior indicat. nam Romano ritu mentum rasum erat. Prædictas figuras hoc loco exhibere juvat. Hac de re iterum inferius ad x i Augusti. Repertus est autem tumulus ille apud Chiaiam, Neapoli suburbanum opidum, in villa Principis Caramanici: cujus tumuli delineationem illustrissimus Andreas ab Aquino, Principis cognatus & episcopus nuper Tricaricensis, eidem Ciampino submitit. Ex una parte unius Regis ac Reginae in uno fonte sacra tinctio exhibetur.

XX. Raphaël Fabrettus, vir scriptis & eruditione clarus, novam nobis ostendit veterum inscriptionum collectionem ab se factam, quæ unum facile volumen conficiet, aliæ omnino ab editis. Idem nobis librum suum de Aquæductibus, atque alterum de Columna Trajana liberaliter impertiit. In libro de Aquæductibus inter alia multa variæ eruditionis Fabrettus probat, congruum Romanum, in ædibus Farnesianis asservatum, ad cujus normam diversæ mensuræ pro legitimis fabricatæ sunt, omnino supposititium esse. Ex variis inscriptionibus apud Fabrettum asservatis, duæ nobis observatione digniores visæ sunt. Una cujusdam Martyris epitaphium est, lapidi marmoreo inscriptum, habens ex altera parte fragmentum sodalitiî paganorum sub deo Silvano, cujusmodi multæ Christianorum inscriptiones in Romanis cœmeteriis visuntur, ex una parte epitaphium pagani, ex adversa Christiani præferentes. Altera inscriptio, quam apud Fabrettum vidimus, sollemnem paganorum *Diis Manibus* dicationem, etsi hominis sit Christiani, exhibet hoc modo.

AN. 1685.
JULIO.

Fabrett.
pag. 74 &
seqq.

D. MA. SACRUM. XL.

LEOPARDUM. IN. PACEM. CUM

SPIRITA. SANCTA. ACCEPTUM

EUMTE. ABEATIS. INNOCINTEM.

POSUER. PAR. Q. AN. N. VII. MEN. VII.

Hic manifestus de Confirmationis Sacramento locus est, referendus utique ad prima illa tempora, quo cruda adhuc quorundam in cordibus Christiana religio aliquid de pagani-

AN. 1685.
JULIO
Roma *subt.*
lib. 3. cap.
22.
Smet. fol.
143. n. 3.

Grut. M
XLIX
num. 2.

ci ritus superstitione retinebat. Numerus $x\cdot l$. est ad designandum tumulum, quales numeros in Roma subterranea sæpius offendes. Aliud id genus Mariniani Christiani hominis epitaphium cum inscriptione D. M. reperitur apud Smetium. Nam præterquam quod Marinianus *bonæ memoria* appellatur, ibidem ex adversa lapidis parte habetur A & Ω cum chrismo in medio: quæ signa sunt hominis Christianis sacris addicti. Celsus Cittadinus in tractatu de articulis cap. II. paulo aliter alteram epitaphii partem refert. Alia exempla vide sis apud Gruterum a pag. ML. apud quem invenies quemdam, nomine Adjutorem, qui *POST ACCEPTAM PÆNITENTIAM migravit ad Dominum, Anastasio Consule.*

XXII. Dominica cum Ciampino & Fabretto lustravimus thermas Antoninianas, id est Antonini Caracallæ, ad portam Capenam, opus ingens & perquam magnificum, ut ex spatio & ædificii reliquiis conspicuum est. Locus Patribus Jesuitis cedit. In reditu obviam fuerunt basilicæ sanctorum Nerei & Achillei, tum sancti Cæsarii, in quibus ciboria & ambones ad priscum ritum: monasterium sancti Sixti cum ecclesia, quæ olim sancto Dominico primum, deinde sororibus ab ea institutis attributa, modo inculta, uti & monasterium; postremo basilica sancti Johannis ad portam Latinam, quam tunc duo Galli eremitæ incolebant, eo in loco sita, ubi quondam stabat Dianæ templum, cujus reliquiæ etiam nunc conspiciuntur: & ante aream Oratorium dictum sancti Johannis in Oleo, ubi dolium, oleum, & capilli sancti Johannis sub altari assevari dicuntur. De monasterio sancti Sixti legimus in bibliotheca Chigiana vetus instrumentum, quo *magister Centhius Gregorii Ranpazoli, in presentia Stephani Cardinalis sanctorum Apostolorum, reverendo & per omnia referto fratri DOMINICO Priori venerabilis monasterii sancti Sixti, recipienti pro ipso monasterio, & pro monasterio sanctæ Mariæ in Tempulo & eorum servientibus, in perpetuum concedit M XC libras prov. Sen. quas domine Eugenie olim abbatissa dicti monasterii sanctæ Mariæ in Tempulo mutuaverat, & de quibus ipsi pignus fecerat, scilicet in hortis ipsius monasterii de Circulo maximo. Actum anno M. CC. XXI. pontificatus domini Honorii Pape anno V. Indict. IX.*

XXIII. Ab iisdem amicis per portam Flamineam, quæ Populi modo appellatur, ducti ad aquam Acetosam, observavimus situm monasterii sancti Leucii, uno milliari extra portam;



& ad veterem viam Salariam, in cryptis sub rupe cavatis, sepulcra veterum Romanorum, qui non crematis ibi, sed integris corporibus conditi fuerant. Primus, ut notum est, cremari corpus suum mandavit Lucius Sylla Dictator, multorum sibi conscius odiorum, veritus ne in se post obitum Mariana factio auderet, quod ipse ausus fuisset in Marium. Postmodum ita cremandi mos invaluit, ut probum ingens visum sit supremis ignibus caruisse. Antonini Pii principatu ad primarium redditum est morem.

XXVIII. Cum ad villam Benedicti ab eminentissimo Cardinale Estræo, qui identidem eo cum viris litteratis secedit, ad cœnam essemus invitati, proximam sancti Pancratii basilicam interim adivimus, ubi olim monachi nostri Ordinis, nunc seminarium Carmelitarum Excalceatorum: ex quibus Pater Dominicus Gallus apud Romanos magno in honore habetur. In ecclesia exstat ciborium insigne cum corpore sancti Pancratii, duoque ambones, quorum unus constructus est anno M CC XLIX. per Hugonem abbatem. Mauro abbati sancti Pancratii Gregorius M. epistolam scripsit observatione dignam, de substitutis ibidem a se loco presbyterorum monachis, *ut ad sacratissimum corpus beati Pancratii quotidie opus Dei peragatur.* Calepodii cœmeterium eidem basilicæ adjacet. Prope locum occisus est Borbonius.

Greg. M.
lib. 3. epist.
18.

XXIX. Cum amicis nostris varia Romanæ urbis monumenta conspeximus, tum in hortis Farnesianis, eo in loco sitis, ubi quondam Imperatorum palatium erat, prope amphitheatrum: tum in arcu Constantini, ex Trajani arcus lapidibus facto: in quo peditum calcei ferreis clavis sub planta muniti; equorum soleæ ferro nudæ apparent: tum in ecclesia beatæ Mariæ Novæ, ubi sanctæ Franciscæ corpus in egregia Confessione religiose asservatur, sepultusque est Gregorius XI. cui Roma suorum Pontificum istuc regressum debet. denique in adjunctis Olivetanorum hortis, in quibus duplicis paganorum templi reliquæ (Castoris & Pollucis Poggii fuisse censeri) exstant, cum duobus fornicibus sibi adversis. In hortis Farnesianis ad cryptofontem insignis præ aliis nobis visa est statua feminae sedentis complicatis manibus, vultu ad tristitiam mire composito. In inscriptione arcus Constantini illud observatione dignum, quod Senatus ejus auctor Constantinum *instinctu Divinitatis* de Maxentio tyranno remp. ultum fuisse dicit. Utinam inscriptio hæc,

AN. 1685.
JULIO.

immo arcus ipse, rimas ex stillicidio agens, religiosius haberetur, & ab effractorum injuriis vindicaretur. Vixisset Sixtus v. & amphitheatrum, stupendum illud opus, integratum nunc habemus: in cujus angulo sancti Ignatii ædícula cernitur, ad eum (ut creditur locum) ubi sanctus martyr feris objectus est. Præter numericas notas, quæ singulis mirandi hujusce ædificii ordinibus appositæ sunt, Tiburtini ingentes lapides quadrati, quibus immensum illud opus constructum est, extima in facie variis crebrisque foraminibus interpuncti visuntur. De illorum foraminum usu atque origine variæ circumferuntur sententiæ. Sunt qui non parum veri simili conjectura existiment, id factum opera institorum & artificum, qui cum ad nundinas venumque mercimonia sub tentoriis exponerent, adactis solo furculis, ex adverso perruptos amphitheatri lapides fodiebant ad perticas sustinendas, tectumque componendum. Vulgata est hac de re Josephi Mariæ Suaresii episcopi Vasionensis Diatriba singularis.

XXX. Dies festus sancti Ignatii Confessoris sollemni ritu celebratus fuit in ecclesia nominis Jesu, quæ Professorum est. Sub sinistra transversæ crucis ara sancti Ignatii corpus, ad altare majus Bellarminus Cardinalis jacet. In ipsa Patrum domo cella, quam vivens incoluit Ignatius, in oratorium conversa est. Vasa ex argento, candelabra, aliaque id genus sacra supellex infinita in illa ecclesia. Magnificum item est Patrum Collegium Romanum: cujus ecclesia, sancti Ignatii titulo insignis, vix ulli alteri post Vaticanam cedit. Hic pro testudine est pictura recens, quæ oculos mire fallit, ut si in apto visionis loco constiteris, jures veram esse, non fictam testudinem. R. Pater Fontana Assistens pro Gallis, & P. Semerius Remus nos amicitia, & sæpius præsentia sua dignati sunt. Exigua, sed quovis cimeliarchio pretiosior est sub nomine sancti Andreæ sacra Novitatus ædes in monte Quirinali, opus Equitis Bernini, celebris sculptoris & architecti: cujus vitam illustris Academicus Parisinus Petrus *de la Chambre* gallico idiomate eleganter composuit. Jacet in hac ædícula Palavicinus Cardinalis, insignis ille Tridentini Concilii historiciæ scriptor, qui & vitam Alexandri VII. ineditam latine scripsit.

Eadem die in quemdam novellarum schedularum auctorem animadversum est. Presbyter ejusdem facti reus in carcerem coniectus, postea Romanorum procerum intercessione libera-

tus sollempni more in festo decollationis sancti Johannis Baptistæ. quo die singulis annis reus aliquis rogatu Sodalium sancti Johannis liberari solet.

AN. 1685.
JULIO.

XXXI. Cum eminentissimum Cardinalem Carolum Barbarinum adiissemus, ille post omnimodam humanitatem librum Synodi Sublacentis a se celebratæ; itemque funebrem de Francisco patruo suo orationem nobis concessit, fecitque potestatem adeundi bibliothecam suam. quod in subsequens tempus distulimus. Idem nos in curru suo ad hortos suos Vaticanos deduxit. Palatium, quod Prænestinense appellant, Barbarino Principi, atque adeo Cardinali proprium in monte Quirinali, situ, elegantia, picturis, signis, hortis, aliisque rebus exquisitissimis inter præcipua censendum est. Platea infra palatium Delphini nomine pro felici Ludovici Magni natalitate a Barbarinis Francico regno addictis instructa, & salientibus ornata, nunc quoque Delphini vocabulum retinet.

I. Per Kalendas Augustales, sollempnes ex veteri more munusculorum in Urbe ad amicos missitationes fiunt, quorum etiam nec expertes fuimus. Sed parum attinet singula hæc commemorare. Illud potius observandum, quod ab homine docto accepimus: quem cum de libro Diurno Romanorum Pontificum, cujus exemplar invenire magnopere avebamus, interrogarem, ab eo nobis responsum est, Hilarionem Rancatum Cisterciensem, hominem studiosum & eruditum, qui Ughelli præceptor fuerat, habuisse antiquum ipsius libri exemplar, quod Allatius commodato cum accepisset, una nocte exscripserit, & postea publicare voluerit: at impressionem prohibitam fuisse. Sed tandem post multam inquisitionem votis potiti sumus, reperto veteri codice, ex quo Garneriana editio multis in locis emendari, novisque aliquot formulis augeri potest.

AUGUSTO.

Ipso die ad sanctum Petrum in Vinculis, catenæ beati Petri de more ostensæ sunt. Locus est in Exquilis, antiquus Cardinalis titulus sub nomine Eudoxiæ conditricis; atque adeo antiqua basilica, cum columnis marmoreis, & cum multis novis passim ornamentis ex munificentia Alberti Cardinalis Brandenburgensis. Hanc incolunt Canonici regulares sancti Salvatoris. Magnificum est in ea sepulcrum Julii II. ex genio Michaelis Angeli Bonarotæ partim sculptum, cum statua Mosis, quæ artis egregium specimen præbet. Ibidem olim, ut cum novis an-

AN. 1685.
AUGUSTO.

tiqua conferamus) Arator subdiaconus, pontificatu Vigiliæ Papæ, carminum suorum libros duos cum ad confessionem beati Petri obtulisset, *postea in ecclesia beati Petri, quæ vocatur ad Vincula*, in frequenti religiosorum, clericorum & laïcorum nobilium conventu recitavit quatuor distinctis diebus, sicuti vetus codicis Reginæ inscriptio nos docet, *ut uno die mediæ libri tantummodo legeretur, propter repetitiones assiduas, quas cum favore multiplici fieri postulabant. Eadem recitatio*, subdit inscriptio, *facta his diebus, prima Idib. Aprilis: secunda xv Kal. Maii; tertia viii Id. Maii; quarta vero iii Kal. Junii, tertio post Conf. Basilii v. c. Indiæ. v. p. i.*

Eodem die cum illustriss. Ciampino & Victorio Brevium signatore, & cum Fabretto & Schelestrato, per pagum Camœnarum, uno ab urbe lapide, primum ad cœmeterium Callisti, quod alio nomine Prætextati & Lucinæ dicitur, tum ad circum aurigationum, ubi circa duas metas, quas media spina dividebat, concurrebant sex ex ordine currus, ex loco duorum carcerum procedentes. Sub utraque meta est antrum seu crypta Consi, id est (ut quibusdam videtur) Neptuni, de quo Tertullianus. Obeliscus insignis, qui modo in platea Agonali seu Navoniana erectus cernitur, ex hoc circo effossus est. Non longè ab hoc circo ad viam Appiam cernitur mirandum Metellæ, Marci divitis conjugis, mausoleum: cujus muri tanti sunt, ut viginti pedes latitudine superent. Ad viam Appiæ duo hinc inde latera infinitæ veterum mausoleorum reliquiæ ferme Neapolim usque: alia pyramidum instar, ut Cestii epulonis ad portam Ostiensem; alia ut ædiculæ, alia denique ut lapidum congestorum moles. Sexto ab urbe lapide Ustrinum corporum prope Statuariam (sic locus vocatur a recentioribus) cernitur: ubi spatium amplissimi circi, templum fere integrum, & basilica seu prætorium, utrumque cum amplissimis fenestris.

II. Bibliothecæ Altaempensis libri editi magna ex parte distracti; manuscripti adhuc venales ad duo millia. Codices græci bonæ notæ circiter ducenti: *Concilii, Ephesinum, Chalcedonense, CP. contra Monothelitas, Nicanum secundum; Gregorius Nazianzenus, Basilii*, cujus *Liturgia* in volumine seu rotulo maximo perantiqua; *Chrysostomus, Procopius, Heronis Alexandrini spiritualia, Hermogenes*. Præter vetustos codices, alii numero centum transsumti sunt ex antiquis, quos Paulus v. in Vaticanum transportari curavit. Cum bibliothecæ AL-

taempensis indicem revolveremus, occurrit in illo indice *Ciceronis liber de Republica*. Ilico exsiliit animus lecto titulo præclari operis, quod jamdudum excidisse creditur. Sed breve gaudium fuit, cum viso codice designato, advertimus hoc opus nihil aliud esse, quam Philippicam primam Ciceronis, quæ ab his verbis incipit, *Antequam de Republica, Patres conscripti, dicam &c.* quæ prima verba occasionem dederunt indicis auctori non satis accurato, ut *de Republica* inscriberet orationem illam, quæ titulo in codice carebat. Exstabat opus illud Ciceronis ad tempus Gerberti, testante ejus epistola LXXXVII ad Constantinum Scholasticum Floriacensem: cui suadet, ut iter ipsius comitentur Ciceronis opuscula *de Republica & in Verrem, & quæ pro defensione multorum plurima Romana eloquentiæ parens conscripsit*.

III. Cum illustriss. Victorio invisimus museum nobilis civis Romani Landi, quod primum fuit ipsius avunculi Magnini. In eo multa curiosa instrumenta, quibus cruciati sunt Martyres, omne genus armorum; Belisarii clypeus votivus ex ære, Viti-gen regem supplicem exhibens; gemmæ, conchæ &c. quæ omnia Landus accurate depingi curavit. Varii item ibidem lapides cum inscriptionibus, quarum una est de puero quinquenni immaturius extincto, marentibus parentibus, qui dolorem suum testati sunt his verbis: *DIS INIQUIS, qui rapuerunt animulam tuam &c.* Romæ in ædibus Porciorum non ita pridem consimilis fere, depictis duabus manibus erectis, legebatur inscriptio.

PROCOPE. MANUS. LEBO. CONTRA.
DEUM. QUI. ME. INNOCENTEM. SUS-
TULIT. QUÆ. VIXIT. ANNOS XX.
POS. PROCLUS.

De hoc more diis imprecandi iis consueto, qui immatura morte obiissent, legendi Tacitus lib. II. Annalium in oratione Germanici num. LXXI. Suetonius in Tito cap. x. & Livius lib. XXV. sic Servianus, ab Hadriano interfectus, diis imprecatur, apud Dionem in lib. LXIX. Qui religiosiores erant parentes, dicebant liberis immature extinctis se tumulum erigere *contra votum*. cujusmodi exempla multa occurrunt in tumulis non modo ethnicorum, sed etiam Christianorum, ut via Latina in cœmeterio non ita pridem detecto, hæc inscriptio in-

AN. 1685.
Augusto.

venta est , relata in Roma subterranea , præfixo Christi monogrammate.

VAL. NICE. Q. E. ANN. X.

VAL. EXSYPIUS. FILIAE

CONTRA VOTUM.

* Gruter.
M LVII
num. 2.

Alia hujusmodi non pauca occurrunt apud Gruterum in inscriptionibus Christianorum : ubi & parentes * *breves* ob eandem causam appellantur. Mater quædam, vocabulo Claudia Agapomene, imperante Claudio, his verbis in filiorum suorum epitaphio usa est : *Filiis suis infelicissimis, qui ætate sua non sunt fruniti, fecit mater scelerata* &c. Hoc epitaphium integrum est relatum a Marco Velsæro in epistola LXXII. ubi quæstionem quasi difficilem movet, cur mater hoc loco se *sceleratam* dicat. Hanc autem vocem usurpat ob scelus in se, non a se perpetratum in morte liberorum. Apprime ad hunc locum Ugutio apud eruditissimum Cangium : *Sceleratus, in quo fit scelus : scelerosus, per quem fit.*

V. Dominica, eminentissimi Cardinalis Pamphili ædes adivimus, eidemque obtulimus librum de Liturgia Gallicana, quem etiam quibusdam aliis dedimus. Bibliotheca Principis, quæ Innocentii x fuit, servatur in ædibus Pamphilianis ad plateam Navonianam. Bibliothecæ præfectus abbas Spina liberaliter se gerit adversus homines litteratos, quos suis officiis juvare potest.

I X. Cum Reginaë Christinæ eundem Liturgiæ librum obsequii & grati animi causa offerremus, nobis significavit sibi displicere, quod *Serenissima* nomine, maxime apud Gallos, afficeretur : se invitam in hanc querelam descendere, sed coactam indignitate rei, ut omnes demum intelligant, suum sibi nomen sufficere absque alio titulo aut elogio. Post aliquantam moram sermonis & colloquii, quo nos dignata est, discentes benigne dimisit, oblato suo favore & præsidio suæ bibliothecæ in subsidium studiorum nostrorum.

In ædibus illustrissimi Severoni ostensæ sunt nobis bullæ tres authenticæ, quarum una erat Benedicti XII. asserentis præcessorem suum Johannem XXII. nihil de statu Piorum ante resurrectionem diserte statuisse. Hæ bullæ postea in archivum apostolicum translatae sunt. Apud Guidium sculptorem vidimus novum atque insigne monumentum, ad Regis honorem fabri-

cari

cari coeptum. Est ingens ex uno lapide marmorea moles, Famam exhibens, Regis præclaris gestis describendis, Invidia fremente ac perperam insultante, intentam; manu sinistra circularem Principis figuram oblique tenentem. Hæc figura posita est super librum de historia Regis, effigie Temporis librum sustentante. Inter insignia circum tropæa cernuntur antiquorum heroum imagines. Hoc monumentum Versalias modo advectum esse ex aliis comperimus.

X. Die festo sancti Laurentii, basilicam ejus nomine extra muros in agro Verano constructam, unam ex patriarchalibus ecclesiis, adivimus, sacra ibidem celebraturi. Eodem convenerunt Ciampinus & Fabrettus, quibuscum ecclesiæ fabricam & cetera omnia observavimus. Insigne ibidem ciborium eum Confessione, in qua sancti Laurentii & sancti Justini martyrum reliquiæ asservantur. Duo item in navi ambones: unus qui stat ad latus epistolæ, pro Evangelio, tum quia ornatior est, tum quia adjunctam habet ex marmore columnam pro cereo. Ingressum ecclesiæ antiquitus ex adversa parte fuisse veri similia indicia suadent. Ad arcum, qui fornicem apsidis claudit & cingit, apparet Pelagii papæ I effigies ex musivo, qui basilicam post Constantinum instauravit auxitque. Portam majorem Honorius III construxit, cujus ibidem ex musivo effigies ante atrium cernitur. In ipso atrio depicta est vita sancti Laurentii, atque adeo baptisus sancti Romani per ipsum: qui dextra Romanum nudum, utpote qui aquis immerfus erat, benedicit; sinistra urceum aqua plenum super ejusdem caput effundit. Urceus iste ex ære etiam nunc ibidem in sacrario ostenditur. Ergo quia caput in aquam mergi non poterat, superfusio aquæ adhibebatur, immersio ad reliquum corpus, ut nulla pars hominis expers esset sacri lavaeri. In actis sancti Gratiliani mss. Felicissima, ab ipso Christianæ religionis mysteriis imbuta, *urceum cum aqua*, ut baptizaretur, ei obtulisse dicitur. Hodie quoque Græci ipsi, præter trinam immersionem, etiam aquam capitibus baptizandorum superfundunt, ex antiquo haud dubie ritu. Huc spectat Neapolitani tumuli delineatio, quam superius exhibuimus. Præter ea in eodem sancti Laurentii atrio pingitur Honorius III. Eucharistiam sinistra, dextra benedictionem impertiens Petro Comiti Antisiodorensi, quem in ea basilica Imperatorem Constantinopoleos ex Latinis tertium coronavit, teste Onuphrio Panvinio. Damasus III. ex una, ex altera ingressus parte:

SAN. 165,
AUGUSTO.

Guillelmus Fliscus cardinalis, Innocentii IV ex fratre nepos, sepultura donati sunt. Et Guillelmus quidem in egregio mausoleo nobilis cujusdam pagani, in quo repræsentatur duorum conjugum hymenæus, sibi dextras jungentium, cum duobus pronubis, qui utrumque complectuntur. Sic profanis tumulis Christiani non raro quasi propriis usi sunt. Sic Innocentius II teste Romano sancti Petri Canonico, apud Lateranum sepultus est in porphyretico Hadriani imperatoris sepulcro, *cujus coopertorium est*, inquit, *in paradiso beati Petri super sepulcrum Præfecti.*

In atrio Laurentianæ ecclesiæ australi, quod claustro pervium est, exstant veteres tumuli non pauci, in his Bonizonis abbatis è nostris. Quippe locum monachi ante Canonicos regulares infederunt, & quidem non semel. nam sæculo decimo Cluniacensibus ab Agapito II concessa est hæc basilica, curante Alberico nobili Romano, ex Panvinio; & deinde illis, incertum quo casu, amotis, Honorius denuo locum monachis nostris, quos ex monasterio sancti Silvestri in Campo Martio submoverat, restituit, ut ex notis ad Romanum sancti Petri Canonicum discimus. Sixti IV pontificatu illic perseverabant nostri, ut ex indice taxationum tunc facto intelligimus. Panvinus auctor est, Gregorium VII & Paschalem II ex eodem loco produxisse: sed affirmare nolim. Ad basilicæ septentrionalem partem descensus est in proximum Cyriacæ cœmeterium.

Alia est (ne quid dicamus de aliis) in colle Viminali basilica sancti Laurentii in Panisperna, antiquis sancti Laurentii *in Formoso* (ita enim scribebant) ubi sanctus Martyr ustulatus fuit. Ibidem sepultus est magnus ille Guillelmus Sirletus cardinalis, cum honorifico, ut par erat, epitaphio. *Vixit annos LXXI. Obiit anno M D LXXXV.*

Ipso die cum amicis lustravimus veteres extra urbem aqueductus, qui aquas Claudiam, Martiam, Tepulam, Virginis, aliasque in urbem ducebant: ex quibus quidam à Sixto V sunt resecti. Id unum est urbis miraculum, nempe aquarum variis ex locis magno cum labore derivatarum abundantia tanta, quanta sufficit non modo ad publicum usum, sed etiam ad voluptatem. adeo ut platearum fontes hortorum nostrorum sumtuosos saltus copia, perennitate, varietate & arte superent. Sed tamen quantum præsens copia deficit ab antiqua magnificentia Romanorum; quibus thermæ publicæ & naumachiæ abunde suppetebant, quæ recentioribus penitus desunt. Vidit hos fontes seu has

ITER ITALICUM.

23

formas, atque etiam naumachias Sidonius Apollinaris , profectus Romam: *cujus mihi*, inquit, *non solum formas, verum etiam naumachias videbar epotaturus*. Gregorii M. pontificatu Romanos nonnullos scrupulus invasit, afferentes, *nullum Dominico die debere lavari*, haud dubie in publicis illis thermis. Sed ejusmodi scrupulis nunc omnino soluti sunt Romani.

AN. 1403.

AUGUST. G.

Sidon. l. 1.

ep. 5.

Non ita procul ab his aquæductibus cernitur moles seu mausoleum Septimii Severi imperatoris, Septizonium appellatum; quod mausoleum in eam altitudinem crexerat Septimius, ut in Africam navigantes (Afer quippe erat) ipsius cineres adorarent. Sixtus v. ruinæ proximum evertit, columnis aliisque materiis ad alia opera translatis, solo aggere superstiti, in cuius inferiori parte crypta ingens cernitur ad cineres mortuorum olim reponendos. E vicino itidem stabat mausoleum Helenæ Imperatricis.

XII. Dominica, sollempni apud Maronitas Missæ interfui-
mus. In ecclesiæ majori ara est beatissimæ Virginis assumptæ effigies. Sacerdos sacra celebraturus duplici manipulo utitur, uno in dextera, altero in sinistra. Amictum super albam gerit, stolam ante pectus pendulam, non decussatam. Diaconus stolam gerit ex utraque sinistri humeri parte, nempe ante & retro pendentem. Post consecrationem non fit elevatio, sed ante Communionem.

Audita Missa, conventus à nobis illustrissimus abbas Scaldratus, serenissimi Baviaræ Electoris in urbe Orator, multa nobis retulit de nova Benedictinorum Congregatione Bavarica sub titulo Angeli custodis, erecta procurante Principe.

Sub vesperum cum solitis amicis basilicam sanctæ Agnetis extra muros ad viam Nomentanam adivimus, ubi Canonici regulares sancti Salvatoris loco sanctimonialium Ordinis nostri pridem collocati sunt. Dormitorium vetus adhuc superest absque divisione cellarum, cum pictura seu imagine sancti Benedicti & aliorum. Descensus in basilicam fit per gradus triginta duos. Hinc magna loco frigiditas, quæ Paulo v. ibidem sacrum virginis corpus transferenti ac sacra celebranti letalem morbum creavit. Ad descensum inscriptio est de indulgentiis loco concessis anno M C C L V I, tempore Lucæ Abbatis. Columnæ mamoræ, quibus fulcita est concameratio, sex & viginti. Quantivis pretii sunt ex iaspide quatuor illæ, quæ ciborium sustinent. Honorius I. apsidem ex musivo decoravit. Super altare majus præclara statua virginis, cujus caput & bra-

A. M. 1685.
AUGUSTO.

chia ex ære deaurato, cetera ex alabaistro, Franciosino sculptore. Sub altari, sacræ virginis exuviae servantur. In eadem basilica corpus beatæ Agnetis abbatissæ ab anno M CC XLI requiescit. Die festo sanctæ Agnetis lanam ad Pallia archiepiscoporum conficienda, id est geminos agnos vivos, ibidem benedici mos est.

Proximum adjacet templum aliud rotundum, viginti quatuor columnis marmoreis quadruplici ordine sustentatum, ornatumque opere tessellato. In medio est altare, quod Alexander IV. anno M CC LVI consecravit sub invocatione sanctæ Constantiæ virginis, filiæ Constantini imperatoris. Atticæ, Arthemiae, & Emerentianæ virginum ibidem reliquiae cum corpore ejusdem Constantiæ reconditæ sunt. Vas ingens porphyreticum, quod pone altare in angulo modo cernitur, olim in medio erat, continebatque corpus sanctæ Constantiæ. Octo pedes longitudinis, plures altitudinis habet. In ipso vase, atque in fornice ex musivo, passim exhibentur genii uvas demerentes, ferentes, & calcantes. unde Bacchi sepulturam & fanum esse plerisque persuasum est. At in actis ipsius Constantiæ, quæ in bibliotheca Vallicellana legimus, hoc mausoleum in Constantiæ honorem à Constantino patre ædificatum fuisse dicitur. In vulgata sancti Ambrosii epistola XXXIV. quam Ambrosii nequaquam esse constat, Constantia patrem & fratres rogasse fertur, *ut basilica beatæ Agnetis construeretur: & sibi illic mausoleum collocari precepisset.* In veteri tamen codice illustrissimi Abbatis de Noaliis non *mausoleum* legitur, sed *mansionem*. Cui lectioni faver liber de vitis Pontificum in Liberio, qui *rediens de exilio habitavit in cæmeterio sanctæ Agnetis apud germanam Constantii Augusti, ut per ejus rogatum rediret in civitatem.* Id vero intelligi nequit de Constantina, Hannibaliano primum, deinde post ejus mortem Gallo Cæsari, Juliani fratri, nupta: quæ vivente altero marito, *Bithynia vi febrium absumpta est*, teste Ammiano Marcellino, *sepulta in suburbano via Nomentana.* Præter hanc Constantini M. filiam Ammianus nullam aliam agnoscit, quam Helenam, Juliani cæsaris uxorem, quæ juxta Constantinam sororem, prope sanctæ Agnetis tumulum humata est. Afferunt porro nonnulli, hanc ipsam, nec aliam esse Constantinam, quæ prope basilicam sanctæ Agnetis secessit adhuc puella, ibidemque sepulta est. Certe sancta hæc *Constantina* vocatur in vetustis codicibus; in actis perve-

Ammian.
lib. 24. cap.
21. & lib.
21. cap. 1.

tustis, quæ penes nos sunt, Johannis & Pauli, & apud Aldhelmum in carmine de Virginitate. Et ne quis mendum suspicetur in aliis præter Aldhelmum, quem fortasse metri necessitas ad formandum Constantinæ vocabulum coëgisset; in acrosticho Damasi papæ *Constantina* itidem effertur. Hanc virginem ac sanctam commendat Aldhelmus; cujus testimonium firmat Damasi, qui proximus illorum temporum erat, auctoritas.

Constantina Deum venerans, Christoque dicata,

ea nimirum quæ sanctæ Agnetis basilicam construxit, quod elogium Constantinæ, Galli uxori, mulieri sævæ & parum piæ, nequaquam convenit, sed virgini, aut saltem Deo devoræ, sive hæc fuerit tertia Constantini filia, sive quævis alia. Itaque Constantiæ seu Constantinæ mausoleum illud ipsum est, quod hodie conspicitur ad basilicam sanctæ Agnetis: quod cum a paganis forte architectis constructum fuerit, aut vero a Christianis neophytis; non mirum, si quid paganici ritus in fabricæ ornamentum admiserint.

AN. 1685.
Augusto.

V. Bolland.
ad 18. Febr.

Prope adest cœmeterium sanctæ Agnetis nuncupatum, & hippodromi vestigia cernuntur: cujus delineationem apud illustriſſ. Commendatorem Carolum a Puteo vidimus. Non dubium quin e vicino fuerit aliquod palatium. Certe Prudentius locat *Agna sepulcrum Romulea in domo.*

Alia est sanctæ Agnetis præclara basilica in platea Agonali, seu Navoniana, eo videlicet in loco, ubi ejus pudicitia tentata est a paganis. Novum opus, figuræ ovalis, cujus partes interiores ex marmore & ex ære constant. Picturæ industriam artificis mire exornant. Insigne sane virginalis pudicitæ monumentum.

XV. In festo assumptæ Virginis Missa sollemnis in Collegio Græcorum ab Archiepiscopo ejusdem nationis celebrata est. Is pro alba linea vestem ex panno pretioso habebat, planetam antiquo ritu. Nullus sacerdoti manipulus, neque etiam diacono aut subdiacono: qui ambo stolam ex humero sinistro utrimque pendentem gestant, sed ita ut anteriorem partem manu dextra excipiant. Communicat uterque cum calice, ut sacerdos: laici Eucharistiam ex calice de manu sacerdotis cum cochleari stantes accipiunt ad portam mediam, qua in Sancta aditus est. Sunt & aliæ duæ utrimque portæ. Panis benedictus adstantibus ab Episcopo post Missam sedente ad eandem portam distribuitur. Lituus pastoralis ex argento, non recurvus, sed instar fulcri subalaris: mitra rotunda deaurata est. Græci om-

AN. 1685.
AUGUSTO.

nes signum crucis a dextra in sinistram in corpore exprimunt.

* *Teucrio.*

XVI. Cum Ciampino, Fabretto, & Schelestrato, Fidenarum urbis antiquæ, quinto ab urbe milliario, rudera lustravimus, transito ponte Narfis supra * Anionem, ubi inscriptio antiqua Justiniani annos $xx \times viiii$. præfert, non $xx \times viii$. ut apud Gruterum. Fidenarum civitas, modo penitus everſa, Tiberi ad sinistram incumbens, medio Tiberi ſejuncta erat a Rubrica, quæ itidem deleta eſt. Ad Rubricam Cremera in Tiberim influit. Sesquimilliari a Fidenis ſtabat olim Crustumium, ubi reliquæ templi etiam nunc conſpiciuntur. Inter Fidenas & Crustumium in quadam ſpelunca Neronem delituiſſe quidam falſo exiſtimant. quod Gebberius poëta nescio quis epigrammate appoſito affirmavit. Hic recordari ſubit Maximi martyris, qui, ut acta mſſ. teſtantur, prope Fidenas arenis effodiendis adhibitus, demum conſummato martyrio ſepultus in arenario eſt, ubi arenam effodere ſolebat.

XIX. Dominica apud Oblatas ſanctæ Franciſcæ ad Turrem de Speculis, prope Capitolium, ſacra fecimus. Ibi monachæ ad centum, omnes nobiles, pie vivunt ex præſcripto Regulæ ſancti Benedicti. Laneis interulis utuntur: eis foras exire ob graves cauſas licet. Nullus ſæcularium in earum eccleſiâ admittitur, tametiſi non difficilis acceſſus in interiora monaſterii. Sanctæ Franciſcæ veſtes, librum, cilicium, & alia id genus oſtendunt. Corpus ejus ad ſanctam Mariam Novam: ubi Oblatæ illæ profeſſionem faciunt, & poſt mortem ſepeliuntur a Patribus Olivetanis.

XXIV. In eccleſia ſancti Ludovici, nationis Gallicanæ, habitata eſt capella (ut vocant) Cardinalitia, cui excellentiſſimus Regis Orator cum Cardinale fratre interfuit. Hanc eccleſiam regunt ſacerdotes Galli cum aliquot Oratorii Patribus, quorum magna in nos benevolentia fuit; atque adhærentis xenodochii curam habent, in quo Galli peregrini recreantur. Pendebat a monaſterio Farfenſi hæc eccleſia ſub titulo ſanctæ Mariæ ante annum $M \ CCCC \ LXXVIII$. quo anno commutata eſt cum Oratorio ſancti Ludovici, ſito prope Turrim argenteam.

XXV. Sabbato die feſto ſancti Bartholomæi, ejus eccleſiam inviſimus, in Inſula Lycaonia (quæ modo ſancti Bartholomæi dicitur) ſitam, ubi corpus Apoſtoli ſub majori altari, & cacabus, in quo recepta ejus cutis, aſſervantur. Ipſo die nomina eorum, qui Paſchali communioni non ſecrunt ſatis, quot,

annis in tabella describi solent, atque in ejusdem ecclesiæ atrio exponi, ut pro nominatim excommunicatis habeantur. Novem (si bene memini) hoc anno ex nomine designati erant. Ibidem ad ingressum cœnobii Franciscanorum habetur lapis cum inscriptione, *Semoni Sancto Deo Fidio sacrum &c.* Consimilis habetur apud Fulvium Ursinum. Sangi sacellum erat versus ædem Quirini, teste Livio.

A. N. 1685.
AUGUSTO.

XXX. Caput sancti Johannis Baptistæ in ecclesia sancti Silvestri in Campo Martio, atque Christi Domini imaginem telæ impressam, quam Abagaro missam ferunt, favente eminentissimo Cardinale Carpineo conspeximus. Hæc ecclesia primum fuit monachorum Græcorum, qui has reliquias ex Græcia Romam detulerunt: deinde Benedictinorum, qui postea ad sanctum Laurentium extra muros translati, Clarissis demum locum fecerunt. Ibi sancti Johannis caput sacrum a fronte ad labrum superius absque mento. Reclamat præ aliis Ambianensis ecclesiæ a. qua de re eximius Cangius eruditam dissertationem edidit.

II. Dominica, sollemnibus sacris gratiarum actiones Deo actæ sunt præsentē Pontifice, ob expugnatas urbes Neuhausellium in Hungaria, & Coronem in * Peloponneso: eandemque ob causam festivi hac ipsa die & sequenti ignes per Urbem excitati sunt.

SEPTEMBER

* La Morée.

VIII. Natali beatissimæ Virginis illustrissimus Ciampinus nos cum multis amicis suis & patre Cupleto Soc. Jesu, qui nuper e Sina Romam advenerat, in villam suam prope * Tusculum deduxit, & honorifice excepit. Idem dies in proximo Cryptæ-ferratæ monasterio festivus erat, frequensque hominum eo concursus. Vetus est monasterium duodecimo ab Urbe milliari, ubi monachi, Itali aut Calabri, regulam sancti Basilii sectantur. Missam græce celebrant, sed Romano ritui prorsus accommodatam. Festi occasio in causa fuit, ut reliquias librorum videre non potuerimus. Verum Ambrosius Camaldulensis, qui ejusdem rei causa olim eo se contulerat, nihil reperit præter ruinas *ingentes parietum & morum, librosque ferme putres atque conscissos, nihilque fere præter notissima offendit.* Superest hætenus ibidem unum volumen Menologii Græcorum, tempore ac jussu Basilii Imperatoris scriptum, quod eruditus Papebrochius nuper edidit. Ceterum quod attinet ad monasterium, Pius v illud restituit, murisque vallavit.

* Ercolani.

Papebroch.
to. 1. April.
sub finem.

IX. Dominica sub vesp̄erum ad Vaticanam basilicam pro-

AN. 1685.
SEPTEMB.

fecti, spectavimus processionem novorum ad Fidem catholice converforum, præeuntibus Crucis sodalibus nobilibus Romanis cum baculo argenteo in crucem desinente, subsequen-
tibus duobus Cardinalibus, Chigio & Hovvarto. Conversi om-
nium extremi ex ædibus, quas cardinalis Rasponus eis primum
construxit, ducebantur ad illas, quas cardinalis Gastaldus re-
cens testamento reliquit, id est ad ipsummet Cardinalis pala-
tium. In basilica sancti Petri frequenti populo novisque con-
versis e sublimi loco spectandæ exhibitæ sunt lancea, crux, &
imago Christi Domini, & caput sancti Andreæ: quæ in qua-
tuor parastatis basilicæ Vaticanæ tholum fulcientibus custo-
diuntur. Hæc Christi imago a recentioribus VERONICÆ di-
citur: imaginem ipsam VERONICAM veteres appellabant.
Petrus Mallius in libro inedito de basilica sancti Petri ad Ale-
xandrum III, & post eum Romanus sancti Petri ante annos
quingentos canonicus, *Sudarium Christi quod vocatur VERONICA.* & in cap. XXV. *Oratorium sanctæ Dei genitricis Virginis Mariæ, quod vocatur VERONICA, ubi sine dubio est Sudarium Christi, in qua ante passionem suam sanctissimam faciem, ut a nostris majoribus accepimus, extersit, quando sudor ejus factus est sicut guttæ sanguinis decurrentis in terram.* Id factum in horo, ubi Christus extremum illum agonem passus est, semotis omnibus arbitris, ipsisque tribus quos secum duxerat discipulis. Petrus diaconus monachus Casinensis in libro ms. de Locis sanctis, de prædicto Christi sudario ad eundem fere modum ita scribit. *Sudarium vero cum quo Christus faciem suam extersit, quod ab aliis VERONICA dicitur, tempore Tiberii Cesaris Romanam delatum est.* Ecce iterum sudarium Veronica dictum ante annos quingentos. Sed longe post eos Augustinus Patricius in descriptione adventus Friderici III in Urbem, tempore Pauli II. ait Pontificem cum Imperatore accessisse ad *Salvatoris nostri faciem adorandam, in Sudario expressam, quam VERONICAM appellant.* Alio feruntur Onuphrius & alii recentiores, opinantes esse sudarium quod vocatur *Veronice*, id est cujusdam piens-
tissimæ, ut putant feminae, quæ ante passionem Christi faciem
ejus extergens, in sudariolo faciem impressam suscepit. Me-
moratu dignum est id, quod de hac imagine scribit Jacobus de
Treeis, tunc archidiaconus Laudunensis, atque Innocentii
IV capellanus, postmodum Urbanus IV, in epistola, quam ad
Abbatissam & sanctimoniales Cisterciensis conventus Monaste-
rioli

ROMANUS
pag. 97.

rioli seu Monstrolii ad radices montis Laudunensis scribit. Hæ quippe ab eo studiose petierant, ut sibi depingi curaret *faciem & figuram nostri Salvatoris* secundum illam, *quam in nostra*, inquit, *habemus custodia*. Piis earum votis obsecutus Jacobus, optatam mittit imaginem, rogans obnixè, ut propter reverentiam illius quem repræsentat, recipiant eam *ut sanctam Veronicam, seu veram ipsius imaginem & similitudinem. Actum Romæ anno millesimo ducentesimo quadragesimo nono*. Ex his intelligitur, Veronicæ vocabulum esse imaginis, non mulieris, tracto inde etymo, quasi diceretur *vera icon* seu *iconia*, & contractis in unum vocabulum litteris, *Veronica*. Si tamen Veronicæ nomen primum mulieri, & ab hac imagini tributum præfracte velint alii, per nos licet. nam hic narrantis officium, non disceptantis suscepimus. Servatur ad hunc usque diem apud Monstrolienfes virgines eadem imago, magnoque Fidelium concursu frequentatur. Caput est radiatum cum barba oblonga & bifurca; oculi graves, nec sine majestate. In infima tabellæ parte apposta est inscriptio cum characteribus nobis incognitis: quorum sex primi nonnihil suspicionis primo conspectu injiciunt, ne *Abrafax* designetur: quo nomine significantur amuleta, quibus Basilidiani hæretici utebantur. Verum præterquam quod tabellæ collo appendi non potest; certe quo minus hæc imago sacra sit, dubitare non sinit venerandum JESU-CHRISTI nomen, hinc inde in superiori imaginis parte expressum compendiosis litteris græcis, ut patet ex typo sequenti, cujus reliquam inscriptionem aliis divinandam relinquimus.



ΩΕΡΑΖΖ ΓCΠΑΡ ΝΑΥΕΡΥCΖ

AN. 1685.
SEPTEMB.

XIII. Eminentissimus Cardinalis Casanata nomine sacræ Indicis Congregationis ad me transmisit Isaaci Vossii libros duos de ætate mundi & de diluvio universali, ut ad purpuratos Patres referrem quid de his libris sentirem. Hic venit in mentem Ciceronis ad Trebatium, *se malle a Casare consuli, quam inaurari.* Quamquam hæc sacræ Congregationis potius dignatio, quam consultatio censenda est.

XIV. Post prandium apud excellentissimum Regis Oratorem, illustrissimus abbas Gevreus, pro insigni, qua præditus est, modestia, ingenio & doctrina Romanis proceribus acceptissimus, nos ad hortos Matthæianos secum duxit, multaque alia subinde humanitatis officia nobis exhibuit. In istis hortis multæ inscriptiones, lacrymatoria, plurima item signa: in his statua mulieris sacrificæ cum stola & aqua lustrica. Inscriptiones duæ, præter annos & menses, etiam horas vitæ notant: cujus rei quædam alibi exempla occurrunt, ut in epitaphio Sixti IV. Basilica sancti Thomæ in Lauro ex profano templo, & ecclesia beatæ Mariæ de Navicella seu in Dominica his hortis adjunctæ sunt.

XXI. Cœmeterium Cyriacæ, adjunctum basilicæ sancti Laurentii extra muros, cum Schelestrato perlustravimus. Difficiles illuc aditus: cryptæ humiles, arenisque delapsis fere oppletæ; loculi vacui: sed locus veneratione plenus, maxime ob sepulcrum sancti Hyppoliti, qui in eo cœmeterio sepultus est cum aliis multis. Loculi in hoc aliisque cœmeteriis, alii majores, alii minores. Majores plerique corpora mediocria fuisse arguunt, non qualia sanctorum Gervasii & Protasii describit sanctus Ambrosius, id est *mira magnitudinis*. Inde per ecclesiam Lateranensem reversi ad sanctos Petrum & Marcellinum, ac demum ad sanctum Matthæum in Exquilino, quæ ecclesia est Augustinianorum, ipso die ejus festo.

Ambros
epist. 56. ad
Marcellin.

XXVI. Septem ecclesiarum iter devotionis causa confestim, addita octava sancti Anastasii ad tres fontes, de qua alias. Una ex his, quam nondum videramus, ecclesia est sancti Sebastiani, ubi Petri & Pauli apostolorum corpora aliquamdiu sepulta jacuerunt, videlicet ad *Catacumbas*, mendosè *Catatumbas*. Si nominis notationem spectes, quosvis subterraneos recessus seu quasvis cryptas significat: si veterem usum, certum est hoc vocabulo peculiarem illum locum, ubi aliquamdiu jacuerunt Petrus & Paulus apostoli, designari, quasi diceretur

ad cryptas, nam *cumbæ* vocabulum valles & depressa loca significat. Hunc locum omnes statuunt secundo aut tertio ab urbe milliaro ad viam Ardeatinam. Petrus Mallius, qui tempore Alexandri III. scribebat, cœmeteria urbis recensens, non vocat ea *catacumbas*; immo cœmeterium Callisti, sancti Sebastiani basilicæ adjunctum, locat juxta *Catacumbas*: at Catacumbas inter cœmeteria non numerat. Apud antiquos auctores *cœmeteria*, *cryptæ* dicebantur: *Catacumbæ* solus ille locus, ubi Apostolorum sepultura fuerat. Est formæ pæne circularis, in cujus ambitu tredecim exstant sepulcra, & sedes marmoreæ: quarum una, tantisper elaboratior, Pontificis fuisse dicitur, cum illic Christianorum conventus tempore persecutionum fiebant. In medio exstat altare, sub quo quadratus est scrobis instar putei, ubi corpora Apostolorum aliquanto tempore jacuerunt, *in loco qui dicitur ad Catacumbas*, inquit Gregorius M. in epistola ad Constantinam Augustam, & quidem *secundo ab Urbe milliaro*. Damasus Papa locum ornavit marmore, (quod opus *platoniam* Anastasius appellat) & versibus. Catacumbis proximum est ad viam Appiam Callisti cœmeterium, ubi sancta Cæcilia cum multis aliis primitus sepulta fuit. Visitur etiam nunc ibidem inscriptio, quam Guillelmus archiepiscopus Bituricensis anno M^o CCCC^o IX incidi curavit eo in loco, ubi sanctæ Cæciliæ corpus jacuit. Hæc loca sanctus Hieronymus, dum juvenis Romæ litteris operam daret, religionis causa diebus Dominicis frequentare solebat, uti testatur ejus commentarius in Ezechielem. In ecclesia sancti Sebastiani sepultus est loci abbas Johannes *Bodier*, Cenomanus, philosophus & medicus: cujus opera Julius II. utebatur. Ibidem nunc degunt Patres Fulienses perpauci.

Altera ecclesia, nobis ad id tempus non visa, est basilica sanctæ Crucis, a Constantino constructa in palatio Sessoriano. Duæ alæ, navim hinc inde fulcientes, cum duodenis utrimque columnis, alias duas primitus adjunctas habebant, ut reliquæ in horto exstantes probant: eo modo quo basilica Lateranensis & sancti Pauli Basilicæ dicebantur apud Romanos ejusmodi ecclesiæ cum oblongis porticibus; templa vero quæ Gentilium more rotundo opere, quadrato, octogonali, aliave simili figura constructa erant. Testudo basilicæ sanctæ Crucis variis ornata est picturis, & sub ea elegans ciborium. Pone altare ad parietem, absque ara supposita, servatur sanctissima Eucharistia in patente

AN. 1685.
SEPTEME.

vase, adjectis loco ornamentis: quod opus Franciscus Quignoni-
 nius, tit. sanctæ Crucis cardinalis, *sanctissimo Christi Corpori*
 dicavit anno M. DXXXVII. Subtus apsidem est crypta, ubi
 celebris est capella dicta Jerusalem, in quam feminis nonnisi
 semel in anno ingressus conceditur, viris eo die exclusis. In
 eadem crypta extra hanc capellam lapidi insculpta legitur an-
 tiqua inscriptio HELENÆ PISSIMÆ AUGUSTÆ, ab
 aliis relata: quam *Julius Maximilianus Comes* Helenæ dicavit.
 Ibidem sepultus est cum insigni elogio Hilarion Rancatus Me-
 diolanensis, monachus Cisterciensis, pietate, doctrina, & lin-
 guarum peritia celebris; sui Ordinis, dum viveret, Procura-
 tor ac Præses in Italia generalis; in recognitione librorum Sy-
 riacorum, versione arabica biblicorum, explicatione contro-
 versiarum fidei, quinque summis Pontificibus Paulo v. & sub-
 sequentibus eximie probatus: qui vixit annos LXIX. obiitque
 die XII Aprilis, anno MDC LXIII. Sed id præcipue ad ejus
 laudem vertit, quod varios codices, ex Italiæ monasteriis con-
 quissos, studiose collegit: ex quibus nos ipsi non parum pro-
 fecimus. Ex hac bibliotheca, eruta est præclara illa sancti Au-
 gustini epistola ad Alypium, quæ est in nova editione XXXX.
 & aliquot novi sermones. Cistercienses hodie quoque incol-
 lunt hunc locum, quem Leo Papa IX. Casinatibus quondam
 monachis, (ut in primariis apud Casinum litteris legimus) A-
 lexander II. Canonicis regularibus sancti Fridiani concessit,
 monachis ad sanctum Sebastianum in Pallara translatis. Ur-
 banus v. Cartusianis attribuit: ac demum Sixtus v. Cartusia-
 nis ad Thermas Diocletiani positus, Cistercienses eo loci col-
 locavit, accitos ex monasterio sancti Sabæ, quod sancti Apolli-
 naris seminarii alumnis traditum fuit. Sic omnium rerum vicif-
 situdo est. In hortis monasterii superstant reliquiæ duorum fa-
 norum, Veneris scilicet atque Cupidinis: nec longe inde aberat
 Tauri Statilii amphitheatrum.

XXVII. Josephus Thomasius, clericus regularis ex Ordi-
 ne Theatinorum, amicus noster in primis, modestia & pietate
 non minus; quam doctrina & scriptis commendandus, colle-
 ctanea de ritibus sacris quam plurima habet, quorum ultro no-
 bis copiam fecit, solo animo promovendi studium rerum sacra-
 rum, quibus totus incensus est. Præter vulgatos ab se libros Li-
 turgiarum veterum, & Psalterium; tunc edendis vetustis Res-
 ponsorialibus & Antiphonariis dabat operam. Moratur in ædi-

bus sancti Silvestri in monte Quirinali, ubi olim thermæ Constantinianæ erant. Illic sepultura concessa est *Joanni Jacobo Pancirolo Cardinali*, viro suo nomine celebri, cui si aliquid addas, demis, uti epitaphium habet.

XXVIII. Bibliotheca Angelica Patrum Augustinianorum, quæ in usum publicum omnibus patet, nobis etiam nullo negotio referata est, favente humanissimo patre Josepho Sabatino, Bibliothecario & Generalis Assistentente. Hanc Angelus Rocca Camers, episcopus olim Tagastensis, ejusdem Ordinis alumnus, & apostolici Sacrarii præfectus, omni artium & scientiarum genere refertissimam, virorum item illustrium iconibus ad vivum expressis ornata, longo temporum spatio, magnæque labore ac sumtu comparatam, cœnobio sancti Augustini Urbis, studiosorumque omnium commoditati dedit, dicavit, donavitque, ut animi grati pietatem (verba inscriptionis referimus) erga familiam Augustinianam, parentem & altricem suam, & erga litteratos litteratorumque amatores propensionem vivis posterisque patefaceret anno salutis M. DC. V. Laurentius Pignorius in epistola XL ad ipsum, hanc bibliothecam mirifice laudat, aitque refertam esse libris *ad miraculum optimis*. Lucas Holstenius libros suos editos complures huic bibliothecæ assignavit: qui tamen in ecclesia beatæ Mariæ de Anima, nationis Germanicæ, sepulturæ sibi locum elegit. Inter manu exaratos codices unus sancti Leonis opera continens; alter Antiphonale Gregorianum, melioris sunt notæ inter veteres: inter recentiores omnia acta autographa congregationis *de Auxiliis* sub Clemente VIII & Paulo V. In antiphonali Gregoriano ante annos sexcentos scripto notatur, *Dominica I de Adventu Domini, statio ad sanctum Andreæ apostolum post Præsepe*, Ad hunc locum Angelus Rocca sequentem observationem adhibuit, *re diligenter inspecta*, anno M DC I. *Hæc edicula, sancto Andreæ apostolo olim dicata, hodie intra ecclesiæ sancti Antonii atrium, prope sanctæ Mariæ Majoris basilicam profanata cernitur, & in hominum usum conversa*. Idem subdit, *Exstat etiam dicto in loco profanata apsis illa vel tribuna edicula antiquæ, in qua imagines, opere musivo olim factæ, nunc semidirute vel collapsæ cernuntur*. Nunc verò statio *Dominica I. Adventus est in ecclesiâ sanctæ Mariæ-majoris*. Ita ille. Jam verò nihil penitus superest ex illo musivo, parietibus interclusis, etiam gypso & calce oblitis.

Quod attinet ad acta *de Auxiliis*, omnibus adfuit præter A-M iij

AN. 1685.
SEPTEMB.

nastasium abbatem Farfensem Congregationis secretarium, Jacobus *le Bossu*, sancti Dionysii in agro Parisiensi monachus; distinguendus ab alio cognomine ejusdem loci tertio Priore, qui obiit anno M D LXX, testante epitaphio, sepultus in clauistro Dionysiano ex parte ecclesiæ. Alter vero, de quo hic agimus, posterior, Romæ diem supremum absolvit, ibidemque in ecclesia Patrum Minimorum Gallorum, scilicet sanctæ Trinitatis in monte Pincio, extra cancellos majoris altaris sepulturam habet cum epitaphio sequenti.

D. O. M.

HIC JACET FRATER JACOBUS LE BOSSU, origine *Parisinus*, Religiosus sancti *Benedicti* ex cænobio sancti *Dionysii in Francia*, dignitate *Sacerdos*, gradu *Doctor Sorbonæ*, omnibus *Pontificibus*, sub quibus *Romæ* degit, *carus*, sed præsertim *Clementi VIII. & Paulo V.* propter munus *Consultoris* ab eis illi impositum in illa venerabili congregatione, quæ de *Auxiliis* dicta est. *Vixit an. LXXX. mens. IV. dies XII. Obiit VII Id. Junii anno Domini M DC XXVI.*

Prope eum sepulti sunt Antonius Muretus Lemovix, mortuus anno M D LXXXV. ætatis anno LIX. Item Ludovicus *de Creil* Parisiensis, Presbyter & Theologus, a schola Sorbonæ ad Sedem apostolicam pro eadem congregatione delegatus: qui anno M DC XVII prid. Id. Septembris e vivis excessit.

Eodem die bibliothecam Chigianam permissu & favore eminentissimi Cardinalis perlustrare cœpimus. Huic præfatus est optimus Thomas de Juliis, Lucæ Holstenii quondam familiaris. In ea sunt codices mss. haud pauci; plerique Alexandri VII. manu & observationibus illustrati: varia item authentica instrumenta, in unum corpus ab eodem collecta (quod insignem Pontificis diligentiam atque in litteras amorem arguit: Diarium autographum Sixti V. de rebus ante pontificatum a se gestis: multa item ad recentiore historiam, præsertim Jansenianam. Omnibus præstat codex græcus insignis, ab annis minimum octingentis scriptus, continens quatuor Prophetas majores, item breve commentarium in somnium Nabuchodo-

nosoris a sancto Hyppolito martyre & episcopo compositum, cujus meminit Eusebius, & post eum Hieronymus, aliique. Hic codex videtur ex ipsismet Origenis hexaplis excerptus, uti disertè legitur fol. 130. recto, item fol. 135. 167. & fol. 315. verso, ut Holstenius, qui codicem viderat & fere integrum descripserat, observavit. Appositi sunt passim asterisci & obeli. Huic similis est alter codex in bibliotheca Vaticana. Denique in fine Isaïæ apponuntur quidam numeri, quibus tempus seu annum scripti codicis designari quidam ab Alexandro VII. consulti existimarunt. At numerum versuum his notis significari non dubitamus. H C A I A C S T I. T. Ω K, id est, Isaïæ αἱ χῆς seu versus tria millia octingenti ac viginti. Codex latinus unus e multis, continet *acta Concilii Chalcedonensis*, quæ Rusticus ex latinis & græcis exemplaribus Acœmetarum præsertim monasterii emendavit. Post sessiones *Allocutio Concilii* incipiens ab his verbis: *Habita apud Marcianum Imperatorem &c.* In alio codice Concilium Romanum sub Martino; item Concilium sextum universale.

Ex libris editis præclara sunt *Biblia polyglotta*, Parisiensibus typis ante annos quadraginta expensis Jaïanis impressa, & pretioso operta corio: quibus Alexandro VII. fucum facere tentarunt Hollandici typographi tres, Joannes Janssonius à *Vvaesberge*, Johannes Jacobi *Chipper*, & Elizeus *Vveirstraet*. Hi cum anno M DC LXVI Romam librorum venalium causa adventassent, primum horum librorum folium, quod titulum operis continet, cum anno & loco impressionis, novis typis recudi curarunt, adjecta epistola nuncupatoria ad Alexandrum VII. in cujus gratiam hanc editionem primo factam fuisse videri voluerunt. Specimen ita habet: BIBLIA ALEXANDRINA HEPTAGLOTTA auspiciis S. D. Alexandri VII anno sessionis ejus XII. feliciter inchoato. Lutetia Parisiorum. Prostant apud Johannem Janssonium à *Vvaesberge*, Johannem Jacobi *Chipper*, Elizeum *Vveirstraet* M DC L XVI. Sic titulus: præfatio seu epistola hoc modo exordium habet.

ALEXANDRO VII. divina providentia Pontifici maximo felicitatem & longevitatem.

Ab ultimis Belgarum, Urbem dominam, sedem vestram, Romam divinarum litterarum sarcina instructi magis quam onusti, multiplice Sanctitatis vestrae illicio, ceu potentiore quodam magnete, fortiter suaviterque protracti, anhelis, non tam fatigatione quam exultatione

AN. 1685.
SEPTEMB.

*animis passibusque subintramus, desideratissime terris & nobis Pontifex maxime: quo ut votorum nostrorum vehiculo subvecti feliciter devenimus, non in primis urbis sanctæ portis moramur, aut palatiorum promiscuè statim obviatorum magnopere miramur augusta: alius ardor, alia quam curiositatis cura nos angit. Alexandrum, Alexandrum in-
clamamus: rectaque ad Vaticanum, viæ nostræ finem, gressu intento, dona quæ septemplex sacra Scriptura facies facit, deferimus &c. Sic fumos, immo libros suos venditabant boni illi palpatores: sed non diu doli sui usura penes eos stetit.*

Quæ ex illa Chigiana bibliotheca excerpimus, non est necessarium singulatim exponere. Tantum de Alfonsi Ciaconii epistolis, quas inde habuimus, quædam observare juvat. Ex his epistolis intelligitur, Alfonsum Dominicanum, qui Petri doctissimi germanus erat, opera duo molitum fuisse: unum de Antiquitatibus Romanis, cum variis figuris: alterum de bibliotheca Scriptorum ecclesiasticorum. Ideam hujusce operis habemus sub titulo sequenti. BIBLIOTHECA A PLURIMIS ANTEA AUCTORIBUS DISPERSIM INSTITUTA ET COLLECTA, deinde ab aliquot in epitomen redacta: jam vero postremo recognita, novorum librorum accessione locupletata, & ab hæreticorum monumentis purgata, & in duplum post priores editiones aucta per F. Alfonsum Ciaconum Hispanum Biacensem, Doctorem theologum Ord. Prædic. & Romani Pontificis penitentiarium. Scribit hac de re ad Guillelmum Sirletum Cardinalem, qui aliquos obices seu scrupulos prædictæ Bibliothecæ objectos, qui illius revisionem & probationem retardarent, per Petrum Ciaconium Alfonso significaverat. Unus erat, quod ex Conradi Gesneri Bibliotheca multa ad verbum in suam transtulisset. Alterum, quod Rabbiorum libros inter ceterorum auctorum opera recensuisset. Ad hæc respondet Alfonsus: sed quod sperabat, a censoribus non impetravit, ut scilicet sua Bibliotheca imprimeretur.

XXIX. Cum illustriss. Archiepiscopo Rossanensi & Ciampino ad ecclesiam sancti Michaëlis, cujus ipso die festum erat, Vaticano proximam, profecti, legimus inscriptionem lapidi incisam de illius ecclesiæ conditione, quæ Leoni IV (immo tertio) & Carolo Magno tribuitur, nempe occasione quorundam Gallorum; qui in bello pro ecclesia Romana suscepto mortui, *in crypta juxta Neronis palatium sepulti sunt*: ob idque ad honorem sancti Michaëlis super illos facta est ecclesia, quæ
postea

postea sancti Magni reliquias, ex urbe Fundis allatas, suscepit, Cum varia inter nos, ut sit, colloquia misceremus, Archiepiscopus narravit modum, quo ossa Mathildis Comitissæ; quæ tempore Gregorii VII vixit, ex Mantuano sancti Benedicti monasterio in Vaticanam basilicam, postulante Urbano VIII translata sunt anno MDCXXXV. rem clam exsequente Hypopolito abbate, efflagitatu Dominici Pinelli procuratoris generalis e Congregatione Casinensi.

AN. 1685.
SEPTEMB.

XXX. Dominica, die festo sancti Hieronymi, ad basilicam sanctæ Anastasiæ cum Fabretto ejus loci canonico profecti, vidimus calicem, quo sanctus Hieronymus in re sacra usus fuisse dicitur. Constat ex terra figulina alba, sed fractus; in morem calicis usualis ad potandum. Hieronymus an rem sacram fecerit umquam, non leve dubium est.

I. Primi hujusce mensis dies lustrandis variis Urbis bibliothecis impensi, dum interim iter Neapolim paramus. In codice Reginæ epigrammata Silvii Piccolominei revolventi, unum occurrit ad Bartholomæum Roverellam, in quo de Romanis conqueritur, quod ex vetustis monumentis & marmoribus calcem tunc conflarent.

OCTOBRE;

*Oblectat me, Roma, tuas spectare ruinas,
Ex cujus lapsu gloria prisca patet.
Sed tuus hic populus muris defossa vetustis,
Calcis in obsequium marmora dura coquit.
Impia ter centum si sic gens egeris annos,
Nullum hinc indicium nobilitatis erit.*

Eadem est querela Poggii, qui insigne illud amphitheatrum, Vespasiani opus, *Coliseum* vulgo appellatum, majori ex parte ad calcem deletum fuisse asserit. Idem refert de porticu ædis Concordiæ, quam cum primum, inquit, ad Urbem accessi, vidi ferme integram, opere marmoreo admodum specioso. Romani postmodum ad calcem ædem totam & porticus partem, disjedis columnis, sunt demoliti. Sed nullam majorem ruinam passa est Roma, quam in secessu Pontificum Avenione: quo tempore cuique in vetera quæque ædificia impune grassari licebat. Urbis statum, qualis in reditu Pontificum erat, Ambrosius Camaldulensis in epistolis suis describit. Et tamen quam maxime attinet ad Romanos, si modo Urbem suam amant, ejus decora servare: quam tantam fuisse etiam relicta post tot clades monumenta probant, quantam nec quis cogitatione

AN. 1685
OCTOBRI.

assequi, ipsa urbe non visa, potest. Sane Manuel Chrysoloras, priusquam Romam vidisset, multa ab historicis dicta supra quam verum aut cuiquam credibile esset, existimabat, uti ipse in Comparatione Romæ & Constantinopolis asserit. Sed
 „ Roma conspecta & inspecta, quamquam nihil tunc integrum
 „ ac saluum remanebat, nihil eorum quæ de ea scripta sunt, a ve-
 „ ro abhorrere intellexit: ita ut hæc non solum composita atque
 „ integræ, sed disjecta quoque ac diruta priscae majestatis spe-
 „ ciem præ se ferat ac retineat. Hujus Chrysoloræ, ne id alias
 excidat, prædictum libellum a Francisco Aleardo Veronensi latine versum, & Johanni Galeazo, Marchioni Sfortiæ, anno MCCCC LXIV nuncupatum, ex bibliotheca Christinæ reginæ descriptum habemus. Denique urbis Romæ, quam urbem *æternam* appellabant veteres, verum arcanumque nomen { quis credat? } hætenus ignoratum fuisse Philippus Camerarius demonstrat. Sed longius nos ducit hæc digressio, quamquam non omnino extra viam.

Camerar.
Meditat.
hist. vol. 2.
c. 19.

Dum a bibliothecis investigandis ac lustrandis tantisper vacaremus, identidem nos in suas ædes admittebat illustrissimus Slusius; nosque doctis & eruditis colloquiis suis una cum Dieroyfio nostrate jucundissime recreabat. Tanto quippe viro unica voluptas est ex litteris & ex libris: quorum magnam copiam sibi comparavit, non ad pompam, sed ad usum suum & amicorum, quos cordate diligit.

X. Cardinalis Ottobonus veteres codices non paucos, quos in bibliotheca sua habet, in domum nostram, pro sua in nos benevolentia, transmittere non est gravatus, ut domi facilius eis uti possemus. Unus ex illis continet acta omnia, totamque seriem inquisitionis, tempore & jussu Urbani IV factæ in Robertum electum Trevirenses, qui, pallio non accepto, Archiepiscopum nihilo minus se ferebat, & sacris se immiscebat. Acta hæc desiderantur apud Brovverum in Annalibus Trevirensibus, qui tamen eorum mentionem facit. Deinde in alio codice habetur index privilegiorum ecclesiæ Romanæ, *quorum aliqua, ad perpetuam rei memoriam conservandam, per felicitis recordationis Innocentium papam IIII in Concilio Lugdunensi sub bulla sua & sigillis quadraginta Prelatorum, qui presentes fuerunt, sunt annotata & transsumpta; & eisdem transsumptis sic annotatis dictus dominus Innocentius, prædicto approbante Concilio, fidem decrevit perpetuo, sicut originalibus, adhibendam.* Horum trans-

sumtorum authentica exempla in archivo Cluniacensi vidimus. Primum locum inter imperialia occupant privilegia duorum Ottonum, primi ac secundi, tum Henrici augusti, *litteris aureis per totum scripta: quorum primum non est sigillatum, licet ex tenore ipsius appareat, quod debuit sigillari: sed secundum est sigillatum aurea bulla imperiali; non tamen est data apposita in eodem: & in utroque sunt posite subscriptiones ipsorum Imperatorum, ac Prelatorum & Principum suorum.* Quæ omnia mire confirmant ea, quæ in opere nostro de re Diplomatica observavimus. Ad hæc descripsimus ex alio codice recensionem *thesauri ecclesiæ Romanæ*, factam pontificatu Bonifacii octavi.

Libros venales, quos Moronus, Barbarinæ bibliothecæ curator, reliquerat moriens, per hos dies revolvimus, atque ex eis nonnullos pro regia bibliotheca comparavimus.

ITER NEAPOLIM.

XV. Cum aër tantisper ex imbrium madefactione temperatus, atque ex ventorum aquilonarium flatu repurgatus esset, visum est adire Neapolim, quæ civitas Roma distat quinque dierum itinere, viatoribus haud magnopere jucundo, nisi Neapolis conspiciendæ cupido invitaret. Velitris prima statio, ubi Ginettorum palatium visitur. Inde perpetui montes obambulandi per Sermonetam Ducatus caput, Privernum, Tarracinam, Fundos, aliaque usque Gavilianum loca. * Privernum, antiquum opidum, olim in valle situm, nunc in colle: ex quo in adverso monte cernitur castellum Rosæ-siccæ, nunc pertinens ad gentem de Maximis. Reginaldus, sancti Thomæ Aquinatis socius, Privernas erat. Altero inde milliari occurrit Fossæ-novæ monasterium Cisterciensium, Forum Appii quondam, ubi Thomas ipse mortem obiit. Visitur ibidem ejus cella in Oratorium conversa; & in ecclesia locus lapideus sub altari, ubi sepultus fuit; postea translatus Fundos in conventum Dominicanorum, atque inde Tolosam. Ante Cistercienses Fossæ-nova cœnobium Casinensium erat sub titulo sanctæ Potentianæ. Tarracinam, Anxur apud veteres, adeundo secundum Alpes conspiciuntur à dextris viæ Appiæ vestigia in paludosis locis, atque Trium-tabernarum, ubi sanctus Paulus hospitatus est, urbs quondam episcopalis, quam Gregorius M. Velitrensi (quæ & ipsa Ostiensi modo unita est) conjunxit. Hæc via a Tarracina Neapolim usque protendi-

* Piperne.

Greg. M. lib.
2. epist. 34
Ind. 10.

AN. 1685.
OCTOBRI.

tur, quadratis saxis etiam nunc passim munita. Tarracina in colle sita est, diversorium extra urbem: ubi dum prandii horam exspectamus, a Germanis duodecim armatis propemodum concitata seditio est. Iverant illi Neapolim, & in transcurso ad idem diversorium se receperant. Cum egressum parant, camerarius, qui adventantium curam habet, petiit mercedulam, quæ *mancia* vulgari nomine vocatur: recusantes durius appellavit. Hi in regressu dieterii memores, cum ille, injuriæ factæ immemor, mercedulam denuo flagitaret; tum vero unus ex illis Germanis, arreptis loris, seminudos camerarii artus atrociter cecidit. Plagis multoties repetitis, vociferabatur ille ejulans: hospes in Germanum frendebat, parumque abfuit, quin opidanos ad ulciscendum insultum acciret. Dum Germani discedunt, affirmavit camerarius, se nostri dumtaxat respectu teneri, quominus tortorem suum pilæ ictu trucidaret. Sic in minas evanuit illa seditio. Post prandium conscendimus opidum, si quid in eo dignum esset, contempturi. Promontorium est, unde in subiectum mare despectus. Templi Jovis, Pollione architecto, reliquiæ insignes ad majorem ecclesiam, quæ sancto Casario subdiacono & martyri nuncupata est. Altare majus more solito ad Orientem conversum: duæ aræ collaterales Occidentem spectant. In area ecclesiæ exstant inscriptiones duæ: una de Trajano Augusto, quod viam *silice sua pecunia stravit*: altera de Theodorico rege, quod viam *Appiam refecit*, recte edita apud Gruterum; nisi quod ubi hic legit, *ad perpetuandam tanti Domini gloriam*, in lapide, si non memoria fallit, scriptum est, *ad perpetuandam tanti Domini memoriam*.

Miserabile spectaculum est videre illius loci opidanos, cadaverosa omnes facie etiam juvenes adolescentes & teneras puellas, haud dubie ex aëris contagio. Hos percontati sumus de monasterio, quod Benedictus Pater eo in loco construxerat, teste Gregorio M. Nemo ex eo quidquam rescivit. Neapoli ad montem Casinum profecti, legimus varia de illo monasterio instrumenta. Primum est Agapiti Papæ II. inscriptum Balduino abbati Casinensi, cujus rogatu Pontifex Casinatibus concedit *monasterium sancti Christi protomartyris Stephani situm in territorio Terracinensi, quod per longam vetustatem in ruinis & in desertis positum erat. Data XVII. Kal. Novemb. per manum Andreae, divini respectus gratia Vicarii sanctæ Sedis apostolicæ, an-*

no pontificatus domini Agapiti summi Pontificis & universalis junioris Pape anno x. Indict. xiv. Et ne de alio hic monasterio sermo esse videatur, Leo ix Richerio abbati confirmat monasterium sancti Stephani juxta civitatem Terracinensem positum, quod Deo dignissimus vir Benedictus vivens corpore construxerat, ut legitur in authentico, dato per manus Frederici diaconi S. R. E. cancellarii & bibliothecarii, vice domini Herimanni archicancellarii atque Colonie archiepiscopi, xii. Kal. Junii, domini Leonis viiii Capue anno iiii. Indict. v. Ex illo monasterio, nunc penitus diruto, census persolutus est ad superius sæculum monasterio Casinensi. Dum Tarracinæ rudera vestigamus, audimus vectorem nostrum non audere ulterius progredi, propter homicidium, quod recens in regno Neapolitano, cui Tarracina finitima est, perpetraverat. Urgemus pactum: calecam (quidni enim in re nova nobis novare non liceat?) obtulit ille, sed operam denegabat suam: nec alium aurigam inveniebat quem sufficeret. Bona fortuna Stephanotii nostri, qui se se nobis ad paucos dies socium in itinere Neapolim usque adjunxerat, domesticus aderat. Is aurigæ officium subiit, & sic ex lepidi illius mortalis manibus educti sumus.

XVII. Fundis ecclesia cathedralis beato Petro apostolo (quod pæne singulare) nuncupata est. In hac urbe Gallicani olim Cardinales, electo post Gregorium xi Urbano vi vim caufati, Clementem vii novis comitiis crearunt. quod funesti in ecclesia discidii exordium fuit. Fundis dum cænamus, importune se ingerunt duo satellites, qui se gubernatoris præsidarios ferebant. Talium hominum aspectus tristem aliunde mensam non ita belle condiebat. Dissimulamus. Illi cum se nihili a nobis fieri intelligerent, exeunt, & continuo reversi, mala aurea & alia id genus fructuum afferunt. Quid hæc dona vellent, facile erat divinare. Aliquot Julios Danais illis largimur. Exeunt illi dictis gratiis. Postridie cum ante lucem urbe egressi procederemus, illi armati truci voce aurigas sistere jubent. Dum vero vocem nostram audiunt, tum boni custodes faustum iter nobis comprecantur. Absque Juliis periculum marsupijs fuisset.

XVIII. Die festo sancti Lucae, impluvio cælo per Alpes infestas via Appia nobis obvia fuere Itræ, olim Mamurræ, Castellonum prope Caietam, postea Mola, quondam *Formie* appellata, ubi Ciceronis horti hætenus ostenduntur, in prof-

AN. 1685.
OCTOBRI.

Gregor. M.
lib. 1 epist. 8

pectu Caietæ. Paulo post Molam paullatim se aperit amœnissinia camporum & pratorum planities ad Lyrin seu Garilianum fluvium : ubi olim Minturna civitas episcopalis, Formicensi a Gregorio M. unita ; nunc aqueductus, amphitheatri, & thermarum reliquæ supersunt. Loco, ubi fluvius navicula transmittitur, Trajecto vocabulum est. Ad sanctam Agatham prope Sueffam hospitium fuit, haud longe a Sinuessâ. Sed bone Deus ! qualia ubique hospitia, quippe ad subigendam viatorum patientiam, non ad recreandos itineris labores. Jam ævo Ciceronis diverforia Tarracinæ male audiebant, ut ex ejus epistola ad Fabium Gallum intelligimus.

XIX. Capua duplex, nova & vetus : hæc olim ad viam publicam, nunc tantisper ab ea deflectit. Ejus delineatio, prout olim stabat, in ædibus Archiepiscopi visitur. Nova sita est ad Vulturum, eo in loco, ubi quondam Casilinum opidum stabat. Neutra vix quidquam habet elegans, præter jucundissimam fertilissimamque situs planitiem, quæ tot delicias antiquis, ipsi Capuæ superbiam & arrogantiam suggerebat. Novæ Capuæ metropolitana ecclesia, sancto Stephano nuncupata. Ab ingressu ad apsidem columnæ marmoreæ utrimque duodecim. In apsidis musivo antiquo beatissima Virgo cum Jesu affante in gremio sedente media residet : a dextris ejus sanctus Petrus & sanctus Stephanus ; a sinistris sanctus Paulus & sancta Agatha, subjecto hoc disticho :

Condidit hanc aulam LANDULFUS, & OTO beavit.

Mœnia, res, morem, vitæcum dedit HUGO decorem.

In infima parte ecclesiæ, supra portam, in ligneis tabulis depictæ sunt primorum Episcoporum Capuanorum effigies. In atrio eminet sub divo sepulcrum Atenolli principis. Apud Annuntiatam legitur epitaphium Paganini grammatici & rhetoris. Michaël, cognomento Monachus, & Camillus Peregrinius Capuæ nostro sæculo præclara fuerunt ornamenta.

Ad portam prætorii quædam vetera cernuntur monumenta, & inscriptiones nonnullæ. Præcipuus ex illis est marmoreus lapis, anno MDCXLV erutus e cryptoporticu veteris amphitheatri, longitudine palmorum quatuor cum dimidio, latitudine unius & dimidii, exhibens sequentes figuras.

GENIUS THEATRI



LVECEIVS·PECVLIARIS·REDEMTOR·PROSCENI
EX BISO FECIT.

Johannes Petrus Paschalis e Soc. Jesu, exiguu libello has figuras explicavit, ita ut prima figura machinam versatilem ad sustollendos lapides grandes; secunda sculptorem vel architectum; tertia Palladem; quarta Jovem sedentem; quinta Cupidinem; sexta Senatorem, qui impensas operi suppeditabat; septima denique Vulturum fluvium significari existimet. De quatuor primis explicationibus vix ulla difficultas: alias non facile admissuri sunt viri eruditi. Nam & quinta Apollinem melius refert, quam Cupidinem, qui nudus pingi solet: sexta sacrificum, qui Genio theatri sacrificat, dextra craterem effundens in aram, sinistra flores in cornucopiæ gestans. Nam Genio res sacra fiebat mero & floribus, ex Varrone & Censorino. Apud Oiseliu tab. XLII *Genio Augusti* eodem modo sacrificatur. Porro Genium serpentis imagine aliquando significatum fuisse, præter Rosinum, Virgilius auctor est *Æneidos* lib. v. Unde septima figura sine dubio exhibet Genium Theatri, ut titulus superpositus indicat. Sic apud Gruterum pag. CXI, *Genius theatri Pompeiani*: apud Reinesium pag. CLXXXIII, *Genius theatri Augusti* legitur. sed hæc viderint alii. Capuæ veteri, quæ altero milliari a nova dissita est, adjacet amphitheatrum, quod quadraginta millia spectatorum capiebat. Cryptoporticus centum octoginta columnarum triquadrato ordine constructa erat. Nunc etiam priscam ædificii magnificentiam parietes reliqui ostentant. Ecclesia major aliquid itidem retinet venerandæ antiquitatis: cujus picturas Michael Monachus in Sanctuario suo Capuano exprimi curavit. A Capua Neapolim usque quasi jugis paradisus, media civitate Averfa, arboribus, vinetis, pratis, cultisque terris consitus. Ibi nascuntur

AN. 1685.
OCTOBRI.

vina, quæ a lacryma Christi nomen habent, parum seria & accommodata appellatione.

Neapolim dum appropinquamus, nobis obviam venit illustrissimus Josephus Valletta, in senatu Neapolitano Advocatus, de nostro adventu Roma certior factus litteris amici Pastricii superius laudati, nosque in currum assumptos in nostrum hospitium deduxit. Perseveravit hæc Josephi humanitas per totum tempus, quo Neapoli versati sumus, id est per quinque fere hebdomadas: quo toto tempore nihil prætermisit officiorum, quæ amici maxime necessarii sibi invicem præstare solent.

XX. Neapolim lustrare cœpimus, quæ civitas argute dicta est *Fragmentum celi delapsum in terram*: eo modo quo Livius scriptor græcus, cum ad amicum suum scriberet Romæ videndæ cupidum, non urbem, sed *quamdam quasi celi partem* appellavit. Neapolis situs præstantior est: ubi omnia ad voluptatem composita. Si cælum spectes, quid illud? cum terra ipsa sit quædam celi portio. Si solum, illic Campania Felix, omnium non modo in Italia, sed in toto terrarum orbe pulcherrima plaga: quam eleganti libello descripsit vir limati ingenii Cælestinus Guicciardinus, Cælestinorum generalis præfectus, in suo Mercurio Campano, quem nobis dono dedit. Ver ibi perpetuum, quod nec frigoris inclementia, nec caloris vehementia interrumpit. Diceres unam ibi esse anni tempestatem, scilicet ver autumnale, aut vernum autumnum: cum flores, fructusque illic fere numquam deficiant. O tranquilla Parthenope, ait quidam, & magnis ingeniis laudata: vestrum est quod ait Maro:

Ver ibi perpetuum, atque alienis mensibus æstas.

Illic naturæ & artis miracula sine numero congesta, illic omnium rerum terra marique commercium. Paucis, Neapolis longe superasset Romam, si Roma Neapolis loco sterisset. A meridie secundum litus maris inferi, in cornua circumflectitur: tum extenditur in continentem, molliter ab imo usque ad verticem assurgente clivo. Celsiorem locum occupat arx sancti Erasmi, sub qua Cartusianorum cœnobium, a Carolo Illustri ædificatum, tanta magnificentia, tanta situs jucunditate, ut spectantes in admirationem rapiat. Ecclesiæ parietes marmoreis incrustationibus, pavementum marmoreis itidem segmentis constant. Sedilia opere tessellato, ex ligno Canarico, quodvis metalli & lapidis pretium superant. Sacrarum armaria, eadem

arte

arte elaborata, infinitam ex argento supellectilem continent. Prioris cella palatii loco esse potest. Omnia denique exquisitissimis picturis fulgent. Inde prospectus in urbem & in mare admirabilis. Camaldulenses in edito colle e regione consistunt. Ecclesiæ in illa urbe innumeræ, opes in eis infinitæ. Nempe uno hoc modo gazas suas in tuto positas Neapolitani existimant. Una novi Jesu ecclesiæ, quæ olim Salernitanorum Principum erat palatium, plus argentæ supellectilis habet, quam centum e nostris ornatioribus. Conventus Dominicanorum ad octodecim in urbe, præter aliquot suburbanos: Franciscanorum plures quam decem. In plerisque templis ac monasteriis plurima Francicæ pietatis monumenta exstant. Apud Clarissas Roberti regis conditoris, ejusque liberorum ac nepotum præclara mausolea.

Urbis decora primo triduo cum Valletta vidimus: cujus instructissima bibliotheca nobis maxime placuit. Hunc *Antigenis* nomine in suis eclogis celebravit elegans nostri temporis poëta Nicolaus Giannettasius e Soc. Jesu, eumque dicit *regio animo ac sumptu*, domi suæ bibliothecam ex probatissimis auctoribus omnium admiratione & plausu comparasse. Idem etiam de suo stipendium Gregorio Messerio, presbytero Brundusino, in litteris græcis versatissimo, suppeditavit ad græcas litteras publice docendas. Dum in hac ejus bibliotheca versaremur, eo accesserunt nostri causa, viri cum primis literati & nobiles, Franciscus Marcianus Judex, Franciscus Andreas, patronus causarum emeritus, quem in causa Principis Satriani magno cum eloquentiæ flumine & fulmine perorantem non semel auscultavimus; Andreas Andreinus, nobilis Florentinus; Pacichellus Abbas, Nicodemus nobis amicissimus, Alciatus latine & græce doctus, Carolus Cornelius, & alii: quorum plerosque postea semper conjunctissimos habuimus.

XXI. Dominica metropolitanam sanctæ Mariæ seu sancti Januarii ecclesiæ, quæ a Carolo I Andegavensi condita est, adivimus, olim Salvatori & sanctæ Restitutæ nuncupatam. Veteris sanctæ Restitutæ ecclesiæ ad sinistram navis partem quædam oratoria supersunt: ubi in capella, quæ dicitur Constantini, imago beatæ Mariæ prima totius Italiæ esse dicitur: sed non videtur tantæ antiquitatis. Nobis antiquiores visæ sunt picturæ ex musivo, quæ in adjuncta sancti Johannis ad Fontes ædificula conspiciuntur. E regione exstat magnifica sancti Januarii

A. M. 1635.
OCTOBRI.

capella, *Theſauri* appellata, eximiis ex ære statuis quatuordecim, aliisque multis donariis magnificis exornata : ubi caput ſancti Januarii cum duabus ampullis, in quibus aliqua ſacri ejus ſanguinis concreti portio, aſſervatur. Hic ſanguis ad præſentiam capitis colliqueſceri videtur, ampulla ea parte, qua ſanguis naturaliter in ſubjectam ampullæ partem cadere debet, ſuſpenſa. Miſſa interim una, duæve, dum ſanguis decidat, celebrantur : ſi non liqueſcat, prodigii infauſti loco habetur. Innocentius IV in illa baſilica ſepultus prope ſacrarium, quod ſacellum erat à Carolo I Neapolis rege conſtructum, primitus ſub titulo fratris ſui ſancti Ludovici Francorum regis dedicatum, ut ex picturis manifeſtum eſt. In illis picturis cernitur primigenius habitus Minorum cum capicio oblongo ; mentum ſine barba. In illo ſacrario oſtenſus eſt nobis baculus, quem ſancti Petri vocant, habens fulcrum ex ebore ad manum ſuſtentandam : quem baculum episcopis orantibus ex priſco ritu uſui fuiſſe credimus. Cathedralis *ſtephania* etiam * à conditore appellata, ſuas habuit, ut Roma, catacumbas : quod nomen loco impoſitum eſt ex imitatione Romanorum : quemadmodum etiam appellatæ ſunt apud Neapolim eccleſiæ ſanctæ Mariæ in *Cosmedin*, ſanctæ Mariæ *Major* : idque in aliis Italiæ urbibus etiam uſu venit, ut vocabula præcipuarum Romæ eccleſiarum alijs quoque aliarum urbium eccleſiis tribuantur.

* *Johan.*
Diac. in
ſtephano
41. Arch.
Neapol.

Sancti Severini monaſterium e noſtris magnificum : eccleſia auguſtiſſima ; intercolumnium a Gangaro depictum, nulli elegantia cedit. Johannis olim abbatis ſancti Severini hortatu Johannes alter, eccleſiæ Neapolitanæ diaconus, paſſionem ſancti Sozii Miſenatis levitæ & martyris litteris conſignavit. Abſens erat reverendiſſimus loci Abbas Hyppolitus à Vigilijs, cum primum eo proſecti ſumus. Reverſus fecit quod in ſe erat, ut nos apud ſe retineret. Nec deſuit etiam voluntas reverendiſſimi Patris Andreæ a Neapoli Procuratoris in Romana curia generalis, qui nos litteris ſuis ubique commendaverat. Illuſtriſſ. Franciſcus Nicodemus, Advocatus monaſterii Caſinenſis in ſenatu Neapolitano, litteris a Magliabeco acceptis, in dies curram ſuum cum Valetta nobis ſubminiſtravit, noſque continuis officiis ſuis afficere non deſiit. Is appendicem eruditam adjecit ad librum de Scriptoribus Neapolitanis, atque utrumque nobis dedit cum alijs libris.

XXII. Puteolos & Baias proſecturis occurrit poſt ſubur.

bium Caiarense mons Pausilypus, multis decoratus palatiis, sepulcro Virgillii, & Sannazarii secessu ac tumultu illustris: tum crypta ingens seu via intra montis tractabilem rupem excavata, stupendum opus: cujus longitudo ad ulnas 2700, latitudo ad 32. altitudo vero, qua major, ad 98 porrigitur. Cryptam seu carcerem longum appellat Seneca, alique veteres. Hæc lumen accipit a duobus extremis orificiis & e medio: cujus supercilium Alfonso Arragoneus senior aperiri curavit. Dolebat vero Peireschius, quod ignoraretur is, qui tam præclarum facinus tanto viatorum compendio, commodoque attentasset, digniorem arbitratus quam Xerxen, cum Græciæ bellum inferens, Athos montem medium perforavit.

* Puteoli, antiqua civitas, quo sanctus Paulus Romam profecturus appulit. Locum adeuntibus sese adiungunt Cicerones, id est locorum monstratores & interpretes. Memini legere apud Gregorium M. Ciceronem monachum Misenatem. Puteolorum ecclesia major, sancti Proculi titulo insignis, olim vetus delubrum erat. Amphitheatri reliquiæ, pons Caligulæ, sulfurata, & alia id genus permulta, Puteolos nunc magis commendant, quam ædificia recentia. Apud Puteolanos, ut nobis relatum est, non ferendus regnat abusus, ut qui conjugium appetunt mares & feminae, ante sollemnem in ecclesia benedictionem ad unum duosve, aut tres etiam annos simul conveniant, nequicquam repugnante Episcopo: adeo ut nec ulla pecuniaria huc usque multa ab ejusmodi errore potuerint revocari. Longe dispar erat Petrarchæ tempore Maria illa Puteolana, singulare servatæ virginitatis decus & admirandæ fortitudinis prodigium, quæ spectante ipso Petrarcha, grave saxum ac ferream trabem, quod onus nemo præsentium virorum attollere potuerat, nullo negotio e terra movit, stupentibus omnibus, qui aderant.

Ad urbis prospectum brevi freto dirimuntur Misenum, Baiæ, Ciceroni *Baſili*, Cumæ, Campi Elysii cum suis tumulis, Avernus, antrum Sibyllæ, thermæ, sudatoria: quæ omnia libris integris descripta sunt. Misenum, Cumæ, urbes quondam episcopales, a Gregorio M. simul unitæ; Baiæ, deliciæ quondam Romanorum; villa Ciceronis, nuda modo nomina absque ædificiis: nisi quod in editiori parte collis, ubi urbs olim exstabat Baiarum, Carolus v arcem superimposuit, quæ modo in ergastulum conversa est. Hic Agrippinæ, Neronis matris,

AN. 1685.
OCTOBRI

* PONZZO-
les.

Greg. M.
lib. 4. epist.
27.

Petrarch. lib.
4. epist. 40.

Greg. M. lib.
2. epist. 37.
Ind. 10.

AN. 1685.
OCTOBRI.

tunulus in crypta, etiam nunc picturam servans: hic Caligulæ superbum olim, nunc obrutum undis iter, cujus aliquot pilæ supersunt: hic Julii Cæsaris injectum pelago frenum seu portus.

Sub Miseni promontorio est crypta, quam *Traconariam* vocant, in quam ostiis quatuor aqua pluvia excipiebatur, (*Tracones* enim dicuntur meatus aquarum subterranei) duodecim pilis suffulta, quatuor transitus habens rectos, & totidem transversos, longitudine pedum CLXX, altitudine XX. Haud longe ab eo loco abest piscina *Mirabilis* dicta, Neronis opus, an Luculli, in rupe itidem excavata, longa passus CCL, lata CLX. quam sustentant pilæ latericiæ XLVIII. in quatuor ordines distinctæ. Castellum aquæ cæmento obductum. Descensus in piscinam per gradus quadraginta. Vicinæ Centum-camerellæ, Neronis opificium, incertum ad quem usum, nunc obrutæ, exceptis duodecim. Multa dici possent de balneis ac de cuniculis subterraneis, sudatoriis scilicet, è quibus calidi emanant vapores, quorum vis ad pellendos morbos mirabilis est. Erant olim ad quadraginta ejusmodi balneæ aut sudatoria apud Baias: ad quas alludit Sidonius in epistola ad Aprum, qui tunc temporis in gallicanis quibusdam thermis versabat r. *Calenses (an calentes) nunc te Baia, & scabris cavernatim rutata pumicibus aqua sulfuris, atque jecorosis ac phthisicentibus languidis medicabilis piscina delectat.* Ex illis cuniculis calidus vapor erumpit adeo densus, ut qui recto corpore procedunt, tantum non suffocentur: at qui demisso capite, facile respirant. Ex puteo potissimum assurgunt ejusmodi vapores.

Ad lacum Avernum visitur antrum, quod Sibyllæ appellant, Virgilio, Justino martyri, aliisque antiquis memoratum. Observatione dignum est id, quod ex Sibyllæ Cumææ oraculo cecinit Virgilius *Ecloga quarta. Non omnino est*, inquit Augustinus, cui alteri, præter Dominum Christum, dicat genus humanum:

Te duce si qua manent sceleris vestigia nostri,

Irrita perpetua solvent formidine terras.

quod ex Cumæo, id est ex Sibyllino carmine, se fassus est transtulisse Virgilius: quoniam fortassis etiam illa vates aliquid de unico Salvatore in spiritu audierat, quod necesse habuit confiteri. Antrum illud latitudinis fere quinque passus, altitudinis pedes circiter quindecim habet; ad trecentos tantum passus modo extensum, obducto muro ad ulterius spatium, ne ultra progredientes aut

Augustin.
epist. 258.
num. 5.

inter fœtorem, aut vaporum spissitudinem (uti contigisse aiunt) exanimarentur. Post septuaginta passus descensus est in cubiculum quoddam musivo decoratum, ubi fons limpidissimus ad balneum, & duo lectuli ex lapide compositi: quo in loco Sibyllam se lavasse ferunt. Adjacet & aliud eodem modo ornatum cubiculum cum alio itidem fonte: ex quo Cumas usque, id est ad tria millia, subterraneus meatus, nunc occlusus, porrigebatur. Hoc antrum eo consilio factum dicunt nonnulli, ut expeditior a Baiis ad Cumas esset transitus. Cumarum porro nihil superest præter arcum Felicem, ut vocant, quem portæ urbis partem fuisse nonnulli opinantur. Hæc civitas anno M C C VII a Teutonibus excisa est. Eversionis historiam habes apud Bollandum ad XVI Februarii, post vitam sanctæ martyris Julianæ, quæ colebatur in Cumana sancti Maximi martyris ecclesia cathedrali. Sic enim in fine vitæ sanctæ Julianæ auctore Petro Neapolitano diacono legitur in codice Casinensi, qui locus mendosus est in editis: *Translatum est corpus ejus in civitatem Cumanam, in ipsum episcopium, & in beati martyris Maximi basilica collocatum.* In eadem urbe erat quondam Apollinis statua cum pede cygneo, ad sapientiam scilicet designandam. Forfan ob similem causam Chrothildis, Chlodovei M. conjux, in antiquis statuis cum pede anserino etiam nunc conspicitur nonnullis in locis apud Gallos nostrates.

Inde revertendo Puteolos, vidimus montem novum, qui ex eruptione subterranei ignis die XXIX Septembris anni M D XXXVIII excrevit post ingentes terræ motus, quibus Tripergula opidum totum obrutum est, mari ad centum passus retrocedente. Simile quid de Taureduno castro ad Rhodanum sito, apud Gregorium Turonensem episcopum leges. Uno milliari a Puteolis visitur fanum Vulcani, vulgo Sulphurata, alias *Sulforetaria* dicta in actis sancti Januarii Beneventani episcopi, qui non longe ab illo monte martyrium passus est. Apex montis continua ignis depastione subsidit in vallem formæ ovalis, cujus longitudo est pedum 1246. latitudo amplius quam mille. Terra ex sulphure, bitumine, chalcanto, aliisque similibus rebus constat. Terram hanc non secus atque hortum excolunt rusticani, & ex materia per vapores cocta & disposita, figulina vasa aliquanti pretii conficiunt. Prope etiam sunt officinæ, ex quibus alumen conficitur. Haud procul ab eo loco sunt spiracula, mortiferum spiritum exhalantia: qualia in Sinuessâ.

Greg. Turon. lib. 4. c. 31.

AN. 1685.
OCTOBRI.

no, Puteolanoque agro exstitisse Plinius tradit. Unum est in monte Anagnio, lacum media publica via contiguum habens, *Antum canis* vulgo appellatum. Est autem specus ad altitudinem hominis, longa quatuor pedes, vaporem adeo pestilentem emittens; ut quidquid animatum & spirans in eam injicias, continuo spiritum amittat; & nisi statim inde removeas, continuo exanimetur intereatque. Id hominibus nonnullis accidisse testes fide digni asseverant; nosque id experimentum in cane & in rana factum vidimus. Nam mox ut canis in terram tantisper demissus tenebatur, spiritu intercepto emori videbatur: at statim projectus in proximum lacum, animam resumebat. Sed, quod nobis observatione dignum visum est, rusticus a nobis conductus, qui hoc experimentum faciebat, ipse recto corpore intra specum nihil timens consistebat, facem accensam gerens, quæ ad altitudinem quatuor pedum flammam retinebat, depressa continuo amittebat. Atque adeo vapor ille, terræ visceribus conceptus, in exitu letalis est: ubi tantisper cum aëre mistus fuerit, nocendi vim amittit.

XXIII. Sed jam tempus est ut ad solitas nostras amœnitates revertamur, id est ad veterum librorum bibliothecas, e quibus præcipua Neapoli, si veteres libros spectes, est Patrum Augustinianorum in cœnobio sancti Johannis de Carbonaria. In ea multi sunt codices antiqui, tum græci, tum latini; veteres item librorum editiones ex dono Hieronymi Seripandi Cardinalis. Is germanum habuit fratrem Antonium, cui cum amicus Janus Parrhasius libros suos testamento legasset, Antonius vicissim eosdem cum suis Hieronymo fratri reliquit, ab Hieronymo sodalibus suis postea datos. Franciscus Puccius Florentinus utriusque, id est Jani & Antonii, præceptor fuerat. Ex libris græcis præter vulgares hi sunt: *Georgii Gemistii opera*, *Procli commentarii in Platonem*, *Eunapii vitæ sapientum*, *Gregorii Nysseni de iis qui eunt Ierosolyma*, *Maximi epistola ad Hesiodum*, &c. *Theodoriti epistolarum* codex bonæ notæ, sed mutilus initio & in fine; *Cathecheses Theodori Studite*, *Evangelia* quatuor cum glossis græcis, quibus præmittuntur canones Eusebii cum epistola ejusdem ad Carpianum: *Augustini soliloquia* græce. Ex latinis codex antiquissimus litteris Saxonice, in quo *Hieronymus de scriptoribus ecclesiasticis* cum Gennadio, eodem modo dispositus atque in nostro Corbeienſi, ubi de Augustino eodem modo sermo est, uti ex Corbeienſi retulimus in tomo

secundo Analectorum; *Gelasii decretale* de libris Canonicis, *Priscianus de laude Anastasii Imperatoris*, quod notatu dignum: *Tertulliani Carmen de Jona*, libri duo *Claudii Sacerdotis de grammatica*. In alio veterrimo codice Evangeliorum, litteris quadratis exarato, Evangelium *secundum Lucanum* adscribitur. quod in alio item Bobiensi legere meminimus. Item in aliis *Vibii Sequestris de fluminibus, fontibus, lacubus* &c. ad filium suum Sebastianum. Ad hæc varia collectanea Sirleti pro Concilio Tridentino: multiplex item propositio quæstionis de Justificatione in eodem Concilio facta, cum Seripandi censura. Præterea *Ægidii Viterbiensis historia* autographa viginti sæculorum, per totidem Psalmos digesta, cum quibusdam item Seripandi observationibus & emendationibus. Ejusdem *Ægidii variae epistole*, per Seraphinum Eremitam Augustinianum collectæ in unum: ex quibus præcipuas descripsimus. Dum vero post multos dies ceteris exscribendis daremus operam, bibliothecarius, juvenis bonæ indolis, & qui nobis eatenus impense, & quidem, ut videbatur, ex animo faverat, nescio quo impellente fingit, se cujusdam consanguinei ægrotantis causâ extra urbem debere proficisci in dies octo: quo tempore sciebat nos constituisse Neapoli discedere, nec bibliothecæ claves sibi creditas cuiquam consignare posse. Astum subodorati, ejus reditum exspectamus. Finguntur alia atque alia in dies, ne ulterius in bibliothecam admitteremur. quod facile tulimus, cum pauca superessent quæ nostram operam desiderarent. Sub bibliotheca exstat lararium Seripandorum: ubi Antonius monumentum *Francisco Puccio*, quod *bonarum artium sibi magister fuisset*: tum aliud *Jano Parrhasio*, quod *sibi socius in re litteraria fuisset*, testamento fieri jussit. Ipsius Antonii epitaphium sic habet.

ANTONIO SERIPANDO

Sacerdotiis commodioribus honeste functo, cujus fide atque doctrina scribendis epistolis Elisus Cardinalis Aragonius usus fuerat, uni mortalium maxime amicorum causa nato, qui vixit annos XLV. mens. XI. dies XV. fratri optimo F. JACOBUS anno M D XXXVIII.

Hieronymus Seripandus, sepultus Tridenti in ecclesia Augustinianorum sancti Marci, super avitum familiæ sacellum curavit

AN. 1685.
OCTOBRI.

construi bibliothecam, de qua mox diximus. In ecclesia sancti Johannis de Carbonaria exstat mausoleum Ladislai regis; egregia item monumenta Caracciolorum.

XXVI. Elegantior est Olivetanorum bibliotheca, sed non tot vetustis referta libris. Inter codices fere viginti, unus continet historiam translationis sancti Benedicti & sanctæ Scholasticæ ex Italia in Galliam: tametsi *eorum cadavera partim, non ex toto* translata dicuntur. In perantiquo Calendario Capuano apud Michaëlem Monachum eadem translatio notatur die XI Julii, itidemque in multis aliis etiam Italiæ Calendariis. In sacello familiæ Aurilianæ apud Olivetanos exstant præclaræ ex terra cocta statuæ, nempe Christi Domini crucifixi humi jacentis, atque hinc Joviani Pontani sub nomine Nicodemi; inde Jacobi Sannazarii sub nomine Josephi. Sannazarii, ut jam dictum est, tumulus, & quidem affabre elaboratus, ad Pausilypum exstat in villa ejus suburbana Mergellina, quam templo exstructo Virgini parturienti & sancto Nazario vivens nuncupavit. Pone altare magnificum ex pario marmore assurgit ejusdem Sannazarii mausoleum, in cujus summo dimidiata ejus ad vivum effigies, lauro redimita: subtus binæ hinc inde adstant marmoreæ Minervæ & Apollinis statuæ, ludentibus in medio satyris. Pudit forsan, nec immerito, posteros tantæ in ipsis etiam aris irreligionis: eamque belle occultare sibi visi sunt, apposito sub Apollinis statua D A V I D; & sub Minervæ J U D I T H nomine. Sed his coloribus non luditur Deus. In infima parte inscripti sunt duo versus auctore Petro Bembo Cardinale, omnibus noti. Actii Sinceri (sic enim alio nomine Sannazarius vocabatur) obitus in sepulcro notatus est anno M D. XXX pro M D XXXII. ut periti censent. Valletta nobis numisma dedit in ejus honorem percussum, quod hic exhibemus



Virgilii sepulcrum ex alia Pausilypi parte tribus fornicibus, duobus quadratis, summo rotundo constat, inventu difficile absque duce. In inferiori camera super columnas marmoreas erecta erat urna, poëtae cineres continens, cum disticho vulgato. Virgilii breve aliud epitaphium nuper repertum est in villa Ducissæ Cagiani.

AN. 1685:
OCTOBRI.

SISTITE VIATORES, QUÆSO PAUCA LEGITE.

HIC MARO SITUS EST.

Nihil brevius; nihil concinnius. Nunc non belle sonat epitaphium, nisi librum efficiat: vitæ ipsæ non placent, nisi in multiplices libros dividantur. Ergo male actum est cum Attico & Agricola, quod Cornelium Nepotem ac Tacitum, compendiosiores scilicet vitæ suæ scriptores habuerint.

XXVIII. Vidimus museum Francisci Antonii Picchiati, refertum cimeliis rarissimis, varii generis numismatibus, græcis & latinis, aureis & argenteis.

Dum in Vallettæ bibliotheca versaremur, res haud illepidam contigit. Is ab Inquisitione Romana obtinuerat facultatem legendi libros prohibitos, sed eos solos, qui de humanioribus literis tractarent. Rem bono modo, ut par erat, interpretabatur. Scrupulum movit filius, an litterarum humaniorum nomine Historici comprehenderentur. Consultus ea de re Pater spiritualis censuit comprehendere, qui tamen postea suspectam habens suam definitionem, ad concilium Patrum quæstionem retulit. Hi contra censuerunt non comprehendere: iussusque est Pater spiritualis sententiam revocare. Venit ad Vallettam, dum nos in ejus bibliotheca versaremur: & Vallettam seorsum affatus, Patrum sententiam exposuit. Reversus ad nos Valletta: Qualem vero putatis, inquit, fuisse illius legationis causam? Factum mox non sine stomacho narravit, obtestatus, ut Romam reversi, ampliorem sibi facultatem impetraremus. quod lubenter præstitimus.

II. Ad prolusoriam orationem in collegium Sœc. Jesu invitati sumus a R. P. Nicolao Gianettasio, qui nobis carmen suum *de re Nautica*, quatuor libris eleganter scriptum, dono dedit, vir humanitatis & candoris non vulgaris.

NOVEMB.

IV. Excellentissimo Proregi Marchioni de Carpio reddidimus litteras a R. P. Gusmano Dominicano. Multa in nos Proregis humanitas fuit, cui debet Neapolitanum regnum, quod

AN. 1685.
NOVEMB.

ab infestis prædonibus repurgatum sit, & ad meliorem gubernandi formam compositum. Vidimus inter Proregis cimelia caput tenuissimum instar ovi columbæ, quod pumilionis fuisse asseriebant vetera auctorum testimonia: pumilionem autem circa Avenionem vixisse tempore (si non fallor) Benedicti xiii. Discedentes excellentissimus Prorex ad festum de natali Catholici Regis, quod apud Carmelitas intra biduum celebrandum erat, nos invitavit.

Eodem die bibliothecam Patrum Theatinorum, qui ad Apostolos degunt, adivimus. Insignis auro, picturis & fabricæ majestate domus & ecclesia, in cujus aditu præclarissimæ columnæ veteris Castoris & Pollucis delubri supersunt. Codices antiqui ibidem aliquot: e græcis *Andreas in Apocalypsim*, *Cyrilli Carthecheses*, *Vita Constantini*: e latinis *Vita Sanctorum Neapolitanorum* in duobus voluminibus; *Martyrologia* duo antiqua: ex Italicis autographum *Torquati Tassi de Jerusalem liberata*. Frontini opus de aquæductibus, quod ibi exstare clarissimus Thevenotus, bibliothecæ regiæ curâtor, Parisiis nobis significaverat, non invenimus post diligentem inquisitionem.

Postremo profecti sumus ad suburbanam sancti Januarii ecclesiam, quæ *Magna* dicitur in actis sancti Athanasii, aliis *ad Corpus* apud Capacium: ubi olim Ordinis nostri monasterium erat, modo Lazaretum. Incumbit ecclesiæ mons, in cujus cavitæ antiquum est urbis cœmeterium, omnino insignæ; quod usui erat annos supra nongentos. Eo profecti sumus cum Valletta, duce Carolo Celano, venerabili canonico ecclesiæ metropolitane, rerum Neapolitanarum peritissimo, nam ceteris fere tunc ignotum erat cœmeterium. In immensum produci-
tur, & longe altiores habet, quam Romana cœmeteria, fornices, ob duritiem & firmitatem rupis, secus quam Romæ, ubi arena seu tophus tantum altitudinis non patitur. Multæ sunt directæ per cœmeterium viæ; & quidem triplex ordo cryptarum, alius super alium. In unaquaque viâ sex sunt ordines loculorum: varia subinde lararia diversarum familiarum, cum variis inscriptionibus etiam græcis, qualis est hæc, $\overline{\text{I}}\overline{\text{E}}\ \overline{\text{X}}\overline{\text{P}}\overline{\text{E}}\ \text{N I K A}$. item $\text{A}\ \Omega$. At pavementum sancti Januarii totum ex veterum inscriptionum fragmentis stratum est. In aditu cryptarum adest subterranea ecclesia sancti Asprenis, ejusdem civitatis episcopi primi; & prope eam sancti Januarii episcopi & martyris altera, ubi a sancto Severo sepultus est.

Celanus duo nobis epistolarum a se scriptarum volumina largitus est, quibus titulum dedit, *Avanzi delle poste*.

A N. 1685.
NOVEMB.

V. Vesuvium montem conscendimus, qui ab urbe octo millibus distat. Ascensus montis ad tria milliaria maxime arduus; ab uno milliari ad verticem, propter abruptum iter, cineribus ex montis conflagratione frequenter erumpentibus, maxime lubricus. Mons extra hoc milliare optimis vinetis confitus est. E summo conspicitur vorago ingens ad tria milliaria in gyrum: cujus humus ob assiduos motus, quasi sulcis arata videtur. In medio voraginis ante aliquot annos mons e cineribus eructantibus conflatus emerfit, ignem & ingentes fumi globos jugiter evomens: tametsi flamma ignis interdum rarius cernitur. Fragoribus subinde horrendum immugit, (quod accidit tempore quo Neapolim accessimus) & lapides cum cineribus inde violento impetu emissi, vastitatem agris finitimis minantur, & sæpe magnum detrimentum afferunt. Cum illuc venimus, fumi globos immensos ad aquilonem vehemens propellebat ventus. Unde relicta nobis ex adverso adeundi facultate, quam propius e summo montem fumantem prospeximus. Materia tota sulphuris & bituminis speciem habet, eadem omnino atque in Sulphurata prope Puteolos: sed in Vesuvio longe major & inflammator. Descendi in craterem voraginis sine periculo non potest: at in Sulphuratam descensus minus periculosus propter fumi raritatem, qui nobis ibi non nocuit. Ab Oriente Vesuvius Neapolim spectat, mare a meridie, ab aliis partibus campos. Ex parte maris Stabiæ erant haud procul a monte, ultra fluvium Sarnum, vicus modo excisus, ubi Plinius secundus fumo Vesuviano præfocatus est. Proxima sunt Pompeianum, & Herculaneum: ubi prælium Latinos inter & Romanos commissum, Tito Manlio Torquato & Publio Decio Coss. Jugum, quod Neapolim spectat, ab adjacente Summa opido *Mons Summe*: alterum ad meridiem, corrupta (ut veri simile est) Vesuvii appellatione, *Veholus* appellatur, unde Seberthus amnis decantatus excurrit.

VI. Rheda excellentissimi Proregis nobis submissa, ad Patres Dominicanos sancti Thomæ primum, ut eminentissimum Cardinalem Ursinum salutarem; deinde ad ecclesiam Carmelitarum accessimus, ubi Catholici Regis natalis dies sollemnibus sacris celebrandus erat. Stabant in amplissima platea præsidiariorum militum dispositæ acies, omnes in habitu Gallicano.

A. N. 1685.
NOVEMB.

Inter eos cum in sella gestatoria procederet excellentissimus Prorex, nos e propinquo visos ex sua sella benignissime salutavit, & per unum e suis sertum e floribus, quod in manu gerebat, nobis deferri iussit. Quod non commemoraremus, nisi ad commendandam tanti viri in omnes, maxime in exteros, humanitatem.

Post meridiem conventus a nobis Januarius Andreæ, Francisci germanus frater, unus e præcipuis regni Consiliariis, retulit nobis Camilli Peregrinii epitaphium, quod Camillus ipse sibi vivens composuit, atque amico suo Januario Andreæ dictavit, quod in memoriam hominis de re publica litteraria bene meriti referre juvat, addito vitæ & mortis anno.

CAMILLUS PEREGRINIUS

ALEXANDRI F.

HIC JACET.

MENTE DEUM, STILO PATRIAM, OFFICIIS AMICOS,
PURE, DIGNE, SANCTE COLUIT.

VIXIT ANNOS LXV.

CONTENTUS VIXISSE.

OBIIT ANNO MDC LXIII.

HAUD MOLESTO SIBI FATO.

HOSPES HÆC SATIS E SAXO.

A B I.

Quod se Camillus Alexandri filium diceret, non ostentationis, sed discriminis causa dixit, nempe ut se distingueret a Camillo Peregrinio patruo suo majore, qui italice scripsit de controversia nata inter Tassum & Ariostum. Multa etiam in eadem collatione dicta sunt de Cartesio ejusque doctrina, quæ ab omnibus ejusdem urbis eruditis magnopere probatur.

CAVENSE MONASTERIUM.

VII. Sequenti die cum Francisco Andreæ & Valletta egimus de itinere nostro ad Cavense nostri Ordinis monasterium, quod unius diei intervallo abest a Neapoli: statuitque Franciscus cum Valletta & Alciato nos ad eum locum comitari in rheda Principis Satriani, apud quem Franciscus hospitatur.

VIII. Cavam adeuntibus occurrit primo villa, ubi Carolus ex Africa reversus per triduum diversatus est, unius horæ ab urbe intervallo: tum fluvius vulgo Scaphatus dictus

cum arce, ubi Dux Guisus a Neapolitanis acceptus; deinde Pompeianum, Herculaneum, & Nuceria urbs episcopalis, in cujus ecclesia majori, sanctis Prisco & Marco ejusdem sedis episcopis sacra, Jonæ prophetæ ossa servari asserunt. Inde Peninas alpes ingressi, noctem illam egimus apud sanctum Georgium in ædibus illustrissimi Baronis, Francisci Andreæ consanguinei, qui nos humanissime tractavit. Sub eo, in quo noctem agebamus, cubiculo planctus gementis, ac querulosas voces e subterraneo loco emittentis, a nobis auditi. Vallettam accersivimus, ut Manes illos (sic enim male credulis videri potuisset) interrogaret. Rusticus erat, ob violata venandi jura in foveam detrusus. Profuit illi gemitus suus. Nam Valletta, nobis obsecrantibus, ejus causam probe egit, atque homini ex illa fovea egressum sequenti die impetravit.

X. Urbs Cava, jam dudum episcopalis, triginta sex parochiis circumpositis constans, in amœna valle sita est, quam montes hinc inde ambiunt, vinetis & arbutis jucundissime vestiti. Monasterium inde duobus milliaribus distat, ad quod ascensus est per sinuosam viam, haud ita procul a Salerno. In media via exstat Oratorium sancti Petri, ubi Romani Pontifices duo monasterium adeundo tantisper substitere: quorum unus fuit Urbanus 11. qui ecclesiam dedicavit. Progressis paullo post occurrit opidum, *Corpus Cavae* appellatum, quasi quoddam cœnobii munimentum, ab illis scilicet inhabitatum, qui *homines de corpore* in monasteriis nostris dicebantur. Ab eo loco fit descensus in cœnobium, medio in monte abrupto intra rupem excavatum, in loco quem veteres *Meletianum* vocitabant. In basilica exstat tumulus sancti Adelferii seu Alferii abbatis primi a dextris aræ, in qua sanctissimum Sacramentum asservatur, cum sepulcris, hinc Petri Abbatis eo nomine primi, inde Petri secundi, qui Alferii neptis filius fuit. Eo certis diebus magnus fit populorum concursus. Ecclesiæ sanctæ Trinitatis & regularibus ædibus horridæ tecti instar incumbunt rupes, purissimam aquam exsudantes, quæ sine incommodo per totum monasterium derivatur. Ibi cum multa humanitate excepti sumus a reverendissimo abbate Jovita a Neapoli & religiosiis monachis. Dum cum illo verba faceremus, accedens quidam rusticus ad pedes abbatis se abjecit, eosque deosculatus est. Is pro calceis habebat pellem recentis corii bubuli, fasciis circum pedes involutam; quod genus calceamenti, apud rusticos pauperiores

AN. 1685.
NOVEMB.
Polit. Mus.
cell. pag.
477.

in regno Neapolitano usitatum, antiqui *carbatinas* seu *carpatinas* appellabant, ut probat Angelus Politianus in Miscellaneis. Cavenfis monasterii archivum integerrimum est, atque ante annos quinquaginta optime ordinatum per Augustinum monachum, qui totum opus in quatuor volumina distribuit, varia passim erudita documenta interfereundo, cum prævia præfatione, in qua nomen suum auctor modestiæ causâ reticuit. Manum ad scribendum adhibuit Camillus a Capua, loci monachus. In duobus instrumentis VVaimarii seu Guaimarii Salernitani principis ac monasterii conditoris, sigillo affixo apponitur adversum sigillum, quod nusquam in sigillis affixis prehenderamus. Sigillum cereum ex una parte VVaimarium dimidiato corpore, cum sceptro in dextra, & corona clausa in capite præfert, sub hac inscriptione, VVAIMARIUS PRINCEPS: ex adversa manum extensam medio digito ad pollicem reflexo, cum eadem inscriptione. Bulla aurea pendet e diplomate Rogerii Siciliae regis cum inscriptione græca: Ρογέριος βασιλεὺς τῆς σικελίας ἐκ τῆς χειρὸς τοῦ βασιλέως. Bonfès.

In bibliotheca pauci supersunt codices, *Hilarius de Trinitate & de synodis*, liber de *geographia* antiqui auctoris, *Vita Patrum Cavenfis*, ante annos quadringentos exarata litteris Langobardicis. Quæ scriptura proinde perseveravit ad sæculum XIII. ut patet tum ex hoc codice, tum ex alio *Benedicti* Cavenfis monachi de *septem sigillis* ad Balsamum Abbatein, quod opus ineditum est. In fine auctor veniam petit, quod abbate minime conscio illud opus composuerit. Vixit sub annum MCCXXVII. In alio codice sunt variæ *Regum Langobardorum leges*, eorumque gesta: tum variæ interpretationes vocum Langobardicarum. Magnopere nos pænuit, quod in illo itinere neque Salernum adierimus, neque Nolam, cujus maxime videndæ desiderio ob sanctum Paulinum tenebamur.

XI. Neapolim reversi, sequenti die lustravimus reliquias veteris amphitheatri, templique Castoris & Pollucis: deinde bibliothecam Patrum Capucinorum, quæ fuit quondam Centurionis nobilis Genuensis. His diebus munusculorum ad amicos missitationes fiunt, quorum etiam nos partícipes fuimus.

XIII. Andreas Andreinus, nobilis Florentinus, nobis cimelia sua ostendit. Singulare est numisma ex ære magno Procopii tyranni, Valentis æmuli, cum inscriptione in adversa

parte, REPARATIO FELICIIUM TEMPORUM. In quodam plumbo, quod e servi collo pendeat, hæc leguntur: *Tene me quia fugio, & revoca me in viam latam ad Flavium D. M.* id est *dominum meum*: quales inscriptiones alibi habentur.

Eodem die, cum apud Januarium Andreæ versaremur, magno cum mærore accepimus nuntium de morte illustrissimi Franciæ Cancellarii Michaëlis Tellerii, quem exteri paullo minus quam Galli luxere, uti præcipuum togæ ornamentum, atque justitiæ & æquitatis eximium exemplar. Luximus vero sortem nostram, quod optimum patronum amissemus, eique pro modulo nostro parentavimus.

XVI. Relicto Neapoli ad tempus Anissonio, ex urbe illa discessimus cum Valletta patre, ejusque filio Didaco, modestissimo & græce docto: qui nos ultra Aversam in rheda sua cum eximiis amoris testimoniis deduxerunt. Aversæ in transcurso invisimus sancti Laurentii monasterium e nostris, quod a Guiscardo constructum est, uti etiam civitas Aversa ex reliquiis vicinæ urbis Atellarum. Prope Aversam exstat castellum Castrilucis, Johannæ primæ Neapolitanorum reginæ insanis amoribus infame, quod Boamundus de Baucio in Cælestinorum cœnobium commutavit. Ibi beatissimæ Virginis imago, quæ à sancto Luca (si Deo placet) depicta dicitur, cum duobus pretiosis vasis, altero ex alabastrite, altero ex acathe, quæ pro duabus cœnæ ad Canam celebratæ hydriis habent. Inde Vallettis non sine mutuo animorum dolore dimissis, per Capuam veterem ad novam devenimus. Hic cum de Michaëlis Monachi tumultu inquireremus, venerabilis vir Octavius Massarius, ecclesiæ metropolitanæ Canonicus, nobis ostendit novam ejusdem auctoris appendicem ineditam ad Sanctuarium Capuanum, cujus appendicis copiam Massarius nobis liberaliter fecit.

CASINUM, ET SUBLACUS.

XVII. Sequenti die Casinum adituri, ad viam publicam, quæ * Teanum ducit, advertimus lapidem quadratum, cui * *Teano*; insculpta erat hæc inscriptio haud vulgata.

P. TAPSENNÆ. P. F. PROCULUS
MILITAVIT. COHOR. X. PR. SIN
PETTIAE. URBANAE. CONJUGI

AN. 1685.
NOVEMB.

QUI. CUM. VIXIT. ANNIS. XXXII.
CUIUS. DOLOREM. ACCEPIT. ALIUM
NULLUM. NISI. MORTIS. EJUS. ET
P. TAPSENNÆ. L. F. PATRI. ET
Q. TAPSENNÆ. P. F. FRATRI.

Ea nocte hospitati sumus in diverforio prope Caianellum, quod opidum *Calenolum* Herchempertus appellat : ubi egregie tractantur adventantes, quibus pluris constat somni, quam cibi refectio.

XVIII. Dominica per loca invia, prædonibus olim maxime infesta, nempe per sanctæ Felicitatis & sancti Miniani vicos, opidumque sancti Petri de Pinubus, accessimus ad urbem sancti Germani, ad radices Casini montis sitam : ubi a reverendissimo Patre Abbate, Congregationis Casinensis Præsidente, Sebastiano a Mediolano, cum omni caritatis officio excepti fuimus.

XIX. Feria secunda, quo die sancti Odonis abbatis festum apud nos celebrari mos est, sacrum montem pedibus conscendimus cum Patre Carafa Decano. Tribus horis confectus a nobis est arduus ascensus. Ad primam cœnobii portam a quinque monachis magna cum amoris significatione accepti sumus. Ad primam aream primum, quadratis lapidibus stratam, porticibusque ornatam, (Paradisum appellant) gradibus quadraginta per subobscurum fornicem ascenditur; inde in atrium ecclesiæ, columnis & statuis insigne, per totidem fere gradus; ac demum in ecclesiam subitur. In hac quadriporticu exstant statuæ summorum Pontificum & episcoporum Casino eductorum: tum ex una parte ecclesiastici, ex alia sæculares benefactores. Ad portam ecclesiæ parens uterque sancti Benedicti, cum columna marmorea, cui impositum erat olim Apollinis idolum, quod sanctus Pater comminuit. Peractis sacris nobis occurrerunt R. P. Bernardus a Neapoli Prior, Ratchisus Scotus, aliique. Nihil eorum in nos humanitati defuit, quam per dies decem experti sumus ab universis monachis, qui eo in loco quam laudabiliter viventes divina officia, si uspiam alibi in Italia, rectissime celebrant. Matutinum non, ut fere alibi, de die, sed nocte aut summo mane persolvunt.

Mons Casinus, in quo situm est monasterium, tantum habet in

bet in crepidine spatii, quantum satis est ad continendas regulares aedes. Ecclesia, ut in loco angusto, magna & ampla; ut in illa montis altitudine & asperitate, quo nulla possunt vehicula pertingere, magnifica & augusta. Bipatentes portæ majoris valvæ ex ære, in quibus universas monasterii possessiones litteris argenteis Desiderius Abbas, qui postea Victor I I I dictus est, imprimi curavit. Ex utroque navis latere, præclara sacella quinque cum suis convexis hemisphæriis, quorum unum beato Berthario abbati, duo alia Victori I I I, & Apollinari abbati sacra sunt. Ad utrumque latus majoris altaris, hinc Vidi Ferramoscæ, inde Petri Medicei mausoleum. Chorus navi supereminet cum ara majore, & sua testudine a Lanfranco præclare depicta: sub qua jacet crypta cum altari sancti Benedicti, aliisque duobus Placido & Mauro nuncupatis. In ipsa crypta visitur sedes pertusa ex porphyritide, omnino integra, similis duabus Lateranensibus, sed altior. Constantinus Cajetanus inde probare conatur, Pontifices statim post suam Romæ consecrationem Casinum proficisci solitos ad repetendum totum suæ consecrationis ritum: quod ex hac sella Casinensi inferit. Rectius Angelus de Nuce sellam balneariam fuisse censet, quam veteres *folium* appellabant. Facile crederemus novos Abbates Casinenses in eam sellam exemplo Pontificum impositos fuisse, si aliqua hac de re in vetustis libris testimonia suppeterent. Sed cum in illis nihil, ubi de Abbatum institutione mentio est, legatur, id temere nolumus affirmare. In sacrario Casinensi extremum caput Regulæ, quod propria manu sancti Patris exaratum dicunt, & pondera panis & vini asservantur: sed hæc non videntur tantæ antiquitatis. Fortasse hoc folium Regulæ est illud, quod Drogo abbas Glannasoliensis anno M. C. X X X I I I Casinatibus cum aliis donis obtulisse perhibetur in chartario Petri Diaconi. In codice quodam mentio fit de altero Regulæ autographo, quod in Majori monasterio servabatur, de quo infra.

Ad sinistram Casinensis ecclesiæ partem hospitium existat ad excipiendo peregrinos, qui frequentes eo confluunt, & ex eodem latere vetus capella sancti Martini, ubi, si qui peregrini aliquando illo in loco morte intercipiuntur, sepeliri solent. In sacello beatæ Annæ conditorium est monachorum. Ad dextram ecclesiæ consistunt regulares officinæ, claustrum, dormitoria, aedes Abbatis & hospitium, & aliæ pro loco non

AN. 1685.
NOVEMB.

minus magnificæ, quam commodæ. Has terminat turris, in qua sanctus Benedictus habitasse creditur, & in ea egregium sacellum, picturis exquisitissimis, variisque ornamentis decoratum.

In monte aër purus, ac plerumque serenus, dum in subjecta valle densissimi nimbi in multam diem singulis diebus æquoribus instar subsidunt. Prospectus in ipsam vallem alioqui jucundissimus. Tonitrua illic pæne quotidiana: terræ motus haud rari. quod semel nobis illic morantibus accidit. Aqua ibi nulla, nisi pluvialis.

Casino monti non longo intervallo superminet mons Cäirus, aliis Cäira, nivibus fere perpetuis rigens. In hoc monte Apollinis aram, quam sanctus Benedictus subvertit, exstitisse anonymus poëta, qui instaurationem sacri cœnobii Casinensis a Desiderio factam cecinit; immo cœnobium Casinense ibidem primitus fuisse innuit his versibus.

*Mons ibi Cäira nomen habens,
Omnibus eminet: ipse quidem
Pectore mœnia prisca nimis
Pertulit, in quibus ara fuit
Qua perhibetur Apollo coli.
Hic Pater ante monasterium
Constituit Benedictus, habens
Pignora luminis ætherei,
Plebs quibus inscia demoniis
Eriperetur ab opprobriis.*

Verum hoc loco Cäiræ *pectus* seu venter prominens Casinum montem haud dubie significat, ut ex sequentibus versibus intelligitur: cujus comparatione Cäira Casini montis vertex censeri potest. Sacri montis ac monasterii specimen in adjuncta tabella expressum est, quod Lectoribus non ingratum fore speramus.

Prima nobis de libris cura post res sacras. Bibliotheca novo opere constructa est prope Capitulum: libri omnes de novo eadem forma operati. Supersunt membranei codices ad quingentos, multis hac illac distractis. Quosdam in Vaticano invenimus: in his unum, in quo Gregorii & Victoris III de sancto Benedicto Dialogi, & quidquid ad sanctum Patrem pertinet, continentur, cum variis monachorum atque Abbatum figuris, in quibus cuculla atra, toga alba depingitur. Lon-



gum esset recensere quæ ex illa Bibliotheca depromimus. Inedita sunt quædam, nempe liber *Scintillarum seu sententiarum*, quas ex Catholicis Patribus excerpsit DEFENSOR Grammaticus & monachus Locociagensis apud Pictones, vetus auctor, ut qui nullum e Patribus Ilidoro posteriorem adducit. Est & aliud ejusdem argumenti JOHANNIS ABBATIS, ejus scilicet qui libros tres de vita Odonis abbatis Cluniacensis composuit, *Opusculum ex Gregorii Moraliibus defloratum*: in quo auctor alia sua scripta commemorat. Anonymi etiam liber de *sacra expeditione* tempore Urbani 11. Multa ibidem *Petri Diaconi*, & aliorum opuscula itidem inedita. Ex Martyrologio veteri discimus, Thomam Aquinatem Casini monachum fuisse, antequam in Dominicanorum religionem convolaret. Ita enim de eo Nonis Martii secunda quidem manu, sed ante annos trecentos adscriptum legitur. *Nonis Martii apud Fossam novam natale sancti Thomæ confessoris, viri eruditissimi: qui oriundus de Aquino, primo Casinensis monachus factus, postmodum in Ordine beati Dominici frater Predicator effectus, sua multiplici & fructuosa doctrina illuminavit valde Ecclesiam sanctam Dei.*

In eadem bibliotheca habetur codex græcus bonæ notæ, quædam *Gregorii Nazianzeni* opera complectens, quædam etiam sancti Nili *de Christiana philosophia* &c. quo codice usus est Ilidorus Clarius ad hunc librum e græco transferendum in latinum, ut inferius videbimus. In alio codice græco quædam item *Johannis Damasceni*. Ex latinis potiores sunt codices, qui *Ferrandi Diaconi* epistolas; *Augustini* operis imperfecti libros tres priores contra *Julianum*; *Gregorii Turonensis* episcopi historiam, quæ in nonnullis ab editis differt; *Auxilii Presbyteri* quæstiones in *Genesim*; *Palladium de re rustica*, & *Frontini* librum de *Aqueductibus*, continent. Hoc postremo Casinenfi codice usus est Poggius ad vulgandum prædictum Frontini librum, quem, quia deficiente edito conferre nobis non licuit, integrum descripsimus. Manus ad scribendum, & se ipsum totum in nostros usus impendit pius & cordatissimus Dominus Erasinus a Caieta. Unum nobis defuit ex Casinenfi bibliotheca volumen, quod inspicere non potuimus, illud scilicet, quo usus est Lupus Augustinianus ad vulgandas insignes illas epistolas, quæ ad Concilium Ephesinum pertinent. Inquirentibus nobis dictum est, Romam fuisse missum, postulante R. P. Procuratore generali: qui post reditum nostrum asseruit, illum codi-

A. N. 1685.
NOVEMB.

cem esse in palatio apostolico : nec quidquam aliud de eo a quodam elicere valuimus. De aliis quibusdam codicibus aliqua observare juvat.

In variis codicibus diversi reperiuntur *sancti Severiani* Galilitani episcopi sermones, sed non tot, quot in codice bibliothecæ Ambrosianæ, nec omnino iidem. Unus est, cum de *expulsione ejus* ageretur. Alius de *pace*; cum susceptus esset ab episcopo *Johanne*, scilicet Chrysostomo. Prior ita incipit. *Multi quidem fluctus, & undæ immanes: sed submergi non vereor, quia supra petram sto. Insaniam licet mare, petram non potest commovere: insurgant quantumlibet fluctus, navis Jesu obrui non potest. Sed quod putant, ne mortem verear; cur verear, cui vivere Christus est, & mori lucrum? ne exsilium pertimescam, qui Domini noverim esse terram, & plenitudinem ejus. Sed bonorum proscriptionem metuum? qui sciam, quod nihil intulerim in hunc mundum, sed neque auferre quid possum. Quicquid terrori habet mundus, contemno: quicquid delectabile habet, rideo. Divitias non cupio, paupertatem non pertimesco. Mortem non timeo. Vita enim mihi ad vestrum profectum tantummodo ducitur.* Hæc in specimen sufficiant, nam posterior ille, de quo mox diximus, sermo inter homilias Chrysostomi vulgatus est.

De Regula sancti Benedicti hæc legimus in quodam codice Casinensi ad librum, qui inscribitur *Ordo monasticæ conversationis*, editus apud Haëstenum. *Hæc verba sanctissimi patris Benedicti reperta sunt in fine Regula, quam ipse propriis manibus scripsit, & sancto Mauro, cum ad Gallias mitteretur, tradidit: quæ dominus Petrus Abbas Cluniacensis, cum ad Majus-monasterium Turonense in eadem Regula, quæ ibi pro reliquiis servatur, invenisset, rogavit sibi transmitti.* Eadem verba, suppresso Petri nomine, refert Brovverus in Historia Fuldensi: sed ita ut referantur, non ad librum de Ordine monasticæ conversationis, verum ad hæc, quæ ex codice Fuldensi ab eodem Brovvero, tamquam ex Turonensi exemplari desumpta adducuntur. *Codex peccatoris Benedicti. Va mihi misero habenti contrariam mihi rem: qui reus in omnibus, quæ adversantur moribus meis malis. Tu vero horum lector, si tuam videris vitam concordare præceptis, orans pro scriptore, codicem redde domino suo.* At vereor, ut hæc clausula, quæ in fine Regulæ in exemplari Turonensi legebatur, sit tantum exscriptoris, non auctoris. Quidquid sit, modo pergit hoc exemplar, aut saltem in alienas manus pervenit. Parcat

Brovver.
Pag. 172.

lector, si tantisper in res monasticas exspatiamur: locus excusat & occasio.

De vita sancti Placidi apud Casinum diligenter inquisivimus, & de vita sancti Mauri. Triplex ibi reperta beati Placidi vita: una jam vulgata sub nomine Gordiani, antiqua: altera per Petrum Diaconum ac monachum Casinensem, ad Gregorium præfulem: tertia per Stephanum Aniciensem. utraque inedita, & ex græco (sic isti auctores asserunt) translata. Primæ vitæ folia ante annos septingentos descripta, ad compingendos alios codices detracta invenimus. In vetusto Kalendario Casinensi, quod annos sexcentos præfert, hæc adscripta sunt aureis partim litteris. *III Non. Octob. apud Siciliam natalis sancti Placidi beatissimi martyris cum sociis suis, Eutychio, Victorino, & aliis triginta: pro quo pater ejus Tertullus Patricius decem & octo patrimoni sui curtes beatissimo patri Benedicto obtulit.* Hæc primaria manu: sed *Octave sancti Placidi*, minus antiqua. De sancto Mauro id invenimus in veterrimo codice, olim Nonantulensi, nunc sanctæ Crucis in Jerusalem, qui codex a Leopardo abbate Nonantulensi *acquisitus est*, eum in Litaniis appellari post sanctum Benedictum. Leopardus ordinatus est abbas anno DCCC XCIX. Codex ipso antiquior. Ad hæc in bibliotheca Casinensi exstant veteres loci ritus sub Berthario abbate, ubi jejunia ecclesiastica tempore æstatis ad nonam, alio tempore ad vesperam usque præcipiuntur. Hæc, inquam, sub Berthario abbate: cui a Petro Diacono tribuitur *liber Anticimenon, id est, questionum de libris veteris & novi Testamenti*, qui liber Juliano episcopo rectius adscribitur a Felice episcopo Toletano in appendice ad librum Isidori de Scriptoribus ecclesiasticis. Exstat hoc opus Casini, tempore Bertharii abbatis exaratum, uti indicant subjecti versus, quorum duo primi Petro aliisque ansam dederunt ipsum opus Berthario adscribendi.

Bertharius Christi fultus juvamine sanctus

Presbyter hunc librum condere jussit amans.

Post bibliothecam nobis archivum lustrare concessum est, omnium totius Italiæ præstantissimum. Præter authentica instrumenta innumera, quæ habentur a tempore Bertharii abbatis, adfunt etiam varii codices, in quibus integra diplomata & privilegia referuntur. Unus est Petri Diaconi cum præfatione ad Seniorectum abbatem, cujus hortatu id operis aggressus est Petrus, accedente etiam Roberti Capuanorum Principis in-

AN. 1685.
NOVEMB.

terpellatione. Totum librum in sex dividit sectiones pro totidem argumentis, id est, *privilegiis, præceptis, oblationibus, libellis, renunciis, & sacramentis.*

XXVIII. Albaneta Casini prædium est uno inde milliari, olim monasterium, in quo Lucius monachus Cavenfis piissimus ante annos quingentos se recepit: & longe post eum sanctus Ignatius Loyola, ut ad fundandum Soc. Jesu institutum in illo secessu se disponderet, hic exercitia sacra frequentavit. Ob id Novitii Patrum, qui in illis partibus degunt, Albanetam religionis causa passim adeunt.

Dum a studiis vacaremus, identidem interfuimus collationibus & disputationibus publicis, quæ apud Casinates nostros frequentissime fiunt de rebus theologicis & philosophicis, maxime moralibus; nec raro etiam de Scripturis sacris. Ejusmodi collationes passim conditæ orationibus & poematiis, ut hospitibus suis gratificarentur. Sane apud Casinates præclare instituuntur juvenes, qui per sex annos continuos sub accurata magistri disciplina in Novitiorum conclavi privato degunt: ubi in officiis pietatis atque in litteris accurate exercentur. Eadem in aliis etiam Casinensium cœnobiis institutio viget, in quibus præclara semina conservandæ religionis observavimus, si modo conceptos ignes refineant in adulta ætate. Neque vero Casini defunt emeriti senes, fervore & disciplinæ regularis studio ipsis etiam juvenibus superiores: quorum si revelaremus nomina, modestiam & latendi desiderium forsân offenderemus.

Prope archivum insignis est inscriptio lapidi incisa, quam nec apud Gruterum, nec apud Reinesium invenimus.

* *Sacris
faciendis*

C. UMNIDIO. C. F. TER. DURMIO
QUADRATO. COS. XVVIRO. * S. F
LEG. TI. CAESARIS. AUG. PROV. LUSIT.
LEG. DIVI. CAES. AUG. D. F. IN. LYRICO
EJUSDEM. ET. NERONIS. CAESARIS
AUG. IN. SYRIA. PROCONS. AUG. AD. CUR.
P. R. AER. XVIRO. STLIT. JUD.
CURAT. TABULAR. PUBLICAR. PRAEF.
FRUM. DANDI. EX. S. C.

Hoc ultimum est quod Casino reportavimus monumentum. In antepæultimo versu, STLIT. JUD. id est, *Litibus judicandis*, nam *stlitibus* pro *litibus* passim legitur in vetustis ins-

criptionibus, ut apud Gruterum ccccl. num. 9. & M xxv. 2, & alibi. Unde absque intermedio puncto consimilis legenda inscriptio apud Boissardum.

AN. 1685.
NOVEMB.

Boissard. 3.
p. art. fol. 45

XXIX. Casinatibus nostris cum multa gratiarum actione vale dicto, iterum ad inferius sancti Germani monasterium, prosequente ad primam Casini portam universo amantissimorum Patrum cœtu, nos recepimus, ut die sequenti Sublacum versus iter institueremus. Henricus a Gandavo, & Erasmus a Caieta nos in descensu comitati sunt. Reverendissimo Patri Præsidenti, qui tum in lecto ex dolore pedum decumbebat, actis ex animo gratiis, ipse suam vicissim operam, si quando ea opus haberemus, verbis & postea litteris pollicitus est. Egressi ex opido sancti Germani, vidimus reliquias veteris amphitheatri in loco, ubi olim Casinum opidum situm erat; deinde villæ Varronis, quod testes idonei probant. Eiusdem Varronis sine scripto monumentum ibidem superesse Puccius apud Jovianum Pontanum in Dialogo Ægidii refert. Paulo post Plumbariolæ, olim monasterio, nunc prædio ad sinistram relicto, miserati sumus ruinas ingentes Aquinatis civitatis, cujus ecclesia cathedralis neglecta, conspurcata, violata, tumuli effossi, altaria diruta, parietes ex impluvio ruinæ proximi. Exstant adhuc veteris amphitheatri rudera ad majorem cumulum doloris, quod civitas olim illustris ad eum redacta sit statum, Episcopus loci in proximo sancti Germani opido plerumque versatur. Ipso die sancti Andreæ Frisenonium opidum, triginta millibus a Casino, hospitium nobis præbuit.

I. Post Guercinum opidum ingressis in lucos & in Alpes sese obtulit veteris muri semirutus, ac portæ in ipsis silvis haud inelegantis fabrica; moxque in subjecta valle fons Anionis, qui triplici capite, cum magna aquarum copia, ex rigidissima rupe erumpit, & per aquæductus demum Romam partim perducitur, Trebia nuncupatus. Eadem die per continuam vallem pervenimus ad monasterium sanctæ Scholasticæ, quod Sublacensi specui proximum est, olim sancti Benedicti & sanctæ Scholasticæ appellatum. Sanctum Silvestrum addit Anastasius in vita Leonis iv. ubi hæc leguntur. *Ipse vero præclarus, antistes, superno inflammatus amore, obtulit in monasterio sancti Silvestri, sanctique Benedicti, & sanctæ Scholasticæ, quod nuncupatur Sublacus, vestes de fundato tres, & vela similiter de fundato septem.* Nunc sanctæ Scholasticæ cœnobium simpliciter appellatur, situm

DECEMB.

AN. 1685.
DECEMB.

in ascensu montis, qua in sacram specum ascenditur, media videlicet via inter ipsam specum & opidum Sublacensē. Illic duodecim cum Abbate regulari monachi vivunt, cum tenui censu. Abbatialis mensa Cardinali Barbarino commendata est, uti & Farfensis. Triplex fuit illius monasterii sub Abbatibus status. In primo statu, qui a conditione loci ad Urbanum VI perseveravit, Abbatis electio per monachos; confirmatio per Pontificem de more fiebat. Urbanus VI abbatis perpetuitate sublata, manuales, id est ad nutum Pontificis mobiles, instituit: sed ita ut ex monastico ordine eligerentur. Hic secundus status ad Callistum III. qui Abbates perpetuos regularibus suffecit, quorum primus fuit Johannes a Turre-cremata Cardinalis, & post hunc Rodericus Borgia Valentinus, qui post modum Alexander VI. a quo transivit abbatia titulus ad Columnenses in centum & sexdecim annos; & ab his ad Barbarinos, qui hactenus ea fruuntur. Reginren monachorum est penes Abbatem regularem: quod officium modo recte administrat religiosissimus Pater Michaël Angelus Invrea, nobilis Genuensis. In claustro ecclesiae vicino legitur barbara

ref. Scalam

hæc inscriptio. * *Sculum quintanas & fenestras cum pabimento Quojutor qui pro amore Dei & beati Benedicti abbati, qui in hoc locum magnum certamen habuit. Tum sequitur: Edificatio ejus ecclesie sanctæ Scholasticæ tempore domni Benedicti VII PP. ab ipso Papa dedicata, quod sunt ab Incarnatione Domini CCCCCCCC LXXXI: mense Decembri die iii. Indiēt. VII. Ad portam ecclesie sanctæ Scholasticæ (cui adjacebat sanctorum Cosmæ & Damiani Oratorium, quod modo in Capitulum conversum est) hæc item leguntur. Anno IV pontificatus domini Leonis Papæ, Humbertus venerabilis abbas edificavit opus egregia turris ad honorem Christi Confessoris Benedicti, ejusque sororis sanctæ Scholasticæ virginis: ubi breviter annotavit ea, quæ continentur in Præceptis hujus venerabilis monasterii. In primis specum: duos lacus: fluminis decursum cum molis & piscariis suis &c. quæ opportuniùs alibi referemus cum chronico ejusdem monasterii. In sacrario corpus sanctæ Chelidonie asservatur. Bibliotheca olim plurimis referta libris, nunc ad paucas editiones veteres redacta est. Archivum absente custode videre non potuimus. E paucis qui restant manuscriptis codicibus, unus est Adalgeri episcopi ad Rosvvidam reclusam de rebus moralibus; liber seu tractatus qui vocatur *Linea salutis monachorum sive eremitarum*, compositus*

compositus a religioso viro fratre AMBROSIO de Florentia, Generali Ord. Camald. Dialogi more scriptus est liber, totusque constat ex sententiis Patrum. Translatio librorum Dionysii de mystica Theologia, cui præmittitur Prologus JOHANNIS SARACENI, translatoris ejusdem libri, ad Odonem abbatem sancti Dionysii: qui Johannes ejus rei gratia in Græciam se profectum fuisse tradit; mentionemque facit de VVillelmo monacho, qui librorum causa itidem in Græciam missus fuerat ab Odone abbate, cui & ipse VVillelmus successit. Is est qui anno MCC LII, teste VVillelmo Nangio, sancto Ludovico, in transmarinis partibus commoranti, navem pannis variis, caseis & volatilibus oneratam, per duos ejusdem loci monachos misit. Ceterum Joannes ille Saracenus fuit abbas Vercellenfis, ut ex apposita dorso codicis epigraphe intelligitur.

II. Dominica prima Adventus sacram specum, quæ mille passibus inde abest, conscendimus non sine gestientis animi gaudio, dum tritam a beatissimo Patre atque sanctis hominibus viam incederemus. Specus ipsa in medio abrupti montis sita est; mille passus supra angustissimam vallem, in qua Anio amnis instar torrentis præceps decurrit. Directum habet ad meridiem prospectum in oppositum montem, angusta valle a specu discretum. Spatium quod eo in loco negaverat natura, ars & industria hominum dedit, tantum scilicet, quantum ad Oratorium & ad viginti monachorum cellas cum hortulo sufficit. Ibi unicus modo degit monachus cum socio ex eorum numero, quos Commissos vocant, nos Conversos, diebus festis violaceo pallio indutos. Oratorium in tres partes dividitur, superiorem, mediam, & infimam. In hac specus est sanctissimi Patris, statura hominis non longior, paullo minus alta: ubi signum piissimi adolescentis ex marmore ab Equite Bernino egregie fictum. Ara ad specus ingressum posita est, ubi sacra celebravimus. In medio ordine plura sunt altaria, unum sancto Gregorio sacrum, ad quod hæc leguntur de Gregorio IX. *Hic est Papa Gregorius, olim episcopus Ostiensis, qui hanc consecravit ecclesiam.* Tum subjiciuntur hi versus de eodem, qui illic per duos menses quondam resederat.

Pontificis summi fuit anno piæta secundo

Hæc domus: hic primo quo summo fulsit honore

Manserat, & vitam celestem duxerat idem,

Perque duos menses sanctos maceraverat artus:

AN. 1585.
DECEMB.

Julius est unus, Augustus fervidus alter.

In sacrario ostenditur tintinnabulum, quo utebatur Romanus, cum ex rupe specui eminente panem Benedicto subministrabat.

ROMA SECUNDO.

Tivoli.

III. Sublacus unius diei itinere Roma distat. * Tibur in itinere obvium propter angustias temporis a nobis prætermisum. In diversorio proximo, cum reficiendis equis pabula quærimus, negavit hospes, nempe ut nos ea nocte apud se retineret. Memini aliquando nobis Arona Mediolanum reverentibus, cum à fabro ferrario clavos aliquot ad ferrum equi firmandum peteremus; religione se teneri, quo minus id faceret, respondit vir bonus, integrum ferrum esse necessarium. Sic illi viatoribus illudunt nonnumquam. Hoc tamen habent commodum & liberale, quod peregrinum atque advenam irridere, vel ferociore dicto aut facto quemquam, nisi provocati, laceßere nefas putant. Albula fluviolo, cujus aqua fervens, ripæ sulphureo colore infuscatæ, pertransito, inde Romam denuo appulimus.

XIII. Sanctæ Lucæ die festo sollemnes gratiarum actiones quotannis Deo fiunt in basilica Lateranensi ob memoriâ conversionis Henrici IV Francorum regis, cujus statua ex ære ad porticum ejusdem basilicæ lateralem posita est. Monumentum hujusce conversionis cernitur e regione ecclesiæ sancti Antonii, ubi religiosi Galli degunt, prope sanctam Mariam majorem, erecto signo crucis cum inscriptione: quam quia nebulones quidam ex parte violarunt, integram huc referre non pigebit.

D. O. M.

CLEMENTE. IIX. P. M.

AD MEMORIAM

ABSOLUTIONIS HENRICI IV FRANCIE
ET NAVARRÆ REGIS CHRISTIANISSIMI,

Q. F. A. D. XV. KAL. OCTOB.

CIO IO XCV.

XVI. Schelestratus nobis dono dedit librum suum de Concilio Constantiensi: sequenti vero die ostendit codices Vaticanos, quibus usus est in isto libro contra Mamburgum,

ut probaret hæc verba Sessionis quartæ, *quoad reformationem in capite & in membris*, in antiquis Concilii codicibus desiderari. Unus codex habet (quod Schelestratus ipse bona fide non dissimulavit) hunc articulum Sessionis quartæ non integre fuisse lectum, sed suppleri ex Sessione sequenti.

XXV. Natali Domini sacrum Præsepe in basilica sanctæ Mariæ-majoris expositum erat super altare in quodam reliquiario, domunculæ instar fabricato, longitudine duorum circiter pedum, latitudine non integri unius pedis. Ligni partes cariosæ simul colligatæ sunt.

Inde transito Colisæo venimus ad Oratorium sancti Sebastiani, in monte Palatino situm, prope arcum Titi Augusti, quem arcum *Ad septem Lucernas* appellatum invenimus a septifido candelabro templi Jerosolymitani, illi inciso ob memoriam subactæ civitatis. Eandem ob causam *Arcum recordationis* dictum opinamur in Descriptione urbis Romæ, quam in tomo IV Analectorum retulimus. In prædicto oratorio sancti Sebastiani (Sebastianellum vocant) retro altare, veteres parieti appositæ sunt picturæ. Has Constantinus Caïetanus excudi curavit, ratus in eis repræsentari sanctum Benedictum inter apostolos Petrum a dextris, & Paulum a sinistris. Verum potius est imago beatissimæ Virginis, uti colligitur tum ex facie oblonga & imberbi, tum ex lineo panno circa collum, sanctimonialium instar; tum ex velo a capite dependente; tum denique ex adjunctis versibus, quos partim mox referemus. Illud tamen obstare videtur, quod manum dextram extendit benedicens in morem, tenetque librum manu sinistra. Sed cum cetera conveniant, hæc neutiquam a sententia recedere nos cogunt. In superiori parte parietis cernitur Christi Domini cum ejus monogrammate effigies, habentis manus expansas super Episcopum, græcanico ritu indutum; adhærente Diacono: sinistram vero porrectam ad feminam quamdam, quæ pusionem in cunis ipsi offert, adstante subdiacono cum libro. Radiatas habent omnes, etiam mulier, coronas. quod indicium est probatæ ac receptæ sanctitatis. Ad pedes eorum multitudo agnorum, quales in antiquis musivis & picturis passim occurrunt. In ordine medio varii depinguntur sancti, in medio Episcopus manibus hinc inde ad pectus supine porrectis, cum duobus utrimque Seraphinis, qui Christi monogramma una manu, alia labarum gerunt cum trisagio. Sub eorum pedibus inscripti erant

AN. 1685.
DECEMB.

sex versus semesi, ex quibus hæc tantum expiscari potuimus.

Virgo Redemptoris genitrix & splendida mater,

.....X R I.....

... *Sebastiano vota*...... *illustris medicus*........*capiat vestris celestia regna.*

Primum ex his versibus referri non potest nisi ad beatissimam Virginem, quæ in infimo (ut diximus) ordine media inter apostolos Petrum & Paulum depicta est. Sub eorum pedibus hæc inscriptio legitur.

EGO BENEDICTUS PRB. ET MONACHUS PINGERE FECI.

Constantinus legit PP. I. id est, *Papa primus*. Verum consulta usque tertio scriptura, indubie ita legendum esse censuimus, PRB. id est *Presbyter*. Etsi enim aliquid de secundæ ac tertiæ litteræ characteribus detritum est, remanent tamen sufficientia vestigia ad lectionem nostram confirmandam. Nescio an Benedictus ille idem sit cum Benedicto presbytero, qui vitam Damasi Papæ, rogante Petro ecclesiæ sancti Laurentii ad Damasum presbytero, in litteras retulit, qualis a Sarazanio edita est. Sed de illis picturis satis.

Inde ad antiquissimam sancti Georgii in Velo-aureo basilicam, quæ fere numquam patet; adivimus. Eodem modo constructa est, atque aliæ veteres basilicæ, nempe absque fornice & laqueari, præterquam in apside. Altare majus apside obversum est, ita ut sacerdos populum spectet. Sic ad sanctum Petrum in Vaticano, in Lateranensi basilica, ad sanctam Mariam majorem, ad sanctum Clementem, ad sanctos Petrum & Marcellinum, ad sanctam Mariam trans Tiberim, ad sanctum Chrysogonum, & ad sanctam Cæciliam, (sed non ad sanctum Paulum), & in aliis non paucis, quarum portæ Orientem spectant, quæ ratio movit, ut sacerdos ad populum conversus sacra faceret, ne ab Oriente oculos ac faciem orando, ac sacris operando averteret.

Non longe ab sancto Georgio est templum sancti Theodori, quod olim Romuli fanum erat, rotundo opere, sed absque ornatu. Nicolai v nomen in porta hinc inde primis dumtaxat litteris designatum est, cum insignibus pontificiis. In illud templum septem octove gradibus abrupte descenditur propter soli elevationem.

XXVIII. Bibliothecæ Barbarinæ forulos, annuente cum eximia benevolentia eminentissimo Carolo Cardinale, revolvēre cœpimus. Nulla Romæ post Vaticanam numerosior. Ad eam nos deduxit amicus noster Guillelmus Lessæus Scotus, Theologus Cardinalis familiaris; nobisque se facilem exhibuit eruditus bibliothecæ præfectus Petrinus, canonicus Prænestinensis. Invenimus in primis collectionem Africæ Conciliorum, quam Lucas Holstenius meditabatur: sed imperfectum opus & inelaboratum, sine rerum ordine, nihil non editum continet. Inedita sunt *acta Concilii Tridentini* per Gabrielem Palæotum Cardinalem; item *Vicecomitis epistole* de rebus ejusdem Concilii ad Cardinalem Borromæum, cum Pii IV comonitorio ad eundem Vicecomitem. Ad hæc *Nicolai Fabricii. Peyreschi epistole* ad diversos. Ibidem *Codex Canonum* miræ antiquitatis, itemque *Ordo Romanus* vetustissimus. Rursus ex minime vulgatis epistola Prosperi Phaneli Calabri, monachi Casinatis, *an Christus Dominus in cena Emauntina usus fuerit signo crucis ad benedicendum panem.* quod ipse negat. Multa ex variis codicibus descripsimus: Chronicon Sublacense, fragmenta Chronici sancti Vincentii ad Vulturum a Chesnio prætermissa, cujus Chronici autographum ibidem habetur. In illo autographo variæ depinguntur figuræ, Abbatis una cum baculo non recurvo, sed in T desinente. Vincentius diaconus & martyr pingitur cum stola ex humero sinistro dependente, & manipulo digitis extra pollicem imposito. Item monachus cum tunica alba & subatro scapulari, quod tribus redimiculis ad utrumque latus adstrictum est. Denique, ne simus nimii, pro *Zmilla*, quod nomen Reginæ legitur apud Chesnium tomi tertii pag. 683. in codice habetur *Ymilla*. Ex eadem Bibliotheca eruimus *Prosperi Sanctacrucii*, Nuntii apostolici in Gallia, libros tres commentariorum *de civilibus Galliarum dissensionibus* tempore Caroli IX. quibus Prosper præsens adfuit.

XXIX. Dominica Missam celebravimus ad sanctum Paulum, ubi vidimus ligneam Crucifixi effigiem, quem sancta Brigida sibi loquentem audisse perhibetur. Ad sanctos Cosmam & Damianum vetus Crucifixi figura talari veste induta est. quod de quibusdam aliis observavimus. Exstabat olim supra portam veteris sancti Petri basilicæ Vaticanæ imago Crucifixi, a collo ad pedes operta, opere musivo depicta per Johannem papam VII. cujus imaginis typum exhibuit Angelus Rocca in libro

AN. 1685.
DECEMB.

fuo de Particula sanctæ Crucis.

XXXI. Cum inter loquendum de ecclesiasticis rebus sermo incidisset de fermento, quod Romani Pontifices antiquitus per ecclesias mittebant, Josephus Maria Thomafius dixit se probare id, quod de ejusmodi fermento in nostro Itinere Germanico observatum erat, nempe nihil aliud esse quam Eucharistiam consecratam: alia sibi ejusdem sententiæ suppeteret argumenta, quæ nobis suppeditavit. Porro hujusce ritus originem sibi videri referendam ad Zephyrinum papam, de quo legitur in Propylæo ad tomum 1 Aprilis Bollandiani, eum fecisse hoc constitutum, *ut patenas vitreas ante sacerdotes in ecclesia ministri portarent, dum episcopus Missam celebraret.* Hujus autem muneris ministros fuisse acolythos, e quorum numero fuerit ille Tharsicius, qui cum quodam die deferret Christi corporis sacramenta, nec vellet ea discutientibus prodere paganis; tamdiu est fustibus ac lapidibus maceratus ab eis, quousque exhalaret spiritum; ut in Martyrologio Usuardi legitur ad XVIII Kal. Sept. Subjunxit Thomafius mirari se, ex Amalario neminem observasse, quod antiphonæ olim post singulos ejusque psalmi versus repetitæ fuerint: responsoria integra a cantore primum decantata ad versum; deinde a choro repetita; & post versum a cantore cantatum, iterum a clero repetita: secus in Gallia. Verum hæc ipse fusius in Præfatione ad suum Antiphonale, & nos quoque alias.

AN. 1686.
JANUARIO

VI. Cum solita humanitatis & obsequiorum officia amicis nostris de more persolvissimus, ad visendam sanctæ Crucis in Jerusalem bibliothecam, cujus jam superius mentio facta est, non semel nos contulimus, favente humanissimo & religiosissimo abbate Cosmo Annoño Mediolanensi. Inter illa quæ descripsimus, non ultimo loco censendum est sancti Anastasii martyris miraculum, factum in ejus basilica ad Aquas-salvias tempore Constantini papæ, octavo sæculo ineunte. In pervetusto codice, qui fuit quondam monasterii Nonantulensis, *de acquisito domni Leopardi abbatis*, anno undenongentesimo ordinati, continetque excerpta ex Hieronymi commentario in Psalmos, præmissa ejusdem epistola ad Sunniam & Fretelam; primo loco habentur Litanie veteres, in quibus Confessores inter laudantur Polycarpus, Eleutherius, Grammatius, Constantius, Damasus, Innocentius, Gelasius, Victor, Possidonius, Orosius, Priscus, Rufinus, Rufinus, Paulus, Paulinus, Felix, Lucius, Fortunatus, Dona-

tus, *Benedictus*, *Maurus*, *Antonius*, *Effrem*, *Euphrosinus*, *Sabinus*, *Probus*, &c. Superfunt in illa sanctæ Crucis bibliotheca codices numero C L X X I I. Bibliothecarius Carolus Emmanuel Scottus, itidem Mediolanensis, humanissimus adolescens, operam suam nobis contulit.

XIII. Eminentissimus Cardinalis Capisucchius ad suam audientiam nos benigne invitavit admisitque. In sermone familiari actum est de sententia piæ memoriæ Cardinalis Bonæ de Azyino, quam sibi non probari dixit. Actum est etiam de Gothescalco & de Prædestinarianis, quos nequaquam ficticios esse Cardinalis censet. Idipsum nuperrime Seraphinus Piccinardus e Prædicatorum cœtu demonstrandum suscepit, edito Patavii libro anno superiori sub titulo *Prædestinatus*.

Per hosce dies, cum basilicam, quæ Ara-cæli vocatur, adissemus, exposito illic magna cum pompa Cardinalis Savelli recens mortui cadavere, quatuor famuli in quatuor funeris angulis amplissima flabella movebant ad abigendas muscas, quæ per id tempus non dmodum infestæ erant. Sed ita præcipiunt cæremoniarum leges. Eo in loco Jovis Capitolini quondam templum stabat. Gradibus centum viginti in basilicam scanditur. Ibi olim Benedictini versabantur. Ecclesiæ machinam sustinent columnæ marmoreæ: tholum ornant elegantes picturæ. Ad sinistram altaris partem sacellum & ara cum quatuor columnis, sub qua corpus sanctæ Helenæ in urna porphyretica jacere creditur. tamen si ad Altvillarense Campaniæ nostræ monasterium translatum fuisse quidam veteres Galli scriptores tradunt. Non longe inde abest ecclesia & xenodochium beatæ Mariæ de Consolatione: ubi quædam Antonia testamento mandavit, cadaver suum in osseam compagem redigi ad usum medicorum. quod ab illustri quodam Sancto recentiori itidem de suo præceptum fuisse accepimus.

XV. Cœmeterium recentissime detectum est ad portam Majorem prope aquæductum Sixti v. quod cœmeterium Castuli esse existimant. Integri loculi reperti, integræ etiam quibusdam in locis inscriptiones, quarum una erat cujusdam femine A BALINEU AUGUSTAE. In loculis Martyrum erant vitra sanguinis maculis adhuc rubentia.

Post sex dies iterum eodem reversi, quædam corpora, quæ

AN. 1686.
JANUARIO

sanctorum esse creduntur, e tumulis extulimus, procurante Fabretto. Ex illis quorum corpora fustulimus, tres nominibus suis designati erant; *EX SUPERIUS*, *MACEDONIUS bonæ memoriæ* dictus, tametsi anno ætatis duntaxat duodecimo decessisse dicitur in lapide adjuncto; & alius, cujus nomen litteris græcis adscriptum erat, sed verbis latinis. Ad illud quod mihi concessum est corpus ex gratia eminentissimi Cardinalis Carpinei, nullum nomen exstabat, sed tantum vitrum cum ferreo instrumento dentato, quod martyrii instrumentum esse putant.

XVII. In festo sancti Antonii, ad ecclesiam Patrum Gallorum prope sanctam Mariam-majorem ritus nobis insolitus visus est, ut quidquid equorum est in urbe, ducantur cum suis phaleris ad plateam ecclesiæ, ubi aqua lustrali ab uno e Patribus omnes & singuli adsparguntur, dato annuo censu. Qui secus faxit, si quid equis adversi contigerit, id piaculo vertitur.

XVIII. Cœmeterium Pontiani ad portam nomine Portuensem, alias *ad Ursam pileatum* dictum est, diversum a cœmeterio sanctæ Bibianæ itidem *ad Ursam pileatum*: ubi prope ecclesiam sanctæ Martyris re vera ursus pileatus ex marmore fictus cernitur. Ad illud Pontiani cœmeterium nos deduxerunt amici Ciampinus, Fabrettus, & Schelestratus. In eo supersunt aliquæ picturæ antiquissimæ, in his sanctorum Abdonis, Sennis, & Milis, atque aliæ, in Roma subterranea expressæ. Supersunt etiam ædiculæ aliquot, & fons ad baptizandum: quod probat adjuncta pictura de baptismo Christi Domini per Johannem. Loculi omnes vacui sunt, corporibus alio delatis. Hollandus quidam hæreticus, haud ignobilis, cui nomen Albertus, his imaginibus locisque conspectis, errorem nuper ejurasse dicitur, & ad Franciscanos strictioris observantiæ convolasse, apud quos vivit etiam nunc, Franciscus de Hollandia nuncupatus. Inter alia ibidem invenimus quædam fragmenta marmorum, in quibus ex una parte inscriptiones paganorum erant, ex alia Christianorum. Quippe Christianis mos erat, ut e sepulcris gentilium lapides revellerent in suos usus: & relicta ex ea parte, quæ interiora Christiani tumuli spectabat, profana inscriptione, aliam in exteriori apponerent ritu Christiano. Ejus facti exempla occurrunt in Roma subterranea, uti superius monuimus. Sic etiam gentilium integra mausolea sibi aptabant Christiani: quod de sepulcris

Flisci

Flischi Cardinalis, & Innocentii IV jam observavimus. In eodem cœmeterio item repertum a nobis est idoli Ægyptiaci (ut videbatur) fragmentum. Hinc suspicio nata est, aliquos gentiliū ibidem sepultos fuisse. Verum Fabrettus suspensionem discussit, atque hoc idolum interfigne fuisse ad discernendam aliquam Christiani hominis sepulturam asseruit. Christianos quippe aliquando numericis notis, ut superius vidimus, aliquando inscriptione peculiari, aut sane quovis, quod in manus occurrebat, indicio unos ab alteris tumulos distinxisse; & quidem hoc idolum ab aliquo ad eundem usum adhibitum. Nec mirum, cum profanis aliquando sepulcris & inscriptionibus Christiani ipsi uterentur, & numismata imperatorum aliquando suis sepulcris infoderent, ex Romæ subterraneæ lib. III cap. XXII. At fortasse casu istuc delatum sit istud idolum; aut potius fragmentum fuerit Lazari mortui fasciis involuti, ut in antiquis Christianorum sepulcris representari solet, specie non multum dissimili ab idoli ægyptiaci figura. Quidquid sit, Christianorum sepulturas cum gentiliū sepulcris permistas non fuisse constat. Adeo enim pagani Christianos abhorrebant, ut suos cum eorum ossibus cineres confundi passuri non fuissent. Equidem aliquando martyrum cadavera pagani cum profanis miscuere, sed cum facinorosis aut Judæis. Sic sancti Vitalis & Agricola, testante Ambrosio, *sepulti erant Judæorum solo inter ipsorum sepulcra*: sic Julianus Apostata sanctorum reliquias cum ossibus contentissimis per iudibrium permisceri jusserat, qua de re conqueritur Gregorius Nazianzenus in oratione secunda contra Julianum: sic denique reliquias Nestabi & Zenonis cum ossibus camelorum & asinorum commistas fuisse, auctor est Sozomenus. Quid? quod Christianorum cœmeteria plerumque gentilibus ignota erant, in iisque latebant Christiani contra violentiam persecutorum. Hujus rei unicum afferimus testimonium ex primaria inscriptione, in cœmeterio Callisti reperta, quæ exstat in Romæ subterraneæ lib III cap. XXII.

AN. 1686.
JANUARIO

Sozom. lib.
5. c. 82



ALEXANDER MORTUS NON EST, SED VIVIT
Super astra, & corpus in hoc tumulo quiescit. Vitam explevit cum Antonino Imp. qui ubi multum beneficii anteve-

AN. 1686.
JANUARIO

nire prævideret, pro gratia odium reddit. Genua enim fle-
tens vero Deo sacrificaturus ad supplicia ducitur. O tem-
pora infausta ! quibus inter sacra & vota ne in cavernis
quidem salvari possimus. Quid miserius vita ? sed quid mi-
serius morte ? cum ab amicis & parentibus sepeliri ne-
queant ! Tandem in calo coruscat. Parum vixit, qui vixit
IV. X Temp.

Cavernæ illæ erant sine dubio cœmeteria, in quibus Christia-
ni sacra faciebant, & sese occultabant. Si de Antonino Pio
(ut videtur) in hac indubitata antiquitatis inscriptione men-
tio est ; idoneum inde elicietur argumentum contra Henrici
Dodvelli (qui suis alias armis facile revinci potest) opina-
tionem de paucitate Martyrum, cum in dissertatione XI inter
Cyprianicas contendit, non plures, quam quos Justinus in se-
cunda Apologia sua, quæ hodie prima est, memorat, nempe
Ptolemæum, Lucium, & forte illam, cujus meminit, feminam
quamdam, Antonini Pii principatu Romæ affectos martyrio
fuisse. Idem Dodvellus ibidem asserit, nullius martyris in pro-
bis monumentis exstare memoriam, qui passus sit sub Hadriano.
quod refellitur ex sequenti inscriptione, post superiorem ad-
ducta in Roma subterranea, ex cœmeterio itidem Calli-
sti.

TEMPORE ADRIANI IMPERATORIS,
MARIUS ADOLESCENS DUX MILITUM, QUI
SATIS VIXIT, DUM VITAM PRO CHRISTO
CUM SANGUINE CONSUNSAT, IN PACE TANDEM
QUIEVIT. BENE MERENTES CUM LACRYMIS
ET METU POSUERUNT ID. VI.

Metus ille sine dubio oriebatur ex fervore persecutionis, quæ
vigeat tempore Hadriani, quod de Antonini etiam tempore
inscriptio prior contestatur. Hæc duo argumenta, quæ aliud
nobis agentibus occurrerunt, non dubiam spem ingerunt de
aliis multis contra Dodvellum inveniendis, si quis accura-
tam navaret operam. Certe Prudentius, quem in suam cau-
sam trahit Dodvellus, innumeros Romæ Martyres sepultos
fuisse testatur his versibus hymni XI *Ωσι τε πάτερ.*

*Innumeros cineres sanctorum Romula in urbe
Vidimus , o Christo Valeriane sacer
Incisos tumulis titulos. Tu singula queris
Nomina ? Difficile est ut replicare queam.
Tantos justorum populos furor impius hausit ,
Cum coleret patrios Troia Roma deos.
Plurima litterulis signata sepulcra loquuntur
Martyris , aut nomen , aut epigramma aliquod.
Sunt & muta tamen tacitas claudencia tumbas
Marmora , que solum significant numerum.
Quanta virum jaceant congestis corpora acervis
Nosse licet , quorum nomina nulla legis.
Sexaginta illic defossas mole sub una
Reliquias memini me didicisse hominum ,
Quorum solus habet comperta vocabula Christus.*

Ex his manifestum est , primis illis temporibus non tam accurata fuisse Kalendaria , ut omnium martyrum nomina non solum exteris in locis, verum etiam in iis, ubi passi fuerant, in numero essent. Ecce Prudentius plurima Romæ se vidisse ait sepulcra Martyrum , quorum nomina soli Christo nota essent. Neque vero etiam eorum , qui nomina adscripta habebant , memoria in Kalendariis conservata est, ut de Alexandro & Mario mox laudatis constat , qui in Martyrologio Romano (si non fallimur) locum non habent : neque etiam CONSTANTIUS , qui veneno sibi propinato , vitam non nisi ferro pro Christo amisit. quod testatur patena vitrea in cœmeterio sanctæ Agnetis reperta. His adde * PRIMITIUM fortissimum martyrem ex cœmeterio Ostiano ; * GAUDENTIUM ex Agnetiano , qui sub Vespasiano ; & GORDIANUM , Galliæ nuncium , jugulatum *pro fide cum familia tota.* cujus epitaphium integrum mox referemus. Denique in quonam Kalendario memorantur *Marcella & Christi Martyres* CCCCL. quorum inscriptiones exstant in Romæ subterraneæ lib. IV cap. XXV II. Ad hæc , si extra Romam paullisper evagari licet , sanctorum Gervasii & Protasii , priusquam eorum corpora detexisset Ambrosius , nomina Mediolanenses penitus ignorabant , eorumque sepulcra. *Evasimus non mediocrem* , ait Ambrosius , *pudoris sarcinam : patronos habebamus , & nesciebamus.* *Invenimus unum hoc , quo videamur præstare majoribus : sanctorum Martyrum cognitionem , quam illi amiserant , nos adepti sumus.*

* Romæ
subt. lib. 3.
c. 22. pag.
692
* Ibid. pag.
602.

Ambros.
epist. 54.

AN. 1686.
JANUARIO

140

ITER ITALICUM.

Sed ut ad id unde digressi sumus revertamur, etsi paganis occulta & ignota passim fuerint Christianorum cœmeteria, quandoque tamen ab eis detecta fuerunt. Id confirmat testis indubitatus Tertullianus in Apologetici cap. xx xvii. ubi ait, paganos in bacchanalium furiis, nec mortuis pepercisse Christianis, *quos illi de requie sepulture, de asylo quodam mortis, avulserint ac distraxerint*. Et certe difficile erat, ut ne hæc cœmeteria in notitiam paganorum aliquando venirent per falsos fratres, qui ad idolorum cultum relabebantur. Verum ab ejusmodi cœmeteriis potius abhorrebant pagani, quorum cineres aut in suis prædiis, aut in patentibus ad vias tumulis, aut in separatis ædiculis cavernisque sepeliri mos erat, ut visu hodie quoque conspicitur. Pauperibus & infimæ fortis hominibus extra portam Exquilinam communis sepultura tribuebatur in loco, cui teste Varrone *Puticuli* vocabulum erat, de quo Horatius in lib. I Sat. viii.

Hoc misera plebi stabat commune sepulcrum.

Atque ut sceleratis quibusdam locus in illis Christianorum sepulturis a paganis, dedecoris causa, datus fuisset; non dubium quin Christiani, qui certis signis & tesseris mortuos suos distinguebant, eosdem sceleratos inde postea remoturi fuissent, si quos pagani ad violanda Christianorum cœmeteria eo intulissent.

Certe in cœmeteria illa magna semper veterum Christianorum religio & reverentia fuit, ut ex Hieronymo constat, qui singulis Dominicis, more aliorum, cœmeteria illa frequentabat: nec umquam nata est eis suspicio, hæc loca a gentilibus hoc modo violata fuisse. *Diis Manibus* inscripta erant pleaque gentilium sepulcra. Unde Prudentius contra Symmachum lib. I.

*Ipsa Patrum monumenta probant: DIIS MANIBUS illic
Marmora secta lego, quacumque latina vetustas
Custodit cineres.*

quæ verba *Diis Manibus*, licet quidam Christiani ex reliquiis gentilitatis primitus retinuerint, ut superius observatum; tamen aliis notis religionem Christianam designabant, sive cruce aut monogrammate Christi, sive palmis, seu cordium expressionibus, columbis, agnis, sive aliis indiciis. quæ quidem non sunt Martyrum indicia, ut infinitis constat exemplis, sed Christianorum. Pro certis Martyrum indiciis sunt vitrea vasa martyrum sanguine intincta, qualia referuntur in Romæ sub-

terranæ lib. III cap. XXII. vel instrumenta martyrii : certissima signa, inscriptiones antiquæ martyrium attestantes. In illis Christianorum inscriptionibus aliquando invenitur *Domus æterna*, ut Romæ subterraneæ lib. IV cap. XV III. ex ritu gentilium, qui corporum resurrectionem ignorabant. Aliquando duo in eodem loculo corpora jacebant, qui loculi *bisomi* dicebantur; immo homines ipsi *bisomi*, apud Gruterum. Plerique, non tamen omnes, conversis ad Orientem oculis compositi. quod in Christi sepultura observatum est, teste Beda ex Adamnano. Ut mirum sit, recentiori hoc ævo antiquum morem pro sacerdotibus fuisse quibusdam in locis mutatum: quod discrimen patres nostri, etiam episcopi & pontifices, ignorarunt, ut ex antiquis mausoleis & sepulcris manifestum est. In loculis bisomis haud quaquam unum, alteri cadaver superponere licebat, sed ad latus locare. Testes hujusce ritus inscriptiones, ut Johannis Cartaparii apud Baronium ad annum M IV. testis & canon XV Concilii Autisiodorensis: *Non licet mortuum super mortuum mitti*. Apud Gruterum lepidum est epigramma hominis Christiani, Feliciani Veronensis, qui rationem hanc reddit, cur solus quiescere velit: nempe *ut in die censorio sine impedimento facilius resurgeret*.

AN. 1686
JANUARIQ

Grut. pag.
MLIII. 7.

Grut. pag.
MLII. 8.

Antequam hinc discedamus, Gordiani martyris, de quo superius, Galliæ nuncii seu legati, epitaphium ex Romæ subterraneæ lib. III cap. XXII referendum est: propterea quod hoc insigne, & fortasse unicum sit specimen veteris Gallorum scripturæ, *qui in publicis privatisque rationibus*, ut scribit Julius Cæsar in Commentariorum lib. VI. *græcis litteris utebantur*. quod quidem patet ex subjecto epitaphio, ubi litteræ græcæ Runicis insertæ sunt.

Rom. sub.
P. 599.

ΘΗΣ ΝΩΡΘΗΑΡΥΝΣ ΥΑΛΛΗΕ ΡΥΡΣΗΥΣΗ ΝΝΥ
ΛΑΤΥΣ ΤΤΡΩΦΗΣΕ ΣΥΜΦΑΜΗΛΗΑ ΤΩΤΑ
ΡΥΝΗΕ ΣΣΥΡΤ ΗΥ ΤΤΑΚΕ
{ΥΘΦΗΛΑΡΣΗΛΛΑΦΕΣΗΤ

Hoc epitaphium sic redditum est in Roma subterranea. *Hic Gordianus, Galliæ nuncius, jugulatus pro fide cum familia tota quiescunt in pace. Theophila ancilla fecit*. Hæreo an legendum sit *Theophila*, an potius *Trophila*.


A. N. 1686.
JANUARIO.

XXV. In festo conversionis sancti Pauli illustrissimus abbas Johannes Palagius Romanus, e nobili Florentinorum familia, nos cum amico nostro Diroyfio doctore Sorbonico & Taya abbate ad sanctum Anastasium, qui *ad Guttam jugiter manantem* antiquitus, postea ad *Tres-fontes* dictus est, in sua rheda deduxit, ubi Missam celebravimus, vidimusque præclaram sancti Anastasii martyris imaginem, de qua in secundo Concilio Nicæno contra imaginum effractores actum est. Antiquissimæ istius imaginis ectypum hoc loco exhibere visum est in memoriam hujusce Concilii, in cujus actione quarta Hadriani Papæ Legati ad imaginis præsentiam fugari dæmones testati sunt: id quod probat miraculum suo loco edendum, quod ante prædictum Concilium initio sæculi octavi contigit, a teste oculato descriptum. Tres eo in loco fontes sunt, unde inditum loco nomen, ad viam Ostiensem: totidemque basilicæ, una sancti Anastasii, altera sancti Pauli: (ubi tres alii fontes, eo in loco quo sancti Pauli caput amputatum, tres saltus fecisse perhibetur, scaturiunt, lacteum saporem etiam nunc retinentes:) tertia, ubi sanctus Bernardus abbas Clarævallensis scalam ad cælos pertingentem vidisse fertur, sub titulo sanctæ Mariæ de Scala-cæli, rotundo opere constructa. Bernardus alter, qui postea summus Pontifex Eugenii tertii nomine exstitit, abbas fuit illius cœnobii, quod ad paucos nunc monachos redactum est. Officinæ regulares vetustate obsoletæ. In clauastro infirmorum variæ sunt picturæ, in quibus antiquus Cisterciensium habitus exhibetur. Depicti quippe illic cernuntur monachi & conversi laborantes, itemque alii funus ducentes, omnes cum capellis seu calanticis, quæ totum caput tegunt, abjecto capitis. Unus prope sacerdotem sacris vestibus indutum stat monachus cum cuculla, quæ capitium videtur non habere. In eodem clauastro Kalendarium festorum, quæ per totum annum in Ordine celebrari olim mos erat, item depictum est. Fugientes litteras atque picturas. illustriss. Commendator a Puteo depingi curavit. Picturæ utraq; annos quadringentos excedunt. Abbas loci fuit Ferdinandus Ughellus, in primaria ecclesia sepultus ad latus epistolæ cum hoc epitaphio, quod Francisci Barbarini Cardinalis mandato illic appositum est.

F E R D I N A N D O. U G H E L L O

Hujus. monasterii. Abbati

Her Ideal pag. 142



*Mirare. nostri. grande. sæculi. decus
Virtutibus. laboribus. modestia*

Cui. debet. Italia. sacros. Antistites

Qui. traxit. e. mortis. sepulcro. tot. viros

Perire. mortis. in. sinu. numquam. potest.

Obiit. XIII. Kal. Jun. an. M. DC. LXX. æt. LXXV.

FRANC. EPISCOPUS. OSTIENSIS

De. suo. ceterisque. Italiae. Episcopatibus

B. M. posuit

Post prandium Palagius nos deduxit in ædes consanguinei sui nobilis & illustrissimi Equitis & Commendatoris Caroli a Puteo, in quo modestia, pietas & humanitas domicilium fixisse videntur, uti & omnes fere gratiæ picturarum exquisitarum totius antiquitatis Romanæ, ne quid de libris & numismatibus dicamus. Totus Virgilius, totusque Terentius elegantissimis picturis expressi: varia apud eundem specimina sanorum, templorum, & basilicarum. Inter illius musei tabellas magni fiunt illæ septem Ecclesiæ Sacramentorum ingeniosæ picturæ auctore Nicolao Possino Gallo, tantopere etiam apud Romanos commendato: qui in ecclesia sancti Laurentii in Lucina sepultus est. Locupletissimum illud museum magna ex parte instruxit Caroli germanus nobilis Eques & Commendator Cassianus a Puteo, vir antiquitatis curiosissimus, & Lynceæ artis studiosus indagator: cui Carolus Datus oratione parentavit; observavitque inter amplissimæ dignitatis viros, qui ex illa familia prodierunt, Ludovicum a Puteo in castris Christianissimi regis Francisci I. quondam militasse unius cohortis præfectum. Hæc lubentissime de Puteana gente commemoramus grati animi causa in Carolum, cujus humanitati multum obstricti sumus. Hujus musei curam habet Johannes Baptista Marinellus, vir officiosissimus.

XXIX. Præter bibliothecam pontificiam, quæ in Vaticano splendidissima habetur, alia Vaticanæ basilicæ propria est, in qua codices ultra centum, quidam optimæ notæ asservantur. In hanc bibliothecam aditus nobis concessus est per humanissimum virum Josephum Balduinum ejus custodem. Codices rariores & pretiosiores hi sunt. *Hilarii Pictavensis Episcopi*

AN. 1686.
JANUARIO

opera, scripta ab annis fere mille ducentis: *Josephi antiquitates Judaicae*: *Catena graeca* ex Patribus: *Beda Martyrologium* auctum, sed antiquum, cum Sacramentali: *Anselmi Lucensis* episcopi Decretum: *Hildeberti Cenomannensis* & *Bernardi* epistolae; *Ammianus Marcellinus*: *Persii Satyra*, itemque *Terentii Comediae* antiquissimae. In illo *Beda Martyrologio* ad xii Kal. Aprilis, *Assumptio sancti Benedicti*: & v Id. Julii, *Depositio sancti Benedicti*. In Litaniis pro sabbato sancto quidam Sancti invocantur hoc modo: *sancte Gregorie*, *sancte Augustine*, *sancte Ambrosie*, *sancte Hieronyme*, *sancte Beda*, *sancte Antonie*, *sancte Paule*, *sancte Basilie*, *sancte Benedicte*, *sancte Maure*, *sancte Placide*. Quod sanctus Beda in loco tam illustri collocetur, illud in causa est, quod ex antiquis monumentis credatur sepultus in basilica Vaticana: sive fuerit alius a Beda Anglico, sive ille ipse, ut jam dudum Romanis persuasum est. Sane Romanus, sancti Petri ante annos quingentos canonicus, in descriptione basilicae sancti Petri insignem facit de Beda mentionem. *Requiescit etiam ante portam argenteam*, inquit, *sub rota scilicet porphyretica*, ut a nostris majoribus accepimus, *venerabilis Beda presbyter*, qui fecit homilias: & ejus ob reverentiam antiqui nostri penitus non transiebant per eam, nec nos transire permittunt. In quibusdam etiam Kalendaris duo notantur Bedae, unus Anglicus Maii die xxvi. alter Italus, qui junior, decimo Aprilis, monachus Gavellensis coenobii prope * Rodigium: cujus reliquiae Genuam translatae sunt. Sed haec non sunt hujus loci.

* Rodigo

Jocio

Eadem die post meridiem habita est sacra Indicis Congregatio in Vaticano, in qua sententia dicta per illustrissimum Pallavicinum, Johannis Launoi liber de regia in matrimonium potestate in indicem relatus est, decreto Cardinalium, qui novem omnino tunc aderant cum R. P. Josepho Clariono, Magistró sacri Palatii, & Patre Blanco Secretario Congregationis. Ex schedula ego quoque monitus sum illi Congregationi interesse ad promendum qualecumque suffragium meum super quibusdam libris Vossianis de diluvio non universali. De eodem argumento antea dixerant tres alii. Is enim in illa Congregatione mos obtinet, ut Consultores deputati duo vel tres pro rei gravitate sententiam suam de proposito libro pronuntient, scriptoque consignent. Hoc scriptum mox secretario Congregationis traditur in manus: qui rationes votorum in compendium

compendium redactas ad Cardinales denuo refert, ex qua relatione Cardinales statuunt quod sibi consultius videtur. Aliud tribunal est sacræ Inquisitionis in libros, qui ob notam hæreseos damnandi veniunt: qua in congregatione consultores non viva voce, sed scripto tantum suffragium suum exprimunt.

AN. 1686.
JANUARIO

I I. Cum in bibliotheca Barbarina versaremur, duo accepimus observatione haud indigna. Unum est, Ludovicum XIII felicitis memoriæ ab Urbano VIII clam rogatum, ut a fœdere Suecico, de quo maxime Austriaci conquerebantur, resileret: propria manu citra cujusquam consilium rescripsisse, se ad id præstandum promptissimum esse, atque etiam ad arma simul cum Austriacis convertenda contra hæreticos Germanos & Gallos, si modo Austriaci a protectione fratris sui, qui Bruxellas secesserat, abstinerent, & a ferendis fovendisque motuum ac discordiarum seminariis in Gallia per hæreticos. Quod Urbanus cum Oratori Regis Catholici significasset, Oratorem scripsisse hac de re in Hispaniam: sed responsum datum fuisse nullum. Autographa hæc epistola in archivo Barbarino aservatur. Alterum notatu dignum est, quod Urbanus ab Hispanis quibusdam interpellatus de concedendis indulgentiis ob cultum cujusdam sancti, cui VIAR nomen inditum erat, negaverit Pontifex id se facturum, nisi prius resciret, quis & qualis esset ille sanctus, & quo tandem argumento ejus sanctitas probaretur. Allatus est lapis, in quo hæc litteræ reliquæ erant, S. V I A R. At periti judicarunt fragmentum esse veteris inscriptionis, in qua quidam *Præfectus viarum* laudabatur.

FEBRUARIO

VIII. Celebrata Missa in basilica Vaticana, lustravimus subterraneam loci ecclesiam, in qua permulta supersunt vetera monumenta. Illic sepulti sunt, præter alios, Otto secundus imperator, & Amalricus de Monteforti. De his cryptis exstant libri singulares. Verum in illis libris nulla, si bene memini, mentio est de inventione illic facta mausolei Honorii imperatoris & duarum ejus conjugum, Mariæ & Thermaniæ, Stiliconis filiarum. Hæc inventio facta est anno M D XLIII. quo anno Bullingerus Vadiano scribens eam refert his verbis. *Erant hæc cadavera palliis aureis involuta, ipseque calvarie aureis cinctæ diadematibus... Ossa adhuc coherrentia simul cum vestibus statim ad contactum sensumque aëris abierunt in pulve-*

AN 1686.
FEBRUAR.

rem. Aurum ex vestibus collectum & purgatum ponderabat libras circiter LXXX. In pectore alterius massa racemi specie dependebat, composita ex auro, adamante, smaragdo, atque aliis gemmis. Apposita erant & vasa aliquot perforata forma clepsydram, odoris gratia concinnata. Cetera lege sis in eadem epistola, quæ exstat inter philologicas editas a Goldasto.

IX. Interfuimus sollemnibus sacris de sancto Marone in ecclesia Maronitarum: eodemque die Neapoli ab illustriss. Petro Andrea Andreino accepimus antiquam inscriptionem de quodam milite veterano, uno ex his, quos Augustus Miseni posuerat ad pontem custodiendum, ibidem inter rudera nuperrime repertam.

D. M.

M. PETRONI. VALEN

TIS. VETER. EX. CLAS. PR. MIS.

PETRONIA. PRIMA. PATRONO. BENEMERENTI.

Idem nobis copiam fecit epistolæ ab se scriptæ ad Franciscum Antonium Picchiattum de duabus glyphicis gemmis: quarum una anularis ex lapide lazzoli, Romæ in quadam vinea extra portam Lateranensem reperta, stantem figuram exhibet, in litari habitu insignitam, hastæ sinistra innixam, pedibus scuto hærente: ad dexteram vero, quæ mutila est, columna cernitur cum imaguncula Victoriæ, militem coronare gestientis. quod vir doctus interpretatur de M. Sergio Silo, qui secundo stipendio dexteram manum perdidit, teste Plinio apud Fulvium Ursinum, & stipendiis duobus ter & vicies vulneratus est. Altera gemma Capuæ inventa ex eo genere amethystorum est, quod Græci *Pederotes* appellabant. In hac gemma cælata sunt geminæ figuræ, a capite usque ad umbiculum referentes pulcherrimum adolescentem, & paris formæ puellam; cetera desinentes in delphinos: ita ut adolescens sinistra manu inter humerum & brachium temonem regat, dextra vero uxori suæ opem ferat, catulum in pectore gestanti, dum eadem altero brachio alterum catulum ab undis retrahit, delphini capiti innixum. Nereum & Doridem, Oceani & Thethyos natos, his figuris designari idem Andreinus existimat.

X. Ecclesia beatæ Mariæ de Capella trans Tiberim, olim sanctæ Mariæ ad Pineam vocabatur, ut legimus in veteri inscriptione; quæ sic habet. *Anno Domini M X C Indict. XIII. men-*

St. Paul. ad rom. 197



se Mart. die xxv. dedicata est hac ecclesia sancta Maria, qua appellatur ad Pincam, per Episcopos urbis, id est V. Sabinensem & Johannem Tuscolanensem. tempore domni Urbani II Papa, in qua sunt reliquia ex vestimentis sancta Mariae Virginis, rel. Petri apostoli, Cornelii PP. Calisti PP. Felicis PP. Tppoliti mart. Anastasii mart. Melix, Marmenia mart.

AN. 1686.
FEBRUAR.

Damasus vitam post mortem, Christo Redemptor.

In hac inscriptione advertere juvat, Sabinensem & Tusculanensem Urbis Episcopos (quod proinde vocabulum Romani Pontificis suffraganeis commune erat) appellari. Hinc explicari potest quod legimus in chartario Farfensi, nempe quod DODO EPISCOPUS SANCTAE ROMANAE ECCLESIAE dedit libras quinque pro rebus post mortem, id est ecclesiam sanctae Mariae cum casamento ipso Cassiano. Actum mense Octobri, temporibus Benedicti VIII. In alio diplomate illi suffraganei vocantur Romani episcopi. Dodo mox laudatus videtur fuisse episcopus Sabinensis, omissus apud Ughellum.

In eadem transtiberina regione exstat antiquissima ecclesia sancti Benedicti in Piscinula, hodie parochialis, in cuius maiori altari est effigies paullo minus antiqua sancti Benedicti, cuculla induti cum strictissimis manicis, capitis tantisper submentum defluente, barba neglecta, qui Regulam manu tenet: qualem hic in apposita pictura cernere est. Ad latus Evangelii ara est sancti Laurentii, & paullo infra sepultura Constantini Caietani absque epitaphio. Obiit die VII mensis Septembris anni M DC E, ætatis anno LXXXV. Hinc corrigendus Ughellus, qui ejus obitum ad mensem Julium refert. Mortis causa non tam ex decrepita ætate, quam ex dolore concepta, quod quidam Siculus, ejus familiaris, multos codices antiquos, aliaque monumenta sibi clam abstulisset. Ex eodem prædictæ ecclesiæ latere prope vestibulum ædicula est beatæ Mariæ, tota musivo quondam ornata, in cuius pariete ad aram depicta est imago sanctissimæ Virginis, brachio dextro filium tenentis crucem præferentem. Illic orasse, & prope habitasse ferunt Benedictum puerum, cuius palatii rudera & macerias in proximo ostendunt. In descensu ex inferiori tribuna (ut vocant) alia imago est sancti Benedicti valde antiqua. Navis ædificium fulciunt marmoreæ columnæ. In horto basis est aræ profanæ cum hac inscriptione. *Si quis hanc aram leserit, habeat genium iratum Pop. Rom. & numina divorum.* Alia iisdem

Ughell. 401.
S. Ital. 106.
27.

AN. 1686.
FEBRUAR.

omnino verbis legitur apud Fabrettum. Ejusmodi imprecationes ethnicis familiares erant. Nonnulla huc exempla referre juvat. Inscriptio extra portam Aureliam, hodie sancti Pancratii, reperta sic habet.

C. TULIUS. C. L.
BARNAEUS
OLLA. EJUS. SI. QUI
OUVIOLARIT. AD
INFEROS. NON RECIPIATUR.

Ollæ figulinæ erant ad cineres mortuorum continendos. Alia in cippo marmoreo consimilis ibidem reperta anno M DC LII

L. CAECILIUS. L.
ET. D. L. FLORUS
VIXIT. ANNOS. XVI
ET. MENSIBUS. VII. QUI
HIC. MIXERIT. AUT
CACARIT. HABEAT
DEOS. SUPEROS. ET
INFEROS. IRATOS.

Littera C inversa *Caïam* significat ex Quintiliano in lib. I cap. VII. Brevior alia apud Reinesium pag. M.

QUISQUIS. HOC. SUSTULERIT. AUT. LAESERIT. ULTIMUS. SUORUM. MORIATUR.

Ejusmodi formulas Christiani itidem, ethnicorum exemplo, in suis sepulcris adhibuerunt. Unam habes apud Gruterum pag. M LXII. Alterius fragmentum ex basilica sanctæ Mariæ in *Cosmedin* Fabrettus nobis communicavit.

...S. HUNC. TITULUM
...A. PLASHANTRA. SEPUL
...MORA QUÆ CLAUDUNT
...SSE POTES XRI ANCIL
...TA NOMI ...ANNA
...ENS VELAMINE SACRO
...GRAVIT AD XPM
...SEPULCRUM VIOLARE
...ET SIT ALIENUS A REGNO DEI.

Alia itidem Romæ reperta ad viam Nomentanam prope sphæ-
ricum templum sanctæ Constantiæ.

A. M. 1686.
FEBRUAR.

MALE. PEREAT. INSEPULTUS
JACEAT. NON. RESURGAT
CUM. JUDA. PARTEM. HABEAT
SI. QUIS. SEPULCRUM
HUNC. VIOLARIT.

XIII. Priusquam Romæ valediceremus, visum est adire Farfam, insigne nostri Ordinis monasterium, quod Roma distat xxv passuum millibus, impositum dorso montis Acutiani, in territorio Sabinensi. Noster Johannes Durandus se nobis socium adjunxit ad levandum scriptionis laborem. Nulla apud Farfam hominum frequentia, præterquam in duobus festis Annuntiationis & Nativitatis beatæ Mariæ loci patronæ, cujus imaginem a sancto Luca depictam ostentant cum clave ædiculæ Lauretanæ. Insalubris eo in loco per æstatem aer cogit monachos solum mutare, & in cœnobium Salvatoris, octo inde millibus dissitum, demigrare: Abbas vero in opidum Faram, quod Farfæ proximum est, interim secedit. Abbas loci regularis (nam Cardinalis Barbarinus titulum habet) reverendissimus Pater Severinus ab Asculo, vir humanitatis & doctrinæ non vulgaris, archivum loci, codices mss. omnia denique nobis magno cum affectu exhibuit. In bibliotheca non admodum copiosa vetus exstat *Lectionarium*, ex quo quædam acta Martyrum collegimus. Editiones item quædam antiquiores ibidem inveniuntur: *Origenis contra Celsum*, Sixto IV dicata: *Chrysostomi homilie in Mattheum* ex recensione Thomæ Januensis de Valerano, qui in Præfatione ad Severinum de Pedepennis Bitontinum, Ordinis nostri monachum, ipsum laudat, quod multum in recognoscendis illis homiliis insudarit; itemque domni Lucæ studium ingens, *qui hos Chrysostomi sermones elegantissime transtulit*. Nec omittendum opus *Bonifacii Simoneta*, doctoris ac monasterii Cornu abbatis, *de historia persecutionum Christianarum*, in sex libros per epistolas redactum: in quarum prima Carolum VIII Francorum regem mirifice laudat, in secunda Guillelmum de Rupeforti equitem. In epistola VII ad Alvisum monachum Cisterciensem, ait se ejus consilio hoc opus suscepisse. Editum est Mediolani anno MCCCC LXXXVIIII. Prolixius esset dicere, quot & quanta ex archivo, & ex

A N. 1686.
FEBRUAR.

præclaris chartaceis monasterii libris excerptimus. His peractis Romam reversi sumus.

XVI. Duæ sunt in Urbe, præter jam laudatas, bibliothecæ celebres, una in collegio Sapientiæ, altera in Capranico. Sapientiæ gymnasium originem suam acceptam refert Leoni x. qui dispersa per Urbem studia in hoc unum redegit, inchoatis ædificiis, quæ sub Gregorio XIII, Sixto v, Clemente VIII, subsequentibusque Pontificibus incrementum paullatim accepere: donec Alexander VII totam fabricam, Borromino architecto, absolvit anno MDC LX. Instructa etiam ab eodem bibliotheca insignis, cujus ædificium magnificæ totius collegii structuræ apprime respondet. Magna ibi librorum copia, sed veteres codices pauci. Eo translata est Alexandri jussu bibliotheca Constantini Cæietani. Ibidem sex cathedras, præter alias jam dotatas, instituit idem Pontifex: quarum una est de controversiis Fidei, altera de historia ecclesiastica, ceteræ de jure tam canonico quam civili. Præclara sane institutio: sed si fundatorum votis & ædificiorum splendori frequentia studentium responderet. Ibidem Syriacas litteras docuit Abrahamus Echellensis: cujus affinis Faustus Naironus Maronita bibliothecam nobis humanissime ostendit, & dissertationem suam de origine ac religione Maronitarum dono dedit.

Collegium & bibliotheca Capranica Dominicum de Capranica Cardinalem habent auctorem. Ejus vitam scripsit Baptista Poggius, eamdemque eruditus vir Stephanus Baluzius typis vulgavit in tomo tertio Miscellaneorum. Ædificaverat sibi Dominicus ædes in regione Columnæ, in quibus *decrevit bibliothecam ad communem doctorum hominum utilitatem, congestis ibidem libris, quos magna impensa, in omni doctrinarum genere ad duo millia voluminum coëgerat.* Angelus ejus frater domum suam sibi reservavit: sed ne laudabilis voluntas fratris irrita esset, contiguum illi gymnasium magnificentius excitavit. Dominicus obiit anno MCCCC LVIII. Hæc bibliotheca duce Palagio facile nobis patuit per humanissimum gymnasii rectorem. Codices plerique ad Jus pertinent: ex aliis præcipui sunt *Josephus de antiquitatibus Judaicis*, idemque *de bello Judaico*. Item *Martyrologium sive Datarium secundum ritum S. R. E.* Præmittuntur prologi vulgati Hieronymi, Bedæ, & Usuardi in Martyrologium. Usuardum aliis præfert auctor, propterea quod *ejus opus magis habetur in usu apud multas ecclesias.* Et re quidem vera.

ante annos centum Uluardi Martyrologium receptum erat in ecclesia Romana, ut ex antiquis editionibus constat. Reperitur etiam ibidem Concilium Constantiense absque vulgata clausula quartæ Sessionis. Item *Professio quam fecit Benedictus Caietanus*, postea dictus Bonifacius VIII, post suam assumptionem anno M CC XCIV, cum glossa super eandem: cujus glossæ auctor ait, se prædictam professionem reperisse multis in locis, nempe *in Diurno libro, & in fine Mallonis sancti Petri, in domo Celestinorum Parisius, atque in pluribus locis in Francia*, asserentibus qui eam exhibebant, quod Bonifacius Papa VIII miserat Regi Franciæ, scire volenti, an habuisset ipse introitum canonicum in Papatu. Et inter alia quæ Rex allegabat, quod ad hoc Romanus Pontifex teneretur, inducebat epistolam papæ Pelagii Gilberto (legendum Childeberto) regi Franciæ pro causa simili destinatam. Hanc etiam eandem vel similem Professionem faciebant alii novæ quatuor Patriarchæ sydonaliter, eamque subscriptam sibi mittebant invicem & Principi in sua novitate, ut patet per Gregorium: & hoc idem clare ostendunt historiæ Romanorum pontificum Eugenii & Zachariæ. Ita glossator. Alia est hæc formula ab illis, quæ sunt in Diurno vulgato. Epistola ad Childebertym, cujus glossator meminit, est Pelagii I. edita primum a Sirimundo in tomo I Galliæ Conciliorum.

XVIII. De basilica sanctæ Mariæ in Cosmedin seu ad Os veritatis, observandum est id, quod in ecclesiis Casinensi & Sublacensi advertimus, nempe recensionem censuum ad portam basilicæ lapidibus insculptam esse. Ibi enim ad sinistram ingredientium hæc leguntur. *Hæc tibi præclara Virgo celestis, Regina sancta, superexaltata & gloriosa Domina Dei genitrix Maria, de tua tibi offero dona ego humillimus servulus tuus Ustathius immeritus dux, quem tibi deserviri, & huic sanctæ Diaconie dispensatorem effici jussisti, tradens de propriis meis facultatibus in usus istius sanctæ diaconie, pro sustentatione Christi pauperum & omnium hic deservientium Diaconistarum, ob meorum veniam delictorum, hæc inferius adscripta loca, id est fundum Pompeianum cum casis & vineis fundorum &c. Item ego Georgius gloriosissimus offero unc. tres, fundum Atticum &c. ubaricas, quod sunt in fundo Arrani, quæ data sunt ab heredibus germanæ meæ Emele, cui data sunt ab heredibus Pauli.... Et quidem hac conditione, ut Presbyter qui pro tempore fuerit, factururus quotidianas Missas, accipiat a Patre solidos tres &c.*

AN. 1686.
FEBRUAR.

Diurn.
pag. 132.

Ex his intelligitur, in antiquissima illa basilica, quæ titulus est etiam nunc Diaconi Cardinalis, exstitisse olim domicilium Diaconistarum & pauperum, quibus non tantum Diaconus, sed etiam quidam *Pater* seu Sacerdos præfectus erat. In Diurno libro habetur privilegium ad instituendum Diaconum in ejusmodi diaconiis: ubi præscribitur, ut *quando lucina perficitur*, id est ad Lucernarium, *omnes diaconites & pauperes Christi KYRIE ELEISON exclamare studeant*. Porro unita erat hæc ecclesia monasterio sancti Pauli extra Urbem ante Leonem X. qui unionem illam solvit anno MDXIII. ut in ejusdem ecclesiæ porticu legitur. Juxta altare majus, dedicatio ejus per Callistum II facta memoratur mensis Maii die sexta, anno MCXXIII, Indict. I. & inter varias reliquias a Gelasio II concessas, & a Callisto in altari repositas, recensentur reliquiæ *Petri Abbacyri, & Johannis; Marmenia martyris, sanctæ Sumene*, & aliorum. Proximum est templum beatæ Mariæ de Sole, olim solis fanum: & e vicino aliud sanctæ Mariæ Ægyptiacæ quadratum, quondam vetus delubrum. Hæc in via ad portam Ostiensem, ubi pyramidalis tumulus C. Cestii VII viri epulonum, quod Petrarcha sepulcrum Remi esse opinatus est, tametsi integra etiam nunc cum bipedalibus litteris inscriptione.

XXI. Feria V ante carnisprivium, ecclesiarum in Urbis stationes percurri solent decantandis psalms, hymnis & rosario: quod præstant Romani, bini, terni, aut plures simul procedentes. Ad portam Ostiensem singuli ad sanctum Paulum egredientes tesseram in prandium accipiunt, in hortis Matthæianis sumendum, ubi super herbas discumbitur. Præsunt huic pio instituto Patres Oratorii Ecclesiæ novæ, qui cibos omnibus & singulis parabiles, &, ut pœnitentes decet, frugales exhibent. Nec hoc dedignantur etiam Cardinales. Intererat hoc anno eminentissimus Cardinalis Cibo: aderamus & nos cum aliis numero non exiguo, scilicet ultra sex millia. Cardinalis nos de suo bellario honoravit. Præstantibus ministrabant ex Procerum numero plerique Prælati, & alii, præter Oratorii Patres, quos inter Marchesius, & Colloredus: cui purpura cardinalitia nuperrime, quantumvis reluctanti, pro humili, quo tunc præcinctus erat, linteo imposita est.

XXIX. Basilica sancti Gregorii, olim sancti Andreæ, in monte Cælio seu clivo Scauri, quam Camaldulenses incolunt, ab eodem sancto Pontifice constructa est in ædibus paternis: ubi

ubi & ipse monachus fuit. De eo hæc legimus in veteri libello de ejus vita apud Patres Oratorii Romani. *Beatus Gregorius, qui fuit Præsul ecclesie, antequam fieret Patriarcha, monachus erat in monasterio sancti Andreæ apostoli, quod appellatur clibi Tauri, juxta sanctorum martyrum Johannis & Pauli. Erat autem abbas ejusdem monasterii: mater vero ejus beata Silvia manebat tunc prope portam beati Pauli apostoli, in loco, qui vulgo vocatur Cella-nova. Gregorii reliquiæ sub ara majori jacent. Extra basilicam tria exstant sacella, quæ Cardinalis Baronius instauravit: unum beatæ Silvie Gregorii matris: alterum sancti Andreæ: tertium ipsius Gregorii, ubi mensa marmorea, in qua egenos recreasse creditur.*

Vicina est antiqua sanctorum Johannis & Pauli basilica, nuper Dominicanis Anglis concessa. Illic Mapheus Veggius reperit elegans epigramma Gratiae Alexandriæ, ethnicæ matronæ, quæ, in Christianarum quarundam dedecus, *filios suos propriis uberibus* educasse laudatur. Hoc epigramma refert Mapheus in libro primo de educatione liberorum.

X XII. Ad urbem Portuensem profecti sumus cum Ciampino, Fabretto, Schelestrato, Laurentio de Zaccagnis, Taya, atque cum Bernovio & Auzuto nostratibus. Ibi portus quondam Trajani, & emporium celebre: uti & apud Ostia, quæ urbs duobus inde millibus distat; nunc tristitia urbium cadavera. In Portu reliquiæ supersunt veteris templi & murorum urbis. Basilica sancti Hyppoliti, quæ olim primaria erat, nunc ad tugurioli formam redacta est. Ibidem puteus cernitur, in quem projectus beatus martyr. In domo episcopali, in qua unicus degit colonus, sacellum est pro ecclesia cathedrali. Ubique in gyrum solitudo ingens in fertili & amœno loco, sed ita insalubri ob longam & diuturnam desertionem, ut raros agrorum cultores aura corrumpat. In domo episcopali hos versus descripsimus.

Squallebant Portus ades; urbs tota jacebat,

Vix etiam paucis stabat & ara Dei.

Cedibus assiduïs, dirisque exposta rapinis

Rura, nec in tuto jam locus ullus erat.

Nec mare navigiis aptum, nec Tiberidis unda:

Ipse suis humeris nauta ferebat opes.

Corneus a sævis purgavit littora monstribus.

Hinc nova miraris surgere templa, domus.

AN. 1686.
FEBRUAR.

*Inde vides altum flumen, tuta ostia nautis,
Et didicisse fretum subdere colla jugo.*

M D LXXXIII.

Ex Portu Ostia civitas a nobis visa est, cujus rudera, si temporis oportunitas affuisset, lubenter invisissemus propter antiquam urbis dignitatem & prærogativam, cui concessum est, ut Romanæ ecclesiæ Pontifices ordinet, *non aliquis episcopus metropolitani, sed de proximo Ostiensis episcopus*, ut loquitur Augustinus in breviculo collationum cum Donatistis, collat. tertiæ diei, cap. x.

XXVII. Feria IV cinerum post sollemnem Missam in capella pontificia, facta est Cardinalium processio ad sanctam Sabinam, ubi prima Quadragesimæ statio antiquitus instituta est. Cardinales absente Pontifice admodum pauci cum suis pileis, subsequente famulatio, super mulas processerunt e Vaticano ad prædictam stationem. Pontifex, cum per otium & valetudinem licet, huic supplicationi interesse solet.

XXVIII. Eminentissimus Cardinalis Estræus, ut suæ in nos humanitati cumulum apponeret, brevi discessuros in villa Benedicti denuo excepit. Benedictus abbas, villæ conditor, libellum de villa sua, emblematis argutisque variarum linguarum sententiis refertum, nobis concessit. Pridie hujus diei illusterrimus Slusius, quem cum hæc scribimus in sacrum Cardinalium collegium magno omnium plausu cooptatum esse intelligimus, duo utrique nostrum numismata, sanctissimi Pontificis Innocentii XI nomine signata, unum aureum, aliud argenteum dedit in pignus suæ in nos benevolentiae, cujus æternum memores erimus.

MARTIO.

I. Bellorius a nobis laudatus non semel, ut nos in Galliam reversuros perpetui apud se hospitii jure donaret, exemplum nobis concessit duplicis egregiæ tesseræ hospitalitatis ex ænea tabula, quam ex Hispania, id est ex bibliotheca Laurentii Ramirez de Prado, Matrilo Romam allatam per Camillum Mazimum patriarcham Jerosolymitanum, Bellorius ipse in suo museo nunc asservat. Prima tessera spectat universas familias Desoncorum & Tridiavorum ex opido Zoëlarum: altera privatas personas. Hanc tabulam, prout in lamina ærea jacet, huc retulimus.

M LICINIO CRASSO
L. CALPURNIO. PISONE COS. *
IIII. KL. MAIAS.

* anno Chr.
XCVII.

GENTILITAS. DESONCORUM. EX. GENTE. ZOELARUM
ET. GENTILITAS. TRIDIAVORUM. EX. GENTE. IDEM
ZOELARUM. HOSPITIUM. VETUSTUM. ANTIQUOM
RENOVAVERUNT. EIQUE. OMNES. ALISALIVM. IN. FI
DEM. CLIENTELAMQUE. SUAM. SVORVMQUE. LIBERO
RUM. POSTERORVMQUE. RECEPERUNT. EGERUNT
ARAUSABII. CAENI. ET. TURAIUS. CLOUTI. DOCIUS. FLAESI
MAGILO. CLOUTI. BODECIUS. BURRALLELAESUS. CLUTAMI
PER. ABIENUM. PENTILI. MAGISTRATUM. ZOELARUM
ACTUM. CURUNDA

GLABRIONE. ET. HOMULIO. COS. * V. IDUS. JULIAS
IDEM. GENTILITAS. DESONCORUM. ET. GENTILITAS
TRIDIAVORUM. IN. EANDEM. CLIENTELAM. EADEM
FOEDERA. RECEPERUNT. EX. GENTE. AVOLGIGORUM
SEMPRONIUM. PERPETUUM. ORNIACUM. ET. EX. GENTE
VISALIGORUM. ANTONIUM. ARQUIUM. ET. EX. GENTE
CABRUAGENIGORUM. FLAVIUM. FRONTONEM. ZOELAS
EGERUNT

* anno Chr
CLII.

L. DOMITIUS, SILO. ET
L. FLAVIUS. SEVERUS
ASTURICAE

I V. Pridie quam Roma discederemus, visum est illustrissimo Platellæ Prodatario, sanctæ Mariæ Rotundæ canonico & archivistæ, ut ejusdem loci veteres codices examinaremus. Omnes sunt ad usum ecclesiæ, Passionaria, Kalendaria, libri Missales, & Sacramentorum: reliqui codices exinde alio asportati. Unum hoc Romanæ elegantiae & magnificentiae monumentum integrum superstat post tot urbis deprædationes & ruinas. Hoc est Pantheon, quod in honorem omnium, quos profana gentilitas deorum nomine censuit, M. Agrippa, Augusti gener, exstruxit. Plinius hoc templum ponit inter pulcherrima, illudque architecti adeo admirantur, teste Villalpando, ut vocent absolutissimum opus, & exemplar consummatissimæ architecturæ. Ad ejus exemplum Spitigneus, Boëmiæ dux, ecclesiam sancti Viti Pragæ construxit anno M LX. Pares sunt in longitudine, latitudine, & altitudine mensuræ,

Chronic.
Saxon. mss.


AN. 1686.
MARTIO.

videlicet pedum centum quinquaginta octo, & amplius. Columnæ in porticu viginti octo ex lapide ægyptiaco miræ magnitudinis, altitudine pedum quadraginta cum aliquot particulis. In interioribus columnæ totidem, sed multo minores. Ad templum ascendebatur gradibus septem: tectum opertum erat regulis æneis prægrandibus: trabes in porticu itidem ex ære: ex quibus æneæ baldachini sancti Petri columnæ Urbani VIIII jussu conflatae sunt. Apertum est templum in summo, unde lux in interiora subit. Illic tumultum habet præclarum illud pictorum decus Raphaël Urbinas, cum sequenti elogio, brevi quidem, sed perquam honorifico.

*Hic situs est Raphael, timuit quo sospite vinci
Rerum magna parens, & moriente mori.*

Non divellendus a Raphaële illustris ejus concivis & cognominis Raphaël Fabrettus, sæpius jam a nobis laudatus, qui post nostrum ex Urbe discessum nobis significavit, Romæ ad Tiberis Ripam majorem reperta fuisse novissime diversa ex marmore ponderum specimina, ex quibus antiqua Romanorum libra illustrari potest. Unum est cum littera S. semis, id est semilibram designante: quod cum recentiori pondere comparatum, sex uncias juste appendit. Alterum magis integrum cum eadem nota est unciarum $6\frac{1}{4}$. Tertium cum nota I. est unciarum $13\frac{1}{16}$. Quartum cum duplici II. unciarum $23\frac{3}{16}$. Hæc omnia æquabilia sunt, & sine manubrio, quo sequentia instructa erant. Primum ex his præferens numerum X. est librarum 9. cum uncis 10. Secundum cum nota XX. efficit lib. 18. cum uncis 8. Tertium denique cum nota XXX. æquivalet lib. 29. Ex quibus intelligitur, pondera hæc non omnino æqualia fuisse: quorum forsân aliqua erant ad pondus aridorum, alia ad liquidorum.

Idem vir clarissimus die XVIII Februarii anni currentis MDC LXXXVII sub monte Testaceo, de quo superius mentio injecta est, invenit gentis Rusticellæ sepulcrum: cujus basis & corona ex lapide Albano constant, reliquum ex toptho satis firmo. Ejus specimen hic apponimus.



Epigraphe lapidi Tiburtino insculpta erat in hanc sententiam.

AMBEIVIA. L. F. MATER
L. RUSTICELIUS. C. F. SCA.
M. RUSTICELIUS. C. F. SCA.
Q. RUSTICELIUS. C. F. SCA.
LARCIA. L. F. UXOR.

Gens Rusticelia erat ex Scaptia Tribu, quæ nomen accepit, teste Festo, ab urbe Scaptia, quam Plinius in Latio locat. P. Scaptius p. f. Gabinam viam ornari, ac refici sua impensa curavit, apud Gruterum c. l. Porro prædictum sepulcrum habet longitudinis pedes xxx. totidemque latitudinis. Ad latusejus dextrum repertus fuerat anno superiori sequens cippus pariter e Tiburtino lapide, modo pro limine proximæ cellæ viariæ inserviens.

CIPPUS. PRIM
US. DEFIXUS
ERAT. CONTR
ANGULU
M. DEXTERI
OREM. MO
NUMENTI
RUSTICELI. ET
ABERAT. AB. TR

AN. 1686.
MARTIO.

UNCO. MON
UMENTI. P. V
ET. AB. STRUCT
URA. AQUAE
CLUSARIS. P. VS

Numquam Roma discederemus, si hoc modo singulas Romanas antiquitates, etiam quæ in libris editis desunt, recensere-mus. Sed valeat tandem Roma, valeant & Romani.

ITER SENAS.

V. Feria tertia post Dominicam primam Quadragesimæ, cum nostra obsequia & gratiarum actiones amicis nostris persolvissimus, ex Urbe Florentiam versus discessimus, ultra pontem Mulvium deduæti ab amicis, Diroyfio, Bernovio, Auzuto, & aliis: eodemque die apud Roncilionem pernoctavimus.

VI. Altera post nostrum ex Urbe discessum die Viterbium prætergressis, per tempus nobis haud quaquam licuit adire bibliothecam Latini Latini Viterbiensis, Canonicis ejusdem urbis ab eo legatam. Visitur in ædibus prætorianis Annæ Viterbiensis ex Ordine Prædicatorum depicta effigies, qui fucatis & ementitis librorum & inscriptionum veterum titulis viros doctos suo tempore delusit. Huic Berosi Antiquitates Babylonicas, & Manethonis Chronicon tribuunt * periti critici; variasque inscriptiones, cum græcas, tum latinas: quas ab se subornatas humo infodi, ac post aliquantum temporis inde effodi, quo antiquitatis speciem eis affingeret, dolose curabat. Ejusmodi sunt nonnullæ ædibus prætorianis insculptæ, quarum una Desiderii Langobardorum regis, qua Astolfi decessoris sui abrogat decreta, Grutero fucum fecit. Hujus rei occasione memini legere in scriptis libris quamdam ejusdem farinæ inscriptionem, *Dis pedibus* nuncupatam, de qua inferius dicemus. Gaspar Varrerius Lusitanus præter alios personatum Berosum eleganti validaque censura confodit.

Pransis apud Montem-Flasconis, hospitium præbuit vicus sancti Laurentii ad Volsiniensem amplissimum lacum. Duobus proximis diebus, Aquæ-pendentis opidum, tum Radicofani, unde incipit ditio Magni Hetruriæ Ducis: postea Scala in noctem inde primam, Senæ in alteram nobis occurrerunt: quæ civitas lapidibus coctis tota strata est.

* V. Gerard. Voss. de Hist. Lat. pag. 602.

IX. Sabbato apud Senas ecclesiæ metropolitanæ seu Dominus elegantem fabricam, sed maxime pavementum, marmoreis segmentis depictum, quale nusquam alibi invenitur, non sine admiratione vidimus. Altare majus, solito more conversum ad Orientem, insignes ex ære fusili statuas habet; & super altare exstat sanctissimi Sacramenti repositorium ex eadem materia. Ante hoc altare octo ex candida cera funalia (quod apud Italos singulare, quibus oleum id præstat) perpetuo ardent ex pia institutione Avæ nobilissimæ Magdeburgensis femina: quæ cum olim Senas venisset, non procul a civitate cœnobium sub Regula sancti Benedicti construxit, ac veste monastica ibidem induta, mirabili exemplo vitam traduxit & absolvit. Tempus non exprimit Ughellus, ex quo hæc retulimus. In eadem ecclesia chori sedilia pone altare etiam subalares fornices occupant. Sacella ex utroque latere ad majorem usque portam egregie ornata; sed in primis beatissimæ Virginis capella cum spherica turre, tota interior ex marmore constans, impensis Alexandri VII. cujus statua ibidem cum aliis indigenarum Pontificum statuâ conspicitur. Ex adverso cernitur ejusdem figuræ capella sancti Johannis Baptistæ. Octo vulgo numerantur Pontifices ex Senis vel ex Senensium ditioe oriundi. Gregorius * VII. Alexander III. Pius II. & Pius III. Marcellus II. Paulus V. Alexander VII. quibus Bonifacium VI adjungunt, adduntque Nicolai II electionem Senis in Concilio factam, qui decretum tulit, ut deinceps Pontifex non nisi a Cardinalibus eligeretur. Dum ejusmodi statuas intueremur, occurrit memoriæ id quod in Colomesii Singularibus legitur, statuam pseudopapissæ Johannæ inter illas pontificias locum habuisse usque ad annum MDCXXXIV. quo anno Johannes Launoïus Doctor Parisiensis Senas profectus, ipsam statuam in cathedrali ecclesia etiam tunc stantem se vidisse asserit in Dissertatione de auctoritate negantis argumenti: ac proinde Baronio illusum fuisse, cum in litteris ad Florimundum Raimundum scribens, disjectam & comminutam statuam sibi ipse gratulatur. Oculis omnia lustravimus accurate, nec quidquam de illa statua aut videre, aut rescire potuimus. Rem postea maturius examinavit illustrissimus abbas Jacobus Mignanellus, atque ænigma solvit in litteris, quas per Magliabecum nobis transmitti curavit. Quippe statuam illam fabulosæ Johannæ, quæ post resectam sub hæc novissima sæcula basilicam, obtinente fabula, fabri-

* I: a1. fac.
to. 3. col.
620.

* potius
Romanus.


AN. 1686.
MARTIO.

cata fuerat; demum Clementis VIII pontificatu, cooperante cum Magno Duce ad Baronii preces archiepiscopo loci Cardinale Tarugio, non penitus quidem fuisse comminutam: sed mutatis formæ muliebris lineamentis, ex femina factam Zachariæ pontificis figuram, apposito ZACHARIÆ nomine, ne qua suspicio in posterum hac de re ob servatam statuæ materiam suboriri posset. En vera ac genuina facti historia. Ad latus aquilonare ecclesiæ Pius II egregiam bibliothecam construxit, intruxitque: sed modo soli libri, qui ad cantum pertinent, ibi supersunt, numero quadraginta, cum præclaris ex minio picturis, qui pro temporum diversitate ad chori usum mutantur. In pariete utrimque elegantissimæ picturæ Pii II gesta præcipua repræsentant. In medio super columnam consistunt tres Gratia ex ære: quarum una instar abeuntis, duæ specie redeuntium, morali quippe documento, facta una gratia, geminas auctori provenire.

Senis ecclesiæ Dominicanorum & Franciscanorum ingentes. In hac sanctus Bernardinus custodis officium gessit: in illa vixit sancta Catharina Senensis. Apud Patres Augustinianos, quorum ecclesia sanctum Martinum Turonensem patronum habet, Pater Oliva Generalis instructissimam bibliothecam in publicos usus nuper instituit. Mox laudatus Jacobus Mignanel-
lus, cui a Magliabeco eramus commendati, nos per urbis loca comitari non est gravatus; reversos in suis ædibus amice excepit. Pater ejus inter majores suos numerat ejusdem generis Cardinalem Fabium Mignanellum: mater ex Ptolomæorum gente, Bernardum Ptolomæum, instituti Montis Oliveti auctorem inter suos agnoscit.

FLORENTIA ET LOCA VICINA.

Eodem die flante rigidissimo vento Senis egressi, sequenti Florentiam pervenimus: ubi, tamquam in primario renatarum artium domicilio, ultra unum mensem substitimus.

XI. De Florentia id experti sumus, quod Petrus Delphinus, Camaldulensium summus præfectus, in epistola quadam inedita scribit ad Vincentium Quirinum Venetum, qui Florentiam profectus, se illius civitatis elegantia, morumque comitate mirifice captum fuisse Petro scripserat. Respondit Petrus in hunc modum. *Placituram tibi Florentiam numquam dubitavi. Est enim ejusmodi, si ades sacras, si profanas, si xenodochia*


& alias structuras miro artificio exedificatas consideres, quæ ob sui venustatem & elegantiam omnibus placere debeat. Quæ sint istorum civium ingenia, qui mores & studia; ex illorum congressu facile potuisti advertere. Quam ob rem si a civitatis antislite & aliis tum religiosis, tum primariis civibus officiose habitus es, atque humaniter acceptus; non est quod mei gratia id factum putes. Non enim es tu is, qui latere diu apud Florentinos potueris: cum suapte natura procul odorentur hominum præstantiam, & sapientibus atque eruditis mirifice deferant. Hactenus Petrus. Etsi vero non ii sumus, quibus deferri ob eam præstantiam possit: attamen sive propter amicorum commendationem, seu propter ejus a quo missi eramus dignitatem, a Florentinis nihil nobis non concessum est. Hanc gratiam in primis acceptam referimus serenissimo Principi Magno Hetruriæ Duci, qui, cum Senis esset, comperto ex litteris Magliabeci nostro Florentiam adventu, jussit ut non solum Laurentiana Mediceorum bibliotheca, sed etiam omnes Florentinæ in nostros usus essent referatæ; nobisque suppeditaretur amanuensis ad ea describenda, quibus opus haberemus. Rem exsecutus est illustrissimus Antonius Magliabecus, ex longo litterarum commercio nobis jam dudum amicissimus: quo duce ac monstratore, quicquid librorum in bibliothecis Florentinis proposito nostro magis conveniebat, didicimus. Is enim ea præditus est sagacitate, nihil ut ipsum lateat; ea memoria, ut omnes libros habeat in numerato, ipse museum inambulans, & viva quædam bibliotheca.

Dum cum illo fabularemur, dum congestos librorum acervos apud eum revolveremus, eo advenit R. P. Petrus Pinotus, a sancto Ludovico cognominatus, Fuliensem Gallorum in monasterio Pacis Prior, qui pro sua humanitate nos in suum cœnobium, volentes quidem ac lubenter assentientes, traxit; ibidemque paternâ caritate tractavit. Idem nos postridie deduxit in audientiam Magni Principis Ferdinandi, (is Magni Ducis primogenitus filius) qui nobis favorem suum gallicis verbis promisit, factisque præstitit. Verum cum Patrum Fuliensem monasterium extra urbem situm sit, coacti sumus, non sine amica hospitum nostrorum expostulatione, hospitium accipere in abbatiâ sanctæ Mariæ: cujus loci abbas reverendissimus Pater Candidus ab Asculo nihil non egit, ut ad se diverteremus. Assensimus tandem, & per aliquot quibus Florentiæ mansimus hebdomadas, humanissimi abbatis & monachorum ejus caritas in-

A. N. 1686.
MARTIO.

nos semper constans & eadem perseveravit. Interim eruditum virum Henricum Norisium convenimus in conventu Patrum Augustinianorum de Spiritu-sancto : cujus ecclesia more veterum basilicarum per Remp. Florentinam magnifice exstructa ; majus vero altare , totum lapillis constans , cum baldachino a Florentinis ante annos centum impensis octoginta quatuor millium nummorum fabrefactum est. Cœnobii ædes magnificentia non impares.

Non absimilis est sanctæ Mariæ Novellæ , ubi Dominicani versantur , elegans ecclesia , quam Michaël Angelus à Bonarota suam *Sponsam* solebat appellare. In ea sepultus pius ille Joseph Patriarcha CP. tempore Synodi Florentinæ , quæ ipso in loco habita est. In clauistro primo veteres sunt picturæ de creatione mundi , quarum una sacrificium Abelis & Caïni exhibet cum hoc vulgari Politiani versu retrogrado.

Sacrum pingue dabo , non macrum sacrificabo.

Abel ex parte directæ lectionis pictus est : Caïnus ex adversa , quæ ipsi convenit. Insignis est etiam ibidem bibliotheca , libris editis instructior , quam manu exaratis : quorum primas tenent Johannis Caroli Florentini , ejusdem conventus alumni , opera . in his vitæ insignium virorum , qui in illo conventu floruerunt , Christophoro Landino viro clarissimo nuncupatæ. Hic Landinus Angeli Politiani præceptor fuit , ejusque corpus inter Prætorium-vetus & Puppium , quæ loca sunt agri Florentini Camaldulum versus , incorruptum jacere dicitur. Vitæ autem illæ , quas descripsit Johannes Carolus , sunt Johannis Salernitani , primi fundatoris domus sanctæ Mariæ Novellæ ; Aldobrandini Calvacanti , Urbevetani quondam episcopi ; Simonis Salterelli , Pisani antistitis ; Angeli Acciaïoli , præfulis Florentini ; Alexii Strozæ , theologi præstantissimi ; Guidonis Regiolani , & Johannis Dominici Ragusini antistitis ac S. R. E. cardinalis , qui fuit fundator conventus Prædicatorum Fesulensium , de quibus postea dicemus. Pure & terse scribit hic auctor , qui alium librum anno M CCCC LXI edidit dialogi modo , qui inscribitur , *Liber dierum Lucensium* , continens deplorationes illorum temporum.

XII. Sacris in ecclesia beatæ Mariæ de Annuntiata , ubi Servitæ degunt , celebratis , vidimus loci bibliothecam , quæ codices manu scriptos non paucos habet. Nihil humanius optimis

illis Patribus, qui omnem facultatem investigandæ bibliothecæ non modo concesserunt, sed nos etiam apud se hospitari propemodum coegerunt. Inde multa excerpimus ex quodam libro cui titulus est, *Gubernaculum Conciliorum*, ad Julianum de Cæsarinis, tit. sancti Angeli Cardinalem, scripto tempore Concilii Basileensis a quodam Nicolao prædicatore Hispano, disciplinæ ecclesiasticæ studiosissimo, qui & ipse Concilio Constantiensi interfuerat. Ibidem etiam invenimus quoddam scriptum, sub nomine Hieronymi *de duodecim Doëtoribus* sui temporis vulgatum, quem cum alio codice sanctæ Crucis contulimus. Apud illam Annuntiata ecclesiâ frequens est Fidelium concursus ob imaginem beatissimæ Virginis, quam a quodam Bartholomæo (Johannem alii appellant) inchoatam, ab Angelo absolutam fuisse tradunt.

Dominicus Johannes Florentinus ex Ordine Prædicatorum in carmine suo de vita beatæ Virginis, & de Florentinis ejus ecclesiis, quod quatuor libris scripsit ad Petrum Mediceum, Senioris Cosmi filium, ejusdem ecclesiæ instauratorem, multa dicit de hac ecclesia, describitque atrium ejusdem variis ornatum figuris in signum miraculorum, pictis & fictis, quæ etiam nunc ibidem videntur. Laudat insuper Philippum Benitium, ejusdem loci quondam Patrem, mira pollentem virtute:

Ossa modo cujus sita sunt veneranda Tuderti

Mortua, portentis vivificata novis.

Laudat & Marianum, qui suo tempore vivebat, itidem loci Patrem, de quo plura scripta sunt in Dialogo Pauli Florentini de origine Ordinis servorum beatæ Mariæ ad Petrum item Mediceum: quem Dialogum ex Laurentiana bibliotheca habemus. In quodam codice hujus bibliothecæ, ubi contenta initio referuntur, inter alia notatur *Villelmus Theodoricensis de officiis ecclesiasticis*: sed liber iste avulsus e codice fuerat. Ibidem R. P. Augustinus nobis ostendit librum suum de Doëtoratu, quem prelo subjicere meditatur.

XIII. Nulla post Laurentianam bibliotheca Florentiæ libris vetustis magis referta est, quam bibliotheca sanctæ Crucis, quæ præclara domus est Minorum conventualium. Bibliotheca hæc amplissima solos mss. codices habet, ad quos inspiciendos facilem accessum habuimus. *Liber Anselmi de corpore Christi*, qui in editis desideratur, non levis esset momenti,

A. N. 1686.
MARTIO.

si codex foret correctior. Est & aliud ejusdem argumenti opus ex Patribus, quorum nullus affertur Paschasio Radberto posterior. quod opus Gezonis abbatis esse postea deprehendimus. Alius codex sancti Johannis Chrysostomi in Matthæum homilias **xxvi** Aniano interprete, subsequentes a Georgio Trapezuntio in Latinum versas complectitur. In alio codice habetur alia versio earumdem homiliarum numero **x c.** a Burgundione Judice, origine Pisano, facta *domino Papa Eugenio III præcipiente, anno Dominice Incarnationis M C L I, Indiçt. xv, in Kal. Decembris*, uti Burgundio ipse in fine testatur, qui aliam Chrysostomi, tum Johannis Damasceni latine vertit. De hoc lege Laurentii Pignorii epistolam **xxxix**. Porro viginti sex homilias priores, nec plures, nec pauciores, ab Aniano vetere interprete in Latinum translatas fuisse, ex aliis item codicibus antiquis perspectum habemus. In alio codice sanctæ Crucis exstant Goffridi Vindocinensis epistolæ: ex quibus quadragesima tertia est *ad Robertum de Arbruscello, sanctimonialium de Fonte Ebraudi procuratorem*. Codex scriptus est auctoris ætate. Verum hæc epistola non officit Roberti sanctitati; neque alia item Marbodi episcopi Redonensis: utpote quæ falsos tantum rumores continent, a malevolis sparsos in Robertum, quem inculcata vita, alia auctorum æqualium testimonia, ceteraque omnia ab his calumniis abunde purgant. Sed de his hætenus. Præclara est ibidem Jacobi Angeli ad Chrysoloram epistola de Gregorii **xii** electione. Non inter infimos ejusdem bibliothecæ codices censendum est Pontificale Romanum, in quo singularia quædam leguntur, maxime in visitatione infirmorum, & in mortuorum tumulatione. Sacerdos ad infirmum procedit cum oleo sancto, aqua benedicta, & cinere sacro. Infirmus à sacerdote interrogatus, cur se accersierit, respondet: *Ut constitear Domino & tibi peccata mea, & ut vice Dei tu illa mihi condones; & des mihi penitentiam, & infundas sancti Spiritus unctionem*. Dehinc promittit, se, si convaluerit, *unctionem sanctam custoditurum*. Tum facta super ejus pectus cruce cum aqua benedicta & cinere, Sacerdos cilicium eidem superimponit. Postea *suscepta confessione, & indiçta penitentia*, sequuntur Psalmi pænitentiales; usque decursis adoratio crucis per infirmum. Deinde *tradit ei sacerdos eucharistiam dominici corporis, intincto vino tali intinctione sanctificato*. Deumum fit unctio solito more. In sepeliendo mortuo hæc præci-

pue observantur. Ante defuncti absolutionem, *de mandato Rectoris Pater spiritualis venit in medium, & reddit testimonium pro defuncto, si fuerit unctus, si confessus: & de vita sua audito testimonio, sepe dictus Rector quarit a cuncto clero, & dicit: Placet vobis ut absolvatur frater iste defunctus? Respondent, Placet. Tunc Rector rogat de voluntate omnium eum qui major est inter eos, vel qui primus fuit in oratione, ut ipse absolvat. Ille vero cui iungitur, dicit, Orate omnes. Pater noster. In memoria. Absolve. Finita oratione, jam dictus Rector præcipit diaconis & subdiaconis, ut accipiant feretrum. Illi accipientes deportant eum ad tumulum. Hæc quia singularia sunt, lectoribus rerum ecclesiasticarum studiosis non ingrata fore existimavimus. Hactenus de bibliotheca sanctæ Crucis.*

In ejusdem loci ecclesia, quæ sane amplissima est, insigniorum pictorum eximie sunt tabellæ: præclara item mausolea illustrium virorum, Leonardi Bruni Aretini, & ex adverso Caroli Marsuppini, qui ambo Reip. Florentinæ Cancellarii, atque litteris clari exstiter. Leonardo hoc epitaphium inscriptum est.

*Postquam Leonardus e vita migravit,
Historia luget, eloquentia muta est:
Ferturque Musas, tum græcas, tum latinas,
Lacrimas tenere non potuisse.*

Matthæus Palmerius Florentinus, in libello de Temporibus, quem Petro Cosmi Senioris filio nuncupavit, Leonardi obitum refert ad annum M CCCC XLIII his verbis: *Leonardus Brunus historiographus Florentiæ moritur VII Idus Martii, ætatis sue anno LXXIIII.* Neque Caroli Marsuppini elogium prætermittendum, quod hoc epigrammate concluditur.

*Siste, vides magnum quæ servant marmora vatem,
Ingenio cujus non satis orbis erat.*

*Quæ natura, polus, quæ mos ferat, omnia novit
Karolus, ætatis gloria magna sue.*

*Ansoniæ & Græiæ crines nunc solvite Musæ:
Occidit heu! vestri fama decusque chori.*

Duo isti tumuli exstant in summa navi sanctæ Crucis: in infima vero monumentum Michaëlis Angeli a Bona-rotæ, cum dimidia ejus effigie, tribusque præclaris statuis, quæ pingendi, sculpendi, & ædificandi artes, quibus is excellebat, repræsentant, cum hocce epitaphio.

AN. 1686.
MARTIO.

MICHAËLI ANGELO BONAROTIO,
E VETUSTA SIMONIORUM FAMILIA,
SCULPTORI, PICTORI, ET ARCHITECTO,
FAMA OMNIBUS NOTISSIMO.

LEONARDUS patruo amantiss. & de se optime merito,
*Translatis Roma ejus ossibus, atque in hoc templo major. suor.
sepulcro conditis, cohortante sereniss. COSMO Med. Magna
Hetruria Duce P. C.*

Ann. sal. CIO. IO. LXX.

VIXIT ANN. LXXXVIII. M. XI. D. XV.

Ejus obitus Romæ contigit die XVII. Februarii, anno Domini
M D LXXV. Extra basilicam sanctæ Crucis, ad ædes Novitio-
rum sepultus est celebris ille mathematicus Galilæus Galilæi
Florentinus, qui obiit anno M DC XLII. die IX Januarii,
ætatis suæ anno LXXVIII.

Hæc etsi pluribus diebus a nobis observata, in unum tamen
diem conjuncta sunt: quo die Magni Ducis cimelia, signa, pictu-
rasque nobis monstravit cum Magliabeco Norisius, qui
numismatum & cimeliorum curam habet. Opus esset peritissi-
mo rerum æstimatore ad definiendum pretium tot inæstimabi-
lium rerum, quæ in veteri palatio asservantur: certe neque ea-
rum numerum, neque vocabula condigna afferre possumus. In
his atque aliis quæ Romæ vidimus signis mirari licet priscorum
artificum ingenium & industriam, qui rem mutam atque ina-
nem, veluti spirantem ac loquentem reddere potuerunt; & quod
est mirabilius, ita passiones animi repræsentare, ut rigidum
marmor, quod neque lætari, neque dolere potest, simile tris-
tanti ac ridenti conspicias. Una passim in his signis atque etiam
in picturis verecundia desideratur, quam vel nullam, vel so-
lum dimidiatam exhibebant illi veteres. At forte ignoscendum
paganis, sed non Christianis, qui in ipsis etiam locis sacris, ad
ipsas aras pudorem spectantium nonnumquam offendunt. Cum
in perfectissimorum signorum æstimatione hæreamus, occurrit
præ aliis in galeria (ut vocant) serenissimi Ducis imperfecta
Bruti statua dimidia, cujus vultum cum sculptor dimidiatis
tantum lineamentis exhibuisset, ad cetera supplenda hoc disti-
chon apposuit.

*Dum Bruti effigiem sculptor de marmore fingit,
In mentem sceleris venit, & abstinuit.*

Singularis est uno in conclavi collectio multarum tabellarum, in quibus pictores se ipsos expresserunt: quas inter non postrema est Bruni nostratis nobilissimi pictoris effigies.

AN. 1686
MARTIO.

XIV. Litteris a serenissimo Duce acceptis, in Laurentianam bibliothecam introducti sumus per Magliabecum: ibique multos dies investigandis describendisque codicibus antiquis impendimus. Illustrissimus Johannes Baptista Frescobaldus, Laurentianis Canonicis præpositus, cui a Principe iterato commendati fuimus, nobis facilem illuc accessum cum scriptore præbuit: semperque ad officia paratissimus fuit Alexander de Magnis, bibliothecæ pro tempore curator. Adjacet bibliothecæ ecclesia sancti Laurentii, Ambrosiana olim dicta a sancto Ambrosio, quieam sanctis Vitali & Agricolæ nuncupavit. Hanc vero in eam, quæ nunc cernitur, formam construxit Cosinus Senior, qui ad gradus majoris aræ cum uno, sed perquam honorifico, *Patris Patriæ* titulo, qui ipsi Senatusconsulto decretus est, sub humili lapide jacet. De tanto viro, tamque de litteris benemerito id jure dici potest quod Plinius junior scripsit de Titinio Capitone. Vir erat optimus, & inter præcipua sæculi sui ornamenta numerandus. Colebat studia, studiosos amabat, fovebat, provehebat, multorumque qui aliqua componebant, portus, sinus, præmium, omnium exemplum: ipsarum denique litterarum jam senescentium reductor ac reformator. Claustrum Canonicorum basilicæ adhæret, & super claustrum ex una parte bibliotheca: cujus ædificium delineavit Michaël Angelus Bona - rota. Scamna veteri more hinc inde sunt disposita, & super scamna codices numero tria millia septem. Eorum indicem brevi (ut speratur) edendum accuratorem texit Franciscus Maria Ducci, scribendi græce & hebraice peritus. Bibliothecæ altera pars dotis nomine Catharinæ Mediceæ cessit, in bibliothecam regiam translata. Prope scalam, quæ ad bibliothecam ascensum præbet, exstat Pauli Jovii statua ex marmore cum hac inscriptione.

« Plin. lib.
8. epist.
12.

PAULO JOVIO NOVOCOMEN. EPISC. NUCERINO.
HISTORiarum sui temporis scriptori,
SEPULCRUM QUOD SIBI TESTAMENTO DECREVERAT,
POSTERI EJUS INTEGRA FIDE POSUERUNT,
INDULGENTIA MAXIMORUM OPTIMORUMQUE COSMI
ET FRANCISCI ETRURIE DUCUM ANNO M D LXXIV.

AN. 1686.
MARTIO.

E vicino est monumentum Antonii Ciofii Jurisconsulti celeberrimi, qui obiit anno M D LXXV.

Cum nullus fere in urbe Florentina locus sit, ubi aliquod Mediceæ magnificentiæ aut pietatis monumentum non exstet; nullum tamen augustius, quam hoc in loco ubi basilica Laurentiana, & collegium Canonorum ibidem institutum; Mediceæ gentis pietatem; magnificentiam sepulcra Ducum; Angeli Bonarotii opus insigne; & conditorium illud, quovis auro pretiosius, quod a Ferdinando M. inchoatum necdum absolutum est, tametsi ab annis octoginta a labore non cessarint artifices: amorem denique in litteras & bonas artes, quas ab interitu ante annos ducentos Medicei revocarunt, hæc ipsa, de qua loquimur, bibliotheca, quæ in publicos usus ex Magni Ducis indulgentia patet. Non est opus singillatim omnia & singula recensere, quæ ex illa bibliotheca descripsimus. In Græcis describendis Antonius Maria Salvinus vir, latine & græce, ne quid de aliis linguis dicamus, exercitissimus; in Latinis Franciscus de Stephanis clericus, adjutores fuere. Ex Latinis inde habemus inter alia *Zenobii episcopi vitam*, quæ Simplicianum sancti Ambrosii amicum ac successorem præfert auctorem, quod tamen præstare nolim; deinde *Humberti Cardinalis libros tres contra Simoniacos & contra investituras*: ex græcis *Origenis librum contra sectas & hæreses*, sed mutilum ab ea parte; quæ refutationem continebat; & *acta* cujusdam *Jacobi neophyti* ex Judæis, qui cum contra sententiam, Heraclii principatu, baptizatus fuisset, post susceptum Sacramentum ita in fide confirmatus est, ut etiam disputationem adversus suos populares sustinuerit, ad vindicandam religionem Christianam. In illis actis illud observatione dignum est, quod Jacobus exemplo Pauli apostoli, qui se legis suæ studiosissimum ante suam conversionem fuisse prædicabat, ait se pridem adeo Christianis infensum fuisse, ut apud Ptolemaidem libros eorum ex episcopio abstulerit; & eos quidem, qui ad vetus & novum Testamentum pertinent, secum asportaverit: at codices sanctorum Patrum, Basilii, Gregorii, Epiphani, Ambrosii, Ephraimi, & Antiochi nomina præferentes, flammis tradiderit. Alii libri in illa bibliotheca insigniores sunt *Pauli Orosii libri vi*, litteris quadratis ab annis mille scripti; mutilus codex ad caput *xviii* libri primi. Legitur hæc epigraphæ initio libri *vi*. **CONFECTUS CODEX INSTATIONE MAGISTRI VVILIA-**

RIC ANTIQUARIUM. ORA PRO ME SCRIPTORE SIC DOMINUM HABERE PROTECTOREM. An titulus operis fuerit *ormesta*, ex mutilo codicis principio disci non potest. Præter ea *Ciceronis epistola ad Atticum* in veterrimo codice cum transpositione, quæ in antiquis editionibus reperitur; *Taciti historia lib. v* ex bibliotheca Fuldensi, quo. ex codice prima horum librorum editio Romæ anno M D XV accurata est: *Plotini liber* in præexistentiam animarum græce, ineditus: & alii. Unus codex ex corio antiquissimus ibidem exstat, continens librum *Hester*, hebraice sine punctis scriptum, absque scriptura in adversa foliorum parte. Ibidem habentur *VViclefi opera*, id est primo tractatus magistri *Johannis VVyclif de fundatione pseuodofratrum*; tractatus de Christo & Antichristo; De contrarietate duorum dominorum: De citationibus frivolis & aliis versutiis Antichristi: De nova prævaricantia mandatorum: Speculum Ecclesie militantis: Dialogus inter veritatem & mendacium: Alius dialogus quatuor libris in alathiam, pseustin, & phronesin: De dominis & servis. Nec ab re erit observare, in eadem bibliotheca historiam *Daretis Phrygii*, quicumque sit impostor ille, de exitu Trojanorum, & de eorumdem excidio, exstare in codice ante annos octingentos exarato: in cujus fine habentur versus de sancto Patricio, & de Cellano abbate, tempore Transmari episcopi Noviomensis. Nec illud prætermittendum, quod in libro *Burnetti Latini Florentini*, qui inscribitur, *Thesaurus de origine & natura omnium rerum*, gallice primum, deinde italice ab auctore compositus, Burnettus in capite primo, postquam sibi objecit quemdam interrogantem, cur, Italus cum sit, in *Romana seu Francica lingua* scripserit? respondet se id fecisse duas ob causas: unam, quod in Francia tunc versaretur: alteram, quod Francica lingua ceteris aliis gratior esset atque universalior. *percio che la parlatura Franciescha e piu dilettevole & piu comuna che tutti li altri linguaggi.* Hujus auctoris liber italice vulgatus est. Præterimus historiam *Bernardi Oricellarii de bello Italico*, seu de adventu Caroli V III Francorum regis in Italiam: qua in historia moderatio, scriptori probo conveniens, & alienus a studiis partium animus desiderantur. Recens est, sed tamen non spernendus codex de *viris quibusdam illustribus apud Arabes, per Johannem Leonem Africanum ex ea lingua in maternam traductis.* Hactenus de bibliotheca Laurentiana.

XIX. Cœnobium Angelorum apud Florentiam, Ambrosii

AN. 1686.
MARTIO.

viri eruditissimi & aliorum Camaldulensium Patrum insigniorum secessu illustre, pauca retinet ex illa librorum supellectile, quam optimi Patres illi collegerant. Superfunt tamen nonnulli codices haud contemnendi, quos, concedente humanissimo abbate Romualdo, examinavimus, partimque descripsimus. Majoris momenti *epistole quatuor Lini Colucii Salutati* Cancellarii Florentini, in causa Schismatis scriptæ, I ad Cardinales Gallicos, II Petro de Corsinis Cardinali, III Marchioni Brandeburgensi, IV Innocentio septimo. Exstat aliud opus Pauli Orlandini monachi ejusdem cœnobii, & postea Ordinis præpositi generalis, dictum *Heptaticum*; inscriptum Antonio Puccio, episcopo Pistoriensi & Nuncio apostolico ad Helvetios. Argumentum est de virtutibus & de triplici Theologia, conjuncta, discreta & mista, de interpretatione Scripturarum sanctarum contra vanos ariolos: e quibus arguit nonnullos, qui jactitabant, anno Domini M D XXX Antichristum esse prædicaturum, & Ecclesiam catholicam penitus extinguendam: quorum hominum probationes vanissimas esse demonstrat. Agit vero præcipue contra quemdam astrologum Cremonensem, & contra alium Florentinum, qui Franciscus de Mileto vocabatur, duosque præcipuos conscripsit libros, quorum alteri *Convivium*, alteri *Quatrivium* titulos dedit. Porro auctor in eo refutando ait se *Theologorum Parisiensium more*, decem ejus argumenta proferre; ac postea totidem regulas, quibus Mileti argumenta refutantur, Antonius Franciscus Caramellus, eruditus Theologiæ lector in eodem monasterio Angelorum, multis nos officiis obstrinxit, litteris ad amicos juvit, & quasdam conciones suas editas dono dedit.

XXIV. Sed regrediamur modo ad humanissimos hospites nostros abbatix Florentinæ, quæ Hugonem Tusciæ Marchionem auctorem habuit ante annos septingentos. Eum Marchionem Brandeburgensem perperam fingunt Andreas Notarius Florentinus, & Laurentius Cyathus ex eadem urbe, qui de ipsius Hugonis vita libellos composuerunt. In bibliotheca multi sunt codices græci bonæ notæ, præter latinos. E græcis *Philonis opera* philosophica & de vita Mosis, item liber de opere sex dierum: *Chrysostomi homiliae* in Genesim non semel, ejusdemque varii sermones: *Catena in Matthæum*, item alia in *Lucam*, utraque veterrima. *Gregorii Nazianzeni sermones*; *Acta sanctorum* venerandæ antiquitatis; *Thucydidis historia*; item *He-*

Herodoti, & *Polybii*, bonæ notæ; *Eusebii historia* mediæ ætatis; *Platonis* pleraque opera in multis codicibus; *Luciani sermones* LXXX, aliaque ejusdem. *Acta Concilii Florentini*, item *Scholarum sermones* ad Patres ejusdem Concilii: denique, ut multa alia prætermittamus, codex antiquus optimæ notæ, in quo *Xenophontis* varia opera, *Dionysius Halicarnassensis* de compositione navium, & *Theophrasti characteres*. Hæc de græcis. In latinis, codex annorum DCCC *Rufini historiam* comprehendit; alius *historiam Augustam*, alius denique *Quintiliani institutiones* eleganter scriptas. Postremo *Teuzonis monachi commentarius* in Regulam sancti Benedicti, cum prævia epistola ad Odelricum episcopum. Vivebat Teuzo iste ante annos sexcentos, scilicet tempore beati Johannis Gualberti. Hæc omnia argumento sunt, litterarum, maxime græcarum, studia in illa sanctæ Mariæ Abbatia olim viguisse. Insigne vero est illius loci monachorum elogium ex epistola Isidori Clarii ad Ambrosium ejusdem coenobii abbatem, qua versionem tractatus Nili monachi de Christiana philosophia ab se factam eidem mittit emendandam, quæ auctoris illustris epistola, quoniam inedita est, atque ad commendanda istius loci monachorum studia pertinet, huc referenda nobis est.

*Isidorus monachus Ambrosio abbatia Florentine
Abbati. S. P. D.*

Anno præterito cum in Casinensi illo monte, vel potius paradiso confisterem, nihil mihi adeo cordi fuit, quam ut iis potissimum intenderem, quæ me ad hujus mundi contemptum maxime provocarent, ac sacri illius loci solitudinem suavissimam suaviorem redderent. Verum cum me ad id mihi non sufficere viderem, sanctorumque volumina, quæ mihi suppetias ferrent, avidius exquirerem; nonnulli ex fratribus, tunc inibi mecum commorantes, mihi retulerant esse in loci illius bibliotheca quamplurima opera, tum græca, tum latina, a præclarissimis Ordinis monastici viris, & disertissime & sanctissime scripta, quæ voluntati meæ satis abundeque facere, ac meo proposito conducere possent. Accurro properus, moxque omnia curiosus, avidusque revolve: & inter cetera forte mihi obviavit tractatus quidam Nili monachi, doctrina & vitæ sanctimonia conspicui, de Christiana philosophia. Allexit auctor, & rituli novitas ad legendum: legi & relegi diligenter. Cumque ex ejus lectione multum mihi profuisse viderer, cuperemque illum semper apud me esse, simulque ut menti tenacius inhaereret, e græco latinum

AN. 1686.
MARTIO.

feci. Sed cum me tempus deficeret, (nam propediem discedere, & Romam venire cogebat) in ipso vertendo nulla verborum elegantia usus fui: cujus rei etiam causa fuit, quod mihi soli vertere, nec aliis legendum tradere tunc animus erat. At ubi audiivi filios tuos in philosophiæ studio summis viribus incumbere, mutavi sententiam. nam dandum mihi vitio duxi, si non & ipse, eo modo quo possem, illis auxilio essem. Hunc igitur de philosophia tractatum, quia emendandi otium non est, ita ut verteram, tibi ut corrigas, illis ut legant misi. Excipe itaque obsecro, reverende Pater, Nilum sanctissimum ac doctissimum monachum, pannis meis vilibus obstitum: in quo filii tui, non vestes meas tritas & laceras, sed formam illius angelicam speciosamque considerabunt. Quod si religiosa ejus candidaque conversatione delectati, cum ipso frequentius colloquantur; ex ejus profecto doctrina multo melius ac multo felicius proficient, quam ex Aristotelicis libris hætenus profecerint. Vale Pater cum filiis. Roma XVIIII Kal. Septembris M D XXXIII.

Hætenus Isidori epistola, quam cum sua versione descriptam habemus ex bibliotheca ejusdem Abbatix: ubi optimus Pater Eugenius Gamburrinus Abbas modo versatur, scriptis suis genealogicis & studio in Regem & Francicam gentem non minus, quam genere notus.

Non longe inde abest metropolitana beatissimæ Virginis ecclesia amplissima, quæ a Flore nomen habet. Hæc tota exterius ex quadrato sculptove marmore eximie ac magnificentissime construi cœpit anno M CC XCIV. Exterior basilicæ ambitus elegantia vix ulli secundus. Testudo Michaëli Angelo Bona-rotæ visa admirabilis; turris adjuncta itidem ex marmore altissima est, ad quam per gradus amplius quadringentos ascenditur. Turris architectus fuit Jottus pictor quondam celeberrimus; Philippus testudinis, mortuus xv. Kal. Maias anno M CCCC XLVI. uti ejus epitaphium docet, basilicæ parieti appositum ad australem principis portæ ingressum. Ibi dem cælaturum est sequens Jotti epitaphium auctore Politiano.

Ille ego sum, per quem pictura exstincta revixit:

Cui quam recta manus, tam fuit & facies.

Naturæ decrat, nostræ quod defuit arti:

Plus licuit nulli pingere, nec melius,

Miraris turrim egregiam sacro are sonantem?

Hæc quoque de modulo crevit ad astra meo.

Denique sum Jottus, quid opus fuit illa referre?

Hoc nomen longi carminis instar erit.

Obiit anno M CCC XXXVI. Cives pos. B. M.

M CCCC LXXXX.

A. N. 1686.
MARTIO.

In eadem basilica sepultus est Marcilius Ficinus.

In area principis templi portæ objecta conspicitur præstantissima sancti Johannis Baptistæ ædícula, ex templo Martis in baptisterium conversa. Ejus valvis ex ære, quæ ex ternis partibus introëuntibus patent, variæ novi ac veteris Testamenti historiæ insculptæ sunt. Unam ex his valvis effinxit anno M CCC XXX Andreas Ugolini, Pisanus: Laurentius Florentinus alias duas inenarrabili sculpti æris arte anno M CCCC XXI inchoavit, nec minori quam quinquaginta annorum spatio, teste Matthæo Palmerio, perfecit. Has duas dum Michaël Angelus Bona-rotæ olim stupens intueretur, percontanti quid de his sentiret, respondit dignas esse paradiso, quod quidam his versibus reddidit.

Palmer. in
ms. lib. de
Temporib.

Dum cernit valvas aurato ex ære nitentes

In templo Michaël Angelus, obstupuit.

Attonitusque diu, sic alta silentia rupit:

O divinum opus! o janua digna polo!

Balthassar Cossa, sub nomine Johannis XXIII Pontifex dictus, ibidem humatus est.

XXVIII. Cum Magliabeco iter instituimus in abbatiam Fesulanam Canonicorum regularium Congregationis olim sancti Fridiani Lucensis, nunc Lateranensis. Iter breve quidem nobis, cum hic locus Florentia non amplius quam duobus passuum millibus distet: sed longum Magliabeco, qui numquam extra solum urbis suæ Florentinæ pedem movit: nisi quod semel in vita ad Pratum opidum, decimo ab urbe milliari, jussu Principis adire coactus est.

Felix qui propriis ævum transigit in arvis,

Ipsa domus puerum quem videt, ipsa senem.

Claud. in
epigram.

Iter Fesulas est per portam sancti Galli, dixeris Gallorum, quæ ab adventu Caroli VIII Francorum regis in Italiam occlusa, non ante festivum serenissimæ Ducissæ ingressum ab annis viginti denuo aperta est. Trajecto pedibus siccis Mugnione poëtis decantato, occurrit in declivi montis abbatia Fesulana, nostri quondam Ordinis, quam Cosmus senior ejus instaurator Canonicis regularibus attribuit, expensis in id opus & in bibliothecam octoginta quatuor millibus aureorum. In

AN. 1686.
MARTIO.

hanc abbatiam admissi sumus cum omni humanitate, tum a reverendissimo loci Abbate, tum a ceteris religiosis. Canonicis, in primis a Patre Guinigio, illustrissimi Archiepiscopi Ravenensis nepote, qui suos Theologiam docet. Ecclesia sancto Bartholomæo sacra. Præ aliis bibliothecæ codicibus singulare est *Sozameni Presbyteri Pistoriensis* ac Florentiæ educati *Chronicon* ab orbe condito ad sua tempora, ut in Præfatione loquitur. Constat duobus magnis voluminibus, quorum posterius definit in anno M CC XCII. Quidam tamen auctorem serius vixisse, & ad sæculum XVI pervenisse existimant. Quamquam superiora sæcula, quibus nondum politior litteratura restitui cœpta erat, stilus auctoris sapit, ipsique litterarum characteres. In fine voluminis primi laudat auctor Vespasianum librarium iis verbis, quæ huc referre juvat. *Haud te Vespasiane librarie, urbisque Florentinæ civis, silentio præterire in hujus primi voluminis calce mihi est consilium. Namque si Ciceronis contaneus fuisses, te peroptime dignum suis aureis litterarum monumentis decorasset, immortalemque fecisset. Tu profecto in hoc nostro deteriori sæcula Hebraica, Græca, atque Latina linguarum, omnium voluminum dignorum memoratu notitiam, eorumque auctores memoria tradidisti. Quam ob rem ad te utique omnes Romanae atque aliarum ecclesiarum Pontifices, Reges, Principes, alique trium linguarum eruditi, si humanitatis cognitionem cupiunt, gressus suos dirigunt. Ego autem ipse, ut pro veritate loquar, auxilio tuo in doctorum virorum documentis ab eis relictis potissimum usus sum: quorum multa mihi a te demonstrata, ac deinde diligenter perquisita, in hoc primo nostro volumine conserui. Esto ergo immortalis, ut ita dixerim, dummodo hæc mea scripta, satis inepte pro ingenio mei facultate prolata, tu etiam permanebis. In secundo ejusdem Sozameni volumine ad annum DCCC LIII fit mentio de Johanna pseudopapissa, & ad annum M CC XC de miraculo Eucharistiæ, quod apud Parisios evenit: ubi Judæus quidam pepigit cum femina Christiana, ut ad se corpus Christi deferret, quod in ferventem aquam projecit.*

Floruit in eadem abbatia (ne quid dicamus de Petro Martyre apostata) Matthæus Bossus, cujus epistolæ & scripta omnia Bononiæ apud Victorium Benatum edita sunt anno M DC XXV. Vixit sub finem sæculi XV. nempe tempore Pici Mirandulæ & Angeli Politiani, qui identidem illuc cum Bossio secedebant. Insignis est ea de re Politiani epistola ad Lau-

rentium Mediceum, quam, quia rarissima est, hoc loco exhibere quoddam operæ pretium videtur.

*Angelus Politianus Laurentio Medici
patrono suo S.*

Sapienter, ut cetera Laurenti facis, qui sanctos istos extreme Quadragesimæ dies consumere in Agnano tuo malueris, quam Florentiæ. Quis enim tutior portus, in quem de tantis occupationum fluctibus enates, quam Tyrrheni litoris amœnissimus iste sinus atque secessus, ubi quasi quoddam naturæ certamen sit & gratiæ? Sed ego quoque tuum imitatus exemplum, ceu fugitivus urbis, assiduus in Fesulano fui, cum Pico Mirandula meo; cœnobiumque illud ambo regularium Canonicorum frequentavimus, avi tui sumptibus exstructum. Quin abbas in eo Matthæus Bossus Veronensis, homo sanctis moribus integerrimæque vita, sed & litteris politioribus mire cultus, ita nos humanitate sua quadam tenuit, & suavitæte sermonis, ut ab eo digressi, mox ego & Pico soli propemodum relictæ, (quod antea fere non accidebat) nec esse alter alteri jam satis videremur. Hoc ille arbitror sentiens, dialogum nobis a se compositum DE SALUTARIBUS ANIMI GAUDIIS obtulit quasi vicarium: cujus materia stylusque nos ita cepit, ut quamdiu quidem legebamus, facile auctoris præsentia careremus. Eum igitur ego dialogum mitto ad te quoque, Laurenti, quem subter pineta ista leges ad aquæ caput. Delectaberis arbitror argumento, sensibus, indole, nitore, varietate, copia; nec in eo tamen domesticas quoque laudes desiderabis: ac si tuus etiam accesserit calculus, dabitur opera protinus, ut in multa liber exemplaria transfundatur. Vale.

Hæc Politiani epistola præfixa est libro Matthæi Bossi *de veris ac salutaribus animi gaudiis* editionis anni M CCCC XCI. nec alibi (quod quidem sciamus) recusa.

Ex abbazia Fesulana divertimus ad proximum Dominicanorum vitæ strictioris & observantioris cœnobium: ubi olim sanctus Antoninus vitæ religiosæ tirocinia posuit; vixitque Sanctes Pagninus. Inde Marchio Guadagnus nos in vicinam suam villam deduxit. Prope fastigium montis sita erat civitas Fesulana, nunc fere in solitudinem redacta: ubi superest sancti Romuli cathedralis, & aliæ plures ecclesiæ, quam casæ. Episcopus Florentiæ degit. In declivi montis & in subiecta planitie infinitæ sunt villæ amœnissimæ.

XXIX. Bibliothecam serenissimi Ducis, egregiè instructam, cum Magliabeco ejus curatore revolvimus in palatio,

AN. 1686.
MARTIO.

quod olim à Pittis ædificatum est, ea magnificentia & amplitudine, quæ potentissimum Principem decuisset. In porticu inferiori ad ingressum, ingentis molis cernitur lapis magneticus, sed ab igne tactus: in extrema parte statua mulæ, quæ ad palatii constructionem lapides, ligna, columnas, vexit, conduxit, traxit, ut in apposito disticho legitur. Tanta apud Italos rerum præteritarum religio est, ut ne quidem animantia ab hac cura excipiant: cujus rei vetera & nova exempla suppetunt, non tantum libris, sed & marmoribus consignata. Florentiæ ad ripam Arni exstat inscriptio lapidi insculpta, quam sæculo superiori Carolus Capellus, legatus Venetus, equo suo in obsidione Florentiæ cæso poni curavit. Sic Hadrianus Augustus *epitaphium equo suo composuit*; idemque equos & canes sic amavit, ut eis *sepulcra constitueret*, testante Spartiano. Hinc apparet ejusmodi monumentorum, quæ hominibus & brutis animantibus communia esse possunt, quanta sit vanitas, nisi aliud monumentum, quovis ære ac marmore perennius, homines veris solidisque virtutibus sibi ipsi erigere curent. Non prætermitemus hoc loco id quod legitur ex Sebastiano Maccio in collectione inedita veterum inscriptionum apud Cardinalem Chigi, de quodam mulæ ficto epitaphio, quod viris eruditis nonnullis fucum fecit, opinantibus id esse antiquum, & a P. Crasso mulæ suæ inscriptum, quod sic incipit, DIS PEDIBUS SAXUM &c. ubi alludit auctor ad sollemnes inscriptiones *Diis Manibus*. Thomas Porcacchius inter alios hoc epitaphium pro genuino & antiquo habuit in libro funeralium: immo Alexander VII in adversariis suis notat, id repertum fuisse prope sanctum Petrum. Verum, ut Maccius refert ex Annibale de Grassis Bononiensi Jaccentiæ episcopo, hoc epitaphium confictum fuit a Paride de Grassis, sculptumque ex marmore, atque ejusdem jussu sepultum in quadam ejus vinea. Post hæc fingens se velle quasdam arbores plantare, jussit foveam & scrobem eo in loco fieri, ubi marmor abditum erat. Cum vero fodiendo illud esset inventum, id de sua mula prædictum fuisse dixit. Res vero cum acta esset per jocum, multos annos marmor ut derelictum ibidem restitit, ac deinde antiquitatis specie multos decepit. Similem historiolum refert Varrerius in Berosi censura. Ejusdem farinae videtur esse epitaphium *Luscinia philumena* DIS AVIBUS, apud Jacobum Sponium in tomo tertio ejus itinerum. De his hætenus.

. Post

Post concionem, quæ ad sanctæ Felicitatis parthenona e nostris a Patre Appiano Soc. Jesu habita est, illustriss. Benvenutus ejus loci Præpositus seu Prior nobiscum varia instrumenta communicavit, suamque observationem de pede Liutprandi, cujus mentio frequens in priscis actis, homo doctus & humanissimus, magni Principis Ferdinandi nuper institutor & præceptor. Sanctæ Felicitatis cœnobium Nicolaus Pâpa 11 tum, cum Florentinam ecclesiam episcopus regeret, instauravit. De pede Liutprandi in pauca conferre juvat eruditi viri observationem. Apud Chelnum in tomo secundo Historiæ Francorum fit mentio de pede Liutprandi ex codice Novaliciensi in hæc verba. *His quoque diebus Liutprandus rex Longobardorum apud Italiam strenue regnabat: qui tantæ longitudinis fertur pedes habuisse, ut ad cubitum humanum metirentur. Horum vero pedum mensura pro consuetudine inter Longobardos tenetur in metiendis arvis usque in præsentem diem: ita ut pedes ejus in pertica fune XII fiat tabula.* Subdit vir doctus, nostra etiam hac tempestate hujus pedis mensuram ad agros dimetiendos usui esse in tota Insubria, licet in Tuscia sit abrogata; eamque corrupto vocabulo *Aliprandi pedem* apud Mediolanenses appellari, quam in uncias XII partiuntur. Sex pedes apud ipsos Trabuccum efficiunt; duo Trabucci Jucatam: quæ in se multiplicata Tabulam constituit; & XXIV Tabulæ Perticam componunt. Denique Pes Liutprandi ad nostrum morem compositus, Parisiensem pedem regium continet, & insuper ipsius pedis trientem.

XXX. Invitati ad sancti Spiritus cœnobium ab erudito Norisio, vidimus materias ab ipso dispositas ad historiam Donatistarum. Ut extremam operi manum apponeret hortati sumus. Ille nescio quas excusationes prætendit. Interim in tractandis numismatibus totus occupatur: seque ex eis annum ipsum Incarnationis Christi Domini brevi demonstraturum confidit in libro *de Æris & epochis Syromacedonum*, quem prelo maturum habet. Post prandium lustrata est a nobis sancti Marci bibliotheca, Cosmi Senioris opus; quam auxit Nicolaus de Nicolis, a quo veteres codices non pauci Patribus illis Dominicanis ante annos ducentos legati sunt. Ibi religiosissime vivunt boni Patres, eodem ritu atque in conventu Fesulano. Arque ut paucis dicam, in urbe Florentia, immo & in Hetruria tota, insignis præ ceteris Italiæ locis viget religio cura & studio Magni

AN. 1686.
MARTIO.

Ducis, qui exemplo suo subditis præest. In ecclesia sancti Marci corpus beati Antonini Florentini antistitis magno honore colitur. Ibidem ad aquilonarem navis partem Johannes Picus a Mirandula monumentum habet cum hoc epitaphio.

D. M. S.

Joannes jacet hic Mirandula: cetera norunt

Et Tagus, & Ganges, forsan & Antipodes.

Ob. an. sal. M CCCC LXXXX IIII. vix. an. XXXVI.

Hieronymus Benivenius, ne disjunctus post mortem locus ossa separaret, quorum animos in vita conjunxit amor, hac humo supposita poni curavit.

Ob. an. M D XXXVI. vix. an. LXXXIX. mens. VI.

E regione sepultus est, sed sine inscriptione, Angelus Politianus, Johannis amicus, qui obiit anno M D IX.

In bibliotheca ejusdem loci habentur *Gaudentii Brixienfis* episcopi conciones: *Prædestinatus* a Sirmundo editus, absque titulo in codice annorum quingentorum: *Tertulliani* opera in tribus voluminibus annorum trecentorum: item *Plinii Secundi* & *Sidonii Apollinaris* epistolæ. Habetur etiam ibidem, post varias Athanasii & aliorum litteras sub nomine *Johannis Chrysostomi* epistola ad *Cesarium monachum*, typis vulgata in Hollandia non sine mendis, ac denuo apud Anglos & Hollandos (uti audio) iterum recusa. Ejusdem epistolæ exemplum, quod a Petro Martyre (qui illam epistolam laudavit primus) ex Florentino codice descriptum fuisse veri simile est, Romæ in Altaempenfi bibliotheca vidimus.

APRIL.

VII. Dominica in Palmis apud senatorem Dati, Caroli Dati filium, nobis ostensum est insigne opus Michaëlis Mercati Miniatischensis, inscriptum *Metallotroica*: quo in opere de omni metallorum genere erudite tractatur, eorumque figuræ æri incisæ exhibentur. Hoc opus ineditum laudavit Baronius in tomo I Annalium, ubi de myrrha Christo Domino in Cruce porrecta. Idem auctor librum scripsit de Obeliscis.

VIII. Florentia ad tempus relicta, Aretium versus contendimus per Feginum opidum & amœnas Arni ripas: eoque nobis sequenti die ante meridiem accedentibus obviam venit cum rheda sua reverendissimus abbas e nostris Johannes Baptista Beccius a Castilione, multorum auctor anagrammatum & elogiorum de Ludovico Magno, nosque cum multa humanitate in abbatiam suam, quæ sanctas martyres Lucillam & Floram

titulares ac tutelares habet, deduxit. Archivum loci optime ordinatum, in quo nullum antiquius diploma invenimus, quam Hugonis & Lotharii regum, datum anno DCCCC XXXIX. in gratiam monasterii jam constructi: cujus tamen primordia recentiores in tempus Ottonis III rejiciunt. Situm erat olim monasterium altero extra urbem milliari. Postea majorem seu cathedralem sancti Petri ecclesiam, in qua sepultus Gregorius X, adivimus; tum antiquissimam sanctæ Mariæ collegiatam basilicam; deinde Camaldulensium ecclesiam, quam sanctæ Mariæ *in Gradibus* appellant, a sancto Donato episcopo & martyre quondam frequentatam: ac demum monasterium sancti Bernardi Olivetanorum, quod super fundamenta veteris amphitheatri constructum est. In ecclesia majore quædam monumenta superesse dicuntur: sed ea ob sacros dies (hanc enim excusationem nobis obtendit illustrissimus Decanus): videre nobis haud licuit. Aretii olim Respublica erat, Florentinæ postmodum mancipata. Sed cum jugum excutere conarentur Aretini, iterum sub jugum redacti sunt auxiliantibus Francis, quod Carolo VIII regnante contigit. Singulare factum, quod tunc accidit, narrat in quadam epistola Petrus Delphinus, Camaldulensium generalis præfectus, nimirum in lib. VII epistola XXXV ad Petrum episcopum Patavinum: quod in vulgatis litteris ab ipso resectum & cancellatum, ita ex veteri codice restituimus post ista verba versus XIII. *redigendus est potestatem.* quibus hæc subdit vetus codex. *Et audi indicium. Me apud Aretium agente, dejectus est de pinnaculo templi nostri lapideus Leo, in signe Florentinorum, atque in putrem proximum demersus. Ingresso urbem Gallorum exercitu, eductus est Leo, & in medio celebriori vico posito coacti sunt Aretini, quotquot eo die illac pertransibant, genua flectere, ac de infidelitate sua atque defectione veniam postulare. Audio tamen commendasse illos Regem Florentino Dominio, ne in rebellem populum violentius sevant, neve pro meritis ulcisci in eum pergant. Quod utrum sint facturi, haud ita multo post re ipsa experientur, qui nimia dominandi libidine sunt decepti. Conceperant animis spem melioris status, qui mediocri bono debuerant esse contenti, ne se se in periculum capitis atque in discrimen minus prudenter injicerent. Factura &c. ut in editis.*

X. Feria quarta majoris hebdomadæ ante Pascha, rigidissimus ventus cum nobis in faciem sæviret, ab Alverniæ sacro monte adeundo (is ab Aretio passuum octodecim millibus di-

AN. 1686.
APRIL.

stat) nos prohibuit, fuitque in causa, ut recta in Camaldulen-
sem Eremum tenderemus. Laterina, Rasina, Bibiena, cui
Musolea vicina, & Sosium opidula, in litteris Ambrosii &
Petri Delphini passim memorata, nobis in ipso itinere obvia
fuerunt. Post Sosium, conscenso arduo monte, descendimus
ad Fontem-bonum, in angusta valle inter abietum silvas in-
gentes & abruptos montes ad torrentem situm: ubi cœno-
bium est ad hospites excipiendos. Illic ad viginti eremitæ de-
gunt, sed vitam quasi cœnobiticam ducentes, subministrant-
que omnia necessaria ad sacram Eremum, quæ altero inde mil-
liari in monte invio ac prærupto posita est. Eremitæ hic fere
quadraginta, præter laicos fratres, in cellis separatis piissime
vivunt, remoti ab omni hominum consortio: adeo ut nec viris
sæcularibus nisi rarus illuc accessus, nec feminis propius quam
passibus ab eremitorio ducentis concedatur. Reclusi item duo
illic in summa solitudine vitam agunt, nec nisi ternis ante
Pascha diebus, quibus divinis officiis intersunt, cappa, non cu-
culla induti, extra cellas procedunt. Cellæ olim sine ambitu
murorum. Infirmis abstinencia remittitur numquam in Ere-
mo, sed apud Fontem-bonum. Eorum præpositus *Major* di-
ctus, sub cujus disciplina sex ejusdem Congregationis eremito-
ria vivunt. R. P. Bonaventura ex opido Laterinenfi, tunc Ma-
joris officio fungens, nos cum omni caritatis & benevolen-
tiæ officio excepit, multaque in nostri gratiam per suos descri-
bi curavit. Sunt & aliæ duæ ejusdem instituti Congregationes,
una Veneta, altera Montis-coronæ, præter Gallicanam. Per
illos sacra hebdomadis dies in distinctis cellis ibidem hospitati,
libris nihilo minus revolvendis, quantum sacrorum dierum re-
ligio sinebat, dedimus operam usque ad feriam tertiam post
Pascha. Per totum illud tempus perseveravit infestissimus
ventus. Nec mirum, cum eo in loco cælum nebulosum ut plu-
rimum, procellosum, nivolum, perpetuæ fere hiemis speciem
gerat. Sed adest præsens opportunumque remedium, magna
scilicet copiâ lignorum. In Oratorio sepultus est sine lapide
& titulo magnus ille Ambrosius, Camaldulensium quondam
summus præpositus, cum cœnobitarum, tum eremitarum, qui
sub Petro Delphino discessionem a cœnobitis fecerunt. Subit
indignatio, ut cum Plinio juniore loquamur, tanti viri post tot
annos reliquias, neglectumque cinerem sine titulo, sine no-
mine jacere, cujus memoria orbem terrarum gloria pervaga-

Plin. lib. 6.
epist. 10.

ra est. Sed potior Ambrosii apud Deum gloria est ac memoria. In bibliotheca præter Ambrosii epistolas, Hodæporicon, & litteras diversorum ad eundem; præterque Petri Delphini volumina quatuor epistolarum, & opuscula Hieronymi de Praga ejusdem loci eremitæ, ex quibus multa expressimus; pauci reliqui sunt codices veteres ex illis, quos Ambrosius & alii collegerant. Superfunt tantum optimæ notæ Græci tres, nempe *Johannis Chrysostomi in Johannem*, atque ejusdem *homiliæ in Genesim*; aliæque morales de patientia, eleemosyna, caritate &c. Alius codex latinus continet varia illustrium auctorum elogia de *Manuele Chrysolora*, quæ descripta habemus. In illis epistolis una est Guarini Veronensis, qui omnes in laudem præceptoris sui Chrysoloræ in unum collegit, *claro jurisconsulto Jacobo Fabio Veronensi* inscripta, cui rogatus mittit Chrysoloræ epitaphium, *quod e Constantia vir gravissimus, ac in omni litterarum genere eruditissimus vir, P. Paulus Vergerius, ad me, ait Guarinus, misit, ab eodem ut arbitror confectum. Est autem hujusmodi.*

AN. 1686.
APRIL.

Ante aram situs est D. MANUEL CHRYSOLORAS, Eques CP. ex vetusto genere Romanorum, qui Constantino imperatore migrarunt. vir doctissimus, prudentissimus, optimus: qui tempore generalis Concilii Constantiæ diem obiit, ea æstimatione, ut ab omnibus summo Sacerdotio dignus haberetur. XVI Kal. Maias conditus est anno incarnati Verbi M CCCC XV.


In sacrario asservatur *sancti Romualdi Commentarius in Psalmos*: in cujus operculo, quod ex serico rubeo constat, hæc leguntur: *Istud Psalterium scripsit & glosavit manu sua propria sanctissimus ac beatissimus Romualdus, sicut præceperat sibi Deus, quando fuit raptus in paradysum, celebrans Missam in eremo Syria, ut scribit beatus Petrus Damianus Presbyter Cardinalis in legenda sua. Hic commentarius incipit a primo psalmo in hunc modum: Beatus vir. Iste psalmus proprie de Filio dicitur &c. Eremitæ & Fontis-boni specimen hic ob oculos subjicere juvat.*

XV. Sub meridiem ad Fontem-bonum descendimus, archivum lustraturi, ex quo non pauca in rem nostram hausimus. In antiquioribus instrumentis *Campus-Malduli*, aliis *Campus amabilis*, situs dicitur in mediis Alpibus, Tusciam & Romaniam divi-

AN. 1686.
APRILII.
Greg. M. lib.
3. epist. 65.

dentibus. Theodaldus *sancti Donati Vicarius* (sic passim Aretini episcopi se dicunt, quemadmodum à Gregorio M. Mediolanensis antistes *Vicarius sancti Ambrosii* appellatur) *ob amorem piæ recordationis patris nostri*, inquit, *Domni ROMALDI clarissimi eremite*, communi consilio Fratrum suorum clericorum concedit *domno Petro venerabili eremite ad usum confratrum, eremiticam vitam sub eo degentium, quamdam ecclesiam in mediis Alpibus*, juris episcopi *sancti Donati*, quam nos, inquit, *rogatu domni ROMALDI eremite consecravimus sub honore & nomine Domini nostri Jesu-Christi sancti Salvatoris.* Et post multa: *Hunc scilicet locum domnus ROMALDUS pius eremitarum pater, delegit & prævidit aptissimum congruentissimumque fore ad cellulas fratrum eremitarum, singillatim in contemplativa vita Deo servientium: constructaque inibi basilica sancti Salvatoris, quinque cellulas cum suis tabernaculis ibidem distinxit, atque ab invicem separavit. Sed & singulis cellulis singulos deputavit fratres eremitas, qui secularibus curis & sollicitudine remota, soli divina contemplationi insistant.* Quibus etiam domnum Petrum venerabilem eremitam, tanquam fidelem ministrum & præceptorem, dedit &c. *Datum anno dominica Inc. M XXVII. anno vero pontificatus domni Theodaldi Episcopi v. mense Augusto, Ind. x.* Hoc quasi primarium Eremiti instrumentum est. Existat in multis una charta barbaro sermone de donatione ecclesiæ sancti Nicolai in regno Sardinia, Guidoni Priori & Camaldulensibus eremitis inscripta, consentiente *domno Constantino* iudice seu rege, cognomine *de Laccon*; & *donna Marcusa regina, dicta nomine de Gunale*; anno *M C XIII.* Sigillum ex plumbo appensum, ex una parte caput Regis inconcinne præfert, ex alia *GOSTANTINE REGE.* Hæc & alia dum præsentem R. P. Majorem describeremus, magnam inde capiebat optimus Pater voluptatem; rogabatque ut secum tamdiu maneremus, donec omnia, quæ ad componendam sacri loci historiam sufficerent, collegissemus. Idem flagitabat cordatus Pater Donatus ejus secretarius.

XVI. Verum die sequenti a bonis illis Patribus avulsi sumus necessitate rerum nostrarum, quæ nos alio vocabant: indeque discessimus super mulas, quas nobis humanissimi illi hospites, remissis Florentiam conducticiis equis, commodarunt. Egressis e Fonte-bono, per viam publicam, qua Florentiam itur, in descensu montis nobis occurrit Montio, caput unius e tribus Comitatibus, qui ad Camaldulum pertinent, cui Pup-



pium castrum vicinum est : deinde Pratum-vetus super Arnun, ad mille passus a fluvii fonte. Demum per continuos (ut ita dicam) saltus pervenimus in princeps Ordinis Vallumbrosani monasterium, quod medio ferme itinere inter Camaldulum & Florentiam situm est. Absente loci reverendissimo abbate, vices ejus in nos humanissime exsecutus est R. P. Angelicus Bigazzius abbas, Cellarum eremita, qui locus est, haud procul a coenobio, sancti Johannis Gualberti secessu illustratus : quo ex loco vir ille Angelicus, comperto proximo nostro adventu, in abbatiam se receperat. Vallumbrosa situm habet maxime solitarium in clivo altissimi montis, qui monasterio ex parte Orientis incumbit. Prospectum habet versus septemtrionem in subjectam vallem unius fere milliaris, amne seu torrente Vicano irrigatam. In edito montis aggere sita est cella sancti Johannis Gualberti, in qua mox laudatus Angelicus abbas cum unico socio degit : & non longe inde exstat fagus, sub qua per multos annos delituit Gualbertus, quæ hætenus, novis furculis subinde succrescentibus, ante omnes alias fagos virescit, & post omnes virorem suum conservat. Sancti Johannis corpus Passiniani, unum ejus brachium apud Vallumbrosam habetur cum ejusdem *Psalterio* & *Manuali precum* quotidianarum : item acies seu acumen clavi dominici, in suum monasterium a sancto Ludovico Francorum rege (ut perhibent) dono transmissum : quod sane acumen in clavo illo, quem ad sanctum Dionysium prope Parisios asservamus, desideratur. In *Psalterii* litanis post sanctos Benedictum & Maurum sanctus Placidus invocatur. Multæ sunt ibidem aliæ beatorum domesticorum reliquæ, quorum elogia Hieronymus de Raggiola, ejusdem loci monachus, scripsit ad Laurentium Medicem. Hic codex haud vulgatus superest in bibliotheca cum aliis non multis, uti & Colucii Pierii de Stignano, cancellarii Florentini, libri duo *de sæculo & religione*, ad Hieronymum de Uzano, Camaldulensis Ordinis monachum Florentiæ apud sanctam Mariam de Angelis : quem Hieronymum in sæculo Nicolai nomen tulisse idem auctor tradit. Nec flocci pendendus est brevis Anonymi commentarius *de ratione punctandi*, id est commata apponendi, apud veteres usitata. Vallumbrosanorum habitus, olim ferrugineus, nunc penitus niger : Ordinis Præpositura generalis quondam in hujus primarii loci abbate perpetua residebat : nunc ad eligentium arbitrium in singula qua-


AN. 1686.
APRIL.

driennia mutatur. Magna ibidem hospitum frequentia, etiam feminarum, quæ in ecclesiam non nisi quatuor vicibus quotannis admittuntur, iis alias concessa tantum subalari capella ad sacra audienda. Monasterii typum hic vides.

XVII. Cum Placido Poltri, religioso & honestissimo juvene, reverendissimum abbatem convenimus in villa monasterii, Paterno dicta: ubi vetera instrumenta & diplomata custodiuntur. Quædam raptim notavimus, quæ nobis postea mox laudatus Placidus & Johannes Aurelius Casari a Foro-livio, sacrarii custodes, exscripta humanissime submiserunt. Ex his unum est præcipuum Itæ, proximi sancti Hillari parthenonis, modo excisi, abbatissæ, quæ Johannem Gualbertum ejusque socios, amore solitudinis ex monasterio sancti Miniatis egressos in eremum, *quæ Vallis-umbrosa vocatur*, suscepit in prædio suo, *Aqua-bella* dicto; eisque hoc prædium aliaque sub annuo censu concessit, adducta exemplo Chuonradi Imperatoris Augusti & Ghislæ Augustæ, eorumque filii Heinrici: qui Florentiam ingressi, cum Johannis ejusque sociorum sanctam vivendi normam didicissent, eisque relatum esset, *illos ecclesiam non habere; Rodulfum Pavibronensem, dignum Deo præfulem, quia Fesulani, Jacobo extincto, nondum habebant consecratum præfulem*, ad illos direxit, ut scilicet ibidem oratorium consecraret *in honore sanctæ Mariæ & Michaëlis archangeli, & Bartholomæi & Thomæ apostolorum, & sancti Stephani pontificis, & Benedicti Abbatis, & Nicolai venerabilis Confessoris &c.* Data anno dominice Inc. tricesimo nono post mille, & anno imperii domni Chuonradi Imperatoris Augusti tertio-decimo, v. Non. Julii, Indict. VII. Mittimus in præsens alia Imperatorum diplomata, ceteraque Mathildis Marchionissæ, aliorumque instrumenta.

Cum ad Florentiam ipso die accederemus, obvias habuimus puellarum & mulierum turbas, quæ cum uno sacerdote voti causa, is singulis annis post Pascha in Hetruria mos est) ad Vallumbrosam, Camaldulum, & montem Alvernæ proficiscebantur: ubi in hospitiiis, ejus rei causa dotatis, excipiuntur seorsim a viris, qui itidem proprium habent.

XIX. Pandectarum duo egregia volumina cum Magliabeco examinavimus in palatio Magni Ducis. Hæc volumina formæ sunt prope quadratæ, ita ut altitudo duobus tantum digitis latitudinem superet. Operculum ex ligno villosum sericum rubei coloris, atque emblemata ex argento in medio & in quatuor



quatuor angulis ornant. Characteres sunt quadrati & medio-
cris formæ; vocabula sine abbreviatione ubique, & absque
commatis simul colligata. Quælibet pagella in duas dividitur
columnas, quæ singulæ versus quadraginta quinque continent.
Prima singulorum versuum vocabula passim minio descripta
sunt. Littera S plerumque in medio vocabulo ceteris major est.
Litteræ hoc fere modo formatæ sunt.

A N. 1686.
APRILI.

A B C D E F G H I K L
M N O P Q R S S P P T U X Y

Primo volumini præmittitur græca epistola Tribuniani & alio-
rum, qui Pandectis componendis operam navarunt, *data xvii
Kal. Januarias, Justiniano perpetuo Augusto III. Cos.* Postea se-
quitur index eorum, quæ in duobus voluminibus continentur,
cum titulis minio scriptis. Primum volumen desinit in lib.
xxix. atque adeo secundum incipit a lib. xxx. In fine prio-
ris post sex versus græcos, quibus Justiniani opus ac Tribunia-
ni commendatur, ab Angelo Politiano relatos, recenti manu
Christophorus Landinus secretarius subscribit, & post eum
Marsilius Ficinus die ix Aprilis anni m cccc xciv testatur
se interfuisse, dum illud epigramma reperiretur. Tum subdi-
tur. *Petro Berardi de Berardis sedente Vexillifero justitiæ. Quapro-
pter perspicuum judicamus, hoc volumen proprie fuisse ab ipso Justinia-
no compositum, neque solum transcriptum.* Porro hoc Pandecta-
rum opus Amalphi Pisas, & Pisis Florentiam a Florentinis al-
latum est, quod olim nonnisi *ad funalia* ostendi, & quidem
viris primariis, mos erat, teste Angelo Politiano: nunc indul-
gentia Principis hæc gratia facilius conceditur. Porro Pande-
ctas masculino, non sequiori genere Florentinos dici debere
Antonius Augustinus probat tum in Dialogo x de Nummis
antiquis, tum in Indice nominum priorum, ubi de Pande-
ctis.

Polie Mis-
cell. pag.
546.

XX. Sabbato in Albis iterum Florentia egressis Pisas iter
fuit. Dominica sequenti facta est processio Equitum sancti Sre-
phani papæ & martyris, qui ad Capitulum generale singulis

AN. 1686.
APRILI.

trienniis ipsa die Pisas convenire solent. Ex palatio suo ad proximam sancti Stephani ecclesiam procedebant, præunte clero sancti Stephani cum Antistite seu Priore ipsius ecclesiæ, insignibus pontificiis ornato; Equites bini pallio candido cum manicis rubeis induti, gladiisque accincti, numero ferme quadringenti, extremo ordine Dux serenissimus cum suo comitatu. Tum sollemne sacrum a prædicto Antistite celebratum, & sequenti triduo Capitulum generale.

Eodem die P. Capassius Servita, Theologiæ in academia Pisana lector, se nobis comitem ac ducem præbuit ad videndam ecclesiam cathedralem. Fabrica veteris architecturæ elegans ex marmore, cum tabulato deaurato & fornice duplici subalari, Alexandro Papa II. auctore gloriatur. Tabernaculum ad asservendam sacram Eucharistiam (quæ in Italicis basilicis nusquam suspensa est) totum ex argento recentis operis; tectum ex plumbo cum testudine in medio crucis. Valvæ portæ majoris ex ære artificii admirandi. Prope adest baptisterium in primis insigne: in cujus medio exstat Fons sacer rotundo opere, cum multis fonticulis in petra excisis, in quos forsan baptizandi olim immergebantur. Adhæret altare cum globo supra illud concavo, in quo Eucharistia olim ad usum (ut veri simillimum est) recens baptizatorum asservabatur. Ad aquilonarem ecclesiæ partem cernitur præclarum omnino cœmeterium, (*Campum sanctum* appellant) ante annos prope quadringentos constructum cum porticibus, quarum parietes longi passibus fere CLXXX, vitas Patrum ex una parte, ex alia historias veteris Testamenti egregie depictas exhibent. Inscriptiones illæ duæ insignes, quas sub *Cenotaphiorum Pisanorum* titulo eruditus Norisius exposuit, uni parieti insertæ sunt. Terra, quæ in media est area, Jerosolymis allata, intra horas quatuor & viginti quodlibet cadaver in eam receptum in cinerem olim redigebat: ita ut intra horas octo tumesceret; tum post totidem horas detumesceret; ac demum post alias octo consumeretur, ut vetus pictura docet eo in loco, ubi Cenotaphia illa Pisana visuntur. Nunc humo tantisper refrigerata, ibi cadavera diutius perdurant.

Res nova nonnullis fortasse videbitur, quod terra ex Oriente Pisas allata sit: sed multa ejus rei alia exempla occurrunt, ut apud Augustinum in lib. XXII de Civitate Dei cap. VIII, num. 6. & apud Gregorium Turonensem in lib. I, de gloria

Martyrum cap. VII. ubi ait, terræ hujusce particulas aqua solere conspergi, & ex iis *tortulas parvulas formari, ac per diversas mundi partes transmitti*, ex quibus *plerumque infirmi sanitates hauriunt*. Hinc Donatistæ terram, ex Oriente si eis afferretur, *adorabant*, teste Augustino in epistola LII. Denique Helena Augusta, Constantini M. parens, ex eadem terra magnam copiam attulisse Romam dicitur, ex qua sacellum sanctæ Crucis, *Jerusalem nomine*, constratum & ferme repletum fuisse tradunt Onufrius Panvinius & Severanus.

AN. 1686.
APRIL.

Apud Pisas Beatrix, Mathildis Comitissæ parens, in ecclesia majore sepulta est: cujus mausoleum deinde ad exteriorem portæ collateralis parietem translatum. Prope hanc ecclesiam exstat turris campanaria, industria architecti sic inclinata, ut prope casura videatur, cum octo columnarum ordinibus circa medium. In area meridionali erecta est columna & super eam *Talenti mensura, Pisanis a Cæsare missa ad mensurandum censum*. Hujus rei occasione redit in memoriam inscriptio modii Romani, qui in museo illustrissimi Petri Andreæ Andreini nobilis Florentini asservatur.

MENSURÆ. AD. EXEMPLUM. EARUM. QUÆ. IN
CAPITOLIO. SUNT. AUCTORE. SANCTISSIMO
AUGUSTO. N. NOBILISSIMO. CAES. PER
REGIONES. MISSÆ. CURA. D. SIMONIO. JULIANO
PRA... URB. C. V.

Illud apud Pisas singulare, quod non modo ecclesia metropolitana, sed etiam muri civitatis, ac quidam etiam pontes super Arnun constant ex marmore. Matthæus Palmerius librum scripsit *de captivitate Pisanarum*, quem Florentiæ legimus in bibliotheca Laurentiana. Præfixa est epistola ejusdem *Magno & spectato viro Nerio Capponio*: in qua mirari se dicit auctor, *quod cum plerique aliarum rerum Scriptores suos libros excellentibus mitant viris, hoc idem non fecerint Historici*. Quamquam apud veteres ejus rei exempla non desunt.

Eodem die * Liburnam adiimus, insigne emporium, in cuius portu præclara est Magni Ferdinandi statua cum quatuor captivis ex ære fusili. In urbe viginti millia hominum; & quarta pars Judæorum, (Hebræos appellant:) a quibus ita pendet commercium, ut diebus sabbati, quibus cessant ab opere, etiam ferias agant Christiani. Ipsi Judæi in Hetruria nul-

* Livourne.

AN. 1686.
APRILI.

lum discriminis insigne gerunt: alibi pileum rubeo panno coopertum.

XXII. Pisas reversi, die sequenti Lucam accessimus, Reip. caput, ad Auzerem fluvium, quem sub *Æsaris* nomine in suis elegiis Bartholomæus Beverinus, poëta & orator cultissimus, atque amicus, si quis alius, cordatissimus, eximie describit in hunc modum.

*Tu cadis illimis, purisque argenteus undis:
Suntque tibi Alpina pabula prima nives.
Nobilis aërio nam defluis Apennino,
Unde suas ducunt Tiberis & Arnus opes.
Stant circum horrentes umbroso vertice colles,
Multaque nascentes silva coronat aquas.
Saxaque propellis, jam tanta superbia parvo:
Spumeus & latum per juga pandis iter.
Vallibus exceptus, sinuoso tramite serpis:
Atque tibi ripas, ut libet, ipse facis.
Nec vitreo exhalas nebularum gurgite fumos,
Nec tua sordenti sunt vada pigra luto.*

Hæc in specimen ex Beverini carminibus referimus, qui non minus terse ac polite prosa oratione scribit. Is nobis perpetuus in urbe Luca comes, tamen si theologicis, aliisque studiis occupatus. De hospitio nobis concedendo cum eo certavit rector ecclesiæ sancti Petri de Samaldis Salvator Bonamicus, qui nos altera quam accessimus die in suas ædes invitavit, excepitque amicissime. Magna etiam in nos humanitas fuit illustrissimi Abbatis Burlamachi, qui apud Parisios nobis aliquando notus fuit; atque Marii Florentinii medici, cujus patri Francisco Mariæ Martyrologii Lucensis editionem referre debemus acceptam. Martyrologii exemplar, quod vidimus, octingentos annos videtur superare.

XXIV. Bibliotheca ecclesiæ cathedralis, quæ sancto Martino patrono gaudet, bonos libros, cum editos antiquos, tum manu exaratos habet non paucos, quorum plerosque Felinus Sandæus episcopus concessit. In his quidam sunt non exigui pretii: *Titi Livii fragmenta* Decadum, *Plinii junioris epistole*, Ad hæc *Otto Frisingensis* de gestis Friderici I. & *Pii II* opera historica. Sed præ ceteris insignis est codex, tempore Caroli Magni scriptus, in quo continentur *Eusebii chronicon* & *historia*; *Isidori item chronicon* & *liber officiorum*: *Hieronymus* & *Gen-*

*nadius de scriptoribus ecclesiasticis; liber de gestis summorum Pontificum desinens in Hadriano I. sub nomine Hieronymi: fragmentum de heresibus Græcorum, Judæorum, & Christianorum, desinens in Triteitis: Regula ecclesiastica Apostolorum per Clementem, numero XLIX. Variæ compositiones pro cathmia seu cadmia, id est de confectione aurichalci, pro tinctiōe omnium musivorum, eorumque deauratione, de musivis deargentatis, de sminitis tabulis plumbeis; decoctio plumbi, coctio utri, tinctio pellium varia, triplex tinctio pandii, quæ fit super pelles; de porphyrio melino, tinctio veniti; tinctio melina; compositio smithina; de calce & variis metallis, de lazuro, de chrysographia, seu de modo scribendi cum auro liquido. Præter hæc sequuntur in eodem codice Gennadius de dogmatibus. Canones Nicæni numero XXI. Varia item Concilia; decretalis epistola Gelasii de libris recipiendis: Augustini capitula septem Romam transmissa, Si quis rectum in omnibus non credit &c. Item ejusdem liber de quinque heresibus, & libri duo de excidio urbis: tum liber de natura rerum, auctore Jacobo Dei famulo; Plinius Secundus de divisione temporum; ac demum Genealogia totius bibliotheca, id est librorum sacrorum, ex omnibus libris collectæ veteris novique Testamenti: in quibus prophetia cum nominibus, & tempora omnium prophetarum usque ad beatum Cyprianum designantur, & ad nostram ætatem quid fuerit gestum monstratur, ex historiis collectum legalium mandatorum. In fine hujusce operis hæc leguntur: A nativitate Domini usque ad ejus passionem anni sunt XXXI. Et à passione Domini usque ad XXIII regis... *erici, anni sunt D XXXIIII. Fiunt omnes ab Adam per Legis... usque ad annum præsentem, anni quinque *... nongenti octoginta quatuor. Hæc de vetustissimo illo codice. In alio non minus antiquo recensetur Ordo Episcoporum, qui in urbe Luca fuerunt ordinati. Horum primus est OBSEQUENTIUS episcopus, qui tantum septimus apud Ughellum habetur, secundus FRIDIANUS, & alii ad Laurentium episcopum, qui ordine quintus-decimus in prædicto catalogo exhibetur, Ughello XXI. Sancti Fridiani, aliis Frigidiani, ecclesia Canonicorum regularium haud ignobilis, Richardi Anglorum regis, quem sanctum appellant, tumulo illustrata est. Hactenus de Lucensis ecclesiæ bibliotheca, quam annuente illustrissimo Canonico, cui Libertas Moriconi nomen est, facile vidimus.*

* Theodasti,
ci.* Supple
millia.

In ejusdem ecclesiæ archivum nobis accessum præbuit emi-

AN. 1686.
APRILI.

nentissimus Cardinalis Spinola, Lucæ episcopus. Omnia fere diplomata & instrumenta ibidem authentica supersunt a tempore Liutprandi. Sub noctem sacrum Christi Domini Vultum, qui pium horrorem spectantibus injicit, jubente Cardinale in-
tueri nobis concessum est. Ex cedro efficta est illa imago venerabilis cum vestibus & ornamentis pretiosissimis. In summa Lucensium magna in nos urbanitas fuit, quorum nominibus singillatim commemorandis supersedemus. Sed præterire non licet virum doctum & eruditum Jacobum Mariam Cenni Senensem, Cardinali a secretis, qui nobis indicem epistolarum Ambrosii Camaldulensis, & quasdam ejusdem auctoris epistolas submisit; immo & libellum de vita Mæcenatis, ab se italice compositum, dono dedit. Tanta Lucensium in nos benevolentia significatio innata eorum urbanitati, & Magliabeci litteris commendaticiis tribuenda est.

XXV. Beverinus historiam Lucanæ civitatis, a se eleganter scriptam, nobis ostendit, nondum editam: neque sperabat facultatem imprimendi facile concedendam a Rep. quæ sua arcana vulgari non patitur. Unde intacta hætenus Lucensis historia. Idem Beverinus Æneiden versibus italicis reddidit, recusam non semel; vitamque sanctæ Cæcilie notis suis illustratam, cum poematiis suis in amoris testimonium abeuntibus concessit. Sectatur institutum Clericorum Matris Dei, qui Ordo Lucæ exordium habuit in ecclesia beatæ Mariæ de Curte Orlandini per Cæsarem Franciottum. Marius Florentinius nobis etiam concessit libros duos parentis sui, nempe tumultuariam Disquisitionem de Azymo & fermentato, & Notitias de Mathilde Comitissa sermone italico. Habet & alia optimi parentis sui postuma opera, propediem (uti sperare nos jubet) vulganda typis. Postquam hæc scripta erant, non sine acerbo dolore accepimus, Beverinum Lucæ obiisse die xxrv Octobris, gravi reipublicæ litterariæ damno; maxime Italiæ, cujus magnum erat inter doctos & pios ornamentum. Epistolam, quam vir piæ memoriæ pridie sui obitus, quasi testamenti vice, ad nos scripsit, hoc loco referri, quæ suprema ejus voluntas fuit, Lectori non ingratum fore putamus.

Scribo aliena manu, meo corde, P. R. Reus promissi carminis, quo Maximi omnis memoria REGIS pietati plauderem, jamdiu me exsolvissem, nisi ineluctabiles causæ volenti conantique intercessissent. Ab ipso discessu vestro, ipsis Kalend. Maii, tam dirus æstus

pertinaci vapore ac siccitate totos quinque perpetuos menses adeo
 Etruriam nostram corripuit : ut afflicta valetudine , fractisque non
 corporis modo , sed etiam animi atque ingenii viribus , studia omnia
 intermittere coactus sum , iis tantum exceptis , quæ publica professionis
 munus exigit. Pluries tamen admoveere manum ingenti operi conatus
 sum , sed in ipsis experimentis conatus destituebant : nec quicquam
 occurrebat REGE tanto dignum , & quo nedum supra ceteros , sed
 infra me quoque non essem futurus. Quippe , ut optime nosti , car-
 mina ingenii ac spiritus florem exigunt , nec quicquam in eis pla-
 cere potest coactum & expressum , & quod prono & labente cursu
 sponte non fluat. Itaque rejeceram hanc curam in remissiores autum-
 ni dies , quibus per solitudinem & otium in amæno aliquo recessu
 abditus , mihi & musis vacarem. Sed talia meditantem sub ipsas
 Kal. Octobris febris ardens me repente corripuit , quæ maligno va-
 pore venas totumque corpus adeo succendit , ut intra paucos dies me
 ad mortis portas adegerit. A quibus divina primum clementia , quæ
 pias aures sôdalium precibus votisque porrexerit ; dein studio cl. viri
 Marii Florentini , cujus virtutem præsens vidisti , revocatus vivo ;
 sed ita vivo , ut vix languidum spiritum egre traham. Itaque om-
 nis mihi spes plane concidit moliendi aliquid , quod tanto REGE
 dignum , nostrisque jam editis opusculis non indignum futurum sit.
 Quod utrumque scio R. P. & regia gloria , & quantulumcumque fa-
 ma mea consulentem remissurum. Habet REX Maximus geminum
 & voluntatis , & ingenii mei pignus : duplex inquam carmen , quo
 & Mediterraneum Oceano committenti , & e Batavo bello rever-
 zenti plausi. quibus tamquam duobus monumentis , omni ære peren-
 nioribus , non illius , sed mei nominis famam consecravi. ut proinde
 te præcipue sequestre veniam facile impetraturus sim , si ægrum in-
 genium ejus obsequio impendere minime æquum existimaverim. Ha-
 bes , R. P. contumacia mea causas : quas si carminis loco Itinerario
 inferere non dedignaberis , summi honoris loco ponam. Vale una cum
 doctissimo & optimo patre Germain , quem utrumque complector
 animo , ac deosculor. Valete. . . . Hanc ex lectulo dictabam , non mi-
 nus auctore suo languidam ægramque : sed quæ summa in REGEM
 Maximum veneratione , summo in vos amore caleat vigeatque. Scire
 quoque vos velim , carmina Etrusca propediem , multum aucta , Venetis
 typis tertio proditura. Conciones & epistolæ aliquanto silebunt. An-
 nales Lucenses in pluteis jacent , tempusque opportunum expectant.
 Luca X Kal. Novembris Anno M DC LXXXVI.

Ex carmine , quo vir ille Ludovico Magno ob commissum

AN. 1686.
APRILII.

Oceano Mediterraneum plaudit, hæc in specimen adducimus.

*stupet inscia tellus,
Miraturque novas classes: solitusque secari
Vomere, sentit ager celeres innare carinas.
Littora pulsantur, quondam non pervia nautis:
Commissumque mari invehitur mare, versaque retro
Flumina torquet amans placide; fluctusque maritos
Miscet Atax cupide, pelago mirante, Garumnæ.*

* Pistoia.

* Pistorium civitas, medio Lucam inter & Florentiam intervallo, qua Florentiam spectat, viam aperit ad continuas agri amœnitates, quales a Florentia Pisas usque occurrunt. Priusquam Florentia discederemus, ex Magliabeco rescieramus; Pistorii Vincentium Mariam equitem sollicitum esse de interpretatione tabularum quarundam, quas in cortice scriptas existimabat. Illustrissimum virum convenimus: ille nobis tabulas exhibuit, decem aut duodecim foliis ex ligno cera oblito crassissimis constantes: in quibus minutissimis litteris descriptæ sunt quotidianæ expensæ Regis Francorum in itinere facto ex urbe Parisiorum in Belgium per Asnerias, Pontisaram, Ursicampum, S. Quintini opidum, Bapalmam, Insulas, Curtracum; & ex Belgio in pagum Turonensem, aliasque regni provincias. Incipiunt illæ tabulæ post annum M CCC. quas proinde ad Philippum IV (nam Regis nomen in tabulis non exprimitur) referendas existimamus. De cetero nihil continent observatione dignum, nisi nomina Militum seu Nobilium, qui in Regis comitatu erant.

XXVI. Tertia vice Florentiam reversis, non prius inde discedere visum est, quam sacellum, pro mausoleo serenissimorum Ducum ante annos octoginta duos inchoatum, necdum continuo licet artificum labore absolutum, contemplaremur. Laurentianæ basilicæ sacellum adhæret. Testudo est in octangulum elata, omni pretiosorum lapidum genere decorata ad convexam sacelli concamerationem, quæ picturis ornanda est. In sex octogoni angulis totidem sunt Ducum a Cosmo Magno statuae, aliæ ex marmore, aliæ ex ære. Sub singulis statuis singulæ urnæ sepulcrales vacuæ corporibus, quæ in subjectis cryptis subterraneis reponenda sunt. Unum ex duobus qui reliqui sunt angulis occupabit altare cum choro: alterum porta sacelli, ubi duo alia cenotaphia esse debent. Symbola omnium ac singularum Hetruriæ civitatum nativis pretiosorum lapidum

pidum coloribus expressa hinc inde conspiciuntur opere tessellato. Opus ingentis pretii, a Ferdinando Magno incœptum, ad quod finiendum necessarii sunt (si peritis credendum) aurei duo milliones. In basilica Laurentiana altera capella est, in qua sepulti Laurentius & Julianus Medicei cum eximiis monumentis, Michaëlis Bonarotii arte elaboratis, quæ absolutissimis antiquitatis operibus vix cedunt.

In hortis illustrissimi Marchionis Francisçi Ricardi hanc inter alias probavimus inscriptionem.

D. M.
FAUSTUS. AUG. LIB.
ADJUTOR. AB. EPIS
TULIS. LAT. VIXIT
ANNIS. XVIII. M. IIII.
DIEB. XVI. FECIT
ARTEMISIUS. PÆ
DAGOGUS. ET. LIB.
PUERO
CARISSIMO.

Alios duos, qui Augusto erant ab epistolis latinis, vide sis apud Gruterum.

Grut. D.
LXXXVII
2 C.

XXVIII. Illustrissimus Vivianus, Magni Ducis Mathematicus, nobis ostendit tres priores libros ab se compositos & editos sub hoc titulo; *Divinatio in quinque libros deperditos Aristai senioris de locis solidis*. Superfunt adhuc duo edendi, quos Regi Christianissimo dedicare meditatur, a quo honorarium donum annuum antehac accepit. Idem nobis Theonis in Ptolemæum versionem, sæculo superiori a Johanne Baptista Theophilo, nobili Urbinatæ, factam, ut ad regiam bibliothecam transportaretur, tradidit in manus: quam clarissimo Thevenoto regie bibliothecæ curatori consignavimus.

I. Dux serenissimus, qui ad hoc usque tempus Florentia abfuerat, partim Pisis, partim in Monte-Lupi (ubi Ambrosianum est palatium cum conventu Minorum Hispanicorum) veno tempore versatus, nobis audientiam concessit ea facilitate ac benignitate, ut velis clausis per dimidiam horam nos privatim alloqui sit dignatus. Multa de Rege honorificentissime dixit, deque ejus studio in catholicam Fidem. Postmodum jussit, ut lectica nobis usque Bononiam suppeditaretur. Deinde ad au-

M.A.C.

AN. 1686.
M A I O.

dientiam Magni Principis Ferdinandi, ac Principis Gastonis admissi sumus: in quibus præclara illa Mediceorum indoles, id est innata in litteras & litteratos viros propensio, cum aliis eximiiis dotibusprehenditur.

II. Amicis nostris vale diximus, in primis amantissimis Patribus ex abbazia sanctæ Mariæ, qui toto illo, quo Florentiæ versati sumus tempore, nos semper æquali ac constanti caritate complexi sunt exemplo humanissimi Candidi abbatis: deinde illustrissimo Magliabeco, qui nos litteris, libris, & perpetuis officiis juvit. Ab eo quippe epistolarum Ambrosii Canaldulensis volumen optimæ notæ, libros editos complures, ineditos non paucos accepimus. In his est Petri Apollonii Novariensis carmen heroicum *de Davide & Golia* ad Laurentium Medicem: quo ex carmine discimus ætatem hujusce auctoris, quem alii ad sæculum septimum, alii ad decimum, alii ad alia tempora referunt, ut videre licet apud Gerardum Vossium de Historicis latinis: ubi *Petrus Apollonius Collutius* appellatur. Idem auctor carmen quatuor libris scripsit *de Excidio Jerosolymitano*. In posterum itaque nemini futurum est dubium, Petrum Apollonium sub finem sæculi xv floruisse, nempe tempore Laurentii Medicei, cui superius carmen *de Davide & Golia* inscriptum est. Hanc notitiam erudito Magliabeco præter alia multa debemus. Subjunguntur eidem carmini varia ejusdem auctoris epigrammata; quorum unum epitaphium est Pauli II. alterum Sixti IV. cujus vitam ab Onufrio Panvinio scriptam habemus.

Cum de relinquenda Florentia cogitamus, amici cujusdam monitu discimus superesse magnam veterum librorum copiam penes illustrissimum Canonicum Strozzam, qui aliquando Regis Oratoris officium Florentiæ gessit. Eo nos conferimus, & facultate a viro humanissimo facile impetrata, libros, quoad nobis in illis temporis angustiis licuit, revolvimus. Præcipui sunt *Johannis Chrysostomi* in primam Apostoli ad Timotheum epistolam expositio, *Ambrosio monacho interprete*: ad Pium II pro felici ex Mantuana peregrinatione reditu *Hieronymi Arctini abbat*is sanctæ Floræ *congratulatio* in dialogi modum, interlocutore Guidone Antonio, Pii consanguineo, & ipso Hieronymo, quem Poggius interlocutorem in Dialogo adversus hypocrisim non sine elogio abhibuit. Ad hæc in eadem bibliotheca habetur *Historia Concilii Tridentini* italice, auctore Marco Antonio Milledoni, Secretario Concilii. Ibidem epitaphium Jacobi

Cardinalis Papiensis descriptimus.

Luca ortus, sed Sena fuit mihi patria; nomen,

Dum vixi, Jacobus, Piccolomina domus.

Papa Pius sedem Papiensem detulit: idem

Cardineo ornavit munere: nudus eram.

Quem colui vivens, non linquo mortuus: hic sum,

Et prope sancta Patris filius ossa cubo.

Vivite qui legitis: celestia querite: nostra hæc

In cineres tandem gloria tota redit.

AN. 1686.
M A T O.

B O N O N I A.

III. FERIA sexta, discessus tandem extremus Florentia fuit. Decimo ab urbe lapide in declivi montis Senarii visitur Servitarum princeps monasterium, religione in primis celebre. Prima nobis statio Florentiolæ, quod opidum post montem Jovis occurrit: altera Bononiæ in abbazia sancti Proculi, ad quam in rheda reverendissimi Abbatis, quam in nostri occursum præmiserat, deducti fuimus. Bononia urbs amplissima & elegans, cujus ædes vestibulis sive prothyraïs, quæ viam peditem a pluvie injuria protegent, præmunitæ. Palatia item in ea urbe præclara, ex quibus unum e præcipuis est gentis Ranuciorum, cujus gentis præclarum modo est ornamentum Cardinalis hujus nominis, Nuntius apud Regem Christianissimum acceptissimus. In ea urbe substitimus per quatuor dies, recreati hospitio & officiis reverendissimi abbatis sancti Proculi Ludovici Guerræ Pedemontani, ejusque loci monachorum e nostris. Cænobii ædes Italicam illam artis concinnitatem egregie exprimunt. Ad visendam urbem dux nobis fuit dominus Casimirus Frescotus Burgundus, idemque scribendo suam nobis impendit operam.

V. Dominica salutavimus illustrissimum Comitem Valerium Zani, virum non minus pium, quam doctum; cui Magliabeci litteras reddidimus. Die sequenti cum ipso adiimus celebrem abbatiam sancti Salvatoris, quæ caput est Congregationis Canonorum regularium sancti Augustini. Ibi præclara est basilica recentis architecturæ; insignisque bibliotheca, ante annos centum & sexaginta, libris cum græcis, tum latinis, editis & ineditis instructa a Pellegrino Bononiensi, qui ejusdem Congregationis generalis præpositus anno M D C C X V I. renuntiatus est. Hujus bibliothecæ mentionem facit Mauro-

AN. 1686.
MAIO.

lycus, qui ad eam perlustrandam missus est anno M D LXXXVI a Philippo secundo Hispaniarum rege, *ad faciendum*, inquit, *delectum variorum digniorumque codicum manuscriptorum, tam graecorum, quam latinorum*, quos in bibliothecam sancti Laurentii Escurialis transportaret. Super sunt nihilo minus etiam nunc permulti non solum editi, sed & manu exarati libri utriusque linguae in eadem bibliotheca, in quam facilis nobis accessus fuit ex litteris commendaticijs reverendissimi Patris Cerri, ejusdem Congregationis in Urbe Procuratoris generalis. De quibusdam codicibus melioris notae nonnulla observare juvat, & primo de graecis. In uno *Athenagorae legatio ad Marcum Aurelium & Aurelium Commodum*; ejusdemque *libellus de resurrectione corporum*. *Justini martyris moralis oratio* Ἐπὶ μὲν τῆς τοῦ Θεοῦ βλεμμα τινῶν ἀζογίστων &c. Ejusdem *paranesis ad Graecos*, item *de recta Fide*. *Origenis epistola ad Aphicanum*, ut in codice, in editis *Africanum*. *Cleomedis circularis commentatio cum commentis Chartophylacis: Heron de machinis bellicis cum figuris*. In alio codice *Theonae Smyrneus in Platonem*. Denique in alio *Basilii commentarius in Psalmos: tum contra Sabellianos, Arrium, Anomaeos &c.* Haec de graecis. Praecipuus e latinis est codex venerandae antiquitatis, *Lactantii institutiones*, item *libros de ira, & de opificio* cum epitome continens; litteris quadratis scriptus ante annos mille & centum, collatusque & emendatus minuto characterem Romano antiquissimo. sed, quod dolendum, periire duo aut tria prima folia, deestque praefatio integra: ex qua sciri potuisset, an Constantini mentio in eam intrusa sit. Post hunc codices duo epistolarum sancti Cypriani. Non tanti sunt pretii liber *Bornii de Sala contra Judeos*, & *Hieronymi olim Judaei alter: Antonii de Senis episcopi Fulginatis ex Ordine Jesuatorum liber*, *Quod unicuique à Deo constitutus est terminus mortis* &c. Ad haec *Johannis Antonii Campani de gestis & vita Braccii ducis libri sex*: in quorum fine legitur hoc epigramma Cornazani:

*Cum caderes, Bracci, belli clarissime princeps,
Virtutis cecidit sorte premente jubar.*

OBIIT XVI Kal. Novemb. M CCCC LVIII.

Ex reliquis codicibus tantum tres alios notamus aliquanti momenti. Primus exhibet *generales materias sermonum & collationum* quatuor libris, auctore quodam regulari Canonico anonymo, qui ante extinctos Templarios vivebat.

Totum opus in quatuor libros tributum est. Primus liber continet argumenta collationum sive sermonum ad singulos hominum status sub capitulis centum. Secundus continet in capitulis xxv materias generales sermonum secundum festorum varietates. Tertius constat capitulis xxxiii. in quibus alia materiae generales pro ratione temporum suppeditantur. Quartus denique exhibet materias generales pro varietate negotiorum, in Ecclesia, in Conciliis, in Synodis &c. Redeo ad primum librum, in quo auctor suggerit materias sermonum ad Canonicos regulares, Præmonstratenses, fratres de Valle Scholarium, fratres de Sacco, fratres Prædicatores; ad Monachos, nigros, albos, & griseos; ad Eremitas, Cartusienfes, Grandimontenses, Templarios; ad fratres Minores, fratres de Trinitate; ad Religiosos in Scholis commorantes, ad Conversos & Conversas variorum Ordinum: quibus singulis congrua pro tempore dat monita. In monachis nigris id carpit, "quod pueros in religionem admittant: quod non satis exer- " ceantur in scientia Scripturarum, nec sufficienter a majoribus " suis instruantur; nec satis intelligant beneficium vocationis suæ " ad religionem. Griseos monachos, *sicut sunt illi de Tyrone, &* " *quidam alii*, ait quædam accepisse de severitate alborum, quædam vero de nigrorum remissione, ut pellicia. In capite xxiii ad Eremitas, epistola *de vita solitaria ad fratres de Monte-Dei* laudatur non semel, ejusque auctor GUILLELMUS Claravallis. In capite sequenti ad Cartusienfes: *Admonendi sunt isti, ut dum sunt in cella, agant quæ pertinent ad vitam solitariam, de quo habetur abunde in epistola ad fratres de Monte-Dei.* Et post pauca: *Rursus admonendi sunt, ut interdum tales fiant & admittantur dispensationes, ut tantus rigor tolerabilis reddatur; & sic fiat rationabile obsequium eorum.* Agit dein de terminis possessionum, aliisque rebus; tum laudat sanctam Cartusienfium simplicitatem. *Non enim habent, inquit, aliquam Regulam, sed solum Constitutiones seu consuetudines, nec caput unum, nec est una domus sub alia, sed solum conformes sunt.* Hæc in specimen de primo illo codice sufficiant.

Alter codex continet *P. Candidi Decembrii* epistolarum libros octo ineditos, quibus præfixa est auctoris epistola ad Bartholomæum Mediolanensem antistitem, cujus hortatu epistolas suas in unum corpus collegit. Ultimus liber totus est ad fratrem Antonium Raudensem alias Panormitanum, Ordinis

AN. 1686.
M A I O.

Minorum, quem petulanter irridet ob Philippicam ab eo nuper editam. Ad Candidi invektivas respondet Jacobus Mo-
doëtienſis. In tertio codice habentur *epiſtolæ Pauli Canonici regularis Veronenſis* ex abbazia ſancti Leonardi : ex quibus nonnullæ obſervationes haud indignæ poſſunt erui. In epiſtola tertia ad Bartholomæum & Nicolaum fratres, petit curari, *quo vaſculum conſtetur argenteum, deſuper auro elaboratum, quo ſervari poſſit religioſiſſime ſacraſſimum corpus Chriſti, uti mos eſt per omnem Eccleſiam Dei.* Tum ſubdit : *Urnâ illam eburneam, qua uſi ſumus pro huiuſce cauſa, ſæpe vidisti, & judicaſti indignam tanto myſterio.* In epiſtola v. de morte patris ſui agit auctor, quæ mors accidit Venetiis anno M CCCC XIII. ſumto Viatico ſacro ante extremam unctionem. Epiſtola xvi inſcripta eſt Franciſco Barbaro, a quo ejus librum *de re uxoria* ſibi promiſſum poſtulat. In fine ultimæ epiſtolæ, quæ eſt xix, ſequitur epiſtola Gregorii Conrari, apoſtolicæ ſedis Protonotarii, ad illuſtriſſimam virginem Cæciliam de Gonzaga : cui congratulatur, quod, ſpretis mundi oblectamentis, Deo ſe devoverit : hortaturque, ut relictis poëtis, in quorum lectione a Victorino præceptore inſtituta fuerat, legat potius ſanctorum Patrum tractatus, quos de ſancta virginitate & de ſervanda continentia ſcripſerunt : ſicut Auguſtinus, inquit, & Baſilius in eo libro, quem nuper frater AMBROSIO'S in latinum ſermonem vertit : cui pro ſuis bonis meritis rependat Deus in vita beata. Deinde hæc de eodem Ambroſio addit : *Multa quidem utilia ex Doctõribus eccleſiaſticis egregie tranſtulit, & plura tranſtuliffet, ni eum a laboribus humanis immatura mors ſuſtuliffet.* Et inferius : *Revolve libros Lactantii, Cypriani, Hilarii, Hieronymi, Ambroſii, Auguſtini, Gregorii, Leonis, Sulpicii, Bernardi, Salviani quoque : cujus libros de Providentia Dei, e Concilio Baſileenſi rediens, de Germanorum ergaſiulis in Italiam deportavi.* Hactenus Gregorius Conrarius ſeu Coriarius, ad quem exſtat Poggii epiſtola, qua objecta quædam in ſuum librum de Nobilitate diluit. Ceterum epigrammatibus antiquæ Urbis, quæ Jacobus Mazochius tempore Leonis x vulgavit, præmittitur manu deſcripta collectio veterum inſcriptionum, ab anonymo erudito facta, ex qua unam preferimus, nempe antiquam ſupplicationem ad transferenda mortuorum corpora Imperatori porrectam, quæ in marmoreo ſepulcro inventa eſt hoc modo.

*Dom ante hos dies conjugem & filium amiserim , oppressus
necessitate corpora eorum fictili sarcophago commendaverim ,
donec is locus , quem emeram , edificaretur , via Flaminia , in-
ter mil. I. & III. euntibus ab urbe parte lava , rogo D.
Imp. permittas mihi in eodem loco , in marmoreo sarcophago ,
quem mihi modo comparavi , ea corpora colligere : ut quando
esse desiero , pariter cum eis ponar. Secretum : Fieri placet. Lu-
bentius Celsus promagister subscripsi III Nonas Novembres,
Antione Pollione Coss. An Pudente & Pollione ? anno
Christi C L X V I.*

Quatuor a Bononia passuum millibus exstat ejusdem Con-
gregationis sancti Salvatoris abbatia beatæ Mariæ de Rheno,
ex qua Lucius II ad Pontificatum assumptus fuit, antea Ge-
rardus dictus : cujus mentio est in Necrologio loci , tum ad XI
Kal. Octobris, quo die coronatus est anno M C XLIV. tum
ad VII Kal. Septemb. qui dies ejus supremus fuit anno se-
quenti. Ibidem X Kal. Novemb. anno Domini M C LXXXVIII
abiit Faïta , filia olim domini Alberti ab Urso de Cazanimicis ,
fratris domini Lucii Papa II. Eodem in loco sepultus est anno
M CC XVIII Bandinus Legum doctor , de quo hoc epita-
phium in prædicto Necrologio:

*Bandinus Tuscus , legum splendore coruscus ,
In Pisa natus , jacet hoc tumulo tumulatus.*

VII. Basilica sancti Petronii , cathedrali sancti Petri vici-
na , altare versus portam conversum habet. In ea descripsimus
epitaphium Gratiani , qui olim monachus e nostris, ac Decreti
compilerator fuit.

D. O. M.

GRATIANI Clusini , Cesarei Jur.
& Pont. enucleatoris prope divini :
Qui monachus in martyrum Felicis
& Naboris ade , absolutissimum
ibidem opus Decretorum
anno gratiæ M. C. LI. compilavit :

*Monumentum quod illic carie
rueribusque obsorduerat ;
hic magnificentius renovatum
Johannes Franciscus Aldrovandus Bononien.
IIII Dictator , ære publico instauravit
anno salutis M. CCCC. LXXXVIII.
Idibus Junii , Johanne Bentivolo II.
P. P. remp. feliciter gubernante.*

Prædictum sancti Felicis & sancti Naboris monasterium ,
olim virorum , nunc sanctimonialium est Ordinis nostri : ubi
lapis quondam ad Gratiani ostium cubiculi positus, in sacrarium.
postea translatus, hos versus inscriptos continebat.

*Hanc aula partem reverenter, lector, adito.
Namque loci monachus Decretum hic condidit hujus
Divinum Gratianus opus, quantumlibet arto
Contentus septo : quod jam reparando caducum ,
Et vetus hoc claustrum tolli fuit inde necesse.
Id tamen abbate constructum est Bartholomeo ,
Mille trecentenis decies septem atque quaternis
Annis à Christo pura de Virgine nato.*

Hinc refelluntur qui asserunt cum Sigonio in libro II de Pontificibus Bononiensibus , Gratianum in sancti Proculi cœnobio monachum exstitisse.

Antiquissimum est Ordinis nostri, nunc Cælestinorum , sancti Stephani monasterium , Jerusalem dictum : in cujus area claustrum vas insigne ex lapide prostat , quod ad Cœnam Domini Liutprandus & Hildeprandus reges fieri curarunt , hac inscriptione in orbem apposita.

✠ *umilibus vota suscipe Domine
Dominis dominis nostris Liutprante &
Ilprante regibus , & domino Barbatu
Episcopo sanctæ ecclesiæ Bononiensis.
Hic in honorem loci religiosi sua precepta
obtulerunt , unde unc vas impleatur in Cœnam
Domini Salvatoris. Et si quis munera hac minuerit ,
Deus requireret.* ✠

Ughellus barbaram hanc inscriptionem , at mendose retulit : sed quis fuerit illius vasis usus non indicavit. Nonnulli viri docti existimant , adhibitum fuisse in Cœna Domini ad lotionem pedum. Est enim vas capacissimum , habens in orbem circiter tredecim pedes , altitudinis unum cum octo pollicibus ; & in fundo foramen ad liquorem , ubi necesse fuerit , effundendum. Verum cum legimus in præmissa inscriptione , *Præcepta* , atque adeo donationes a Liutprando & Hildeprando factas fuisse , unde vas impleteretur in Cœnam Domini ; nihil aliud cogitandum succurrit , quam vino continendo destinatum fuisse , forte ad illud epulum , quod ipso die Cœnæ a Fidelibus olim fieri consueverat. In eodem sancti Stephani cœnobio invenimus libellum de gestis Bonodii abbatis. Ad sanctum Michaëlem in Prato nobilissimum est monasterium Olivetanorum , cujus situ nihil amœnius , nihil jucundius. Bibliotheca , novo opere præclare constructa & instructa , nonnisi vulgares libros continet.

Archivum urbis , quod duce Valerio Zani inspeximus , habet quædam vetustissima diplomata ex ecclesia Ravennensi , in papyro Niliaca exarata : quorum unum continet donationem sex unciarum , a Johanne Spatario factam prædictæ ecclesiæ Ravennati. *Actum Imperatore , Consule , & die supra scriptis* legitur ante subscriptiones : sed notæ chronologicæ , quæ initio diplomatis appositæ erant , desunt in mutilo instrumento : cui MAPINOC XPUCOKATA AKTHC litteris græcis , sed verbis latinis subscripsit , alii verbis & litteris latinis. Alterum , totum fere lacerum , datum est *sub die quarto Non. Janu. P. C. Flavi Fausti Juniores V. C.* id est anno cccc xci. exhibetque concessionem cujusdam matronæ , nomine Mariæ , factam Johanni antistiti ejusdem ecclesiæ Ravennensis. In palatio , ubi prædictum archivum est , exstant omnia autographa & adversaria Ulyssis Aldrovandi Bononiensis.

.VIII. Dominicanorum insigne cœnobium invisum præterire fuit religio , tum ob reliquias sancti Dominici , qui ibidem ad superos abiit sepultusque est , tum ad videndam loci bibliothecam maxime ornatam , librisque refertam. In ea bibliotheca Ambrosius Camaldulensis invenit *volumen , ubi gesta Conciliorum veterum pulcherrime descripta erant , & in primis Chalcedonenſis Synodi per actiones distinctæ , pulcherrimis & antiquissimis litteris : quo in volumine erant libri Facundi de ipsius Concilii gestis con-*

AN. 1686.
M^o A 10.

tra detrahentes. Sed hunc codicem non invenimus. Beata Catharina Bononiensis in ecclesia Corporis Christi apud Clarissas integro corpore spectanda exponitur.

Ipso die illustrissimus Comes Carolus Cæsar Malvasia, metropolitanae ecclesiae Canonicus, nos honoris causa invisit. Is libellum scripsit ad explicandum ænigma *Æliæ Læliæ Crispis*: atque aliud opus italice de Pictoribus Bononiensibus, Regi Christianissimo nuncupatum: cujus in se munificentiam magnopere deprædicabat, quod munus regium ad se missum cum gerulus deperdidisset, iterata largitione alterum non sine fœnore ad se rediit.

* *Modene*

I X. Bononia dimissa, * Mutinam tendimus, Sadoletorum natalem urbem, ubi in transcurso visa nobis est sancti Geminiani ecclesia cathedralis antiqua: deinde abbatia sancti Petri e nostris, ubi nihil singulare, neque in bibliotheca, neque in archivo. Hujus loci abbas fuit * Guillelmus Cortesius, postea Cardinalis, Sadoleti litteris celebratus. In eadem urbe picturæ Principis, pleræque ad pietatem compositæ, & numero, & pretio insignes. His cursim perlustratis, ipsa die in Nonantulanam abbatiam, quæ decem passuum millibus inde distat, accessimus: ubi modo sex monachi Cistercienses sub abbate regulari degunt, magna parte bonorum abbati sæculari relicta. In bibliotheca duo tantum supersunt ex multis, quos celeberrima olim illa abbatia habebat, veteres codices, nempe vita Hadriani Papæ I, quam hic habes, auctore monacho loci anonymo: alter vero de abbatibus, qui illud monasterium rexerunt. In archivo diplomata perantiqua Ludovici, Lotharii, & aliorum. Ambrosius Camaldulensis anno M CCCC XXXIII eo profectus, bibliothecam videre non potuit, asserente abbate, nulla ibi esse volumina, cum plurima miræ vetustatis illic pulvere & situ jacere demersa ex auctoribus certis ipse comperisset.

* *Syroring*

Postquam Mutina discessimus, V. C. Laurentius Statilius ex eadem urbe litteris nobis significavit, penes se esse Petronii Arbitri fragmentorum exemplar, quod doleret nobis visum haud fuisse, cum Mutinæ versaremur. Qualis sit codex ille, exponit in itinere suo Dalmatico Jacobus Sponius, qui Tragurii in Dalmatia cum inspexerat apud Marinum Statilium, Laurentii patrem. Tibullo, inquit Sponius, Catullo, & Propertio
subjungitur fragmentum Petronii Arbitri ex libris quinto-de-

cimo & sexto-decimo. Exaratum est exemplar anno M CCCC
 XXXIII. Certent quantum volent litterati viri de auctore illius
 fragmenti, quod nonnulli Petronio abjudicant. Nobis vero
 ejus inspectione caruisse non gravis dolor est, quibus Petronii
 genium & stilum ignorare convenit. Hic in mentem venit P.
 Guirandi Alosiani epistola ad Andream Arnaudum, in qua
 multum improbat novam Petronii editionem. *Hei mihi*, in-
 quit, *quam pessimo exemplo talia luce donantur, & quam carissi-*
mo precio hæc vetustatis reliquia & cineres nobis emuntur! Episto-
 la hæc locum habet inter philologicas, a Goldasto editas, cer-
 te homine Christiano digna.

AN. 1686.
 MAIO.

PATAVIUM, ET VENETIÆ SECUNDO.

X & XI. Ferraria iterum & Patavium à nobis visæ prop-
 ter Venetias, quo librorum quorundam necessitas nos voca-
 bat. Conventus a nobis obsequiorum causa Patavii eminent-
 tissimus Cardinalis Barbadicus, ait ægre se ferre, quod ad suas
 ædes primum non divertissemus; flagitavitque ut in reditu e
 Venetiis apud se hospitaremur.

XII. Venetias dum iterum accedimus, dumque in via tan-
 tisper subsistit auriga qui nos ducebat, vici ecclesiam post me-
 ridiem (Dominica dies erat) excitante campanæ signo, in-
 gredimur: ubi pueri & puellæ in discretos distributi choros, &
 quidem utrique in varias classes quini aut seni, elementa vitæ
 Christianæ recitabant, pueri apud homines graves, puellæ
 apud matronas: quorum singuli singulis classibus præerant. Hic
 ritus in totum annum singulis Dominicis per Italiam frequen-
 tatur. In illis etiam partibus hic mos viget, ut concionatores,
 non in ipso sermonis cursu, ut apud nos; sed ante ipsum con-
 cionis exordium precationem ad beatissimam Virginem fun-
 dant: ne duo (ut fit) exordia facere, & sermonem interrom-
 pere cogantur.

XIII. Per subsequentes dies lustrandis Murani sancti Mi-
 chaëlis, & sancti Mathiæ Camaldulensium monasteriorum
 bibliothecis dedimus operam. Apud sanctum Mathiam inveni-
 mus *Petri Delphini epistolas*, ante præfecturam generalem ab
 eo scriptas, ab anno scilicet M CCCC LXII ad M CCCC
 LXXX. Vulgatis libris Marci Antonii Sabellici de Magistrati-
 bus Venetis, qui *Augustino Bardadico inclito Venetiarum Principi*
 nuncupati sunt, præmittitur scripta manu epistola ejusdem

AN. 1686.
M A 10.

Sabellici ab Bernardum Bembum equitem, qui Bergomi Prætor proximis comitiis creatus fuerat. Apud sanctum Michaëlem post nonnullas epistolas Hermolai Barbari patriarchæ Aquileiensis ad Antonium Calbum de castigationibus Plinianis, quæ litteræ inter Politianas editæ sunt, subiungitur Antonii Merulæ epistola ad eundem Antonium Calbum de morte ipsius Hermolai ex Mediolano 1111 Nonas Sextiles M CCCC LX. XXX1111. cujus Hermolai præmaturum interitum, velut *inestimabilem latialis doctrinæ jacturam, & publicam ingeniorum calamitatem* luget Merula. Hermolaus Romæ obiit anno M CCCC XC1111, Maii XXI. *Vixit an. XLI*, uti legitur in basilica sanctæ Mariæ de Populo, ubi sepultus est cum epitaphio, quod Ughellus refert. Alius fuit eodem fere tempore Hermolaus Barbarus episcopus Veronensis, Panvinio laudatus. In prædicto sancti Michaëlis monasterio sepultus est Petrus Delphinus, mortuus die xv Januarii anno M D XXV.

XVIII. Dum bibliothecam sancti Marci denuo perlustramus, doctissimus abbas Gualterius nobis ostendit in vestibulo signum Ganimedis a Jove rapti, in capite gerentis galerum, ad cujus similitudinem factus est pileus Ducis Venetiarum. Idem Gualterius nos deduxit in insigne cœnobium sanctorum Johannis & Pauli, quod est Dominicanorum: ubi amplissima ecclesia, ædes regulares perquam magnificæ, cum singulis dimidiis ex marmore statuis ad singulas cellas; nec impar bibliotheca. Multi in ea sunt codices manu exarati, sed de rebus scholasticis fere omnes.

XIX. Monasterium sancti Georgii in Alga, quod olim caput erat Congregationis Canonorum sæcularium sancti Augustini, a beato Laurentio Justiniano illustratæ; medio Venetias inter & Fossinas intervallo situm est in mediis aquis. Extinctis ante octodecim annos Canonicis, & bonis Reip. addictis, locus vacuus Patribus Minimis concessus est. Erat ibi quondam bibliotheca non contemnenda, cujus indicem texuit Philippus Thomasinus: at modo nihil ibi superest præter parietes & imagines virorum illustrium, qui eo in loco floruerunt. Cella beati Justiniani pium horrorem affert spectantibus. Antequam is esset Patriarcha, Venetiarum Antistes vocabatur *Episcopus mortuorum*, uti Petrus Pithæus ex Seraphino in suis Pithæanis observavit.

Cum Patrem Coronellum, Venetæ Reip. Cosmographum,

in majori conventu Minorum salutandi causa inviseremus, ipse nobis tabulas quasdam topographicas * Peloponnesi & aliorum locorum dedit, eo tempore, quo Venetorum exercitus in Peloponneso prosperos successus habebat. Hujusce rei occasione venit in mentem id, quod Humbertus de Romanis, præfectus v generalis Prædicatorum, scripto reliquit in libro de iis quæ tractanda videbantur in Concilo generali Lugdunensi sub Gregorio x. ubi agens de negotio suscipiendo contra Saracenos, ait optimum esse, *si principatus de Morea a Latino Principe acquiratur.*

AN. 1686.
M A I O.
* la Morée

XX. Veneriis publica navicula discessimus, quæ sub vesperum appulit Patavium. In ripa nos opperiebatur rheda eminentissimi Cardinalis Barbadici, qui audito nostro Patavium reditu, suæ visitationis in montibus Euganeis cursum interrompere non est gravatus. Mirati sumus tantam eminentissimi viri in exteros homines dignationem, cujus modestiam, studium in litteras & virtutem, zelum indefessum, & mores incorruptos nemo non agnoscit. Sub ejus disciplina floret Seminarium clericorum numero centum, qui in pietate, litteris & ritibus ecclesiasticis a pueritia ad idoneam sacerdotio ætatem erudiuntur. Ibi artes honestæ & clericis convenientes exercentur, præcipue typographica, cujus officina omnigenis fere characteribus, etiam orientalibus, instructa est. Extra urbem aliud exstat Seminarium nobile, qui ad Christianam pietatem informantur sub ejusdem Cardinalis disciplina. Hujus autem hospitii quoties recordamur, (recordamur autem sæpissime) toties in mentem redit id quod de Platonis cœna dixit Timotheus, qui cum ab eo invitatus esset, & eundem postero die denuo vidisset; cœnas Platonis non modo in præsentia, sed in posterum quoque diem jucundas esse confessus est.

XXII. Reverso ad prosequendas visitationes Cardinale, invisit nos Carolus mathematicus insignis, qui unum ex suis libris Regi dedicavit. Nos vero bibliothecam sancti Johannis in Viridario, quam antea jam revolveramus, denuo adiimus, ut carmen Henrici Septimellensis, Magliabeci cura editum, cum veteri codice, ipso petente, conferremus. Hæc bibliotheca multos habet codices calamo exaratos: quorum maximam partem Canonicis illis regularibus legavit Johannes Marca-nova medicus Pataviensis. Is veteres inscriptiones ex Italia, variisque aliis regionibus conquistatas conjecit in librum, quem Malatestæ

AN. 1686.
M A I O.

Novello Cæsenæ Principi nuncupavit anno M CCCC LXV. Non est ex illo numero insignis de Gallicana muliere inscriptio, quæ obitu conjugis sui, qui apud Marosticam, ditionis olim Patavinæ opidum, decesserat, comperto, ad ejus sepulcrum adiit per mansiones seu hospitia quinquaginta, (nam Principis decreto ratæ & fixæ olim erant ejusmodi mansiones:) & mariti sui cineres lacrymis suis resperfit. Inscriptionem hujus facti testem refert Pignorius in epistola xxvii ad Marcum Antonium Romitum, ut recens Marosticæ detectam in sacra æde beati Floriani; nosque ex eo in gratiam gentis nostræ huc adducimus.

MARTINA. CARA. CONJUX. QUAE
VENIT. DE. GALLIA. PER. MANSIONES
L. UT. COMMEMORARET. MEMORI
AM. MARITI. SUI
BENE. QUIESCAS. DULCISIME
MI. MARITE.

Pridie hujus diei conventus a nobis est apud Patres Dominicanos Seraphinus Piccinardus, vir doctus, qui hoc ipso anno Patavii librum vulgavit de Prædestinarianis. In bibliotheca Augustinianorum Eremitarum, Seripandi Cardinalis *Iter ad Concilium Tridentinum*, quod *Iter* in catalogo librorum adscriptum erat, frustra perquisivimus. Nec felicius fuit conatus in reperiendis epistolis Petri Barrotii episcopi Pataviensis, quas Petrus Delphinus ejus amicus, ipso mortuo, ad editionem paraverat. Exstat pius ejusdem Barrotii libellus de modo bene moriendi. Mortuus est, sepultusque Venetiis: sed illius cenotaphium Patavii visitur in ecclesia principe, ex decreto Reip. adscripto hoc elogio.

PETRO BARROTIO, *Bellunensi primum antistiti, Pontif. dein Patavino, sanctimonia, pietate, eruditione, & beneficentia incomparabili, Senatus Venetus monument. hoc faciendum curavit.*

Ejus homiliam invenimus in codice Casinensi sub hoc titulo: *Reverendissimi Petri Barroctii, episcopi Patavini ac Comitum Sacensis, ex beato Epiphanio episcopo Cyprio, de sepultura Domini Dei nostri J. C. & glorioso ejus ad inferos descensu sermo. Quid hodiernum silentium hoc? &c.*

MANTUA, PARMA, PLACENTIA.

AN. 1686
M A I O.

XXIII. Ascensionis festa die post prandium relicto Patavio, versus Mantuam nobis profectio fuit per montem Silicis, * Atestum, Bevilaquam, & alia loca regionis amœnissimæ sub Veneta Rep. cujus præsidium extremum est in opido Lignago ad * Athesim.

* Este.

* L'Adige.

XXIV. Mantuæ nihil veterum librorum repertum. Omnibus notum est illud esse natale Virgilii solum: cujus statuam, quæ in ejus honore multis retro sæculis ibidem steterat, Carolus de Malatestis, dux eo in bello quod apud Mantuam gerebatur, victis fugatisque hostibus, evertit. Ob id Guarinus Veronensis graviter in eum invecit. Mincii stagnantes aquæ urbem cingunt ac muniunt, ac paullo post in Padum seu Eridanum derivantur: ubi Leo M. Attilam convenisse, ac compescuisse memoratur. Difficilem Augustini ævo ac periculosum fuisse hunc confluentium aquarum locum intelligimus ex ipsius Augustini epistola ad Dioscorum. *Non enim sic prohibemus in incerto fame finem ponere, ut tamquam de Mincio in Eridanum emigres, quo se ipse fortasse Mincius etiam non emigrantem impingeret.*

Augustin.
epist. 118.
n. 6.

Non procul inde insigne ac præclarum sancti Benedicti monasterium, quod decem a Mantua passuum millibus distat. Padolironensi vocabulum est a Pado & amne Lirone, qui amnis eo loci in Padum influit. Ibi membranei codices haud minus quam quingenti, prisco more scamnis alligati ferreis catenis. Unus e præcipuis est codex vetus, in quo *liber de corpore & sanguine Domini* continetur auctore Gezone. Fuit hic primus abbas monasterii, quod Giseprandus Dertonensis episcopus ante medium sæculum decimum apud Dertonam sub titulo sancti Martiani de Patrania construxit: quam constructionem Hugo & Lotharius reges suis diplomatibus ratam habuerunt. Hunc autem librum ex Patribus, præsertim ex Paschasio Radberto, collegit Gezo, atque in capita LXXI distribuit. Præfationem operis, quæ sane præclara est, inferius suo loco cum libri capitulatione exhibebimus. Alius codex comprehendit tres ex Origene libros in Job, quos *de græco in latinum Hilarius episcopus* vertisse dicitur, præmisso hoc prologo, *Peritorum mos est medicorum* &c. Et quidem Hilarius Pictaviensis antistes ex Origenis commentariis in Job quædam defloravit, teste præter Hieronymum Augustino in libro secundo contra

AN. 1686. Julianum : at verba , quæ ex hoc Hilarii opere adducit Augu-
 MAIO. stinus , non reperiuntur in illo Padolironensi commentario ,
 qui inter Origenis opera vulgatus est , nec Hilarii venam &
 genium assequitur. Denique in alio codice ejusdem monaste-
 riû *Definitiones dogmatum ecclesiasticorum* , quæ Gennadio passim
 tribuuntur , nomen præferunt *sancti Fausti episcopi ecclesie Ma-*
xilienfis. Porro in eodem monasterio vixit Symeon monachus &
 eremita , natione Armenus , cujus reliquiæ ibidem asservan-
 tur.

* *Guaftal-*
la.

* *Briffello.*

Baccinuy

XXV & XXVI. Rasola , * Gardistallo opido munitissi-
 mo Ducis Mantuani, ubi olim duo celebrata fuere Concilia, &
 * Brixillo præteritis , cum Parmam accederemus , reverendissi-
 mus abbas Angelus Maria Arcionius, ex prænobili Arcioniorum
 apud Parmenses genere , nobis obviam misit aliquot ex suis ;
 nosque singulari benevolentia & humanitate est complexus ,
 quos ad suum monasterium invisendum litteris sæpius invita-
 verat. De tanto viro , qui usque tertium Congregationis Ca-
 sinensis præfectus fuit generalis , & magna caritate & pruden-
 tia suos regit , deque ejus in litteras amore dicere supersede-
 mus , ne ipsi pro beneficiis impensis assentari , nobisque pro
 acceptis honoribus nimium blandiri videamur. Is libros suos,
 italicis versibus egregie scriptos , nobis dono dedit : itidemque
 loci Prior doctus , Andreas Rainerius , libros de philosophia a se
 compositos : at Benedictus Baccinus , noster in primis amicus ,
 largitus est codicem librorum de Imitatione Christi antiquum ,
 in quorum fine hæc clausula legitur : *Explicit liber quartus & ulti-*
mus sancti Johannis Gerseni de Sacramento altaris. Idem Bene-
 dictus nobiscum epistolas Alberti de Sarrhiano communicavit,
 vir in litteris politioribus & in sacris optime versatus : qui ad
 Diarium litteratorum Parmense symbolam suam cum Patre
 Gaudenzio Roberto Carmelita confert , aliaque plura opera
 meditatur. Sed cum de his agimus , pæne excidit nobis me-
 moria Parmensis sancti Johannis Evangelistæ monasterii, in quo
 tanta cum humanitate ab universis monachis , nedum ab opti-
 mo abbate mox laudato accepti sumus. Mira est illius abba-
 tiæ , in primis vero ecclesiæ elegantia , auctore partim & ar-
 chitecto ipsomet abbate , qui non minorem de spirituali suo-
 rum profectu , quam de ædificiorum splendore & ornamento
 curam habet.

XXVII. Bibliotheca Principis ornatissima , librisque re-
 fertissima

fertissima est ad quadraginta fere millia. Basilicæ urbis omnes cultissimæ : Ducalis sancto Martino Turonensi ; cathedralis olim sancto Herculano , nunc beatissimæ Virgini assumptæ nuncupata ; Parmi Sanini, Antonii que Coregiensis picturis decorata est. Nobilium ecclesiarum seminarium unum est ex præcipuis totius Europæ , ædificiis & legibus optime instructum. Sanctimonialium Ordinis nostri cœnobium sub titulo sancti Alexandri martyris condidit sæculo nono. Cunigundis , relicta Bernardi Italiæ regis , attestante authentico instrumento , Parmæ dato , regnantibus *Hlodovico & Hluthario Imperatoribus anno vigesimo secundo & sexto-decimo* , xviii Kal. Julias , Indictione *tertia-decima* , id est anno Christi *dccc xxxv.* quæ notæ chronologicæ observatione dignæ sunt ad stabiliendam epocham imperii Lothariani. Bertholdus monachus sanctus colitur in illo parthenone sancti Alexandri : Johannes abbas in monasterio sancti Johannis.

AN. 1886.
M. A. 10.

XXVIII. Benedictus Baccinus cum Patre Gaudenzio jam laudato Placentiam usque nos deduxit in rheda abbatis sui. Urbem sancti Domnini, alias Fidentiam ; tum Florentiolum opidum, cujus patronus sanctus Florentius episcopus Arausicanus ; obiter percurramus. Hospitio excepti Placentiæ in monasterio sancti Sixti e nostris, archivum, quoad licuit, raptim perlustravimus, vetustis & authenticis noni ac decimi sæculi Imperatorum instrumentis refertum, quanta fere nusquam locorum apud Italos copia. Conditum est primo cœnobium in gratiam sanctimonialium ab Angilberga imperatrice Ludovici III. uxore. Exstat hujus rei inter alia diploma ipsius Ludovici, quo monasterii conditionem dotationemque confirmat III. Id. Octob. Indict. viii, anno imperii *xxv.* apud Olonnam *curtem imperialem.* Appensum est Imperatoris sigillum ex plumbo, in antica præferens ejus effigiem cum hac inscriptione, ✠ *HLUDOVVICUS IMP. R. & in postica parte, CL. AUG. DEC. IMP.* Idem uxori suæ Angilbergæ concedit *abbatiam in honore beati Petri, non procul a Placentina urbe, in loco qui nuncupatur Caput Trebie.* quod modo prædium est monasterii sancti Sixti. Idem eidem Angilbergæ tradit *monasterium Salvatoris, quod dicitur Novum, intra mœnia civitatis Brixie constructum ; & aliud in Luca, quod Aldus Dux edificavit ; itidemque unum in Papiæ, quod vocatur Regina, & xenodochium sanctæ Mariæ cum hospitali sancti Benedicti ; necnon & monasterium situm in Sir-*

AN. 1686.
M A I O.

mione, seu xenodochium sanctæ Mariæ in Papia situm; quod dicitur sancta Maria Britonum: ea conditione, ut, si prædicta Angilberga ante filiam suam Hermengardem obierit, in ipsa loca filia sua succederet. Carolus, cognomento Crassus, non uno diplomate confirmat res monasterii a sorore sua Angilberga concessas. Arnolfus hortatu Hirmingardis, quam mater Engilberga ad se miserat, eadem rata habet; & monasterium Novum, quod Ludovicus Brixia situm esse dicit, *in Comitatu Prissanensi* locat. Addit *Papia monasterium sancti Marini, atque monasterium sancti Thomæ, necnon monasterium Reginae, in quibus sanctæmoniales Domino famulantes commorantur.* Sed, ut ad Ludovicum revertamur, exstat in eodem sancti Sixti archivo libellus dotis, quo Angilbergam sponsam suam, *juxta legem Francorum* dotaturus, eidem *dotalitio nomine* dedit curtem juris sui, *quæ dicitur Campo Miliacio, cum omnibus adjacentiis.* Data III Non. Octob. anno imperii sui secundo, Indict. XIII. Actum Maringo curte regia. Hæc satis ex archivo prædicti monasterii, quod *sub titulo dominicæ resurrectionis, & in honore sanctorum martyrum Sixti, Fabiani, Marci & Apulei*, quorum reliquias ibidem quiescere Karlomannus in suo diplomate asserit; primitus ædificatum est.

MEDIOLANUM SECUNDO.

* Lody.

XXIX. Pado transmissio, per * Laudem Pompeiam ad fluvium Addam; tum per Marinianum opidum, Francisci r. pugna & Helvetiorum clade insigne, Mediolanum denuo pervenimus. Diebus sequentibus amicis revisendis, præsertim illustrissimo Comiti Mezabarbae, qui novis nos favoribus honoravit, & bibliothecæ Ambrosianæ iterum perlustrandæ tempus impendimus. Hic cum aliquis non satis honorifice de Rege loqueretur, unus e bibliothecariis, non sine bile homini invecundo silentium imposuit, dicens eo in loco non permitti oblocutiones in Principes. quæ res adstantibus magnopere placuit. De hac bibliotheca, cum superius multa dixerimus, pauca tantum hoc loco addere juvat, exstare scilicet ibidem varias Claudii Puteani epistolas ad Johannem Vincentium Pinellum V. C. cujus vitam scripsit Paulus Gualdus; qua de re Laurentius Pignorius epistola xxii ei gratulatur. Ad hæc in eadem Ambrosiana bibliotheca exstant variæ Tertulliani emendationes super editionem Pamelii, ex codice Vaticano,

& ex Petri Ciaconii conjecturis. Denique, ceteris omiſſis, poſt Quintiliani libros de institutione oratoria, legitur inedita Poggii epistoſa ad Johannem amicum ſuum de reperto apud ſanctum Gallum integro codice eorundem librorum. In hac epistoſa Poggius aſſerit, Quintilianum apud Italos ita lacratum, ita circumciſum antea fuiſſe, ut nulla forma, nullus habitus hominis in eo recognoſceretur: ſe vero ſingulariſſimum illud lumen Romani nominis, quo exſtincto nihil præter Ciceronem ſupererat, non tantum ab exſilio, ſed ab ipſo pæne interitu in avitam patriam revocaſſe. Id vero quemadmodum acciderit, ita narrat. *Fortuna quadam fuit, cum ſua, tum maxime noſtra, ut cum eſſemus Conſtantie otioſi, cupido inceſſeret viſendi ejus loci, quo ille recluſus tenebatur. Eſt autem monaſterium ſancti Galli, prope urbem hanc millibus paſſuum viginti. Itaque nonnulli animi laxandi, & ſimul perquirendorum librorum, quorum numerus maximus ibi eſſe dicebatur, gratia eo perreximus. Ibi inter confertiſſimam librorum copiam, quos longum eſſet recensere; Quintilianum reperimus, adhuc ſalvum & incolumem, plenum tamen ſitu, & pulvere reſertum. Erant enim in bibliotheca libri illi, non ut eorum dignitas poſtulabat, ſed in teterrimo quodam & obſcuro carcere, fundo ſcilicet unius turris, quo ne vita quidem damnati detruderentur.... Reperimus præterea libros tres primos & dimidiatum quarti C. Valerii Flacci Argonauticæ; & expoſitiones, tamquam thema quoddam, ſuper octo Ciceronis orationibus Q. Aſconii Pediani eloquentiſſimi viri, de quibus ipſe meminit Quintilianus. Hæc mea manu tranſcripſi, & quidem velociter, ut ea mitterem ad Leonardum Arctinum & Nicolaum Florentinum: qui cum à me hujus theſauri adinventionem cognoviſſent, multis à me verbis Quintilianum per ſuas litteras quam primum ad eos mitti contenderunt. Hæc Poggius.*

Non prætermittendum eſt vetus instrumentum, quod V. C. Johannes Pufferla, bibliothecæ Ambroſianæ præfectus, nobiſcum communicavit, primarium ſcilicet cœnobii Caira dæ, vulgo Cairati, ſanctimonialium ex noſtro Ordine, juxta flumen Olona, diœceſis Ticinenſis. Hoc instrumentum condidit Manigunda, Dei ancilla & veſte monialium induta, vivens lege Langobardorum, regnantibus Liutprando & Heldeprando, anno eorum **XXIII**, menſe Julii Indict. v. Hæc pia femina univerſas res ſuas prædicto monaſterio tribuit, ut ſint in poteſtate & conſecratione Annextaſi epiſcopi Ticinenſis, ejusque ſucceſſorum,

AN. 1635.
MAIO.

ea tamen conditione, ut omni anno per ferias de Domini Nativitate debeat dare abbatissa loci candelas duas, valentes denarios quatuor, cannadas duas de vino, oblatas duas de . . . (forte de pane) ad ipsum episcopum sanctæ Ticinensis ecclesiæ. Quod si aliquid amplius in posterum exigeret episcopus, tunc monasterium in potestatem veniret Mediolanensis ecclesiæ. Si vero etiam hujus ecclesiæ antistes hoc annuo censu non esset contentus, quemcumque vellet abbatissa episcopum eligeret. quod sane singulare est.

JUNIO.

I. Ambrosianæ basilicæ archivum, quod in aditu videre nobis non fuerat concessum, in reditu raptim lustravimus, litteris muniti reverendissimi abbatis sanctæ Crucis. Nulli supersunt in eo veteres codices, neque in toto (ut nobis assertum est) monasterio: sed multa copia priscorum instrumentorum, quorum antiquissima in terram rejecta, cum tineis & blattis extremum conflictum agunt. Ad omnia examinanda nobis opus fuisset longiori tempore, quam vel boni illi Patres nobis concedere voluissent, vel nos ipsi impendere huic rei potuissemus.

II. Dominica Pentecostes, Missæ sollemni in Domo (sic metropolitanam vocant) interfuimus, in qua Cardinalis episcopus, qui sacra celebrabat, post Evangelium concionem habuit. Præclarum sancti Laurentii templum, ad Romani Panthei similitudinem, ex delubro Herculis in sacros usus conversum est. Barnabitæ, in ecclesia sancti Barnabæ primum exorti, inde instituti sui vocabulum traxerunt. Nec ab re erit, priusquam Mediolano discedamus, observare, omnes omnium Mediolanensium Ducum imagines in æs incisas, cum eorundem pecuniariis nummis haberi penes unum ex amicis nostris, venerabilem virum Nicolaum de la Haye, ecclesiæ Noviomensis decanum, quæ collectio ante annos triginta ab uno e suis facta est.

* Monks.

III. Dum Michaël socius noster Aronam peteret ad impetrandum codicem Aronensem, ego * Modoëtiam, quod opidum passuum millibus decem Mediolano abest, sum profectus, ut locum illum, ubi corona ferrea novo Imperatori quondam a Mediolanensi antistite pro regno Langobardorum conferebatur, & celebrem sancti Johannis Baptistæ basilicam, olim nostri Ordinis monasterium, ubi hæc coronatio fieri solebat, perlustrarem. Hæc basilica originem suam acceptam refert Theodelindæ reginæ, quæ ibidem sepulta est. Fabrica ecclesiæ

in testudinem primitus definebat, sub qua altare & chori sedilia: duo tantum arcus & duæ crucis alæ pro navi erant. Nunc apside & navi de more aucta est ecclesia. Thesaurus sacrarii locupletissimus: in quo Theodelindæ reginæ cimelia pleraque asservantur. Præter ferream coronam, ibi coronæ duæ ex auro diadematis instar, altera Agilulfi regis, altera Theodelindæ reginæ ejus conjugis, quæ duplo minor. Ad hæc ibidem crux ex crystallo, a Gregorio M. ad Theodelindam pro Agilulfo ejus conjugis missa; Theodelindæ privata supellex, pecten ex ebore, ventilabrum, cultellus, calix. Coronam ferream, quæ interius unum ex clavis Christi Domini habere dicitur, exterius aurea, nunc solo die Ascensionis ostendunt. Ita ex rariori ejusmodi rerum spectaculo eisdem pretium student conciliare. Nec illud sane improbandum iis in rebus, quæ usu & contactu facile consumuntur, immo etiam in sacris. Sic Romæ in basilica sanctæ Crucis in Jerusalem, ubi plurimæ ac pretiosissimæ, si uspiam alibi gentium, reliquiæ asservantur, ut sanctæ Crucis titulus, unusque e nummis, quibus Christum Dominum venditum legimus, nonnisi semel aut iterum singulo quoque anno, & quidem non e propinquo exhibentur. Quamquam nummum illum non in Judæa, sed in Rhodo insula cūsum fuisse litteræ græcæ arguunt, ut Antonius Augustinus initio Dialogi secundi de Numismatibus observavit. Verum his omissis, exstat in eodem MODOËTIÆ sacrario codex ex membranæ purpureis, Gregorii Antiphonarium continens, sed mutilum; quadratis litteris aureis exaratus, cum operculis ex ebore, quæ ex una parte præferunt effigiem Davidis regis, ex alia sancti Gregorii cum hoc disticho.



Gregorius præsul, meritis & nomine dignus,

Quo genus hæc duxit, summum conscendit honorem.

Est & duplex alterius codicis majoris operculum ex auro, cum cruce ex utraque parte, addita hinc & inde hac inscriptione: **EX DONIS DEI DEDIT THEODELENDÆ REG. IN BASELECA, QUAM FUNDAVIT IN MODOËCIA JUXTA PALATIUM SUUM.** Insigne eo loci exstat collegium Canonorum, quibus præest modo V. C. Petrus Paulus Boscha, nuper Ambrosianæ bibliothecæ præfectus. Pæne exciderat e memoria quoddam corporale, quod a Gregorio itidem ad Theodelindam missum ferunt: cujus figuras & characteres, quorum specimen ab humanissimo Josepho Thoma-

AN. 1686.
JUNIO.sio Romæ acceperamus, hic exhibere juvat ad recreandam ex-
cercendamque curiosorum industriam.

O✠NÄIO TORIX MWÆ
YM. INTEI EINEAIA-
ΛIO



IXIEN VVXINHIANAI CI
W NKHMONHCHO.

Non ita procul a Modoëtia stat Comum civitas, quæ non modo C. Plinii Cæcili Secundi & Joviorum, sed etiam sanctissimi Pontificis Innocentii XI ortu illustrata, a Mediolano XXV passuum millibus abest. Varias Comensis agri atque urbis inscriptiones in unum corpus collegit anno MDXXVI Benedictus Zobius, & ipse Comensis, cujus collectionem Romæ in bibliotheca Christinæ reginæ vidimus cum ejusdem Zobii observationibus. At pleræque illæ inscriptiones jam in lucem prodierunt.

TICINUM, ET BOBIUM.

IV. Mediolano * Ticinum profecturis piaculum fuerit non * Pavie, contemplari Cartusiam Ticino proximam, superbum opus Johannis Galeatii, qui ibidem egregium mausoleum cum uxore habet. Ecclesia, tametsi Lombardici operis, materia, arte, statuis intus & extus, etiam Virgilii aliorumque similium in frontispicio ecclesiæ, picturis, & ornamentis, sacraque supellectile & sacrario, adventantium expectationem superat. Cellæ omnes plumbo tectæ, & magnopere ornatae. Danda hæc magnificentia conditori, qui non tam religiosæ modestiæ hoc in opere, quam suæ dignitatis, aut potius divinæ, cui hoc opus construebat, majestatis rationem videtur habuisse.

Ticinum, civitas antiqua & satis ampla ad fluvium cognominem, non adeo elegantes ædes habet. Ecclesia episcopalis sub titulo Deiparæ & sancti Petri, itidem non valde magnifica. Ante palatium Antonini Pii statua ex ære. Proxime adest Collegium, quod a Carolo M. primitus conditum tradunt. In uno e suburbiiis exstat sancti Salvatoris monasterium e nostris, ubi hospitati sumus, a reverendissimo Clemente abbate invitati.

V. Bobiense monasterium, antiquis Ebobiense, sancti Columbani secessu ac tumulo illustre, adituri, transiisso Pado, (ad cujus utramque ripam Hispanorum præsidia tunc erant cum ponte ex naviculis confecto, ob metum nostrorum) primo Bronium, ubi sancti Gothardi corpus in præclaro sacello colitur; deinde continuo montium assensu & descensu Bobium postero die pervenimus: quod in profundissima valle, pro loco satis amœna, frumento & vino ferendis idonea, ad annem Trebiam situm est. Illic Henricus I. imperator episcopatum instituit anno M XIV. In monasterio nihil fere nisi magni umbra

AN. 1686.
JUN 10.

nominis: monachi ad paucos redacti. Basilica monasterii, id est sancti Petri seu sancti Columbani, pro situ non inelegans, cathedrali beatæ Mariæ præstat. In illa nihil fere superest ex prima cœnobii antiquitate, præter eryptas subterraneas, ubi altaria quatuor, olim quinque. In præcipuo corpus sancti Columbani asservatur intra lapideam arcam, quæ anno M CCCC LXXX rudi opere facta est. Scilicet hoc superbum illud est mausoleum magni quondam abbatis Columbani: sed quibusvis oculis aureis præferendum. Lapidus insculptus cernitur Columbanus genibus flexis coram Pontifice quodam, a quo hydriam reliquiis plenam (quæ hydria ex alabaistro hodie quoque in sacrario servatur) accipit supplex. Gregorium M. esse existimant. Quamquam Gregorius tum, cum Bobium ex Gallia secessit Columbanus, amplius in vivis non erat. Exstat tamen Columbani ad eum epistola de celebratione Paschatis, quod abbas sanctus cum suis ritu Britonum, id est Orientalium more, celebrabat. Scriptor libelli de vita Salabergæ abbatissæ testatur, Gregorium rescripsisse ad Columbanum: sed hæc epistola excidit. Quinque tantum supersunt Columbani epistolæ, a Patricio Flemingo e tenebris erutæ: quarum prima & quarta est ad Bonifacium papam IV: secunda ad Gallicanos episcopos in unum sui causa congregatos anno duodecimo, quam in Vogensibus silvis degebat Columbanus, id est anno Christi DC I I. cujus Concilii nulla alia restat memoria. Tertia est ad suos Luxovienses, quos invitus deseruerat: quinta denique ad Gregorium M. Omnes singulari zelo præditæ & Christiana libertate. Quale enim est illud, quod in epistola quarta ad Bonifacium XV. quam instigante Agilulfo Langobardorum rege contra susceptionem trium Capitulorum scripsit, ita Pontificem interpellat? *Quid tacebit peregrinus Christianus, quod jam diu declamat vicinus Arrianus? ... Ut ergo honore apostolico non carcas, conserva Fidem apostolicam, confirma testimonio, robora scripto, muni synodo, ut nullus tibi resistat. Noli despicere consiliolum alienigenæ. ... Mundus jam declinat; Princeps pastorum appropinquat: cave ne te negligentem inveniat. ... Vigila itaque queso, Papa vigila, & iterum dico vigila: quia forte non bene vigilavit Vigilus, quem caput scandali isti clamant, qui vobis culpam injiciunt. Vigila primum pro Fide: deinde pro operibus Fidei jubendis, vitiisque calcandis. ... Te totum expectat, qui potestatem habes omnia ordinandi, bellum instituendi, duces excitandi, arma corripere jubendi, aciem instruendi, tubas un-*
dique

dique sonandi, certamen demum, te in fronte gradiente, ineundi... Vos prope celestis estis, & Roma orbis terrarum caput est ecclesiarum, salva loci Dominica resurrectionis singulari prerogativa. Et ideo sicut magnus honor vester est pro dignitate Cathedra, ita magna cura vobis necessaria est, ut non perdatis vestram dignitatem propter aliquam perversitatem. Tamdiu enim potestas apud vos erit, quamdiu recta ratio permanferit. Nemo qui nesciat, qualiter Salvator noster sancto Petro regni calorum contulit claves. Et vos per hoc forte superciliosum nescio quid præ ceteris vobis majoris auctoritatis, ac in divinis rebus potestatis vindicatis. Noveritis minorem fore potestatem vestram apud Dominum, si vel cogitatis hoc in cordibus vestris. quia unitas Fidei in toto orbe unitatem fecit potestatis & prerogativa: ita ut libertas veritati ubique ab omnibus detur, & aditus errori ab omnibus similiter abnegetur. Nihil solidius, nihil generosius. Miramur vero, miratus est & ante nos non sine stupore Columbanus ipse, quod se ad scribendum de catholica Fide compulerit Agilulfus rex Arrianus. Quippe quia non sine miraculo, inquit, reor esse quod video. Reges namque Arrianam hanc labem in hac diu regione, calcando Fidem catholicam, firmarunt: nunc nostram rogant roborari Fidem. Necdum vero Agilulfum Arrianismum ejuraverat, ut patet ex his ejusdem epistolæ verbis. Dolor namque suus, nempe Agilulfi, est schisma populi, pro Regina, pro filio, forte & pro seipso. Fertur enim dixisse, si certum sciret, & ipse crederet. Ejus rei causa Columbanus librum contra Arrianos composuit, teste Jona. Sed longius prolapsi sumus occasione Columbanæ epistolarum, propterea quod non satis notæ sunt, modo recusæ apud Anissonianos in nova Bibliotheca Patrum.

In eadem crypta Bobiensi ad sinistram præcipui altaris partem jacet in arcaitem lapidea corpus sancti Cumiani cu a veteri epitaphio, apud Ughellum relato, in quo tumbam jussu Liutprandi regis fabricatam fuisse legitur. Duæ hinc inde aræ continent reliquias sanctorum Attalæ & Bertulfi abbatum: quinta Virginis Deiparæ nomine insignis. In sacrario caput sancti Columbanæ in peculiari scrinio servatur, ejusdem cultellus & calix seu cyathus, hydria ex alabastro, illa scilicet, quam Gregorius M. reliquiis plenam sancto abbati dono dedisse perhibetur. Ibidem habetur vetus columba ex aurichalco ad reponendum olim Viaticum, & arietis figura concava, in qua oleum sacrum quondam asservatum existimamus. In postica parte crucis no-

AN. 1686.
JUNIO.

væ ex argento quidam pretiosi lapilli affixi sunt, nempe in summo acathes, cui Isis & Serapis insculpti, cum litteris ægyptiacis in circuitu. In dextero crucis ramo sacerdos Isidis cum sistro in læva, dextera in morem benedicens composita, capitis corona in modum crucis desinente: in sinistro item achates absque cælatura. In infima crucis parte alius achates cum Imperatoris effigie.

Bobiensem bibliothecam plurimis olim optimisque refertam fuisse codicibus facile colligitur, tum ex loci celebritate, tum ex vetustis libris, qui inde in bibliothecam Ambrosianam translati fuerunt; tum ex reliquiis antiquorum codicum, qui ad centum in eodem monasterio supersunt. Et quidem anno MCCCCXCIII in Bobiensi bibliotheca reperti sunt Rutilius Numatianus poëta, Satyra Sulpiciæ, Terentianus Maurus, Cæsius Bassus, Velius Longus, Adamantius Martyrius, Probi Catholica, Cornelius Fronto, Sergius grammaticus, & alii non pauci, ut ait Volaterranus lib. IV Geographiæ, & Pignorius ex eo in epistola XVI. Ex relictis ejusdem bibliothecæ quasi laciniis, quædam observamus in præsens, plura dicturi suo loco. In primis libellus antiquissimus, Franco-gallicis litteris scriptus, exhibet *abbreviationem Fidei catholicae expositam a sancto Hieronymo, ut quidam in hæresim lapsi corrigerentur*: quæ expositio constat articulis seu anathematismis XII. sub Rufini nomine edita apud Garnerium inter opera Marii Mercatoris in Dissertatione X. Deinde varia exstant in illa bibliotheca Bobiensi *Cypriani opuscula* in diversis veterum codicum, qui toti litteris quadratis scripti erant, fragmentis, nempe *de sacramento calicis, de opere & elemosyna*; variæque epistolæ. Ad hæc *Stephani Tungrensis episcopi liber de divinis officiis*: quo de libro alius agemus, referendo auctoris præfationem ad Ruotbertum *Mediomatricis*, id est Mettensis urbis antistitem. Non desunt forte qui hæreant, ut mihi sæpe contigit, in explicandis litteris duplicis ordinis, quæ in vetustis Kalendariis ad marginem apponi solent. Verum hanc dubitationem quodam modo solvit ejusdem loci Missale antiquissimum, in cujus initio hæc leguntur. *Sanctus Hieronymus in Martyrologio solaris anni, primo duo alphabeta ponere destinavit: deinde nomina dierum per duodecim menses anni; postea gesta dierum. Sed quarendum est, quid significent duo alphabeta hæc. Primum alphabetum ad Lunam pertinet, id est diem incensionis cujusque lune per totum*

annum: secundum alphabetum Solem designat, & littera superposita ostendit diem mensis, in quo luna illa renovatur per totum annum. Duas litteras observabis semper ad incensionem Luna, si annus communis fiat: si vero embolismus, tres: si saltus, quatuor. In Calendario ejusdem Missalis notantur festa monasterii peculiaria, de quibus alias, uti & de Regula sancti Columbani. Ex eadem bibliotheca mutuati sumus codicem Liturgiæ Gallicanæ optimæ notæ, litteris majusculis exaratum, & libros de Imitatione, qui nullum auctoris nomen habent, præter quartum, in cujus initio legitur: *Incipit liber Johannis Gersæ, cum quanta reverentia &c.*

Restat ut paucis agamus de archivo, in quo nulla autographa invenimus scripta ante sæculum nonum. Antiquius est Lotharii Imperatoris, qui rogatu Amalrici *Cumensis*, id est Comensis, urbis vocati episcopi & Bobiensis abbatis, confirmat monasterii privilegia. *Data XI. Kal. Sept. anno imperii ejus in Italia XXIV. & in Francia IV. Indiæ. VI. Actum Gundulsi-villa.* Eicardus notarius ad vicem Agilmari recognovit. Idem præstant Ludovicus II. interpellante eodem Amalrico; VVido ad preces conjugis suæ Ageltrudæ & Agilulfi Ebobienfis abbatis anno *DCCC XCV.* Lantbertus anno sequenti sub eodem abbate; Berengarius petente abbate Thieodelasio, *Data XIV. Kal. Novemb. anno Inc. DCCCC III, regni sui. XVI. Actum Papiæ civitate, palatio Ticinensi.* ubi Papiæ distingui videtur a Ticino, quasi Papiæ totam urbem, Ticinum regionem Papiæ, ubi palatium situm erat, significet. Denique Otto tertius itidem privilegium concedit, ut postulavit *vir venerabilis Gerbertus, nunt Ravennas archiepiscopus, & jam olim ex largitate reverendæ memoriæ genitoris, inquit, nostri Ottonis abbas monasterii Bobiensis, quod est constructum in honore sanctorum apostolorum Petri & Pauli atque Andree. Actum Papiæ anno ab Inc. DCCCC XCVIII. Indiæ. XII. imperii III. Data Kal. Octob.* Hæc sunt antiqua (nam recentiora mittimus) diplomata, quæ in illo quondam percelebri monasterio reliqua invenimus, ante annum millesimum scripta.

VIII. Ticinum reversi ad monasterium sancti Salvatoris, die sequenti Dominica monasterium sancti Spiritus Ordinis nostri virorum, nunc extra urbem, olim in civitate sub nomine sancti Galli, visitavimus: sed nihil ibi observatione dignum. Deinde duos sanctimonialium in urbe parthenones adivimus, quorum vetera instrumenta nobiscum communica-

AN. 1686.
JUNIO.

ta sunt rogatu reverendissimi abbatis sancti Salvatoris, ejusque monachorum. Primum eorum est cœnobium *Senatoris*, quod sub titulo sanctæ Mariæ & sancti Aureliani condidit sæculo VII quidam vir præpotens, nomine Senator, a quo nomen loco pro more gentis inditum est, *filius honorandi Albini & Theodelinda*, regnante Liutprando, anno tertio regni ejus, v Kal. Decemb. Indiçt. XIII. Alterum est monasterium *Theodota*, alias *Theodescha*, vulgo de * Posterula, cui Berengarius rex privilegium concedit, idque impetrat *quedam Dei ancilla*, *Richsinda* nomine, *monasterii sanctæ Dei genitricis semperque Virginis Mariæ abbatissa*, quod est situm infra urbem Ticinensem, & nominatur *Theodotæ*: conceditque ut eadem abbatissa, *degens sub Regula sancti Benedicti*, ipsum monasterium cum omnibus ejus rebus, usque ad finem vitæ suæ possideat: tum confirmat res omnes, *quascumque idem monasterium longo tempore dinoscitur possedisse* a GREGORIO ejusdem monasterii fundatore; atque id omne quod Cunipertus rex eidem monasterio concessit. Datum v. Kal. Aprilis anno DCCC XCVIII. Haud scio an idem sit cœnobium *Salvatoris constructum in honore beatissimæ Dei genitricis Mariæ*, ut loquitur in diplomate suo apud Posterulam affervato Berengarius junior anno DCCCC LI. quo anno privilegium Ermengardæ, prædicti Salvatoris monasterii abbatissæ impertit. Ex archivo Placentinæ sancti Sixti abbatiae actum est superius de eodem Salvatoris monasterio, quod a suburbano ejusdem nominis virorum monasterio distinguendum.

His archivis lustratis, visum est adire antiquam nostri quondam Ordinis, nunc Canonicorum regularium & Eremitarum Augustinianorum communem basilicam sancti Petri in Cælo-aureo, ubi sanctus Augustinus, maximus Ecclesiæ Doctor, præcipua religione colitur ob reliquias suas, quæ in illum locum octavo sæculo translatae sunt. Jacet in illa vetere ecclesia Severinus Boëtius ad gradus Sanctuarii ex parte australi, arca lapidea super quatuor columnas erecta, cum hoc epitaphio, quod *Balthasar Tachonus composuit* loco veteris scripti versibus Leoninis.

*Mæonia & latia lingua clarissimus, & qui
Consul eram, hic perii, missus in exilium.
Ecquid mors rapuit? probitas me vexit ad auras:
Et nunc fama viget maxima, vivit opus.*

AN 1686.
JUNIO.

Alia ejusdem Boëtii epitaphia leguntur apud Baronium. Prope hunc locum *requiescunt ossa regis Liutprandi*, (verba sunt ejus epitaphii) qui Liutprandus auctor fuit transferendi ex Sardinia Ticinum corporis sancti Augustini, quod modo ibidem incerto in loco lateret. Attamen in crypta sub altari, ubi corpora sanctorum reponi olim solebant, mausoleum exstat ex lapidibus coctis, & lampas ardens ante mausoleum, quod indicio est, ibi superesse, aut aliquando fuisse corpus sancti Doctoris. Elegans ejus cenotaphium cernitur ex parte Eremitarum Augustinianorum, qui latus australe occupant ecclesiae, Canonici regulares aquilonare, aut certe latus Evangelii.

De Boëtio ejusque libris de Consolatione Philosophiae in veterrimo codice Laurentianae apud Florentiam bibliothecae hae praemittuntur litteris Saxonis. QUINTUS FABIVS CONSUL FECIT HUNC PROLOGUM: VEL BOETIVS IPSE, VEL QUIDAM SCOTTIGENA, ID EST DISCIPULUS BOETII. *Tempore Teotrici regis, insignis auctor Boëtius claruit, qui virtute sua Consul in Urbe fuit. Cum vero Teotricus rex voluit tyrannidem exercere in urbe, ac bonos quosque in Senatu neci dare; Boëtius ejus dolos effugere gestiens, quippe qui bonis omnibus necem parabat; videlicet clam litteris ad Gracos missis, nitebatur Urbem & Senatum ex ejus impiis manibus eruere, & eorum subdere defensionem. Sed postquam à Rege reus majestatis convictus est, jussus est retrudi in carcerem; in quo repositus hos libros per satyram edidit, imitatus videlicet Martianum Felicem Capellam, qui primus libros de nuptiis Philologiae & Mercurii eadem specie poematis conscripserat. Sed iste longe nobiliore materia & facundia praecellit. quippe qui nec Tullio impar sit, nec Virgilio in metro inferior floruit. Haec ibi.*


Post ecclesiam sancti Petri in Caelo-aureo vidimus chronicon loci, a quodam Canonico regulari compositum, in quo varia ejusdem ecclesiae privilegia ex integro referuntur. Primum est Liutprandi regis, abbati & monachis concessum, quibus varias possessiones confirmat donatque. *Haec omnia, inquit, quae supra diximus, adjudicamus venerabili monasterio sancti Petri in Caelo-aureo, in quo sanctum ac venerabilem Augustinum adduximus. Datum IV. Non. Aprilis, regni Liutprandi primo, Indict. X. quae notae respondent anno Inc. DCC XII. quo proinde anno, qui Liutprandi primus erat, translatio sancti Augustini facta est, non anno DCC XXII. ut ego cum aliis aliquando*

AN. 1686.
JUNIO.

opinatus sum. Idem Liutprandus anno regni sui tertio donationem decessoris sui Ariperti regis confirmat *basilicæ beatissimi Apostolorum principis Petri, sitæ foris muros civitatis Ticinensis, & venerabili viro Lucedo Presbytero*. Is abbas erat, sed ob reverentiam Ordinis sacerdotalis tantum *Presbyter* more veteri appellatus. Quæ fuerit causa, aut potius quis color monachis substituendi Canonicos regulares, discimus ex diplomate Honorii Papæ tertii, dato Laterani Idibus Junii, pontificatus ejus anno v. qui fuit æræ Christianæ M C C X X. nempe quia monasterium *in spiritualibus & temporalibus erat collapsum, utpote pro magna parte jam dirutum, atque debito septem millium librarum moneta Papiensis oppressum*. Denique quod Abbas ejusdem loci ea occasione, quod ad nimiam desolationem memoratum monasterium pervenisset, *noviter esset occisus*.

Post hæc omnia eodem die obiter vidimus collegia apud Ticinum duo, nempe Borromæum, a sancto Carolo institutum pro convictoribus quatuor & viginti: alterum Papale Pii v. de *Boschen* pro quadraginta. Insignes ædes & picturæ in Borromæo, cujus quoddam quasi compendium videtur esse Pii v. collegium. Collegia in ea urbe omnino tredecim.

Sed revertendum est ad nostrum sancti Salvatoris monasterium, quod ab Adelaïde augusta in suburbio Ticinensi conditum fuit. Legimus in archivo primarias hujusce rei sub prævio Ottonis nomine Adelaidis litteras pro ipso monasterio Salvatoris, *ubi sanctum corpus beati Felicis martyris requiescit, & ubi dominus Hildebaldu abba à dicta domna Adaleyda imperatrice præordinatus esse videtur*. quæ litteræ scriptæ sunt anno imperii Ottonis Magni tertio, decimo die mensis Aprilis, Indict. XII. Servantur in eodem archivo libelli dotis, tum ipsius Adelaidis, a Lothario primo ejus marito concessæ anno D C C C C X X X V I I I. tum eodem anno, eisdemque verbis Bertæ reginæ, quam Hugo Italiæ rex in conjugem duxit. Sed his tandem minutis, tametsi nonnullius forte momenti, finis imponendus est, unicuique memorando authenticum Henrici primi Imperatoris diploma, eidem monasterio concessum Papiæ, anno dominice Inc. M X I I I I, Indict. XII. anno domni Henrici Imperatoris Augusti regnantis XII, imperii vero ejus primo. Appensum est sigillum plumbeum, in cujus antica parte exstat Henrici effigies coronata, dextra sceptrum tenentis, sinistra globum cum hac inscriptione: HEINRICUS D. G. ROMANORUM IMP.



AUG. in postica vero exhibetur urbs Roma & effigies sancti Petri cum duobus baculis, in quorum uno habetur. S. P. Q. R.

AN. 1686.
JUNIO.

DERTONA, GENUA, TAURINUM, &c.

X. A Ticino non integro duorum dierum intervallo Genua civitas distat. * Vicoiria, Dertona, Nova-urbs, Gavii, * Vultabium, Liguriæ urbes, eo ducunt mediis Alpibus. Ad earum deflexum sita est * Dertona, civitas episcopalis antiqua, quæ nonnullas reliquias antiquitatis retinet, in primis rudera veteris aquæductus. Ibidem episcopus fuit ante paucos annos Carolus Septala, museo suo Mediolanensi, de quo nos suo loco, non ignotus. Is ad illustrissimum Commendatorem a Puteo duos ex Dertona tumulorum typos submisit, quorum unus est P. AELII Sabini, nobilis adolescentis: alter Catervii illustris hominis Christiani. Utriusque exemplum ab illustrissimo Commendatore accepimus: qui tumuli, quoniam ex urbe Dertona transmissi Romam fuerant, ad Dertonam utique pertinere arbitrabamur. Sed postea res aliter visa est. Nam Catervii tumulus ad Tolentum civitatem spectare ex Ughello intelleximus. De altero, qui est P. AELII Sabini, hæret aqua. Typum ejus in adverso folio habes. In eo effictus est ex una parte casus Phaëtonis cum duabus hinc inde figuris juvenum duorum, qui equos singulos regunt, singulas in dextra sagittas gerentes, hac inscriptione utrimque adhibita, ἔδεις ἀθάνατος θάσος, εὐχένει, forte pro εὐχενεία. qua significatur, immortalem esse neminem audacia seu nobilitate. Audacia Phaëtoni, nobilitas duobus illis juvenibus apprime convenit. In averfa parte duo sunt pastores, calamum & fistulam multifidam instantes: & supra illos canis sub arbore, & prope aquilam seu aliam quamlibet avem homo nudus craterem effundens ad fluvium designandum, forsân Eridanum seu Padum, in quem Phaëtona cecidisse fabulantur.

* Voghera
* Voltaggio

* Tortona

Verum nobis antiquius esse debet Catervii, hominis Christiani, monumentum, quod Severina ejus conjux ipsi erexit, prout in apposito specimine oculis subjicitur. Ex una parte, quæ ambos conjuges repræsentat, hi versus insculpti sunt, non admodum exacti ad grammaticorum leges.

*Quos paribus meritis junxit matrimonio dulci
Omnipotens Dominus, tumulus custodit in ævum.
Catervi Severina tibi * congiunta latatur,
Quos Dei sacerdos Probianus lavit & * unxit.*

* Sic

AN. 1686.
JUNIO.

In pōstica vero parte, præmissa inscriptione de Catervio, qui centenario major obiit, alii versus adscripti sunt de Basso, minorenni ejus (ut videtur) filio, qui duodevigesimo vitæ suæ anno e vivis excessit.

ELIO UL. CATERVIVS. V. C. ex *Præf.* qui vixit cū SEPTIMIA SEVERINA C. F. *dulcissima conjugē annis XVI. minus dieb. tredecim. Quievit in pace annor. LVI. dier. XVIII. XVI Kal. Novembris. Depositus est IIII. Kal. Decem. SEPTIMIA SEVERINA C. F. marito dulcissimo ac sibi * sacrophagum & pantheum cum tricoro disposuit & perfecit.*

* sic

Hic longo intervallo disjungitur dies obitus a die depositionis seu tumulationis. Pantheum cum tricoro basilica erat trica-
merata. Versus de juniore Basso sic habent.

Flende jaces in Basso iterum defuncte Catervi.

Occidit ore genus, nomine posteritas.

Tu medius gemma, & germanis clausa metallis,

Morte tua fractum est Basse monile....

Octavus-decimus vix te suscepit annus :

Ocius eripitur quod placet esse Dei.

.... Pax ingeminat rursus præconia Pauli.

In adversa tumuli parte duorum conjugum hymenæus; in aver-
sa sancti apostoli Petrus & Paulus cum bono Pastore exhibentur.
Mediam inscriptionem retulit Ferrarius in Catalogo sanctorum
Italiæ ad decimum mensis Decembris, ubi Catervium uti mar-
tyrem, & Septimiam ejus uxorem, ambos ut sanctos laudat.
Eandem item adducit Ughellus in tomo secundo, agendo de
Tolentinis episcopis. Catervio nuncupata est Tolenti basilica
nobilis, olim Benedictinorum, modo Canonicoꝝ regula-
rium, eumque pro martyre & apostolo suo Tolentini habent.
Martyri tamen prædictam inscriptionem haud convenire non
diffitetur Ferrarius, apud quem mendose refertur. Rectius apud
Ughellum, cujus editio in paucis a nostra discrepat. Post *ex*
Præf. Ughellus addit *prætorio* : quod postremum vocabulū
omittit Puteanus typus, in quo *ann. c. vi* Catervius vixisse di-
citur. Præferenda videtur Ughelli lectio, apud Ferrarium item
diversa, ubi legitur *xlvi*. Ceterum Catervii acta expurgatio-
ne indigere Ferrarius sincere confitetur, nec Ughellus ea pro
indubitatis

indubitatis habet : Baronius ante eos erroribus scaterere affirmat. Si hæc nobis cognita fuissent adeundo Tolentum, ibi tantisper substitissemus ad rei veritatem indagandam. Sed tamen hic in transcurso non visum est omittendum. Catervii monumentum, ex quo Bassum, Catervii, non discipulum, sed filium fuisse non obscure colligitur. Frustra porro Ughellus ad alium Catervium martyrem recurrit, quando eidem Catervio & inscriptio præmissa, & acta Catervii, qualiacumque circumferuntur, omnino conveniunt. Qui martyrem dixere Catervium, non satis attente expenderunt hanc inscriptionem, ex qua sine dubio Catervii acta emendanda sunt. In ejusmodi rebus vitandum est judicium præceptis: sed laudanda Baronii religio, qui ob hoc Catervium Martyrologio Romano adscribere noluit. Utinam hanc religionem imitarentur, qui Sanctorum recens absque certis nominibus inventorum fictas historias comminiscuntur, atque in lucem obtrudunt ad confusionem (ne quid amplius dicam) verarum historiarum: immo & qui paganorum inscriptiones aliquando pro Christianis vulgant. Piget referre quod Tolosæ nuper accidit super quodam epitaphio *Diis Manibus* nuncupato, Romæ in cœmeterio Callisti nuperrime reperto cum sancti martyris corpore, cujus martyrium vas vitreum ibidem appositum (quod infitiri nolim) attestabatur. Inscrip- tio eo loci reperta sic habet. D. M. *Julia Evodia filia fecit castæ matri & bene merenti, quæ vixit annis septuaginta.* Juliam Evodiam proprium esse nomen martyris continuo vulgarunt. At quovis periculo asserere non dubitem, lapidem illum, cui epitaphium inscriptum est, esse ex eorum numero, quos ex gentilium tumulis revulsos Christiani suis sepulcris adhibebant, conversa ad interiora sepulcri profana inscriptione, ut * su-

AN. 1686.
JUNIO.
Baron. 10
4. Annal.
ad an. 3.

* pag. 136.

Baron. ubi
supra.

Sed hæc viderint Tolentinates: nobis vero tandem adeunda * Genua est, cujus situm in formam cornu lunaris secundum mare circumflectitur. Montium declives & infimas partes civium ædes; summas mœnia & præsidia urbis occupant. Non potest jucundior in sterili loco haberi adpectus, ubi ars &

* Genes

AN. 1686.
JUNIO.

magnificentia naturæ suppleant vicem. Ibi nulla fere veterum librorum bibliotheca, nisi quod Philippus Saulus episcopus Brugnatenfis, vir doctus, qui Euthymii commentarios in Psalmos latine vertit, libros suos xenodochio legavit. In eorum catalogo, quem Romæ legimus, nihil singulare nobis visum est. Bernardus Bissius, unus e nostris Casinatibus, qui Genuæ ad sanctum Maiolum degunt, vir doctus, Dictionarium sacrorum rituum tunc edebat binis voluminibus, quorum primum jam excusum nobis ostendit.

XIII. Die festo sanctissimi Sacramenti sollemnem Eucharistiæ gestationem, cui Senatus cum Principe sollemni aderat pompa, spectavimus. Processio fiebat e Domo, id est metropolitana sancti Laurentii ecclesia. Præcedebant more solito religiosi qui ex eleemosynis vivunt, deinde monachi, postea canonici & clerici urbis numero infinito: tum faces a singulis artificum ordinibus gestatæ cum uniuscujusque artis insigni nota: postea canonici Domus violacea toga induti, omnes cum casulis aut dalmaticis pro suo quisque Ordine. Hos sequebatur Archiepiscopus proxime ante sanctissimum Sacramentum, quod a duodecim sacerdotibus portabatur: extremus Princeps cum Senatoribus quatuor & viginti, subsequente infinita promiscui vulgi multitudine. In ecclesia sancti Laurentii præclarum est sacellum sancti Johannis Baptistæ cum statuis & ciborio ex ære, ubi sacri ejus cineres in loculo argenteo asservantur. Ecclesia Annuntiata, quæ Minorum est observantium, omnes elegantia superat, Lomelinæ magnificentia insignem monumentum. Columnæ, quæ fabricæ molem sustinent, ex marmore exquisito, uti & testudo major: duæ aliæ item testudines ex duplici parte principis altaris. Capella sancti Antonii item ex marmore pretioso. Omnia nitent auro & egregiis picturis. Collegium Patrum Soc. Jesu magnifici palatii formam præfert: Balbi ejus conditores vicinum palatium habent. Aurienfem multiplex: unum ad urbis portam, qua ex suburbio Arenæ in urbem aditus patet, *divino munere, sanctæ Romanae ecclesiae, Imperatoris Caroli v. invictissimi, Francisci primi Francorum regis, & patriæ* constructum fuisse, imposita docet inscriptio. Andreæ Aurie conditoris statua ibidem ex ære, cum epitaphio ejus camis, cui Carolus v. annuam pensionem assignasse dicitur. Alia palatiorum decora nec observare, nec describere visum est. Præterimus & illos cineres ex igne Gallicano. Jacobus Bracelleus

Genuensis, suo tempore clarus eloquentia, de præcipuis urbis suæ familiis libellum scripsit ad Henricum de Merla, Christianissimi regis, id est Caroli v. apud Genuenses tunc Legatum, ut ipsum de rebus ad suam legationem pertinentibus erudiret. Huic libello adjunxit descriptionem totius ditionis Genuensis, quam rogante Blondo Flavio in ejus historiæ scribendæ subsidium antea composuerat. Hæc descriptio typis non semel vulgaræ est: sed libellus alter, quia necdum prodiit in lucem, pro sua brevitate non ingratus hoc in loco futurus videtur, ad ea supplenda, quæ huic narrationi desunt. Sic autem habet codex Christianæ reginæ, qui olim Guillelmi Marlii fuit.

Magnifico & ornatissimo viro domino magistro ENRICO DE MERLA, regio Legato apud Genuenses, JACOBUS BRACELLEUS Genuensis salutem. Optare videris, magnifice & ornatissime vir, ut quandoquidem sæva hyeme, summo labore per gelu ac nives ad nos usque penetraisti, adeo rerum nostrarum edoctus a nobis abscedas, ut nihil eorum ignores, quæ diligentiam Legati commendare possint: ut si quando contingat Regem omnium clarissimum & christianissimum aliquid sciscitari, possis non solum de iis quæ generalia, quæque in aperto sunt; sed & de iis insuper, quæ paucioribus sunt nota, rationem reddere. Ego, qui utinam desiderio tuo morem tam gerere possim, quam tu dignus es, a civitate incipiendum putavi: arbitratus, si populum nobilioresque familias ejus, & in quas tribus dividi soleat, enarravero; deinde oppida & terras, quas a Varo flumine usque ad Macram Genuensis ora complectitur, ordine descriptas dederò; id implessè quod a me fieri postulasti.

Quatuor illustratur Genua familiis, de claritate & opibus diversa ratione certantibus: quæ adeo in æquo habentur, ut quam cui præferas, si omnia circumspicias, non facile judicium sit. Duobus Romanis Pontificibus, Innocentio & Adriano, plurimisque præterea Cardinalibus gloriatur FLISCA familia: e quibus Innocentium, acumen ingenii & summæ juris peritia, an bellum contra Federicum Imperatorem tunc rebellem Ecclesiæ gestum, clariorem reddiderit, prudentiorum judicio relinquo. Nec parum huic eidem familiæ claritatis afferunt oppida castellaque, quæ in diem usque præsentem imperio ejus reguntur.

Quatuor fortissimos mari duces nobis ostentat AURIA fa-



AN. 1686.
JUNIO.

milia, Obertum, Lambam, Paganum, Lucianum : quorum primus & patriæ diu præfuit, & Pisanam classem in ipsis prope oculis civitatis magna felicitate delevit. Paganus Græcos, Venetos, Catalanos, in belli societatem coeuntes, haud procul a Constantinopoli classe superavit : nec multo post Venetos ipsos nondum pacatos in Yonio mari iterum fudit ac cepit. Lamba & Lucianus quoque diverso tempore adversus Venetos dimicantes, nobilem de hostibus victoriam adepti, multum gloriæ claritudini generis addiderunt. Nec Sardinia, a Branca Aurio primo & posteritate ejus diu possessa, exigua fuit ad opes & splendorem accessio.

. SPINULAM domum cum plerique alii, tum Guirardus & Opicinus plurimum illustravere. Guirardum memorabilem faciunt animi fortitudo, robur corporis, divitiæ supra privati modum ; & urbs Luca, non modo in ditionem redacta, sed adversus etiam vim circumstrepentium hostium strenue defensa. Hic est qui indomito Leoni carcerem egresso non cessit, sed obviam venienti obvius processit, sinistramque veste involutam in os belluæ conjecit. Opicino tantæ clientelæ, tantusque fuit amicorum numerus, ut cum tota Marchionum Montisferrati soboles interisset, Opicinus filium Imperatoris Palæologi generum sibi assumptum ex Constantinopoli in Liguriam classe advexerit, eique tradito marchionatu insignem principem & insignis stirpis auctorem generum reliquerit.

GRIMALDORUM genus ex provincia Narbonensi ortum duxisse palam est, gentem antiquitate memorabilem, & Francorum Regibus admodum fidam : adeo ut eis bellum gerentibus perraro, aut numquam factum sit, ut regiæ copiæ vel mari, vel terra duces aliquos Grimaldos non habuerint. Memorant adhuc seniores nostri, cum Carolus Francorum Rex, Johannis filius, a Britannis hostibus intra ipsa regni viscera premeretur, accersisse Genua cum ingenti classe Carolum Grimaldum, ejusque forti opera adversus hostes usum esse. Sub hujus familiæ ditione plurima oppida, & non ignobiles adhuc ostendit populos Gallia Narbonensis. His quas nominavimus nobilissimis familiis datum est, ut earum duæ semper in senatu duos habeant senatores, quibus post quaternos menses duæ reliquæ succedunt.

Cæterarum familiarum, prout in urbe habitant, descriptio prope hæc est. Familia Silvestris, Catanea, Venta, Colum-



nenfis, Nigra, Malocella, Carmadina, Squarciafica, Cicada, Marina, Lercaria, Serrea, Camilla, Italica, Imperialis, Nigrona, Grilla, Vivalda, Lomellina, Ufamaris, de Mari, Centurionum, Gentilis, Pinella, Calva, Piccamilium, Cibonum, Guisulforum, Malabotorum; & si quæ sunt aliæ, quæ vel prope interierunt, vel in aliena nomina transierunt.

Habet ipsa quoque **plebs** familias digne memorabiles, Buccanigram, Adurnam, Campofregosam, Guarcham, Montaltam: ex quibus magna ex parte Genuenses Duces prodierunt, æqui interdum sanctique rectores, sævi nonnunquam exitiosi-que tyranni. Habet & Justinianam, Francam, Malrufam, Promontoriam, Furnariam, Saulam. Estque **plebs** ipsa in decem tribus, vel, ut aiunt, societates divisa. Primum ab Oriente suburbium divi Stephani vocant: secundam Castelli: tertiam Plateæ longæ: quartam Macanianæ: quintam divi Laurentii: Sextam Suxiliæ: septimam Portæ: octavam Portæ-novæ: nonam suburbii civitatis: decimam suburbii divi Thomæ. Hæc est brevissima Genuensis populi divisio. Quas vero urbes & populos orientalis occidentalisque ora Genuensis complectitur; ex descriptione Liguriæ, quæ sequitur, plane cognosces.

Hanc descriptionem prætermittimus, propterea quod alibi, ut jam monuimus, vulgata sit, tum Romæ in libris belli Hispaniensis, tum Germanicis typis apud Andream Scottum inter Italiæ illustrata scriptores. Hæc de Genua dicta sufficient.

XIV. Cum maritimo cursu patriam repetere cogitaremus, terrestri potius itinere visum est redire per Alexandriam, Aftam, & Augustam Taurinorum, quo die sexta - decima Junii pervenimus.

XVII. Missa apud Patres Fulienses beatæ Mariæ consolatricis celebrata, Necrologium abbatiæ sancti Solutoris, quæ eo in loco, ubi arx condita est, olim sita, Patribus Fuliensibus demum attributa fuit, nobis ostendit reverendissimus Fuliensium abbas Carolus Josephus Morotius, vir doctus, & libris editis non ignotus. Is Cartusienfis Ordinis historiam composuit, vulgavitque; item Amedei tertii Sabaudia Ducis vitam. Ad hæc monasticarum totius Italiæ Congregationum historiam meditat. Eodem die nobis assertum est, insignem hæreticorum bibliothecam, quæ antiquorum VValdensium erat, prope Luzernam igne periisse.

AN. 1686.
JUNIO.

XIX. Taurinis iter Lugdunum denuo relegimus. Primo die cum ad Novaliciense monasterium, quod in crepidine collis ad Alpium fauces situm est, sub finem diei accessissimus, rogavimus Fulienfium Italogum abbatem, ut si qua superessent in loco celebri veterum librorum aut chartarum monumenta, hæc nobiscum communicare pro sua humanitate non gravaretur. Negavit ille quidquam superesse. ^{et} tramus ad faces (nam jam nox imminabat) basilicam humilis & neglectæ fabricæ, horrido loco bene convenientem: cetera ædificia male item affecta. Cum e monasterio in subiectum opidum Novaliciense descenderemus, occurrit nobis Fulienfium Procurator: qui a nobis de archivo monasterii & bibliotheca interrogatus, respondit nonnulla quidem, sed pauca reliqua esse apud se diplomata, quorum unum esset Caroli M. Hæc non visa sunt tanti, ut institutum iter retardaremus. Postridie superato Cinisio monte, quinto demum die Lugdunum prospere, gratias Deo, ipso die festo Natalis sancti Johannis Baptistæ pervenimus. Dum illic tantisper consistimus, litteræ nobis redditæ sunt ab illustrissimo Comite Mezabarba de reperto post nostrum Mediolano discessum tumulo perantiquo apud Vaprium vicum Ducatus Mediolanensis. Effossa humo inventa est primo capsula in formam sarcophagi ex gypso, longitudine octo pollicum transversorum, altitudine septem, latitudine vero quinque. Intra hanc capsulam alia minor erat ex laminis argenti purissimi in modum capsularum, quibus ad tabacum, ait Comes, utimur. Sub his capsulis duo jacebant corpora integerrima, & super ea crux aurea reperta. Inscriptio hæc lapidi adscripta erat,

HIC REQUIESCET
IN PACE E. M. ARIUKL. V. H.
QUI VIXIT IN SÆCUL^s. ANN^s. PLUS
MINUS V. DEPOS. SUB DIE XVIII KL^s
HOCTUB^s. IND. VIII. KEEL^s.

Interpretationem illustrissimo viro faciendam relinquimus.

XXVII. Absolutis cum Anissonio, totius nostri itineris comite fidissimo, negotiis, eodem itineris compendio, quo discefferamus, Luteciam Parisiorum revertimur. Autisiodori dum moram facimus, imus in sancti Germani monasterium; preces & gratiarum actiones fusuri in sacro illo loco, in cryptis



inquam, quæ adeuntibus pietatem inspirant, sancti Germani quondam corpore, multorumque sanctorum conditorio nobilitatis. Triplicis sunt sub apside ordinis. In primo visitur sancti Germani mausoleum: sed corpus sacrum a Calvinistis superiori sæculo in favillas (horresco referens) redactum est. Evasisit illa strage Sudarium, quo sanctissimi Antistitis corpus Ravenarum a Petro Chrysologo archiepiscopo, suppeditante Placidia Augusta, involutum fuit. Pannus est ex serico, longus sex pedes cum pollicibus novem, latus quinque pedes cum quinque pollicibus; violacei coloris flavo permixti. Aquilis octo respersum est sudarium, internixtis rosas. Aquilæ semiexpansis alis, ex rostro singulas palas cum gemma non mediocri, & torques singulos in collo gerunt. Sacrum hoc sudarium in singulari apud populares veneratione habetur, & merito quidem propter tam insignem Pontificem.

Paullo extra viam & ordinem est, quod hic omittere religio, pictura scilicet haud vulgaris, Romæ ex templo sancti Theodori martyris ab illustrissimo Commendatore Puteano expressa: in qua Christus Dominus globo cælesti insidens, Petrum a sinistris cum Pontifice coronam offerente; & Paulum a dextris habet, adhærente rege, cum pallio liliis resperso, coronam item offerente. Qui sint illi, sive Pontifex, sive Rex, non facile occurrit. Fortasse hi fuerint vel Leo tertius & Carolus M. ex quibus ille pro ditione Pénapolis, hic pro regno Langobardorum vel imperio Christo coronam offerant: vel Clemens IV & Carolus Andegavorum Comes, quem Pontifex utriusque Sicilia regem coronavit. Hinc duæ illæ coronæ. Quod Pontifex & Rex ipse ibidem depicti sunt capitibus radiatis, id argumento est, eam picturam post eorum obitum factam fuisse. Nam viventes personæ illustres, sicubi depingebantur, ad caput *tabulæ quadratæ similitudinem, quod viventis insigne est, præferebant, non coronam*, teste Johanne Diacono in libro quarto de vita Gregorii M. cap. LXXXIV. Multa hujus rei exempla præ manibus habemus. Sed ecce iterum Romam nos revocat amor patriæ, cujus gratia prædictam picturam hoc loco pro ultima itineris nostri periodo exhibemus.

XI. Julii altera die tandem Luteciam Parisiorum reversi, JULIO: non sine mutua effusione animorum a nostris, qui nobis obviam concurrerunt, excepti fuimus. Post octo dies Remos profecti, ut itineris nostri rationem illustrissimo Remorum Archi-

AN. 1686.
JULIO.

episcopo, qui primus ejus auctor fuit, cum multa gratiarum actione redderemus. Hic vero nos quasi paterno affectu per dies aliquot complexus, cum officia & obsequia nostra se pro acceptis habere testatus esset, ab se dimisit, & Parisios ad nostrum sancti Germani monasterium redire permisit. Nunc mihi tandem receptui canendum, nunc de alio itinere cogitandum. Nam, ut ait Augustinus, PEREGRINATIONES, QUAS QUIETAS ET FACILES HABERE NEQUEAS, PER TOTAM COGITARE VITAM, NON EST HOMINIS DE ILLA UNA ULTIMA, QUÆ MORS VOCATUR, COGITANTIS, DE QUA VEL SOLA INTELLIGIS ESSE COGITANDUM.

August.
ep. 10.

ITINERIS ITALICI LITTERARII

F I N I S.

I N D E X

ITINERIS ITALICI.

A

A Bellonius & Adeltruda conditores monasterii Savilianensis, pag. 8
 Abraham Echellensis, 150
 Abraxas, 80
 Adalgeri Episcopi liber ad Rosvvidam reclusam, 128
 Adalais Augusta, 222
 Ægidius Viterbiensis, 111
 P. Ælii Sabini tumuli typus, 223. 224
 Ageltruda uxor V Vidonis regis, 219
 Agilulfus Langobardorum rex, 217
 Agilulfus abbas Bobiensis, 219
 S. Agnetis basilica & monasterium, 83 & *seqq.*
 Agnes Abbatissa S. Agnetis, 84
 Agobardi vitæ series, 68
 Albanera prope Casinum, 126
 Albertus ab Urso de Cazanemicis, frater Lucii 11 papæ, 199
 Alberti de Sarrhiano epistolæ 208, 212
 Aldo Dux, 209
 Aldobrandinus Cavalcantes episcopus, 162
 Alexandri Christiani epitaphium, 137
 S. Alexandri Parmense monast. 209
 Alexius Strozza, 162
 Alferius abbas Cavenfis, 117
 Altræmpensis bibliotheca, 78, 79
 Altaria lignea Romæ, 60
 Alteriana bibliotheca, 55, 56
 Alvernia mons, 179
 Alvisus monachus Cisterciensis, 149
 Amalricus Comensis episcopus, 219
 Amedei apocalypsis, 48
 Amolo episc. Lugdun. 68

Ambrosiana Missa, 15 Basilica, *ibid.* & *seqq.*
 Ambrosiana bibliotheca, 11 & *seqq.* 210, 211
 Ambrosius Camaldulensis, 169, 170, 171, 180, 181, 198, 201
 Ambrosius abbas S. Mariæ Florentiæ, 171
 Ambrosii Calepini autographum, 21
 Amphitheatra Veronense, 25 Romanum, *ibid.* 76 Vicentinum, 25
 S. Anastasii ad tres fontes basilica & monasterium, 142
 Anastasii Martyris miraculum, 134
 Anastasius Bibliothec. abbas S. Mariæ trans Tiberim, 61
 Andreas Saramita præstigiator, 19
 Andreæ fratres, Franciscus & Januarius, 105, 116
 Andreas Andreinus, 105, 118, 146
 Angilberga Imperatrix, 209, 210
 Angelicus Bigazzius abbas, 184
 Angelus de Nuce archiep. Rossanensis, 55, 70
 Angelus Positanus, 174, 175, 178
 Angelus Rocca, 93
 Anianus interpret Chrysostomi, 165
 Anionis fons seu Trebia, 127
 Anna Viterbiensis impostor, 158
 Annexastius episc. Ticinensis, 211
 Anselmi liber de sacramentis, 163
 Antoninus Florentinus antistes, 178
 S. Antonii abbatis cultus Romæ singularis, 136
 Antonius Ciosius Jurisconsultus, 168
 Antonius Majoragius, 16
 Antonius Merula, 204
 Antonius Murerus, 241

- Antonius Puccius episcopus Pistorienfis,** 170
Antonii de Senis episcopi Fulginatis liber, 196
Antonius Seripandus, 110, 111
Antrum Canis, 110
Apostolorum limina quid, 50
Aquinatis urbis rudera, 127
Aræ-cæli monasterium, 135
Arator Subdiaconus, 78
Arcionius abbas Parmensis, 208, 209
Arechisi principis somnium, 27
Aretium civitas, 178, 179
Aretini episcopi S. Donati se vicarios dicunt, 182
Aretinum SS. Lucillæ & Floræ monast. 173
Ariminum, 42
Arnaldus abbas S. Justinæ, 28
Aronense monasterium, 20
Aronensis codex de Imitat. Christi, 18, 20, 21
Assensionis festum celebre Veneriis, 37
Assumptio Virginis Deiparæ in Januario, 57
Ava Magdeburgensis monacha Senensis, 159
Avernus lacus, 108
Averoldus Antonius, 22
Augustini corpus Ticini, 220, 221, 222
Augustinus monachus Cavenfis, 118
Augustini Favoriti sepulcrum, 66
Auria Genuensis familia, 226, 227, 228
Auzer fluvius Lucæ, 188
- B
- B** Aia, 107, 108
Balsamus abbas Cavenfis, 118
Bandinus Legum doctor, 199
Baptismi ritus, 73, 81
Baptismus non nisi ex Episcopi mandato, 10
Baptisteria extra ecclesiam, 9, 10, 39
Barbadicus Cardinalis, 26 & seqq. 203, 205
Barbarina bibliotheca, 133
Barbarinus Card. Carolus, 77
Bartholomæus Beverinus, 188, 190, 191
Basilicæ qui a templis distinctæ, 91
Beatrix, Mathildis Comitissæ parens, 187
Beda an duplex. an Romæ mortuus, 144
Belisarii clypeus, 79
Benedictus medicus martyr Oricolis, 46, 47
S. Benedicti Mantuanum vel Padolironense monasterium, 97, 207
S. Benedicti in Piscinula ecclesia, 147
Benedictus Presbyter & monachus, 131
Benedictus monachus Cavenfis, 118
Benedictus Baccinus monachus Parmensis, 208, 209
Benedictus Zobius, 215
Benvenutus prior S. Felicitatis, 177
Bernardus Italiæ rex, 16
Bernardus Bissis Casinas, 226
Bernardi Oricellarii historia, 269
Berræ reginæ libellus dotis, 222
S. Bertholdus monachus Parmæ, 209
Bessarion Cardinalis, 33
Biblia Paulina, 53
Bibliorum codices, 68, 70, 71, 72
Bisomi loculi, 141
Blanchinus Veronensis, 49
Bobienfe monasterium & bibliotheca, 12, 215, 216, 217, 218, 219
Boëtius Ticini sepultus, 220. opus ejus, 221
Bona Johannes Cardinalis, 57, 62
Bonifacii VIII professio, 151
Bonifacius Simoneta Abbas Cornuti monasterii, 149
Bonizo episcopus Sutrinus, 14
Bonizo abbas S. Laurentii, 82
Bonodius abbas, 201
Bononia civitas, 195, & seqq.

Bornii de Sala liber contra Judæos, 106
 Borromæorum sepulcra, 17, 215, 21
 Bruti effigies, 166
 Bucentaurus navis unde dicta, 37
 Bulla aurea, 99
 Bulla plumbea Henrici Imperat. 23
 Burgundio Judex Pisanus, 164
 Burlamachus abbas, 188
 Burneti Latini Florentini liber, 169

C

Cestii tumulus pyramidalis, 151
 Cæcilia de Gonzaga, 198
 Cæsena, 41
 Cairada cœnobium, 211
 Cairus mons, 122
 Camaldulum, & Camaldulensis Ere-
 mus, 180 & seqq.
 Camillus Peregrinus, 102, 116
 Camillus Silvester Rodiginus, 38
 Candidus abbas S. Mariæ Florentiæ,
 161, 162, 194
 Canonici alterius sedis episcopo sub-
 jecti, 23
 Capella pontificia, 48, 49
 Capisuechius Cardinalis, 135
 Capitolium, Capitulum, 16
 Capranica bibliotheca, 150
 Capua duplex, 102
 Caravallis monasterium, 19
 Caramellus Antonius Franciscus Ca-
 maldulensis, 270
 Carnisprivii stationes, 152
 Carolus Cartharius, 56
 Carolus Joseph Marotius abbas, 229
 Carpatinæ, calcei genus, 118
 Caroli Episcopi Mediolan. corpus,
 17, 18
 Caroli M. an Calvi effigies, 70, 71,
 72
 Carolus Rex Siciliæ, 105, 106
 Caroli VIII numisma, 18
 Carolus Celanus, 114, 115
 Carolus Datus, 178
 Caroli Marfupini epiraphium, 165

Carolus Septala Dertonæ episc. 223
 Cartusia Neapolitana, 104, 105
 Carpius Marchio prorex Neapol.
 113, 114, 115
 Casanata Cardinalis, 21 & seqq. 48,
 70, 60
 Casinense monasterium, 119, 120,
 121, 122, 124, 125
 Castuli cœmeterium, 135
 Catacumbæ, quid, 90, 91
 Catacumbæ Neapolitanæ, 106, 114
 Catervii an martyris Tolentini inf-
 criptio & acta, 223, 224
 Catervii Flionis monumentum, 224
 Cathmix seu Cadmix variæ compo-
 sitiones, 189
 Cavense monasterium, 116, 117, 118
 Cennius Jacobus Maria, 190
 Censuum recensio, portæ basilicæ
 insculpta, 151
 Cerchiarus Johannes Martius, 26
 Cerrius abbas Augustinianus, 58
 Chalcedonense Concilium, 207
 Chelidonæ corpus Sublaci, 228
 Christi imago seu Veronica Laudu-
 ni, 88, 89
 Christi vultus Luca, 190
 Christianis in usu lapides sepulcrales
 pagauorum, 136, 137
 Christina Sueciæ Regina, *Serenissima*
 nomen respuit, 80
 Christinæ Suecorum reginæ biblio-
 theca, 53, 54
 Christophorus Landinus, 162
 Chrotildi pes anserinus, 109
 Chrysoloras Manuel, 98
 Ciaconii Alfonsi bibiotheca, 96
 Ciampinus prælatus, 49, 59, 60,
 63, 73, 74, & seqq.
 Cicero monachus Misenas, 107
 Cicerones Puteolis, 107
 Cimbri trucidati, 24
 Classense monasterium, 4
 Clavus ex iis quibus suffixus Chris-
 tus, 18
 Clerici Marris Dei, 190

- Cœmeteria Christianorum ab ethni-
 corum loculis distincta, 90, 91,
 137, 138.
 Colloredus Leander, Oratorii Ro-
 mani bibliothecarius, 67 S. R. E.
 Cardinalis, 138
 Columba ad servandam Eucharis-
 tiam, 217
 S. Columbani corpus & scripta, 216,
 217
 Colucius Pierius de Stignano, 183
 Congius Romanus, 73
 Conscrypta, 78
 Constantiæ seu Constantinæ mauso-
 leum, 84, 85
 Constantia Boemiæ regis uxor, 19
 Constantini arcus, 75
 Constantinus Cajeranus, 147, 150
 Constantinus Judex seu Rex Sardi-
 niæ, 182
 Constantius Martyr, 139
 Contra votum epitaphia, 79, 80
 Cornelius Margarinus Casinas, 53
 Cornelius Biscopius Joh. Baptista
 procurator S. Marci, 35, 36
 Corneus Cardinalis, 153
 Cornutense monasterium, 149
 Coronellus Vener. Cosmographus,
 204
 Corporum cremandorum primus
 auctor, 75
 Cosmus serenissimus Magnus Etru-
 riæ Dux, 193, 194
 Cosinus Annonus abbas S. Crucis, 134
 Crisconius Afer, 69
 Crucifixi imagines vestitæ, 133
 Crucifixus cum quatuor clavis, 9
 S. Crucis monasterium Romæ dictum
 in Jerusalem, 91, 92, 134.
 S. Crucis bibliotheca Florentina,
 163, 164
 Cryptæ ferratæ monasterium, 87
 Cumæ civitas everfa, 108, 109
 S. Cumianus Bobii, 217
 Cunigundis uxor Bernardi regis Ita-
 liæ, 209
- Cypriani codex antiquissimus Verō-
 niz, 23
 S. Cyriaci monasterium, 57
 Cyriacus Anconitanus, 43, 44, 45
- D
- D** Antes poëta, 41
 Defensor Grammaticus & mo-
 nachus Locociagensis, 123
 Dertonensē monasterium S. Martiani
 de Patrania, 207
 Desoncorum familiæ, 154, 155
 Diaconia, 151, 152
Dis iniquis nuncupatum epitaphium,
 79 contra votum, *ibid.*
 Diis manibus in epitaphiis Christia-
 norum, 73, 74
Diis pedibus & diis avibus affictæ
 inscriptiones, 118, 176
 Diurnus Romanorum pontificum li-
 ber, 77
 Dodo episcopus S. R. E. hoc est
 suffraganeus, 147
 Dodwellus refellitur, 138, 139
 Dominicus prior monast. S. Sixti, 74
Domus aterna dicta sepulcra, 141
 Donatus Bossius, 19
 Drogo abbas Glannafoliensis, 121
 Dulcinus Vercellensis hæreticus, 20
- E
- E** Celinus tyrannus, 28
 Epitaphium martyris aut Chris-
 tiani profanum, 73, 74
 Equi aqua lustrica aspersi, 136
 Erasmus a Caieta monachus Casi-
 nensis, 123
 Ermengarda S. Salvatoris abbatisa,
 210
 Estræi fratres Cardinalis & Legatus,
 48, 75, 154
 Evastus episc. & martyr Casalii, 9
 Eugenia abbatisa S. Mariæ in Tem-
 pulo, 74
 S. Euphemie monasterium, 22
 Eusebij Vercellensis ecclesiæ, &

Evangeliorum liber , 9, 10

F

F Abretus Raphaël.	73, 74, 156
Facundi opera,	201
Faita neptis Lucii papæ	11, 199
Farfense monasterium,	69, 149
Fausti episcopi opus de dogmatibus ecclesiasticis,	208
S. Faustini & Jovitæ monasterium,	21
Faustus Augusto ab epistolis,	193
Faustus Naironus Maronita,	150
Federicus Borromæus archiepiscop. Mediolanensis,	11 & seqq.
Feliciani Veronensis epigramma sepulchrale,	141
S. Felicis & S. Naboris monasterium,	200
S. Felicis Vicentiz monasterium,	25
S. Felicis Florentiz monast.	177
Femina an patriarcha CP.	27
Ferrarii epitaphium,	28
Fermentum Romanorum Pontificum,	134
Fesulana abbatia,	173
Flisca Genuensis familia,	227
Florentia,	160 & seqq.
Fortunatus Vinacesius Brixienfis,	22
Fortunatus Ulmus,	34
Fossæ-novæ monasterium,	99
S. Franciscæ Oblatarum monasterium,	86
Franciscus de Mileto Astrologus,	170
Franciscus Puccius Florentinus,	110
Frescobaldus S. Laurentii Florentiz præpositus,	167
Fridianus episc. Lucensis,	189
Frontini scripta,	27
Fundi civitas,	101

G

G abriels Palexori acta Concilii Trident.	133
Galeatius Archonatus,	12, 13
Galilæus Galilæi,	166
Gallæ Placidæ tumulus.	39, 40

Gallicana synodus occasione Colum- bani,	216
Gamburrinus abbas,	172
Gaudentius martyr,	139
Gaudentii episcopi Brixienfis concio- nes,	178
Gaudentius abbas Ambrosianus,	16
Gaudentius Robertus Carmelita,	208
Genius theatri,	103
Genua civitas,	225 & seqq.
S. Georgii monasterium Veneriis,	34
S. Georgii in Alga monasterium,	204
Georgius gloriosissimus,	151
Gerbertus abbas Bobienfis,	219
S. Germani Autissiodorense monas- terium,	230
Sudarium,	2, 1
Gezonis abbatis opus de corpore & sanguine Domini,	165, 207
Gianettasius Nicolaus Soc. Jesu,	105, 113
Giseprandis episc. Dertonensis,	207
Goffridi Vindocinenfis abbatis epis- tolæ,	54, 164
Gondollæ Venetæ,	31
Gonzata Æmilii nobilis Vicenti- nus,	25
Gordianus Galliæ Nuncius martyr,	139, 141
S. Gothardi corpus Bronii,	215
Græcorum sacri ritus,	85
Gratia Alexandria matrona,	153
Gratiani Decreti compilatoris epita- phium,	199
Gratus episcopus,	13
Gregorii Antiphonarium & corpora- le,	213, 214
Gregorius auctor monasterii Theo- dotæ,	220
Gregorius Conrarus seu Coriarius,	198
Grimaldorum Genuensis familia,	228
Galterius abbas Leonensis,	14
Gualterius abbas bibliothecarius Ve- netiis,	33, 204
Guarinus Veronensis,	181, 207
Guarinus Theatinus architectus,	7

Gubernaculum conciliorum, 162
 Nicolaus ejus auctor, *ibid.*
 Guichardinus Cælestinus, 104
 Guidius sculptor Romanus, 80
 Guillelmina Boëmina præstigiatrix,
 19, 20
 Guillelmus archiepiscopus Bituricen-
 sis, 91
 Guillelmus auctor epistolæ ad Fratres
 de Monte Dei, 197
 Guillelmus de Baiona Cardinalis, 27
 Guillelmus Cortesius abbas tum Car-
 dinal. 202
 Guillelmi Flisci Card. tumulus, 82
 Guillelmus de Rupeforti eques, 149
 Guinifius, Fabius archiepiscopus
 Ravennensis, 38
 Guirandus Alosianus, 203

H

H Egessippi libri Ambrosio inter-
 prete, 14
 Helenæ Augustæ dicata inscriptio, 92
 Helena Cornelia Biscopica virgo doc-
 tissima, 35, 36
 Henrico III facta inscriptio, 30
 Henricus abbas Pomposianus, 37
 Henricus de Merla, Legatus Franci-
 cus, 227
 Henricus Norisius Augustinianus,
 162, 166, 177
 Henrici Septimellensis carmen, 205
 Hermes Lontanus Brixienfis, 22
 Hermolaus Barbarus, 204
 S. Hieronymi calix, 97
 Hieronymus Aretinus abbas S. Flo-
 ræ, 194
 Hilarion Rancatus Cisterciensis, 77,
 92
 Hilarii episcopi versio Origenis, 207,
 208
 Hildebaldus abbas S. Salvatoris, 222
 Hildebrandus monachus, tum archi-
 diaconus ac pontifex Gregorius
 VII, 53
 S. Hillari monasterium, 184

Hollandorum bibliopolarum astus,
 95
 Honorii papæ effigies ex musivo, 81
 Honorii & Valentini tumuli, 40
 Honorii Imp. tumulus, 145
 Honorius Augustodunensis solita-
 rius, 14
 Hospitales tessera, 154, 155
 Hirmingardis abbatissa, filia Ludo-
 vici I Imp. 210
 Hugo Marchio Tuscia, 170
 Humberti Card. libri tres contra Si-
 moniacos, 168
 Humbertus abbas Sublacensis, 128
 Hyppoliti martyris statua, 63
 Hyppoliti martyris opus, 24, 25

I

J Acobi Angeli ad Chrysoloram
 epistola, 164
 Jacobus *le Bossu* monachus Diony-
 sianus, 94
 Jacobus Bracelleus Genuensis, 226,
 227
 Jacobus episcopus Fesulanus, 184
 Jacobus neophytus ex Judæis, 168
 Jacobi Papiensis Cardinalis epita-
 phium, 295
 Januarius martyr Neapoli, 105, 106
 S. Januarii monasterium, 114
 Janus Parrhasius, 110
 Illuminatorum secta, 19, 20
 Imaginum detectiones in Italia, 65
 Imperatori facta supplicatio ad cada-
 vera loco movenda, 198, 199
 Imprecationes in epitaphiis, 147,
 148, 149
 Indicis congregatio, 144
 Indulgentiæ antiquæ, 69
 Ingobertus Referens, 70, 72
 Innocentius IV Neapolise sepultus, 106
 Inscriptiones, 5, 6, 7, 9, 10, 13,
 19, 22, 24, 28, 29, 30, 33, 36,
 44, 46, 53, 57, 61, 62, 63, 66,
 68, 73, 79, 80, 85, 89, 92, 94,
 97, 102, 103, 111, 112, 113, 116,

- 119, 120, 126, 129, 130, 132, 135,
136, 137, 138, 139, 140, 141, 142,
143, 146, 147, 148, 149, 153,
155, 156, 157, 158, 163, 165, 166,
167, 172, 173, 178, 181, 187, 193,
195, 196, 199, 200, 206, 213,
214, 220, 223, 224, 225, 230
- Joachim abbas, 32
- Johannæ Pseudopapissæ fabula 27,
figura Senis, 159, 160
- S. Johan. Baptista caput, 87
- S. Johannis Evang. Parmense mon-
asterium, 208, 209
- Johannis Chrysostomi epistola ad
Cæsarium monachum, 178
- Johannis Gualberti reliquiæ, Pfsalte-
rium, fagus, 183
- Johannes abbas auctor vitæ Odonis,
123
- Johannes abbas S. Severini, 106
- Johannes Alerienensis episcopus, 64
- Johannis Antonii Campani liber de
gestis Braccii Ducis, 196
- Joh. Bapt. Beccius a Castillione, ab-
bas Aretinus, 178
- Johannes Bodier Cenomanus, 91
- Johannes Carolus Florentinus, 162
- Johannes Diaconus Neapolitanus,
63, 106
- Johannis Gersen libri ms. de Imit. 21,
208, 219
- Johannes Marca-nova, 205
- Johannes Palagius Romanus, 142
- Johannes Pastricius doctor, 61
- Johannes Patricius Romanus, 57, 58
- Johannes Ragusæ episcopus, 43, 44
- Johannes episcopus Ravennas, 56
- Johannes Salernitanus, 162
- Johannes Tufculanusepiscopus, 147
- Johannes Saracenus abbas Vercellen-
sis, 129
- Johannes Spatarius, 201
- Johannes Subdiaconus Casinensis, 69
- Johannes abbas Sublacensis, 69
- Josephi codex in phyllira, 12
- Josephus Semenzius Somascus, 18
- Josephus Thomasius Theatinus, 92
- Jotti epitaphium, 172
- Isidorus Clariæ vir doctus, 45, 123,
171, 172
- Itta abbatissa S. Hillari, 184
- Julia Evodia temere pro martyre ha-
bita, 225
- Julius abbas ex Fuliensibus, 60
- S. Justinæ Monasterium, 28
- Justiniani Veneri a Nicolao monacho
ducunt originem, 34, 35
- Juvenianus subdiaconus, 68
- K
- K** Alendis Augustalibus munera
Romæ dari solita, 77
- L
- L** Adislaus rex Neapoli sepul-
tus, 112
- Lana conficiendis palliis archiepisco-
porum benedicta, 84
- Lappæum Cretæ oppidum, 33
- Lateranensis basilica, 54, 55, sedes
Romanorum pontificum, *ibid.*
- Laurentianum mausoleum Magnor-
um Ducum, 192
- Laurentiana basilica & monumenta,
168
- S. Laurentii Aversæ monasterium, 119
- S. Laurentii Romæ monasterium, 82
- Laurentius Statilius, 202
- Lauretum, 43 & *seqq.*
- Leo Allarius, 61, 77
- Leopardus abbas Nonantul. 125, 134
- S. Leucii monasterium, 74
- Leonardi Bruni Arcini epitaphium,
165
- Leonardus Vinciæ pictor, 12, 13
- Liburna urbs, 187, 188
- Litaniæ veteres, 134
- Litterarum ordo duplex cur in Ka-len-
darium margine positus, 218
- Liturgia Gallicana, 219
- Liutprandus Rex Ticini sepultus, 221
- Liutprandi pes, 177

- Locociagenſe monaſterium, 123
 Lothariani imperii epocha, 209
 Lini Colucii Salutati epiſtolæ, 170
 Luca civitas, 188, 189
 Lucedus preſbyter & abbas Ticinenſis, 222
 Lucenſe monaſterium, 209
 Lucia abbatiffa S. Agnetis, 83
 Lucina ſeu Lucernarium, 151, 152
 Lucius monachus Cavenſis, 126
 Luculenti ſermones, 69
 Ludovici II Imp. diplomata, 209, 210
 Ludovici V II anniverſarium, 23
 Ludovicus de Creil Doctor, 94
 Ludovicus Guerra abbas S. Proculi, 195
 Ludovicus de Venetiis abbas S. Juſtina, 28
- M
- M** Agliabecus Antonius, 21 & ſeqq. 161 & ſeqq. 166, 173, 194
 S. Maioli monaſt. Genuæ, 226
 Malateſta Carolus, 27. Sigifmundus, Pandulfus, *ibid.* Novella, 41, 42, 206, 207
 Malvaſia Comes, 202
 Manigunda matrona ſanctimonialis, 211
 Mantua civitas, 207
 Manuel Chryſoloras, 181
 Mapheus Vegius Laudenſis, 37
 Marcella cum Martyribus 450, 119
 S. Marci baſilica & Evangelium Venetiis, 31, 32 Bibliotheca, 33
 Margiſa Regina Sardinia, 112
 Mare ſponſatum a Venetorum Duce, 37
 S. Maria-majoris eccleſia Roma, 65
 S. Maria Florentina monaſt. 161 & ſeqq.
 S. Maria ad caput Trebia prope Placentiam monaſt. 209
 S. Maria in Tempulo monaſt. 74
 Maria & Thermantria Stiliconis filia, uxores Honorii, 145
 Maria Puteolana virgo, 107
 Maringus curtis regia, 210
 Marii Martyris epitaphium, 138
 S. Marini Papiæ monaſt. 210
 Marinus Chryſocatactes, 201
 Marius Florentiniuſ, 188, 190
 Marones, cameli humani, 6
 Maronitarum ſacri ritus, 83
 Maronitarum ſacra & eccleſia, 146
 Martyres Chriſtiani plurimi, 138, 139
 Martyris epitaphium profanum, 73, 74
 Martina Gallæ inſcriptio, 206
 S. Mathia & S. Michaëlis Murani monaſteria, 203
 Matidia, 25
 Mathildis Comitiffæ oſſa Romam delata, 97
 Matthæi Boſſii Veronenſis opera, 174, 175
 S. Mauri abbatris cultus antiquus, 125
 Maurus abbas S. Pancratii, 75
 Maximus martyr, 86
 Mayfreda Pirovana Ord. Humiliatorum, 19, 20
 Mediolanum, II & ſeqq. 210 & ſeqq.
 Mezabarba Comes, 15, 28, 19, 210, 230
 Michaëlis Angeli a Bona-rota tumulus, 165, 166
 Michaëlis Mercati Miniarenſis Metallotheca, 178
 Michaël Monachus, Canonicus Capuanus, 102, 112, 119
 Mignanellus Jacobus abbas Senenſis, 159, 160
 Mincii confluxus in Eridanum, 207
 S. Miniatis monaſterium, 184
 Minorum habitus primigenius, 106
 Mſenum urbs, 107, 108
 Moſi Romani inſcriptio, 187
 Modoëtiana baſilica, ſupellex & coronæ, 212, 213
 Molinos Michaël preſbyter Hiſpanus in vincula conjeſtus, 72
 Monaſterium. Epifcopo qui ſubjeſtum,

ITINERIS ITALICI. 241

jectum, 211, 212
 Moscardi Comitum museum, 24, 25
 Mutina civitas, 202

N

S. Nazarii Veronæ monasterium, 23
 Neapolis, 104, & *seqq.*
 Neri Capponius, 187
 Nicolaus prædicator Hispanus, auctor Gubernaculi Conciliorum, 163
 Nili monachi tractatus, 171
 Nonantulanum monasterium, 125, 134, 202
 Novaliciense monasterium; 270
 Novarienses ecclesiæ, 10

O

O Blatæ Helenæ Cornelie votum, 36
 Obsequentius episc. Lucensis, 189
 Oricolæ opidum, 46
 Octavius Ferrarius vir doctus, 28, 29
 Ejus epitaphium, *ibid.*
 Odescalcus episcopus Novariensis, 10, 17
 Odo abbas S. Dionysii, 129
 Onufrius Panvinus, 52
 Oratorii Romani patres, ecclesia & bibliotheca Vallicellana, 67, 68, 69
 Orientem versus sepulti Christiani, 141
 Origenis liber, 168
 Origenis hexapla, 95
 Otto Comes Johannis, 69
 Ottobonus Cardinalis, 49, 93
 Ovidii mausoleum, 58

P

P. Candidi Decembrii epistolarum libri octo, 197
 Paganorum sepulcrales lapides conversi in Christianorum usus, 136
 Palladius Vicentinus architectus, 25,

Pallia archiepiscoporum, 84
 S. Pancratii monasterium, 75
 Pandeætæ Justiniani, 184, 185
 Pantaleon Consul, 53
 Pantheum cum tricoro, 224
 Papia, 215, 219, 220, 221, 222, quæ distincta a Ticinensi palatio, 219
 Parma civitas, 208, 209, 210
 Patavium, 26 & *seqq.*
 Patavina seminaria, 205
 Patinus Carolus Eques medicus, 28, 29
 S. Pauli basilica, 52, 53
 Pauli Jovii epitaphium, 17
 Paulus Canonicus regularis Veronensis, 198
 Paulus Orlandinus Camaldulensis, 170
 Paulus Veronensis pictor, 34
 Pauliypus mons, 107
 Philippus Benerius, 163
 Philippus Saulus episc. Brugnatensis, 226
 Pederotes amethysi, 146
 Pelagii papæ effigies ex musivo, 81
 Pes Aliprandi, *Vid.* Liutprandi
 Petrarchæ tumulus, 29 laurea poetica, 30
 Perronii fragmentum, 202, 203
 Petrus apostolus, ubi crucifixus, 48
 S. Petri basilica Vaticana, 49, 50, 51, 52
 S. Petri in Cælo-aureo monast. 220, 221, 222
 S. Petri Glaciatense monast. 17
 S. Petri Mutinense monast. 202
 Petri, Abbacyri & aliorum reliquiæ, 152
 Petri Barrotii cenotaphium, 206
 Petrus abbas Ambrosianus, 16
 Petrus abbas Cavenis, 117
 Petrus Mallius Canonicus Vaticanus, 52
 Petrus Delphinus, 166, 179, 181, 203
 Petrus Venetus monachus, 34
 Petrus præceptor eremitarum Camalduli, 182
 Petrus Diaconus Casinensis, 121, 123, 125

- Petrus Diaconus Neapolitanus, 109
 Petrus ex Comite Autissiod. Imperator CP. 81
 Petrus Bellorius, 54, 58, 114
 Petrus de Sanctis, 58
 Petri Apollonii Collutii Novariensis carmen, 194
 Peyreschii epistolæ ineditæ, 133
 Picciati museum, 113
 Piccinardus Seraphinus, 135
 Picus Mirandula Johannes, 174, 175, 178
 Pippini Regis sepulcrum, 22
 Pifa, Pisani equites S. Stephani, 185, 186. basilicæ & cœmeterium urbis
ibid. Pisani Concilii historia, 27
 Piscina mirabilis, 108
 Pistorium civitas, 192
 Placidus Puccinellus decanus Casinensis, 17
 Placii martyris vita triplex, 125
 Platina sepulcrum, 66
 Plotini liber in animarum præexistentiam, 169
 Plumbioliæ monasterium, 127
 Pœnitentium sodalitates & flagellationes, 8, 9
 Poggii epistola inedita, 211
 Pomposianum monasterium, 37
 Pondera Romæ inventa, 156
 Pontiani cœmeterium, 136
 Pontificalis Romani ritus singulares, 164, 165
 Portensis civitas, 153
 Portiana basilica Mediolani, 17
 Præsepe sacrum, 131
 Prætalesense monasterium, 30
 Primitius martyr, 139
 Prissanensis Comitatus, 210
 S. Proculi Bononiæ monast. 195
 Prosperi Phaneli Calabri, monachi Casin. opus, 133
 Prosperi sanctacrucii opera, 133
 Prudentius laudatur, 139
 Prolomæus de Luca, 27
 P. Elius Sabinus, 27
 Paricelli opera, 14, 18, 19, 20
 Pusterla Johannes Ambrosianæ bibliothecæ præfectus, 211
 Puteanus Commendator Romæ, 142, 143, 231
 Pureoli civitas, 107
 Puticuli locus Romæ vulgi sepulcrum, 140
 Pyrrhus Tribunus, 24
 Pyrrhi Ligorii opera inss. 8
- Q
- Quintiliani libri ad S. Gallum reperi, 211
 Quintus Fabius Consul, 221
- R
- R. Aliax vel coronata mortuorum effigies, 231
 Raphaël Urbinas, 156
 Ravenna civitas, 38, & seqq.
 Ravennensis diplomata, 101
 Reliquiæ quæ Romæ Gregorii M. ætate, 5
 Regina monasterium Papiæ, 209, 210
 Regulæ S. Benedicti codex, 124
 Richardus Anglorum rex, Lucæ sepultus, 189
 Richerius abbas Casinensis, 101
 Richinda abbatisa Theodora, 220
 Ricina sive Recanatum, 43
 Robertus rex Neapolitanus, 105
 Robertus electus Trevirensis, 98
 Robertus de Arbrussello, 164
 Rodulfus Paderbornensis episc. 184
 Rogerii regis bulla aurea, 118
 Roma, 47, & seqq.
 Romanus Canonic. Vaticanus, 51, 52
 Romualdi commentarius in Psalmos, 181, 182
 Rusticeliæ gentis sepulcrum, 156, 157
- S
- S. Abellici epistola, 203
 S. Salvatoris Bononiæ monast. & bibliotheca, 195, 196, 197

S. Salvatoris Brixienſe novum monaſterium, 209, 210
 S. Salvatoris monaſt. Ticinenſe, 215, 220, 222
 Salviniſus Antonius Maria, 168
 Sannazarii tumulus, 107, 112
 Sapientiæ Collegium Romæ, 150
 Savilianenſe monaſterium, 8
 Sceleratus, quis, 180
 Scheleſtratus Vaticanæ bibliothecarius, 62, 63, 65, & ſeqq.
 Sebaſtianellæ ædis picturæ, 131
 Sebaſtianus Maccius, 176
 Segufianus arcus & inſcriptio, 6
 Semo Sanctus Deus filius, 87
 Senæ civitas, 159, 160
 Senatoris Ticinenſe monaſt. 220
 Senator filius Albini, vir præpotens, 220
 Sepralæ Franciſci muſeum, 14
 Septimia Catervii uxor, 224
 Septimiſe Severi Septizonium, 83
 Sepulcra Chriſtianorum, 138, 139, 140, 141. Sepulcra ethnicorum a Chriſtianis adhibita, 82
 Serena Stiliconis uxor, 20
 Sergius Silus, 146
 Seripandi Cardinalis bibliotheca Neapoli, 110, 111. Iter ejuſdem ad Conc. Trident. 206. V. Antonius.
 Serpens æneus Mediolani, 16
 Severiani epiſcopi ſermones, 114
 Severina Catervii uxor. 223
 S. Severini monaſterium, 106
 Severinus ab Aſculo abbas Farfenſis, 149
 Severinus de Pedepennis Bitontinus, 149
 Sibyllæ antrum, 108
 Sigillum Ludovici 11 Imp. plumbeum, 209. Item Henrici 1 Aug. 222. Sigillum averſum in affixis, 118
 Sigifmundus Fulginas, 45
 Silvius Picolomineus, 97
 Simon Salterellus epiſcopus, 162
 S. Simpliciani monaſterium, 17

Sirleri Card. de Concilio Tridentino collectanea, 111
 Sirinionenſe monaſterium Papiæ ſeu B. Mariæ Britonum, 209, 210
 S. Sixti monaſterium Romæ, 74. Placentinum, 209
 Sixtus V, 65, 66, & ſeqq.
 Sluſius Cardinalis, 48, 98, 154
 S. Solutoris monaſterium, 219
 Sozius Miſenas martyr, 106
 Sozomeni præbyteri Piſtorienſis chronicon, 174
 Spinola Cardinalis, 190
 Spinula Genuenſis familia, 228
 S. Spiritus Ticinenſe monaſt. 219
 Spitigneus Boëmæ Dux, 155
 Stephania dicta eccleſia Neapolis, 106
 S. Stephani Bononiæ monaſt. 200
 Stephanus Anicienſis epiſc. 115
 Stercoraria ſedes Lateranenſis, 58, 59
 Sublacenſe monaſt. 69, 127, 123, 129
 Sadarium Taurinenſe unde allatum, 5, 7
 Sulphurata Puteolis, 109, 115

T

T Abulæ quadratæ ad capita vivorum, 231
 Talenti menſura Piſis, 187
 Tapsennarum epitaphium, 119
 Tarracina ſive Anxur, 99, 100, 101, 102. Tarracinenſe monaſt. 100, 101
 Taurinum civitas, 7, 8
 Tellerii Franciæ Cancellarii mors, 119
 Terra Jeruſolymis allata, 186, 187
 Teuzonis monachi commentarius, 171
 Theobaldus Campaniæ Comes prope Vicentiam ſolitarius, 25, 26
 Theodaſius epiſcopus Aretinus, 182
 Theodelinda regina, 212, 213
 Theodaſius abbas Bobienſis, 219
 Theodorici regiſtrumulus, 40
 Theodoſii Junioris inſtrumentum inſigne, 24
 Theodotæ monaſt. Ticinenſe, 220

244 INDEX ITINERIS ITALICI.

Therma Diocletiani,	57	Vesuvius mons,	115
Therma Antoninianæ,	74	Ughelli epitaphium,	142, 143
S. Thomæ monast. Papiæ,	210	Ugo schismaticus,	14
Thomas Aquinas monachus Casini,	123	Viar. pseudosancus,	145
Thomas Januensis de Valerano,	149	Vicarius S. Ambrosii, episcopus Me-	
Thomatus Josephus-Maria,	92, 134	diolanensis,	102
Ticinum seu Papia,	25, 219, 220,	S. Victoris Ravennense monast.	39
221, 222		Victoris Amedei inscriptio,	7
Titi Livii sepulcrum & statua,	29, 30	Vincentius Quirinus Venetus,	160
Traconaria crypra,	108	Virgillii sepulcrum,	113
Tridentini Concilii historia ms.	194	Virginum consecratio,	35
Tridiavorum familiæ,	154, 155	Vivianus Mathematicus,	137
Trivultiorum sepulcra,	20	Umbrena Pollia,	10
Typographiæ auctores Romæ,	64	Urbani III. statutum de Ludovici VII	
Tyronenses monachi grisei,	197	annua prece,	23

V

V Sabinensis episc. an. M^o XC, 147
Valerius Zani Comes, 195,
201

Valleria Advocatus Neapolitanus,
104, & seqq. 113

Vallis-umbrosæ monast. 183, 184

Vangadiciense monasterium, 26

Varonis villa, 127

Vas amplum in Cœnam dominicam,
200, 201

Varicana bibliotheca, 62, 63. Ty-
pographia, 63, 64, 143

Venetia, 30. & seqq.

Veronica, imago; an femina, 88, 89

Verona, 22, 23. Ejus amphithea-
trum, 25

Vespasianus librarius, 174

Urbis Episcopi, Suffraganei, 147
Ustathius Dux, 161

Ustrinum corporum, 78

Ufuardi martyrologium, 150, 151

VVaimerus Princeps Salernitanus, 118

VValturi Roberti libri, 27

VViclef opera, 169

VVillelmus abbas S. Dionysii, 129

VVillelmi Theodoricensis libe-
officiis, 163. Ejusdem epistola ad
Eratres de Monte-Dei, 197

Y

Y Milla, non Zimilla, regina,
135

Z

Z Acharia papæ numisma, 18

S Zenonis monasterium Vero-
nense, 21, 23

ERRATA.

P Ag. 9. lin. 4 lege cymbam. 13 lin. 5 Leonardi. 24 lin. 14. corrige accentus in. 8^o n &
idiot. 50 lin. 27 Pippinus lege Carolus. 66 lin. 25 scribe dionysii. 77 lin. 26
Allatus lege Holstenius 101 lin. 22 dele quod pane singulare. 123 lin. 2 lege nempe
Johannis Abbatis &c. ut lin. 6 146. lin. 28 scribe Prædiores. 153 lin. 25 scribe ubique
Hippolytus. 158 lin. 18 lege Annii. 166 lin. 24 inanimem. 168 lin. 7 post pietatem adde
contestantur. 185 lin. 31 adde Scaliger sequioris posse esse generis contendit adversus
Augustinum, et si græca vox sit masculini. 196 lin. 18 lege Theon. 203 lin. 8 luce.
204. lin. 19 scribe Ganymedis. 204 lin. 38 Franciscus Pithæus. 231 lin. 37 pro XI lege II.

MUSEUM

MUSEUM
ITALICUM

TOMI I

PARS ALTERA



IN SEQUENTES HOMILIAS
S. MAXIMI
 EPISCOPI TAURINENSIS
 PRÆFATIO.

I.



Lteram hujusce voluminis partem auspicamur (quod faustum fortunatumque sit) ab homiliis quibusdam ineditis sancti Maximi Episcopi Taurinensis: cujus tanta facundia, tantum studium in rem Christianam fuit, ut vulgata ejus homilia digna sint meliori luce. Ita enim vero distracta, & alienis coloribus infusata sunt, ut quis sit earum legitimus parens, etiam apud viros doctos dubitetur: dum hi alias Ambrosio, illi alias Augustino tribuunt. Neque tamen adeo difficilis est de iis conjectura, ut auctori suo (si modo quis diligentem operam adhibeat) tandem restitui non possint, maxime Gennadio duce, qui earum argumenta & titulos magna ex parte retulit. De omnibus illis homiliis, sive qua apud Ambrosium, sive qua apud Augustinum, seu qua apud ipsum Maximum exstant, accuratam afferre censuram, non est nostri instituti. Hac cura partim occupata est a sodalibus nostris, tum iis qui Augustini sermones cum accurato delectu ab intrusis & suppositiciis jam repurgarunt, tum ab aliis item nostris, qui novam Ambrosii operum editionem adornant: nos tantum, quod e re nostra erit, hoc loco exsequemur.

II. *Maximi homilias plerasque, si non omnes, invenimus in*
Mus. Ital. To. I Pars 2.

A ij

4 S. MAXIMI EPISC. TAURIN.

tribus codicibus p. antiquis : quorum unus Mediolani habetur in bibliotheca Ambrosiana : alter Roma in monasterio sanctæ Crucis, quod in Jerusalem appellatur : tertius in abbatia sancti Galli apud Helveticos. Postremus hic codex, litteris majusculis ab annis mille totus exaratus, continet homilias XC VII sub hoc titulo, In Christi nomine incipiunt homilias S. Augustini episcopi & conf. præmissa capitulatione singularum homiliarum. Pleraque ex his homiliis vulgata sunt inter opera Ambrosii, Augustini, & Maximi prædicti : sed neque Ambrosium, neque Augustinum ; omnes vero, aut fere omnes Maximum habent auctorem. Viginti & una inter eas inedita sunt : quas rogatu nostro descripsit religiosus & doctus Hermannus Shenkius, sancti Galli bibliotheca præfectus.

III. Ambrosianus codex, haud minus antiquus, charactere Langobardico exaratus est, sed initio mutilus. Erant in eo codice homilia ferme LXXX. non omnes eadem atque in codice sancti Galli ; quadam cum titulo sancti Maximi Taurinatis episcopi, qui re vera earum est legitimus parens.

IV. In codice Romano sanctæ Crucis, qui fuit olim monasterii Nonantulensis, ante annum Christi octingentesimum acquisitus ab Anselmo abbate, continentur homilia LXXIII. ex quibus pleraque in sancti Galli exemplari habentur. Inscriptum erat in fronte codicis nomen auctoris : sed, eo abrado, sancti Ambrosii nomen substitutum. Maxima pars tamen harum homiliarum sunt Maximi : tamen quadam alia Hieronymi & Augustini sub eorum nomine inserta sunt.

V. Ex his tribus codicibus, quantumvis antiquis, non eruitur certa & explorata notitia omnium sancti Maximi homiliarum. siquidem sancti-Gallensis eas sub Augustini falso titulo adducit : sanctæ Crucis codex, deleto veri auctoris nomine, Ambrosium præfert : unus Ambrosianus Maximo quasdam assignat, sed paucas, ut postea videbimus. Verum ex aliis indiciis, maxime ex Gennadio intelligimus, omnes, aut propemodum omnes, præsertim quæ in codice sancti Galli exhibentur, Maximo esse tribuendas. Et quidem ita simul connexæ & colligatæ sunt, ut si unarum auctor exploratus habeatur, de aliis consequens futurum sit iudicium. Auctor quippe passim homilia præcedentis in subsequenti mentionem facit. Atqui pleraque Maximum uti legitimum parentem agnoscunt, utpote quas Gennadius manifeste designavit. Hoc in numero eas esse, quas nunc primum in lucem proferimus, ex subjectis observationibus quivis facile animadvertere poterit.

VI. *Maximus, Taurinensis ecclesia episcopus, testante Gennadio, homilias scripsit de hostibus carnalibus non timendis. Una est hoc titulo inter vulgatas Maximi homilias. Prima ex duodecim a nobis edenda ejusdem est argumenti, referturque ad precedentem his verbis, Sæpe dixisse memini, quod hos tumultus bellicos minime timere debemus &c. Ad idem argumentum revocanda est homilia, qua inter Ambrosianas de sanctis est xxi v. in codice sancti Galli inscripta de tumultis bellicosis. Quinam fuerint illi Barbari, facile esset definire, si de Maximi aetate constaret. At incertum est mortis ejus tempus. Moritur, si Gennadio fides, Honorio & Theodosio juniore regnantibus, id est ante annum Christi cccc xxiii. quo Honorius decessit. Mirraus pro moritur reponit floruit. At priorem lectione m præfert vetustissimus codex noster Corbeiensis, litteris Francogallicis scriptus. Veruntamen Maximus Taurinensis antistes anno cccc liii synodica Eusebii Mediolanensis ad Leonem M. epistola subscripsit; immo anno cccc lxxv Concilio Romano sub Hilario Papa, & quidem primus ante omnes, etiam ante archiepiscopos Ebreduensem & Mediolanensem. Itaque dicendum est, aut duos fuisse ejusdem nominis eodem seculo Taurinenses episcopos; aut, si unus fuit, Gennadium in designando Maximi obitu a vero aberrasse: qui tamen illis temporibus proximus erat. Quamquam quod Maximus primus post Papam Synodo Romana subscripsit, inde colligitur eam antiquitate ceteris ejusdem Synodi episcopis superiorem fuisse.*

VII. *Due sequentes homiliae, quas edimus, eundem ac prima auctorem exigunt, ut ex consecutione patet. Exstant hæ tres homiliae in codicibus Ambrosiano & sancti Galli.*

VIII. *Gennadius Maximo nostro tribuit homilias de pænitentia Ninivitarum. In vulgatis una est de Ninivitis; ad quam nostra homilia iv respicit sub hoc initio, Diximus anteriore Dominica, Ninivitas &c. Habetur utraque in iisdem, qui modo laudati sunt, codicibus.*

IX. *Homilia quinta de Kalendis Januariis totidem verbis signatur a Gennadio. Una est inter editas ejusdem tituli & argumenti; una item apud Ambrosium, quæ est homilia xi. de tempore: cui melius nostra respondet. Nam quæ apud Maximum legitur, auditores suos jam dudum a vitiis illis Kalendarum temperasse testatur: contra vero tum nostra, tum Ambrosiana. Nostra porro superiores homilias consequitur in codice Ambrosiano, in quo item succedit sequens de defectu lunæ, quæ a Gennadio etiam no-*

6. S. MAXIMI EPISC. TAURINEN.

tatur. Alius ordo est in codicibus sanctæ Crucis & sancti Galli.

X. *Homilia tres de Natali Domini, quem titulum Gennadius suggerit, an preferenda sint iis qua apud Maximum leguntur, an simul cum illis admittenda, malumus aliorum iudicio quam nostro definiri. Quamquam nostra plus succi quam alia preferunt.*

XI. *Homilia decima e nostris, qua est de hæreticis peccata vendentibus, reperitur absque auctoris nomine in uno codice sancti Galli, quem ab annis mille calamo exaratum fuisse jam diximus. Nullam hoc titulo Maximi homiliam suggerit Gennadius, nisi forte confuse his verbis: Multas alias ejus homilias de diversis legi, quæ nec retineo. Certe cum proxime antecedentes in codice sancti Galli, ac subsequentes Maximum auctorem habeant; idem etiam de hac homilia iudicium ferendum videtur, maxime cum stilus sit uniformis. Qui autem fuerint illi hæretici, nobis haud liquet.*

XII. *Homilia nostra undecima contra clericos negotiatores, incipit ab his verbis: Reprehendimus ante diem negotiationem clericos exercentes. Sed si recte consideramus officium, non vere negotium est, sed functio &c. Hac homilia videtur respondere homilia LVI de tempore apud Ambrosium, sub cuius finem hæc leguntur. Nam & catholicus clericus hac sententia retinetur. Si enim non contentus stipendiis fuerit, quæ de altario Domino jubente consequitur, sed exercet mercimonia, intercessionem vendit, viduarum munera libenter amplectitur; hic negotiator magis potest videri quam clericus. Quod si ita est, utraque Maximo vindicanda. Nostra enim manifeste pertinet ad illam, qua apud Maximum extrema est, in illud Isaïæ, Caupones tui miscent aquam vino, qua a Gennadio diserte signata est. Hæc enim incipit ab his verbis: Non incommode ante dies paucos prosecuti sumus, functionem hanc sacerdotalem vicem quamdam negotii retinere, & quæstum esse non modicum hoc clericatus officium. qua ipsa verba sunt in homilia nostra XI. ad quam proinde respicit indubitata hæc Maximi homilia.*

XIII. *Homilia e nostris duodecima ejusdem est auctoris. Maximus quippe, ex Gennadio, scripsit homilias de sepulcro Domini. Maximi editi libri duas habent hujusce argumenti: in quarum altera, qua est de Cruce & sepultura Domini secunda, referuntur ipsissima homilia nostra verba ab his verbis, Sed*

videamus de hoc ipso Domini corpore &c. *Hac de homiliis sequentibus a nobis edendis: quas ex aliis pluribus selegimus.*

XIV. *In codice Ambrosiano una est Humilia sancti Maximi Taurinatis episcopi de natale sanctorum Martyrum. Incipit hoc modo: Sicut scimus, fratres, vota semper Domini subsequitur festivitas servulorum &c. quam in editis non invenimus. Item post homilias duas de sanctis Alexandro & Sissinnio, quos post obitum sancti Ambrosii martyrio affectos fuisse Paulinus auctor est, Humilia sancti Maximi de sancto Eusebio martyre Vercellensi. Incipit, Ad sancti Eusebii laudem aliquid addere velle, decerpere est, &c. ut apud Ambrosium, rectius quam apud Maximum. Sequitur, Item dictum Vercellis. Dum ad obsequia venerandæ recordationis, communisque patris nostri Eusebii, confessionis ejus honore convenimus &c. Item de S. Eusebio & de Maccabæis, quod primo dictum est Vercellis. Licet me, fratres, debitum caritati vestræ exhibere sermonem imperitia pudorque revocet &c. Item de S. Confessore Eusebio & Maccabæis. Ad celebritatem præsentis diei, fratres carissimi, omni nos cum alacritate concurrere devotio geminæ festivitatis invitat &c. Denique sequitur alia homilia sub hoc exordio: Quamquam, dilectissimi fratres, beati patris nostri summi sacerdotis & confessoris Eusebii indignus sum filius & minimus servus &c. ubi ad marginem appositum est antiquissimo charactere: Nota quod Vercellinus est iste. Hic exhibendi essent cum censura indices homiliarum, quæ in prædictis tribus codicibus continentur: sed hac aliud tempus, aliudque otium exigunt.*

XV. *Illud tamen in transcurso observare juvat, libros sex vulgatos de Sacramentis, qui Ambrosio in editis tribuuntur, absque auctoris nomine inseri sermonibus prædictis in codice sancti Galli, atque in sermones septem distribui sub hoc titulo, Incipit primæ die in Pascha: ita ut singuli sex libri singulos sermones constituent pro totidem hebdomada diebus; & quidem septimus ab extrema parte libri sexti incipiat, id est ab his verbis: Aliud, Psalmorum David licet unus libellus sit, &c. Sed forte majoris momenti erit, quod in sermone quarto, qui in editis liber quartus est, idem codex ita habet: Vides ergo quam operatorius sit sermo Christi. Ergo si tanta vis est in sermone Domini Jesu, ut inciperent esse quæ non erant: quanto magis operatorius est ut sint, & in aliud commutentur. cum in vulgatis postremum membrum sic legatur,*

3 S. MAXIMI EPISC. TAURIN.

ut quæ erant, in aliud commutentur. *Ex his duabus lectionibus unam conflat Berengarius, a Lanfranco relatus in Dialogo contra ipsum, ubi cum ita loquentem inducit. Per consecrationem altaris fiunt panis & vinum Sacramentum religionis: non ut desinant esse quæ erant, sed ut sint quæ erant, et in aliud commutentur. quod dicit beatus Ambrosius in libro de Sacramentis. Lanfrancus exposito hoc loco ita, ut a Berengario objiciebatur, subdit, in quibusdam codicibus præfatam sententiam verbis aliis inveniri; nempe iisdem omnino verbis, quæ modo editi habent. Iam vero per id tempus prædictum opus de Sacramentis in sex libros distributum erat, eoque modo a Lanfranco adducitur.*


XVI. Revertor ad Maximum, cujus sermones, prout sub ejus nomine vulgati sunt, plerique Maximum auctorem habent, atque adeo eidem vindicandi quotquot ex his Ambrosio inter ejus opera supponuntur: ubi pauci admodum Ambrosio, longe plures Maximo adscribi debent. Quamquam & alii sunt, quos nec Ambrosio, nec Maximo tribuere possumus, sed posterioribus auctoribus: quales sunt sermones secundus ac tertius de Adventu; item sermones xxii & xxiii de Septuagesima & Sexagesima: quæ vocabula Maximi, nedum Ambrosii tempore ignota erant; uti & nomen Adventus pro certo illo dierum numero, quos ante Natale Domini celebrari mos est. Non ergo dixisset Ambrosius aut Maximus, quod initio sermonis secundi de Adventu legitur, Hoc tempus non immerito Adventus Domini vocatur: neque his verbis sermonis xxii usi fuissent, In toto anno non dicitur ulla dies Septuagesima, nisi ista; nec Sexagesima, nisi sequens Dominica; neque Quinquagesima, nisi abhinc tertia. Et certe sermo xxxi de tempore apud Ambrosium Septuagesimam & Sexagesimam adeo non admittit, ut reprehendat eos, qui Quinquagesimam Quadragesimæ addebant. Similis oppositio exstat inter sermones xxvi & xxxiv. In hoc enim soli Dominici dies a jejuniis Quadragesimali excipiuntur: in illo vero etiam sabbatum, ad ritum ecclesiæ Mediolanensis. Adde quod in illo sermone xxvi jejunium in Quadragesima præscribitur dumtaxat ad nonam. quod est contra ipsum Ambrosium, & contra veterum temporum disciplinam, in quibus jejunium Quadragesimale non ante vespæram solvi licebat. Hinc intelligitur, rem Ecclesiæ haud inutilem facturos sodales nostros, qui Ambrosianos sermones, adeo turbatos & confusos, cum accurato delectu propediem edituri sunt.



HOMILIÆ S. MAXIMI EPISCOPI TAURINENSIS.

HOMILIA I.

*De Barbaris non timendis ei qui Deum timet, & de
sancto Helisæo.*



Æpe dixisse memini, quod hos tumultus bellicostimere minime debemus, nec quamlibet copiosam hostium multitudinem formidare; quoniam, sicut ait Dominus, *major est qui in nobis est, quam qui in hoc mundo.* Hoc est, potentior est ad protegendos famulos suos Christus, quam diabolus ad instigandum. Quamvis enim idem diabolus colligat sibi turbas, & crudeli eas armet insania; tamen facile destruuntur, quia melioribus populum suum Salvator circumdat auxiliis. Ait enim Propheta: *Immittet Angelus Domini in circuitu timentium eum, & eripiet eos.* Quod si Angelus Domini timentes eum de periculis eripit, non potest timere barbarum, qui timuerit Salvatorem; nec potest metuere hostis impetus, qui Christi præcepta servaverit. Præcepta enim Christi arma sunt Christiani: & divinus timor terrorem à nobis expellit hostilem. Arma autem hæc nostra sunt, quibus nos Salvator instruxit: Oratio misericordia, atque jejunium. Jeju-

nium enim melius quam murus tuetur : misericordia facilius liberat quam rapina : oratio longius vulnerat quam sagitta. Sagitta enim nonnisi proxime conspectum percutit adversarium : oratio autem etiam longe positum vulnerat inimicum. Sic namque sanctus Helisæus propheta cum vellet cum Rex Syriæ captivare , ac suæ subdere ditioni , multisque eum armatorum cinxisset agminibus ; non est territus , non turbatus : sed ait nuntianti puero , *Noli timere : plures enim nobiscum sunt , quam cum illis*. O fidelis sanctus Propheta ! Non timet adversarios , quos perspicit : quoniam scit Angelos secum esse , quos credit. Non metuit terrenas insidias , quia cælestia adesse sibi novit auxilia. Plures enim nobiscum sunt , quam cum illis. Mira res ! plures de cælo defensores meretur sanctitas , quam in terris obpugnatores adduxit improbitas. Plures nobiscum sunt quam cum illis. Beatitudinis meritum propheta nuntiat etiam de multitudine , cum puer adhuc incertus sit de salute. Spiritales oculi carnalibus quantum plus cernunt ! Hic perspicit armatorum numerum , & ille non cernit defensionis indicium. Quanta est divina misericordia ! Defertur hominibus beneficium , nec videtur : auxilium periclitantes consequuntur , & nesciunt. Hæc est enim pietas Salvatoris , ut interveniat saluti , ac non se rodat adfectui : sentiatur beneficiis , & non cernatur obtutibus. Unde errat qui putat , cum prospere aliquid gesserit , propria se fortitudine superasse. Scire enim debet , quod adversarii meritis magis quam virtute vincuntur : & non tam virtute , quam sanctitate superantur : sicut sanctus Helisæus hostes suos non armis superabat , sed oratione vincebat. Nam cum idem ministro suo , ad depellendum ejus timorem , plures adesse diceret defensores , nec metus ab illo posset auferri ; tunc oravit ad Dominum dicens : *Domine aperi oculos ejus , ut videat. Et aperti sunt oculi ejus , & vidit , & ecce mons totus plenus equitum , & reliqua*. Oratio ergo Prophetæ aperuit oculos pueri. Non mirum si oratio aperuit oculos ut videret exercitum , quæ aperuit cælum ut veniret exercitus. Non mirum inquam , si novos senserit oculos , qui nova promeretur auxilia. Aut cur non aciem producat obtutum , qui acies instruxit Angelorum ? cur , inquam , non orationis sua habitudine aciem popillarum dirigeret , qui meritis caliginem nubium penetravit ? Necessario ergo sanctus Helisæus hoc facto ministro formidoloso præstitit securitatem , cui jam refuderat claritatem : & removit ab eo formi-

dinem cordis, à quo removerat visionis cæcitatem : geminoque eum remunerans beneficio, absolvit ejus metum, & absolvit obtutum. Minus timere cœpit, postquam plus videre promeruit, & visum. In montibus ergo cernuntur armati. Apparet eos verè descendisse de cælo, quorum adventus primum in montibus esse reperitur. Ipsa enim locorum proximitas hoc demonstrat, quod descendentes de cælo non nisi juga collium sibi vicina calcaverint. Tunc igitur oravit Helisæus, & omnem hostilem exercitum cæcitatem percussit. Non mirum si adversariis cæcitatem intulit, qui famulo largitus est claritatem : & si hostibus auferret visum, qui ministro præstitit aspectum. Ubi sunt qui dicunt plusquam preces sanctorum hominum arma posse ? Ecce una oratio Helisæi totum exercitum vulneravit, & unius Prophetæ meritis omnis est hostium numerus captivatus. Quæ catervæ Regum, quæ turbæ militum talem victoriam perpetrarunt, ut ita hostes prosternerent, ut de ipsis nullus obcumberet ? Hæc est hæc incruenta victoria, ubi sic adversarius vincitur, ut de vincentibus nemo lædatur. *Explicit.*

HOMILIA II.

Item sequentia.

Mirum forsitan videtur, quod ante dies sancti Helisæi gratiam describentes diximus, in defensionem ipsius de cælis auxilia descendisse, & armatosequites sive quadrigas ei divinitus adfuisse; astitisse etiam circa ipsum quadrigam igneam. Magna quidem res, sed in vero Sancto admiranda non est. Quid enim mirum, si auxilia meretur e cælo, cujus animus semper in cælo est ? sicut ait Paulus Apostolus: *Nostra autem conversatio in cælis est.* Ergo si nostra conversatio est in cælis, & cælestium conversatio * potest nobiscum : hoc est, ut qui vita vivimus Angelorum, recte eorum consortium mereamur. Est enim sancte viventibus quædam inter se cognatio, junctio, atque societas : nec interest utrum in cælis maneat, an in terris. Angelici sint habitus an humani : dum modo in his sit eadem vita. vel sanctitas, conversatio connectit, quos separat elementum ; & diversis licet corporibus dividantur, iisdem tamen actibus conjunguntur. Atque ideo fit, ut sancti sibi quodam consortio cohærentes a se invicem non discedant, & modo

* f. patet

Angeli ad terras veniant, modo homines ad cælestia transferantur: ac profectum meliore, quibus vita communis est, incipiunt illis vivendi etiam elementa esse communia.

Sed dicit aliquis: frequenter audivimus Angelos ad homines descendisse: audire etiam cupimus, quando homines ad cælestia transmigrarint. Manifesta res est, & in promptu posita. Helias magister Helisæi, nonne Angelis ducentibus raptus ad cælum est, & quadriga ignea impositus, quasi in quodam triumpho victor ascendit? Victor enim exstiterat non gentium barbararum, sed sæcularium voluptatum. siquidem graviores inimici sunt pravi mores, quam hostes infesti; & facilius intelligimus hoc tempore malignitatem hostium vinci posse, quam morum. Ergo Heliam Angeli ad cælum perferunt, Helisæum Angeli in terris custodiunt. Quid mirum si Angeli, qui magistrum portaverant, discipulum tuebantur, & novitia quædam obsequia, quæ patri exhibuerant, etiam filio deferant? Ipse enim Helias spiritalis est filius, ipse enim heres est sanctitatis. Recte autem Helisæus Helias spiritalis filius dicitur, quia ascendens ad cælum spiritum duplicem ei suæ gratiæ dereliquit. Cum enim data esset facultas, Helisæo, ut peteret quod vellet, antequam ab eo *reciperetur Helias; petivit ut duplex spiritus Helias fieret in ipso. Tunc dixit Helias: *Dura petis, sed fiet tibi*. O hereditas pretiosa, in qua plus heredi relinquitur, quam habetur; plus consequitur qui accipit, quam possederit qui largitur. Pretiosa plane hereditas, quæ dum a patre transfertur ad filium, meritorum quodam fœnore duplicatur. Igitur Helias cum symbolum sanctitatis ipse haberet, spiritum Helisæo duplicem dereliquit. Mirum ergo in modum Helias plus gratiæ dimisit in terris, quam secum portavit ad cælos: & licet ipse ad altiora latus transferretur corpore, apud filium tamen major remanet sanctitate.

De Helisæi autem meritis quid dicamus? cujus hæc prima laus est, quod patrem voluit gratia superare, dum dari sibi amplius postulat, quam scit apud eum esse qui possidet. Avarus quidem est in petendo, sed idoneus in promerendo. Dum enim a patre plus exigit quam habebat, fecit eum meritis suis plus præstare quam poterat. Nam cum idem Helisæus post ascensum magistri sui venisset Hiericho, & rogatus a civibus ut in eadem consisteret civitate, dixerunt ad illum, *Commoratio opidi bona est, sed aquæ mala & steriles sunt*; tunc præcepit sibi dari vas

* f. rapere-
sur.

fiatile; & in eo reconditos sales, veniens ad exitus aquarum, projicit in aquas dicens: *Hæc dicit Dominus: Sanavi aquas istas; non erit ex his moriens, nec sterilis. Et sanata sunt aqua in hunc diem.* Videte ergo Helisæi quanta sint merita, cujus prima in civitate hospitalitas filiorum est magna fecunditas. Dum enim sterilitatem avertit aquarum, successionem largitur heredum. Non enim hoc facto Helisæus unum sanavit hominem, aut unius domui præstitit medicinam, sed totius civitatis populum reparavit. Si enim tardius hoc fecisset, interveniente sterilitate, senescentibus cunctis, civitas sine habitatore remanserat.

Igitur Helisæus, dum curavit aquas, curavit & plebem; dum fontem benedixit undarum, quemdam fontem indulxit animarum. Nam sicut sanctificatione ejus de occultis terræ venit aqua sana prodivit, ita de occultis vulvæ visceribus soboles sana processit. Non enim sola tantum fluentia benedixit Helisæus. Aquæ fontium jam gremio tenebantur: sed & illa, quæ humido terræ solo adhuc indiscreta paulatim erant, in posterum defluerunt. Unde ait Scriptura, ad exitus aquarum benedixisse Helisæum, ut stillantem aquam prius sanctificatio susciperet, quam sinus fontis includeret.

Igitur quoniam dicit S. Paulus Apostolus, *Hæc in figura contingebant illis*; videamus hæc ipsa figura quam habet veritatem: hoc est, requiramus quæ sit ista civitas, quæ sterilitate laborans; vel quid sibi velit vas fiatile; quid etiam ut aspersi sales afferant suavitatem. Legimus in eodem Apostolo dictum de Ecclesia: *Latare sterilis quæ non parit, erumpe & exclama quæ non parturis.* Ergo Ecclesia est illa sterilis civitas, quæ ante adventum Christi aquarum vitio, hoc est sacrilegio gentilium populorum, sterilitatem sustinens, Deo filios procreare non potuit. At ubi venit Christus, velut vas fiatile adsumens corpus humanum, vitia sanavit aquarum, hoc est resecauit sacrilegia populorum; statim Ecclesia quæ erat sterilis, cœpit esse fecunda. Unde & Apostolus dicit, *Latare sterilis*: ut plures etiam filios ex eo Ecclesia quam fecunda susciperet. Aspersi autem qui sunt, qui attulerunt medicinam, facile cognoscimus. Dicit Dominus ad Apostolos: *Vos estis sal terra.* Ergo si Apostoli salibus comparati sunt, rectè figura completur. Sicut tunc effusi de vasculo sales condierunt aquas, ita & nunc missi a Salvatore Apostoli condiunt universos; & ablata sterilitate vitiorum, prolem incipiunt germinare virtutum. *Explicit.*

HOMILIA III.

Item sequentia.

Meminit vestra dilectio, hoc nos superiore Dominica prædicasse, ut bonis actibus, assiduis orationibus portas nobis justitiæ referarem, ac frequentibus eleemosynis, velut vallo nos misericordiæ muniremus. Murus enim quidam inexpugnabilis est contra adversarium, resistere eleemosynis, dimicare jejuniis. Quamvis enim inimici arma sint valida, fortiora tamen hæc arma sunt Salvatoris: quibus qui indutus fuerit, licet inermis oculis hominum videatur, satis tamen armatus est: quia eum divinitas summa custodit. Bonum est igitur in tribulatione orare, jejunare, psallere, misereri. His enim telis, sicut David exemplum contra Goliath protulimus, solent adversarios suos vincere Christiani, his armis civitatis mœnia custodire. Dicit enim sanctus Propheta: *Nisi Dominus custodierit civitatem, in vano vigilant qui custodiunt eam.* In vanum ergo iste vigilat, qui putat cura se armare civitatem, cum ipse fidei arma non habeat. In vanum planè laborat, qui æstimat se tuitionem alii parare posse, cum ipse sit Dei gratia destitutus. Ait Dominus in Evangelio: *Medice cura te ipsum.* Hoc exemplo dicendum est: Prius tu homo tuæ consule salutis, ut possis salutis providere multorum. Ceterum cum te imbecillum & infirmum videam, ac divinitatis auxilio destitutum, non solum civitatis quæ per te paratur custodia non confido, sed etiam vereor, ne conturbet tua desperatio civitatem.

Tunc ergo civitas munita est, quando eam magis Deus ipse custodit: tunc autem eam custodit Deus, sicut scriptum est, quando habitantes in ea sunt omnes moderati, graves, Christiani, atque catholici. Necessè est enim, ut istam civitatem conservet Deus, in qua de præceptis suis invenit quod reserve. Ceterum ubi est luxuria, perfidia, atque blasphemia; illam civitatem non servat Dominus: ne non tam civitas, quam in ea quæ sunt peccata servantur. Ergo qui in nomine Domini munitionem præparat civitati, iste vere securitatem civibus parat. Nam qui sine Dei gratia munitionem urbi constituere conatur, is vulpium more videtur foveæ sibi latibulum præparare. Nonne enim iste tamquam vulpis in ea fovea est, qui ter-

ram jugiter fodit, cælum omnino non respicit? Ait enim Dominus, sicut lectum nuper audivimus: *Vulpes foveas habent, & volucres cali nidos ubi requiescant: filius autem hominis non habet ubi caput reclinet.* quæ sententia quem intellectum habeat, diligentius intendamus. Non enim de ipso specialiter animali locutus est Dominus: sed de his hominibus, qui versuti semper & callidi, vulpes moribus semper imitari student: dum aliena fraudulenter diripiunt, foveam sibi perditionis effodiunt: atque ideo caput Christi, quod est Deus, habitaculum in his non potest invenire, quia ipsi habitant in defossis.

Quod autem specialiter hæretici vulpibus comparantur, nulla cunctatio est. Sunt enim, sicut vulpes, dolosi, importuni, & timidi: ubi quietem senserint, ibi rabiem suæ levitatis exercent: ubi vigilantiam reperiunt, exinde dolosa fraude diffugiunt. Nam sicut memoratum animal semper est fallax, semper incertum, nec aliquando morum potest mutare versutiam: ita & omnis hæreticus semper fallax, semper incertus est: & cum tecum videatur simpliciter loqui, mutat verba, sed non mutat mores; modestiam sermone promittit, rabiem corde depromit. Vulpis cauda fallit, hæreticus lingua circumvenit: vulpis mansuetudinem animalibus fingit, ut capiat; hæreticus moderationem hominibus promittit, ut noceat: illa ante proludit, ut jugulet; hic prius blanditur ut exspoliet. Familiare autem vulpi est, gallinæ semper insidiari & pullis: ut si a matre quispiam longius abierit, in ejus prædam captetur. ita & hæreticus matri Ecclesiæ semper insidiatur & filiis: ut si forte aliquem negligentiores invenerit, sua illum rabie circumscribat.

Quod autem gallinæ recte comparetur Ecclesia, in Evangelio legimus, dicente Domino ad Hierusalem: *Hierusalem, quotiens volui congregare filios tuos, sicut gallina congregat pullos suos sub alas suas?* Recte autem comparatur gallina Ecclesiæ. Sicut enim non solum suos filios nutrit, sed etiam alienos suscipit venientes: ita & gallina non solum eos nutrit, quos ipsa exclusit; sed etiam adpositos sibi educat alienos. Igitur, fratres, armemus nos per hanc hebdomadam jeuniis, orationibus, atque vigiliis: ut interveniente misericordia Dei, & barbarorum repellamus feritatem, & hæreticorum insidias retundamus.

Explicit.

HOMILIA IV.

De Ninivitis.

DIximus anteriore Dominica, Ninivitas in tribulatione positos Divinitatis misericordiam per abstinenciam meruisse, & civitatem suam de periculo jejuniis liberasse; tantæque eos fuisse sapientiæ, ut non alienis se præsidii defenderent, sed propria devotione salvarent. Nam non statim desperaverunt de salute sua. Audierunt a Propheta cum civitatis se mœnibus subvertendos. Sed quanto proximum adnuntiabatur excidium, tanto magis religiosis actibus armabatur; nec reliquerunt evertendam civitatem suam, sed in ea potius permanserunt, sapientes scilicet, ut quæ civium vexabatur peccatis, civium orationibus salvaretur: & cui perditionem mala conversatio intulerat, ei salutem devotio religiosa conferret. Justum enimerat, ut quos fuerat passa peccatores, eosdem haberet proprios defensores. Civitati enim nonnisi propter civium peccatum infertur excidium.

Desine ergo peccare, & civitas non peribit. Quid fugis patriam? si vis salvus esse, tua potius peccata subterfuge. Si tu peccare desieris, victus est inimicus. Dicit ad Abraham Scriptura divina, per decem justos patriam posse salvari. Igitur si justi sunt qui salvam faciunt patriam; utique injusti sunt qui relinquunt: & si illi propter præsentiam suam consequuntur gratiam, necesse est, ut hii propter fugam desolationem mereantur. Injustus plane & impius est filius, qui periclitantem deserit matrem. Mater enim quodammodo dulcis est patria, quæ te genuit, quæ te nutrit; quæ ut fugere possis, te divitem fecit. Nam si non tibi suppeteret sumptuum copiosa substantia, fugæ præsidium non haberes: atque ideo avaritia ductus, dum metuis divitias tuas perdere, impius in matrem esse non dubitas. Unde intelligimus, plus pecuniæ tuæ consulere, quam saluti. Dic mihi, o bone civis, cur fugere disponis? cur patriam derelinquis? Captivitatem fortasse metuis. Da veniam, non intelligis. Nescis quod hæc est prima captivitas, patriam non videre, & (quod gravius est omni malo) hostile peregrinationis exsiliium sustinere? Solet qui aliquid sceleris amiserit, hujusmodi poena damnari, ut pellatur patria, regionibus.

nibus incognitis relegetur. Hoc igitur malum propria tibi providens voluntate, quod solet supplicii causa damnatus excipere.

Sed ponamus te forti esse animo, & æquanimiter tolerare posse peregrinationis injuriam. Dic mihi, qua inter extraneos libertate victurus es? Nonne cum loqui cœperis, objicietur tibi, unde iste exulat? unde iste fugitivus advenit? an & nostram civitatem opprimere nititur, sicut patriam suam oppressit? Ita aporiaberis, ita conturbaberis, ut libertati tuæ metuens verearis, ne ingenuitati tuæ ibi non invenias adferterem. Mihi crede, in aliena patria tanta auditurus es, quanta in tua patria aliis sæpe dixisti.

Illud autem nolo dicere, quod quamvis dives sis in patria tua, quamvis copiis perfruaris, statim ut exieris de domo tua, mendicus & pauper es. Dicit ergo Deus ad Abraham, per decem justos civitatem posse salvari. Male igitur de te sentis, popule Christiane, si in tanto cœtu ad salvandam civitatem decem justos esse non credis. Dum enim deseris patriam, profiteris non in ea esse dignos, quorum meritis liberetur. At ego vereor ne omnibus in ea justis relictis, tu solus qui deseris, inveniaris injustus. Sed nolo decem justorum numero te perturbes. Legimus autem quod de Sodomitarum excidio meritis suis Loth solus liberaverit civitatem: quod plus valuerit ad salvandum unius gratia, quam ad evertendum peccata multorum. Exeunti enim illi de Sodomis, hospitii causa Segor parva conceditur. Quod si justo hospiti donatur civitas, quanto magis justo patria conceditur possessori? *Explicir.*

HOMILIA V.

Incipit de Kalendis Ianuariis.

BEne quodammodo Deo providente dispositum est, ut inter medias gentilium festivitates Christus Dominus oriretur, & inter ipsas tenebrosas superstitiones errorum veri luminis splendor effulgeret: ut perspicientes homines in vanis superstitionibus suis puræ divinitatis emicuisse justitiam, præterita obliviscerentur sacrilegia, futura non colerent. Quis enim sapiens, qui Dominici Natalis intelligit sacramentum, non ebrietatem condemnet Saturnalium, non declinet lasciviam Kalendarum; & partem cupiens habere cum Christo, particeps

nolit esse cum sæculo? Hæc enim divini cultus ratio est, ut qui societatem habuerit cum vanitate gentilium, copulam non possit habere cum veritate Sanctorum. Dicit beatus Apostolus: *Quæ portio iustitiæ cum iniquitate? aut quæ societas lucis cum tenebris?* hoc est pariter Christianos & iniquitatis exercere luxuriam, & Deum iustitiæ habere placatum.

Nam sunt plerique, qui trahentes consuetudinem de veteri superstitione vanitatis, Kalendarum diem pro summa festivitate procurent: & sic lætitiâ habere velint, ut sit magis illis tristiciâ. Nam ita lasciviunt, ita vino & epulis satiantur, ut qui toto anno castus & temperans fuerit, illa die sit temulentus atque pollutus: & quod nisi ita fecerit, putet perdidisse se ferias; quia non intellegit per tales se ferias perdidisse salutem.

Illud autem quale est, quod surgentes mature ad publicum, cum munusculo, hoc est cum strenis, unusquisque procedit: & salutaturus amicum, salutat illum præmio antequàm osculo? Labiis labia porrigit, & manui manum inserit: non ut amoris reddat affectum, sed ut avaritiæ persolvat obsequium; & uno eodemque officio amicum complectitur, & fraudatur. Vos judicate, quale est istud osculum, quod venale est, nam quo preciosius emitur, tanto vilius æstimatur. Quanti ante aurum potiorum indigni judicabuntur osculo? Posteaquam aurum refulsit in dextera, dignos illos facit præda, non gratia. Hoc autem in ipsa iniquitate quam injustum est, quod expectatur donare inferior potiori, & diviti cogitur ille largiri, qui quod largiatur forsitan mutuatur. Adhuc & ipsam munificentiam strenas vocant, cum magis strenuum quod... Cogitur, inquam, miser donare, quod non habet; & munus offerre, pro quo filios suos obnoxios relinquat.

Sed & divites quique sunt hac munificentia liberales; verum nec ipsi à peccato habentur immunes. Largitur enim dives cuicumque soli locupleti: dumque mendico denarium donare despexerit, Kalendis ad domum amici auro onustus properat, qui Natali Dominico ad ecclesiam vacuus & inanïs advenit. Vides ergo quod apud plerosque plus est præsens adulatio, quam futura remuneratio. Libentius enim habent osculum potioris, quàm gloriam Salvatoris. Quod osculum, osculum non dicendum est, quia venale est. Nam & Judas Scarioth tali osculo osculabatur Dominum, sed hinc illum tradere conabatur,

Hoc autem quale est, quod interposita die, tam inani exordio velut incipientes vivere, ut auspicia colligant, ominaque perquirant; & exinde totius anni sibi vel prosperitatem, vel tristitiam metiuntur? quæ cum inepta sint & ridicula, tum illis ipsis sunt vel inutilia, vel nociva. Nam prosperitatem non habent dum falluntur auguriis: tristitiam semper habent, dum rememoratione omnium sunt solliciti ne contingant. Hoc autem malis suis addunt, ut quasi de auspicatione domum redeuntes, ramusculos gestent in manibus, scilicet pro omine, ut vel onusti ad hospitium redeant: non intelligentes miseri, quod onusti quidem redeunt, non sarcina munerum, sed cumulo peccatorum. *Finit.*

HOMILIA VI.

De defectu lunæ.

ANte dies profecti sumus, fratres, adversus illos qui putarent lunam de cælo magorum carminibus posse deduci: & eorum retudimus vanitatem, qui non minus defectum patiuntur animi, quam luminis patitur illa defectum. Quos & hortati sumus, ut prætermisso errore gentili, tam citò ad sapientiam redeant, quam citò ad plenitudinem suam illa revertitur; & sicut velociter illa lumina recolligit, quod amiserat; ita festinanter isti fidem recipiant quam negarunt; & deposita insipientiæ nebula, incipiant lunam non jam oculo corporis æstimare, sed mentis; & ortum defectumque ejus intelligent ratione magis, quam infirmitate subsistere: quæ nunquam tantam rebus cunctis mutationem daret, nisi esset illi hæc ratio a Creatore conlata. Ecce elementum maris luna deficiente subducitur, eadem crescente cumulatur: ut ad motum ejus aut undæ intra se redeant, aut fluenta non capiant; ita ut quotiens luna mutatur in lumine, totiens maria mutantur in fluctibus. Denique dicuntur ipsa maris natantia in carne sua pleniora esse, cum luna perfecta est; & exhausta & diminuta, cum illa minuitur. Magna igitur lunæ ratio est, & magna præstantia, quæ vigore suo ita elementa minuit, ut rursus adimpleat: ita implet, ut denuo minuantur. Scilicet ut diversis quibusdam vicibus gratiæ sit commutatio; dum reparatio fit perfecta. Et quantum verò terris largiatur augmentum, omnibus notum, quanto rore saltus refecit, quos

sic diurnis horis ardor exusserat: & admiratione quadam, ardentibus æstu rebus serenitate præstat humorem. Novo enim genere, inluminante luna, madidam terram serenitas facit.

Grandis ergo ratio lunæ est, immo grande mysterium. Exinanit se lumine, ut universa recreet humore & imbre. Ita & Christus Dominus exinanivit se divinitate, ut homines repleret immortalitate. Unde ait beatus Apostolus: Qui cum in forma Dei esset constitutus, non rapinam arbitratus est esse se æqualem Deo: sed semetipsum exinanivit formam servi accipiens. Exinanivit ergo se Christus, ut vitam præstet hominibus: evacuavit se, ut profectum tribuat elementis.

Sed legimus de Salvatore, quod sol magis sit ipse justitiæ. Quomodo ergo eum lunæ motibus comparamus? Non magna plane distantia conveniunt sibi ista luminaria. Siquidem luna quadam fraternitate consortii lumen mutuetur a sole, & radiis lucis ejus repercussa, splendorem sui fulgoris accipiat. unde si Christus Dominus Soli rectius comparatur, lunam non nisi Ecclesiæ comparavimus. Nam ipsa, sicut luna, ut inter gentes luceat, mutuatur lumen a Sole justitiæ & Christi radiis: hoc est, Apostolorum prædicationibus repercussa, splendorem ex eo immortalitatis acquirit. Fulget enim Ecclesia non suo, sed Salvatoris lumine; & radiat, non proprio nitore, sed Patris, sicut Apostolus ait dicens: *Vivo autem, jam non ego, vivit in me Christus.* & iterum, *ut sit ipse primogenitus in multis fratribus.*

Recte plane lunæ comparatur Ecclesia: quoniam & ipsa nos lavacri rore perfundit, & terram corporis nostri baptismatis humore vivificat. Recte lunæ comparatur Ecclesia: quia & ipsa augmentum acquirit, patiturque defectum. Minuitur enim sæpe; frequenter augetur. Minuitur persecutionibus, prædicationibus ampliatur. Decrescit, cum minuitur filiis; crescit, cum Martyribus coronatur: & eadem causa, quæ tribuit illi defectum, ipsa præstat augmentum. Frequenter enim quos dolet persecutores, ipsos recipit Confessores. Quotiens eam, sicut lunam, putatis magorum carminibus laborasse? quotiens eam malæ artes de cæli regno deducere voluerunt?

Nam primum utique Jamnes & Mambres magi, cum Moyse signis prodigiisque resisterent, Ecclesiam subvertere cupiebant; sed sacris vocibus veneficorum carmen nocere non potuit. Nihil enim incantationes valent, ubi Christi canticum decantatur. Deinde cum apud Sergium * Paulinum proconsulem Simon

magus Paulum apostolum oppugnaret; utique Ecclesiæ vas temptabat, & veneficis artibus illum quassare cupiebat: sed tanta ab illo virtute convictus est, ut non solum artis infirmitate, sed etiam oculorum eum amissione cæcaret, & pariter illi auferret carmen & visum. Non enim merebatur habere corporis oculos, qui mentis oculos non habebat. Quid autem dicamus de apostolo Petro? quia iterum Simonem, in Romana urbe Ecclesiæ fundamenta turbantem, orationum suarum soliditate prostravit. Cum enim ille artibus magicis sic elatus esset, ut etiam per aëris spatia volitaret, hic illum fidei virtute deicit, ut tanto altius caderet, quanto sublimius evolasset. Vere enim Petrus tam solida petra saxi illum allisione comminuit, ut qui sibi regna cælestia promittebat, terrenæ mortis duritie periret.

Explicit.

HOMILIA VII.

Incipit dictum ante Natale Domini.

ETiam si ego taceam, fratres, tempus nos admonet, quod Domini Christi Natalis in proximo est. nam prædicationem meam prævenit dierum extrema conclusio. Ipsi enim angustiis suis mundus loquitur imminere aliquid, quo in melius reparetur: & expectatione festina desiderat, ut tenebras suas splendidioris Solis candor inluminet. Dum enim cursum suum brevitate horarum concludi metuit, spe quadam annum suum indicat reformari. Hæc igitur expectatio creaturæ, etiam nos expectare persuadet, ut peccatorum nostrorum tenebras novus sol Christus ortus inluminet, & longam in nobis caliginem delictorum justitiæ Sol nativitatis suæ vigore discutiat: nec patiatur cursum vitæ nostræ tenebris vitæ concludi, sed virtutis suæ gratia dilatari.

Igitur quia Natalem Domini etiam mundo indicante cognoscimus, faciamus & nos quod mundus facere consuevit: hoc est, sicut in illa die mundus spatia suæ lucis extendit, ita & nostram justitiam protendamus: & sicut diei illius claritas pauperibus & divitibus communis est, ita & nostra liberalitas peregrinis & indigentibus sit communis: & sicut tunc mundus noctium suarum recidit caliginem, ita & nos avaritiæ nostræ tenebras amputemus: adque ad instar hiberni temporis, sicut in segetibus solis vapore resoluta gelu nutriuntur semina; ita

22 S. MAXIMI EPISC. TAURIN.

& in pectoribus nostris resoluta duritia, justitiæ semen tepescitum Salvatoris radio coalescat. Ergo, fratres, Natalem Domini suscepturi, exornemus nos puris & nitidis indumentis. Animæ autem loquor indumenta, non carnis. Carnis enim indumentum vilis amictus est, animæ vestimentum corpus est
* pro densatum. preciosum: illud humanis manibus * densatum est, istud Dei manibus institutum est. atque ideo majoris est sollicitudinis Dei opus sine macula custodire, quam opera hominum impolluta servare. Mundanum enim vestimentum, si fordidum fuerit, potest illud fullo conductus eluere: animæ autem vestimentum, si semel inquinatum fuerit, nisi propriis & assiduis operibus vix lavatur. Nihil ei prodest manus artificis, nihil fullonis operatio. Conscientiæ enim membra polluta aqua abluere potest, non potest tamen mundare.

Hæc sunt animæ vestimenta preciosa, quæ Marcus Evangelista in Salvatore conlaudat dicens: *Et vestimenta ejus facta sunt fulgentia, candida nimis velut nix, qualia fullo super terram non potest facere.* Laudatur igitur Christi vestimentum, quia nitebat, non textura, sed gratia: laudatur indumentum, non quod staminum subtilitate densatum est, sed quod corporis integritate conceptum: laudatur vestimentum, non quod mulierum manus texuit, sed quod Mariæ virginitas procreavit. Et ideo in eo magnificatur candoris gratia, quia immaculatum illud non artificis cura præstiterat, qualia fullo, inquit, super terram non potest facere. Non potest plane fullo Christi facere vestimentum. Fullo enim præstare potest nitorem, mundiciam, puritatem; præstare autem non potest virginitatem, justitiam, bonitatem. Illud enim in arte est operis, istud est in natura virtutis. Hæc enim in Christo Domino sanctus Evangelista virtutum indumenta conlaudat, quæ & beatus David pari sententia prædicavit, dicens: *Myrrha, & gutta, & cassia a vestimentis tuis preciosis.* His enim aromatum odoribus sanctarum significantur indumenta virtutum.

Ergo, fratres, Natalem Domini suscepturi, ab omni conscientiam nostram facere mundemus. Accuremus nos, non sericis vestibus, sed operibus preciosis. Vestimenta enim nitida membra operire possunt, conscientiam mundare non possunt: nisi quod majoris est verecundiæ nitidum membris incedere, & pollutum sensibus ambulare. Interioris igitur prius hominis ornemus affectum, ut exterioris quoque hominis sit amictus orna-

moreum. Portæ ecclesiæ sancti Zenonis ex ære cum figuris: fornix in apside ecclesiæ, alibi tabulatum. Sub majori altari est crypta subterranea, in qua corpus sancti Zenonis pone altare in lapide marmoreo conditum est. Ad portam ecclesiæ ingens conspicitur labrum porphyreticum, habens in orbem pedes viginti sex, quod ad sancti Zenonis tempora referunt. In archivo monasterii vidimus authenticum diploma Henrici I. Imperatoris cum plumbea bulla, *datum anno M. XIV, imperii ejus primo*. Nihil librorum superest in bibliotheca, quam sacrorum voluminum copia refertam Ambrosius Camaldulensis aliquando viderat. Monasterium olim Teutonicis concessum est ab Imperatoribus Germaniæ: nunc loca monachorum Venetis plerumque a sæculari abbate non sine præmio conceduntur. Monasterium aliud sancti Nazarii Casinensium est. Ecclesia cathedralis Deiparæ Virginis titulo insignita: cujus Canonici quatuor & viginti a ditione episcopi soluti, Patriarchæ Aquileiensi proxime subiecti sunt. Duplex in illa ecclesia est ordo subcelliorum: unus apsidem coronat: alter continuus est usque ad cancellos ferreos, qui navim à choro dirimunt. Sacerdos sacra faciens conversam habet faciem ad populum, renes apside obversos. Olim in illa ecclesia celeberrima bibliotheca erat, id est *plurima volumina miræ vetustatis*, testante Ambrosio Camaldulensi: qui tamen nihil singulare in illis invenit. Et quidem antiquissimum Cypriani exemplar quondam ibidem asservabatur, cujus contenta Romæ apud Patres Oratorii vidimus: sed nullos in illa ecclesia libros modo superesse nobis assertum est. Postmodum istum codicem, majusculis litteris ante annos mille perscriptum, a canonicis Veronensibus Carolo Borromæo dono datum fuisse, ex Aldi Orthographia didicimus, verbo *cultita*.

In quodam codice Christinæ reginæ Suecorum statutum legitur Veronæ editum, quod hoc loco referri non ab re erit ad patriæ nostræ historiæ illustrationem. *In urbe Veronensi ab Urbano Papa tertio, de communi fratrum suorum consilio institutum fuit & sancitum, ut in hac ecclesia & universis totius regni Franciæ ecclesiis, XIII. Kal. Octob. vespere & mane pulsatis campanis, LUDOVICI, piæ recordationis quondam illustris Francorum regis, anniversarium annis singulis sollempniter & devote celebretur. Actum anno ab Incarnatione Domini M C LXXXVI, regnante Philippo victorioso ejus filio, regni sui anno VIII. Hactenus vetus codex.*

cunabula : nec regnator cæli has indignatur angustias, cui habitaculum fuit virgineus venter. Idoneum plane Maria Christo habitaculum, non pro habitu corporis, sed pro gratia originali. Ergo exonerata felici onere Maria, matrem se læta agnoscit, quæ se nescit uxorem : & est gloriosa de sobole, quæ est ignara de conjuge, atque infantem se genuisse miratur, cum Spiritum-sanctum se suscepisse testatur : nec quia peperit in-nupta, terretur : quia testimonio utitur virginittis & sobolis. Soboles enim Dominum patrem indicat, virginitas stupentium suspicionem excusat. Inde virginitati divinitas testimonium perhibet, hinc naturæ secretum. Testimonium, inquam, perhibet divinitas partui virginali. Ut concipiatur enim Christus, secundum prænuntiationem Evangelii Spiritus-sancti repletur gratia, virtute Dei Patris obumbratur, sicut ad Mariam dictum est : *Spiritus-sanctus superveniet in te, & virtus Altissimi obumbrabit tibi & ideo quod nascetur ex te Sanctum, vocabitur filius Dei.*

In nativitate ergo Salvatoris completa est divina illa sententia, quæ dicit : *Duobus aut tribus testibus stabit omne verbum.* Ecce enim Verbum Dei nascitur testimonio Trinitatis. Nam utique in utero sanctæ Mariæ cum Spiritus-sanctus supervenit, cum obumbrat Altissimus, cum Christus generatur ; confessio in eo fidei continetur. Dignum enim erat, ut Mater salutem populis editura, prius in visceribus suis confirmaret mysterium Trinitatis : & intelligeremus ante Salvatoris ortum, confirmatum esse fidei sacramentum. Maria enim tamquam in sacrario ventris sui portavit cum mysterio Sacerdotem, nam quicquid in sæculo profuturum erat, id totum de ejus ventre : Deus Sacerdos & hostia, Deus resurrectionis, Sacerdos oblationis. Hoc autem totum in Christo agnoscimus. Deus enim est, quod ad Patrem redit : Pontifex, quod se obtulit : victima, quod pro nobis occisus est. Mariæ ergo uterum, non uterum dixerim fuisse, sed templum. Templum plane est, in quo habitat sanctum quicquid in cælo est, nisi quod supra cælos æstimandum est, ubi quasi in secretiore tabernaculo mysterium a divinitate disponitur, quemadmodum a pluribus ascendatur ad cælum. Supra cælos plane æstimandus est uterus Mariæ, quia Filium Dei gloriosiore remisit ad cælum, quam de cælo descenderat. Inde enim ut pateretur, hinc reversus est ut regnaret : inde humiliatus descendit in hominem, hinc glorificatus ad Patrem ascendit. Melius plane templum corporis est, quam
cæli.

cæli. Residens enim Christus est, ibi terribilis, hic manifestus: ibi invisibilis, hic visibilis atque palpabilis: ibi peccata vindicat, hic condonat: ibi potestate judicis utitur, hic dilectione fratres hortatur. Atque ideo est bonum nobis adorare eum cum invitat, ut possimus eum non timere cum judicat. *Explicit.*

HOMILIA IX.

Incipit dictum post Natalem Domini Salvatoris.

Lætitia Natalis dominici, fratres, adhuc corda nostra persultant, & festivitatem cælestem gaudia continuata suspirant. Quamvis enim votorum dies transierit, penes nos tamen votorum sanctificatio commoratur: & sicut in dies singulos ab ortu suo Salvatoris nativitas crescit, ita & in nobis crescit fidei ejus affectus, atque augmentum facit ætatis pariter & salutis. Sibi enim Dominus crescit ætate, nobis proficit sanctitate. Non quo proficiat Christi sanctitas, quæ sempiterna est atque perfecta: sed proficere dicitur, cum in nobis facit credulitatis augmentum. Nam Christus post nativitatem, etsi parvulus est corpore, tamen Deus est majestate.

Adhuc ergo gaudia festivitatis Dominicæ viscera nostra concutunt. Concutiunt enim, dum pro ipsa lætitia prorumpere hortantur in vocem, ut & nos dicamus, quod & Angeli dixerunt in Nativitate Christi: *Gloria in excelsis Deo, & in terra pax hominibus bonæ voluntatis.* Angeli videte quid dixerint. Non enim dixerunt, *pax hominibus*, aut quibuscumque hominibus, sed *hominibus bonæ voluntatis*: ut intelligeremus pacem Christi non hominum esse, sed morum. Non enim eam meretur generatio, sed voluntas; non humana improbitas, sed bonitas Christiana. Nam non defertur cunctis, sed offertur probatis: non datur divulganda, sed proponitur eligenda. Pax igitur Christi illi est, qui Christum credit pacis auctorem: pax Christi illi est, qui in se pugnam non habet peccatorum: pax Christi in illis est, quorum non polluitur voluntas cruoribus idolorum. Dignum enim est, ut Salvatorem, quem virginitas immaculata genuit, voluntas incorrupta possideat: & sicut Maria eum inlibata gestavit, ita & anima nostra illum impolluta custodiat. Maria enim typum quemdam animarum nostrarum gessit. nam Christus sicut virginitatem in matre quæsit, ita & integritatem in

AN. 1685.
MAIO.

nia aliquando solitariam vitam duxit, in loco cui *Sallaniga* nomen indidit antiquitas: sepultus postea in monasterio Vicentiae proximo, *Vangadicia* dicto, quod olim nostri Ordinis, nunc Camaldulensium est. Hæc idcirco notamus, quod apud Vicentinos nulla Theobaldi superlit notitia, saltem apud viros doctos, quos de illo percontati sumus. quo minus mirandum est, antiquarum rerum notitias ex hominum memoria jam evanuisse. His antiquitatibus, quæ quidem ad Vicentiam pertinent, revocandis atque colligendis incumbit vir antiquitatis studiosissimus Johannes Martius Cerchiarus, a quo cum nonnulla petissemus, hoc responsum accepimus.

Voracissima temporis injuria Vicentina monumenta adeo attrita sunt, ut nunc prisca decoris perexigua supersit notitia. Irrita sane mortalium vota, quæ præclare gestu marmoreis fastis consignant, quasi ruderum mole non tumulentur sepulcra, quasi fatorum atrocitate immunes non moriantur & lapides. Opera itaque pretium me facturum duxi, si in unum colligerem ea, quæ sparsim agris disjecta, suisque Manibus revulsa vagabantur: ut iterum hoc novo, licet insulso, opere, venerabunda patriæ reflorescat antiquitas. Ad vos igitur, Patres religiosissimi, qui litterario bono præsidetis, inscriptionem a me quesitam transmittito. Credite etiam in marmore mei pignus obsequii perennabit, & si Deus annuerit, ut patriæ monumenta in unum opus congeram, meam erga vos observantiam facundius eloquentur.

Inscriptionem illam, de qua loquitur vir doctus, hoc loco prætermittimus, quod sit vulgata apud Gruterum.

PATAVIUM.

* *Fadonè*

XVIII. * Patavium, urbs magna, sed parum culta pro fitis amœnitate, academiam habet celeberrimam, cujus scholares, plerique exteri, magna licentia fruuntur. Episcopus loci eminentissimus Cardinalis Barbadicus, ad quem litteras ex Cardinale Casanata habebamus, tunc extra urbem veritabatur. In reditu magnam ejus in nos dignationem, quanta major esse nequit, experti sumus. Ecclesiæ cathedralis bibliothecam interim vidimus. Hanc Jacobus Zenus episcopus Patavinus compluribus codicibus, & manu conscriptis, & a primordio typographicæ artis impressis, confertissimam sibi comparavit, apoplexia subito extinctus nulli reliquit intestatus. Petrus Foscarus Cardinalis ejus successor, eandem ob

artis suæ deposuisse peritiam, istos morum abicere nolle luxuriam. *Explicit.*

HOMILIA X.

Incipit de Hæreticis peccata vendentibus.

Semper meminisse, & ante oculos habere debemus, fratres dilectissimi, quod Dominus Jesus-Christus ideo ad terram descendit de cælis, ut nobis vitam largiretur æternam. Ideo cum esset Dei filius, fieri hominis filius maluit, ut nos qui eramus homines, Dei filios faceret. Non enim propter hanc vitam præsentem tantæ dignitatis operatus est mysterium, quæ est brevis, caduca, mortalis: sed propter illam quæ perpetua & sempiterna est. Neque enim Deus nobis hujus vitæ longævitatē præstaturus erat, quæ plena est ærumnis, laboribus, egestate: ne non tam longævitatē vitæ præstaret, quam perpetuitatem malorum. Nam hoc in illa remedii solum videtur esse, quod brevis est. Unde & Apostolus ait: *Si in hac vita tantum in Christo speramus, miserabiliores sumus omnibus hominibus.* Non ergo in hac vita tantum in Christo sperandum est, in qua mali, quam boni plurimum possunt: in qua feliciores sunt, qui peiores sunt; & prospere magis degunt, qui criminosis conversantur. Quid enim boni hæc vita possidet? honores, divitias, sanitatem: quæ licet caduca sint, non tamen meritis accedunt, sed fortuito contingunt. Quantos enim videmus, quos honoratos fecit, non honestas, sed potestas? quantos divitias consecutos, non relictas a parentibus, sed sanguinibus occupatas? quantos membrorum sanitate pollentes, qui non Dei misericordia gubernantur, sed pecudum sanguine crassantur? Hæc igitur quia temporalia sunt, & nulla, quibuscumque passim sine merito ac sine judicio deferuntur, quia non ad remunerationem data sunt, sed ad tentationem.

Nos igitur, quibus vita æterna promittitur, æterna semper bona possidere debemus & quærere, hoc est fidem, justitiam, caritatem. Habent enim ista bona adversarios suos: & licet hæc dona ab hominibus conferri non possunt, frequenter tamen a pravis hominibus auferuntur. Atque ideo circa fidei bonum solliciti esse debemus & providi, & ad custodiam ejus mentis devotione semper esse armati, nec cito fallacibus credere blandimentis. Solet enim sub prætextu pacis hostis inre-

pere, hoc est sub vocabulo nominis Christiani hæreticus subintrare, qui ad decipiendos simplices homines Christum in ore portat, diabolum gestat in corde: & eum quidem lingua confitetur, sed mente blasphematur. Ab hoc igitur oportet penitus declinari, nec aliqua cum eo societate conjungi. Qui enim inimicus est Domini, quemadmodum amicus est servulorum?

Nec mirari debemus, quod hujusmodi hæretici in nostra aberrare cœperint regione. Semper enim gregem ovium insidiator lupus sequitur, semper Christianum cœtum diabolus deceptor incurfat. Quod quidem sit utiliter, ut sollicitiore custodia, nec gregem ovis deferat, nec Christianus Ecclesiam derelinquat. Unde & Apostolus ait: *Oportet etiam hæreses existere, ut probati manifesti fiant inter vos.* tamquam si diceret: Oportet esse Christianis fidei pugnam, ut sit probatis certa victoria. Nam ut eorum interim blasphemias seponamus, retexamus quæ sint ipsorum præcepta vivendi. Præpositi eorum, quos Presbyteros vocant, dicuntur tale habere mandatum, ut si quis laicorum factus fuerit crimen admissum, non dicat illi, Age pœnitentiam, deplora facta tua, desiste peccata; sed dicat, Pro hoc crimine da tantum mihi, & indulgetur tibi. Vanus plane & insipiens Presbyter, qui cum ille prædam accipiat, putat quod peccatum Christus indulgeat. Nescit quia Salvator solet peccata donare, & pro delicto quærere pretiosas lacrymas, non pecunias numerosas? Unde ait ipse: *Gratis accepistis, gratis date.* Denique Petrus cum ter negando Dominum deliquisset, veniam non muneribus meruit, sed lacrymis impetravit. Ait enim Evangelista de eo: *Flevit amarissime.* Vides, inquam, quia apud Christum in lacrymis est quantitas, non in donis. Quam graviter enim flevit culpam, tam celeriter consecutus est veniam. Suscipit ergo dona Presbyter, & pactione quadam indulgentiam de Salvatore promittit. Insipiens placitum, in quo dicitur, minus deliquisse Domino, qui plus contulerit Sacerdoti. Apud hujusmodi præceptores semper divites innocentes, semper pauperes criminosi. Quemadmodum pauper satisfacit pro delicto, qui non habet quod offerat pro peccato?

HOMILIA XI.

Incipit quod non debent Clerici negotiari.

Reprehendimus ante diem negotiationem clericos exercentes, & iuxta eos quodammodo sententia castigavimus: sed si recte consideramus officium, non vere negotium est: sed functio sacerdotalis ministerii functio quædam est spiritalis mercimonii: Ideo enim terrena impendimus, ut cælestia consequamur: ideo erogamus mundanas pecunias, ut æternas divitias adquiramus: ideo fame nostra alios pascimus, ut non deficiat alimonia nostra, sed crescat. Quid enim sibi vult pauperum per nos refectio, quid nudorum protectio, quid carceratorum visitatio, nisi quia sumptus qui in illis erogatur, non impenditur, sed augetur; & negotiatione quodammodo argenti cum quadam lucri usura servatur? Thesaurus enim quidam divitis est pauper esuriens. Eleemosynam enim datam non comedit, sed custodit. Solvatur licet caro, & homo in pulverem redigatur; opus tamen sanctum in eo vivit & permanet, & erit tibi in die iudicii testis idoneus, qui sibi est ad pastum operator inutilis: ita ut cito ei de tuis credatur operibus, cum de suis actibus non credatur.

Vide ergo si non negotiatio est eleemosyna. Amico quod largitus fueris, tibi perit: filiis quod reliqueris, tibi perit: solum non tibi perit, mendico quod dederis. In die iudicii enim pauperes tibi profunt; amici, filiique nihil profunt. Illi causam tuam agent, isti nec causam suam poterunt defendere. Mercimonium enim quoddam est Christianitatis officium; & negotiatio pretiosa, functio Sacerdotum. Pecunias enim Domini, hoc est eloquia Salvatoris populis eroganda suscepimus, de quibus eloquiis ad illum tenacem & inperitum Sacerdotii negotiatorem Dominus in Evangelio dicit: *Serve nequam, oportuit te pecuniam meam dare ad mensam nummulariis, & ego veniens cum usuris exegissem eam.* Arguetur enim, cur præcepta divinitatis sibi credita reservaverit reticendo, quæ multiplicare debuerat prædicando. Arguetur, inquam, cur non seminaverit erogando, quæ possit metere colligendo, sicut ait Apostolus: *Qua seminaverit homo, hac metet.* Ait ergo Dominus: *Veniens cum usuris exegissem.* Intellige ergo negotiationem ibi esse,

ubi tamquam pro fenore usura deponitur; sed non illa usura, per quam avarorum mentes lucrativa pecuniæ redibitione pascentur: in qua renumeratur creditori debitum, nec debitum evacuatur: sed illa usura deponitur, ubi non denariorum ratio, sed morum conversatio subputatur: ubi non de capite fortis agitur, sed de capite salutis inquiritur. Debitores enim sumus & obnoxii retinemur ad debitum, non chirographo litterarum, sed chirographo peccatorum. Unde & Apostolus ait de Domino dicens: *delens quod adversum nos erat chirographum*, & reliqua. Hujus ergo debiti usuram jubemur exsolvere. nam istius debitoris meminit Dominus in Evangelio dicens, tradendum hunc esse exactori, mittendum in carcerem, & non dimittendum donec solvat novissimum quadrantem. Istorum igitur eloquiorum & nos, fratres, usuram debemus, quia enim usura ab utendo dicitur, quemadmodum nos his utamur eloquiis, rationem daturi sumus. Non enim incassum Evangelium prædicat, non gratis Apostolus clamat, non sine causa Sacerdotes loquuntur: in quorumcumque aures vox sancta pervenerit, aut beati erunt de devotione, aut rei de contestatione. *Explicit.*

HOMILIA XII.

Incipit præfatio de corpore Domini.

Hæsterna die satis gaudii accepisse vos credo, fratres dilectissimi, ex tractatibus domni & patris nostri præsentis Episcopi, qui tanta facundia res divinas differuit, ut prædicatio ejus plena fuerit Sacerdotii gratia, oratoris eloquentia, institutione doctoris. Nec mirum, si is, qui in pontificio primatus honorem obtinet, habeat etiam in prædicando primatus eloquium: ut virtutes Dei, quas sancti pectoris arcano depromit, facundi sermonis oratione commendet. Atque ideo parvitatem meam scio auribus vestris minus solito placituram. Quis enim contentus sit potari de rivolo, cum possit haurire de fontibus? Terra enim aquarum tenuem rorem omnino non suscipit, posteaquam eam largus pluviarum imber infuderit. Sic igitur vestra dilectio inundata sancti Sacerdotis eloquio, sermonis mei non patietur vile fastidium. Quamvis enim doctus vir, quamvis disertus Orator, elinguis videbitur, si cœperit loqui præsentem meliorem. Sed tamen habet so-

latium suum ista confusio. Nihil enim ruboris est comparatione summi Sacerdotis displicere minimum Sacerdotum : præsertim cum juvare me possit beatorum insigne consortium. Si enim David unius societate sancti alterum sanctum fieri posse proclamat , dicens , *Cum sancto sanctus eris* : cur ergo me , quamvis imperitum , quamvis peccatorem , non potest fieri posse prædicatorem virtute Domini , tantorum consortio magistrorum ? Igitur quoniam beatissimus frater noster sanctorum Apostolorum laudes magno est profecutus eloquio ; debemus & nos ipsius sepulturam Domini prædicare : ut quia unius corporis membra videmur , similibus obsequiis procurata ; similibus quoque integrum corpus prædicationibus exornetur.

Videamus ergo de Domini corpore , posteaquam de cruce deponitur , quid geratur. Accepit illud Joseph ab Arimathia , vir justus , sicut ait Evangelista , & in novo suo sepeliit monumento , in quo nondum quisquam positus erat. Beatum ergo corpus Domini Christi , quod cum nascitur , utero virginis gignitur : cum recedit , justis tumulo commendatur. Beatum plane corpus quod virginitas reperit , & justitia custodivit. Custodivit illum Joseph tumulus incorruptum , sicut servavit illum Mariæ uterus inlibatum. Hic enim viri pollutione non tangitur : ibi mortis corruptione non læditur. Ubique beato corpori defertur sanctitas : ubique virginitas : novus illud venter concipit , novus tumulus includit. Domini caro virgo , & virgo vulva , & virgo est sepultura. Uulvam dixerim : est enim similitudo non parva. Sicut enim Dominus de matris vulva vivus exivit , ita & de Joseph vivus sepultura surrexit : & sicut tunc de utero ad prædicandum natus est , ita & nunc ad evangelizandum renatus est de sepulcro. Nisi quod gloriosior ista est , quam illa nativitas. Illa enim corpus mortale genuit , hæc edidit immortale : post illam nativitatem ad inferos descenditur , post hanc remeatur ad cælos. Religiosior plane ista est , quam illa nativitas. Illa enim totius mundi Dominum novem mensibus in utero clausum tenuit , hæc autem tridui tantum tumoli gremio custodivit : illa cunctorum spem tardius protulit , isthæc omnium salutem citius suscitavit. *Explicit.*

LIBRI DIURNI ROMANORUM PONTIFICUM SUPPLEMENTUM.

Responsum ad petitionem Episcopi.

ad pag. 97.

Basilicam, quam dilectio tua in honorem sancti ill. a te suggerit esse perfectam, consecrandi tibi per præceptionis nostræ seriem facultatem noveris attributam: quatenus, frater carissime, facta primitus donatione, quæ petitorio tenetur adnexa, votorum devotionis tuæ desiderium complens, celebritatis perfectione gratuleris.

Item responsum.

Oblationem dilectionis tuæ, boni operis perfectione gaudentes, congrua gratulatione suscepimus. Et ideo basilicam, quam in beati ill. nomine suggeris esse constructam, præceptionis nostræ serie quantocius consecrabis: ut princeps Apostolorum claritas universitatis frequentatione pro sui reverentia consecretur; & circumjecta plebs habeat, cujus intervntu petitionis suæ cito mereatur effectum. Cura tu, ut ea quæ ad ordinatum ejus collata dicis, vel a te suggeris conferenda, sine dilatione perficias.

Decretale quem legit Diaconus, quando Episcopus discutitur.

pag. 54.

Destitutis ecclesiis proprii Rectoris officio sic almitas vestra subvenire consuevit, in qua & Sacerdotii principatus existit. Ideoque provolari quæsumus Apostolatam vestrum, domine beatissime Papa, ut nobis pastorem quærentibus ill. talem Episcopum consecrare dignemini, cujus merita in eodem postulando omnium nostrum præstatur assensus. Optamus te per multos annos bene valere, domine beatissime Papa.

Item

Item aliud quod legit Diaconus.

Electio, in qua nemo dissentit, desideratorem pergratularur affectu. Im diu igitur episcopali officio destituti in ill. tali omnium nostrorum vota contulimus, ut annuentibus vobis, in ejus locum qui defunctus est subrogetur. Proinde precamur Apostolatam vestrum, domine beatissime Papa, ut ill. pro vestra benignitate annuere dignemini, quod religionis studio cognoscitur postulari.

Item aliud ejusdem.

Desideria venerandorum Canonum traditione non discrepant beatitudinis sibi poscentibus judicio subveniri. Igitur cum ecclesia nostra diu proprio sit destituta rectore, ad Pontificii vestri jura confugimus, de cujus sede omnis honor proficiscitur sacerdotum. Et ideo precamur Apostolatam vestrum, domine sancte & venerabilis Papa, ut ill. tal. presbyterum nostrum, quem consensus universitatis elegit, Episcopum consecrare dignetur. Optamus te per multos annos bene valere domine beatissime Papa. Et subscripserunt.

Diversa Privilegia apostolica auctoritatis.

Ill. Episcopus servus servorum Dei ill. religioso Abbati venerabilis monasterii sanctæ Dei genitricis semper virginis Mariæ Dominæ nostræ, & per eum in eodem venerabili monasterio in perpetuum. Cum summæ apostolicæ dignitatis apex in hoc divini prospectus nitore dinoscitur præfulgere, cum in exercendis Dei laudibus sui impensius studebit laboris exhiberi certamen. Ob hoc debita nos ejusdem apostolicæ pastoralis compulit sollicitudinis cura, quæque ad stabilitatem piorum pertinere dinoscitur locorum ubertim promulgari, & apostolicæ institutionis censura confirmari. Igitur quia postulasti a nobis, quatenus monasterium sanctæ Dei genitricis semper virginis Mariæ Dominæ nostræ, situm in loco qui vocatur Plumbariolo, territorio Aquinense, privilegiis Sedis apostolicæ infulis decoretur, ut sub jurisdictione sanctæ nostræ, cui Deo auctore deservimus, ecclesiæ constitutum, nullius alterius ecclesiæ jurisdictionibus submittatur. pro qua re piis desideriis faventes, hac nostra auctoritate id quod exposcitur effectui mancipamus. Et ideo omnem cujuslibet ecclesiæ sacerdotem

in præfato monasterio ditionem quamlibet habere hac auctoritate, præter Sedem apostolicam, prohibemus: ita ut nisi ab Abbate monasterii fuerit invitatus, nec Missarum sollemnitatem ibidem quispiam præsumat celebrare, omnimodo statuentes apostolica censura sub divini judicii obtestatione, & validis atque atrocioribus anathematis interdictionibus, ut neque ullus umquam præsumat quispiam alius, cujuscumque sit dignitatis præditus potestate, vel etiam quæcumque magna parvaque persona, in eodem monasterio, vel ejus causis incumbere, aut de rebus & possessionibus, vel quicquid de his quæ ei pertinere videntur, quoquo modo auferre, aut alienare: sed nec quamlibet malitiam, aut jacturæ molestiam, ibidem, siue pacis, siue barbarici temporis, quoquo modo inferre; dum profecto eum perenniter tam (ut dictum est) pacis, quam barbarico tempore firma stabilitate decernimus sub jurisdictione sanctæ nostræ ecclesiæ permanendum. Promulgantes nempe & hoc auctoritate beati Petri Apostolorum principis, coram Deo & terribili ejus futuro examine, per hujus nostri apostolici desiderii atque constituti sancimus atque decernimus, ut loca quæ ab Abbate cujuslibet cœnobii in eodem præfato sanctæ Dei genetricis monasterio Plumbariolo commutata vel etiam concessa sunt, necnon & alias locorum possessiones, quæ a regibus vel ducibus vel gastaldiis, & a ceteris christianis in eodem sancto loco largita atque oblata sunt, aut in postmodum illic concessa fuerint, firma stabilitate jure ipsius prælati monasterii existenda, atque in perpetuo permanenda statuimus. Nec licentia sit, ut dictum est, ex ejus vel omnibus eidem monasterio pertinentibus cuiquam magnæ parvæque personæ auferre: ut profecto juxta id quod subiectus isdem venerabilis locus apostolici constituti atque privilegii consistit, inconcusse dotandus permaneat. Si quis autem (quod non optamus) nefario ausu præsumpserit hæc quæ a nobis ad laudem Dei pro stabilitate jam dicti monasterii statuta sunt, refragare, aut in quoquam transgredi, sciat se anathematis vinculo innodatum, & cum diabulo & ejus atrocissimis pompis, atque Juda traditore Domini nostri Jesu-Christi æterni incendii supplicio concremandum deputatum. At vero qui pio intuitu observator, & in omnibus existiterit custodiens hujus nostri apostolici constituti ad cultum Dei respicientibus, benedictionis gratiam a misericordissimo Domino Deo multipliciter consequatur, & vitæ æternæ particeps effici mereatur.

Privilegium.

Cum in exarandis Dei laudibus debita pastoralis compulsi- ad pag. 100.
sollicitudinis cura, ut quæque ad stabilitatem piorum dinoscitur pertinere locorum, ubertim promulgari, & apostolicæ institutionis in privilegiis atque decretis censura confirmari convenit. Nempe nos apostolico moderamine superscripta venerabilia loca, quæ dudum fuerant in ruinis, magnaque inopia ac paupertate degentes, & a nobis . . . iter a solo ædificata, & undique ditata opportune ordinari s. . . . ad meliorem sine dubio statum reducere: præsertim ubi illa petuntur, quæ non ad commodum temporale, sed ad perpetuam providentiam pertinent Deo servientium animarum, ut prædicta scilicet venerabilia loca, quæ à nobis in uno conglobata atque adnexa sunt, cum propriis sanctorum congregationibus quæ regulariter cetera desunt.

Episcopo de levandis sanctuariis.

Noverit fraternitas tua pro reliquiis nobis beati martyris ad pag. 96.
ill. necessario opus esse, ut in loco qui venerationi ipsius dedicandus est, collocetur. Atque ideo præsentibus affatibus ill. Sedis nostræ secundum consuetam reverentiam levatas reliquias contradere non omittas: ut ad nos, secundum quod ei injunctum est, quantocius valeant deportari.

OBSERVATIONES.

I. **L**iber diurnus Romanorum Pontificum, tanta quondam apud eos auctoritatis, etsi modo penitus obsoletus, non tamen insuper habendus est ob antiquitatis commendationem. Quapropter cum in manus nostras incidisset vetustissimum annorum octingentorum exemplar, quo usus est Lucas Holstenius in adornanda illa, quam meditabatur, hujusce libri editione; aliquod opera pretium nos facturos existimavimus, si prædictum exemplar cum editione Garneriana conferremus. Exemplum codicis, quem Hilarion Rancatus monachus Cisterciensis Holstenio ad unam noctem, ut in Itinere nostro diximus, commodaverat, habuit Garnesius, qui Romanum codicem, eumque antiquissimum vocat, ejusque capitula, paucis omisis, in sua Præfatione refert. Exciderunt ipsi, nescio qua causa, forte ob exempli defectum, nonnulla capita, quæ mox retulimus.

II. Præcipuum est privilegium de monasterio Plumbariolensi. *Tafiz,*

Ratchisi ducis uxor, & filia eorum Rattruda, monasterium puellarum non longe à Casino, in loco, qui Plumbariola vocatur, propriis sumtibus extruxerunt, testante Leone Marficano in Chronici Casinensis lib. I cap. VII. ubi sub magna cautela & districtione regulari vitam agentes, ultimum diem clauferunt. Ibidem sanctam Scholasticam vixisse, atque decessisse tradunt. Monasterium puellarum Leo appellat: & tamen superius privilegium religioso Abbati venerabilis monasterii sanctæ Dei genitricis Mariæ inscriptum est. Fortè duplex ibi monasterium erat, ut in frequenti loco. Certè monasterium Virginum apud Plumbariolam, non Virgini Deipara, sed sanctæ Petronilla nuncupatum legitur in ms. codice Casinensi signato n. 219. in hac verba: Bernardus abbas Casinensis hoc Missale mittit sororibus monasterii nostri sanctæ Petronillæ de Plumbarola, ut orent pro eo. & in eodem codice ad mensem Iunium: Obitus Beatricis abbatissæ monasterii sanctæ Petronillæ de Plumbarola anno Domini M CCC XV. Ad hæc in Novembri: Obitus sororis Marottæ abbatissæ monasterii sanctæ Petronillæ de Plumbarola. Nunc pradium est cænobii Casinensis.

III. Non desunt in Romano exemplari varia lectiones & emendationes, quibus Garneriana editio multis in locis exornari potest. Insigniora quædam loca hic apponere iuverit. Pagina 12. lin. 3. Divina enim nobis in oratione manentibus, ut cælestis dignatio &c. rectius in Romano, Diu enim nobis in oratione manentibus, ut omnium mentibus cælestis dignatio &c. Ibid. lin. 11. Si dici est; codex noster, si dici licitum est. quæ correctio etiam pag. 17. lin. 20. adhibenda est. Item eadem pag. 12. lin. 12. & 13. Presbyteri, in codice Romano, Diaconi, uti & in fine ejusdem formulæ, in illo sanctissimo Diacono & electo nostro consensu & subscripsi. Similiter totus clerus cum Optimatibus & Militibus seu civibus subscripserunt. Pag. 14. lin. 7. pro petitionis unitæ, legendum nostræ. Et pag. 15. lin. 20. beatum Petrum apostolorum principem. Pag. 18. lin. ult. & 19. lin. 1. & seqq. ita restituendum. Propinquantium quoque inimicorum ferocitas, quam nisi sola Dei virtus atque apostolorum Principis per suum Vicarium, hoc est Romanæ urbis Pontificem, ut omnibus notum est, aliquando monitis comprimit; aliquando vero & flectit ac modigerat hortatu... cum obsecratione. Pag. 26. lin. 6. Presbyter, in nostro Diaconus; itemque pag. 32. lin. 12. Pag. 37. lin. 14. Simul Verbi caro, simul caro animata, rationalis.

Pag. 43. lin. 21. *post synodaliter*, *codex addit*, atque decreta-
liter. Pag. 48. lin. 15. *inhumanatum*, *legendum humanatum*. *ibid.*
lin. 13. substantiam lege subsistentiam, *quod grave mendum emen-*
dat codex noster. Pag. 50. lin. 21. Constantini, *noster addit*, Magni.
quod ad formulam vulgarem necessarium. Pag. 51. *lin. 13. prævian-*
tibus, *adde ac comitantibus*. Pag. 61. lin. 10. *post præsumpse-*
runt, *adde itidem*, *præsument*, atque *præsumpserint*. *Ibid. lin.*
14. lege per proprias doctrinas. *Item lin. 16. juxta duarum natu-*
rarum modum, *ita & duas naturales voluntates*, atque *duas*
naturales operationes. Pag. 70. *col. 1. lin. 8. puritatem meam*
atque concursum tibi utilitatibusque Ecclesiæ &c. Pag. 74. *lin.*
7. Litanias vero per triduum ante diem Ascensionis Domini
celebrare, *totum deest in codice Romano*, *ut & in epistola Gregorii II.*
Pag. 86. lin. 6. quia nimirum, *lege qui animarum*. *Ibid. lin. 11.*
& 12. post deglutiat, *ita emenda*, & *ejus ad nostram non imme-*
rito applicetur pœnam perditio, *qui commissos sollicita custo-*
dire cautela negligimus. *Et linea 13. post dicimus*; & *quibus di-*
visi &c. Pag. 95. *lin. 17. lege in loco ill.* & *lin. 19. post fundatum*,
adde, *postulans ut dedicari debeat*, *dilectionem tuam &c.*
Pag. 97. lin. 16. lege In ill. siquidem fundo, *ill. territorio.* & *lin.*
22. ill. Martyris eam censeatis dedicari honorem: *ut Deo pro*
picio salvis orationibus vestris desiderium meum gaudeam
adimplesse. Cetera levius percurreremus.

Pag. 125. *habetur Privilegium Regina cuidam concessum in gra-*
tiam monasteriorum ab ea conditorum. Editi Regina nomen haud
exprimunt: codex Romanus CYNEDRIDAM vocat. Linea 1. pri-
vilegii laudanda de bonis, *lege laudandæ devotionis*. *Item lin.*
10. quæ juste acquisisse: & *lin. 12. constituiſſe ac dedicasse lin. 15.*
tuæ ill. Cynedridæ reginæ. qua Anglorum regina haud dubiè fuit,
aut certè Regis Angliæ filia. Pag. 130. *lin. 4. idoneam-codex habet*
oleorum. & *pag. 134. lin. 4. post votis*, *addit faveas. Hac pausa ex-*
multis.

Visum est subjicere hoc loco vitam Hadriani Papa I. auctore mo-
nacho Nonantulensi anonymo, in qua formulæ in Diurno libro præ-
scripta, prout à Pontifice usurpata sunt, referuntur.

I N C I P I T

VITA ET TEXTUS EPISTOLARUM

ADRIANI I. PAPÆ ANTIQUÆ ROMÆ.

Adrianus igitur, natione Romanus, ex patre Theodoro, & regione... via Lata, sedit annos **xxiii.** menses **x.** dies **xvi.** Hic igitur domno Stephano Papa rebus humanis exempto, ad ordinem episcopatus communi concordia omnium clericorum ac populorum electus est, sicut eorum Decretum demonstrat, quod ita habet.

*Diurn.
pag. 10.*

” Inter cetera quæ summæ divinitatis consilio disponuntur,
 ” pontificalis promotionis sublimitas ipso, à quo procedit omne
 ” quod bonum est, prædestinante ac largiente conceditur &c.
 ” Diu enim nobis in oratione manentibus, ut omnium menti-
 ” bus cælestis dignatio demonstraret, quem dignum ad succes-
 ” sionem apostolicæ vicis jubeat eligendum, ejus gratia suffra-
 ” gante & omnium animis inspirante, in uno convenientibus
 ” nobis, ut moris est, id est, cuncti sacerdotes ac proceres eccle-
 ” siæ, & universus clerus atque optimates, & universa militaris
 ” præsentia seu cives honesti, & cuncta generalitas populi istius
 ” à Deo servatæ Romanæ urbis, si dici fas est, à parvo usque ad
 ” magnum, in personam **ADRIANI** sanctissimi hujus sanctæ
 ” apostolicæ Sedis Romanæ ecclesiæ Diaconi, Deo cooperante
 ” & beatorum Apostolorum annisu, concurrat atque consentit
 ” electio. Cujus Deo amabilis viri tantum meruit apud omnium
 ” conscientias bonæ & pudicæ conversationis profectio, ut nul-
 ” lus in ejus electione divideret, nullus abesset, nullusve seipsum
 ” subtraheret. Quem enim ad hoc apostolicæ vicis officium &c.
 ” & Salvatore nostro protegente valeat. Hoc vero Decretum à
 ” nobis factum subter, ut prælatum est, manibus propriis robo-
 ” rantes, in archivio dominæ nostræ sanctæ Romanæ eccle-
 ” siæ in sacro Lateranensi scrinio, pro futurorum temporum
 ” cautela recondi fecimus, mense ^a Febuario Indictione. **x.**
Explicit electio.

^a *Adriani Romani episcopi ordinatio notatur i v. Nonas Martii in vetustissimo Kalenda-
 rio Gellonenfi, quod tempore Caroli M. scriptum est.*

HADRIANI PAPÆ I. VITA. 39

Ipse etiam venerabilis Adrianus in initio ordinationis suæ Indiculum rectæ Fidei hujusmodi composuit. Ego Adrianus misericordia Dei Diaconus & electus, futurusque per Dei gratiam hujus apostolicæ Sedis Antistes, tibi profiteor beate Petre, &c. pura mente & conscientia devota, corporali jurejurando sinceriter obtuli.

« *ibid. pag.*

« 26.

«

«

«

Postmodum vero professionem rectæ & orthodoxæ Fidei conscripsit istiusmodi. Reverendissimis fratribus & dilectissimis universæ plebis Dei. Ad hoc apostolicæ Sedis officium, dilectissimi filii, quod superna gratia providente ac suffragante cum tanto cordis stupore & humanitate nos suscipere debere perpendimus &c. dum de Patre Filius æternaliter nascitur, Spiritus sanctus de Patre procedere confirmatur, idem Dei Filius de suo accipere perhibet, & in nomine suo mitti à Patre Spiritum sanctum manifestat, & insufflando discipulis, Accipite Spiritum sanctum, utpote de se procedentem, annuntiat &c. beate Petre apostole obtuli conservandam.

« *ibid. pag.*

« 32.

«

Adrianus Episcopus sanctæ catholicæ atque apostolicæ ecclesiæ urbis Romæ, dilectissimis & dulcissimis filiis in Domino salutem. Hodierni diei festiva jucunditas invitat nos dilectissimi &c. per omnia sæcula sæculorum.

« *ibid. pag.*

« 45.

«

«

Hic etiam Sedem apostolicam strenuissime gubernare, & ad proprium statum reducere studuit. Eo siquidem tempore Desiderius regnum Longobardorum tenebat, & Romanæ ecclesiæ castra & prædia more antecessorum suorum nimis vastabat. Quapropter Papa prædictus commotus, Carolum Francorum Regem, sicut in gestis ipsius Caroli legitur, contra Desiderium in Italiam invitavit. Qui etiam Carolus non prius destitit, donec Desiderium bellis fatigatum perpetuo exilio damnaret, & filium ejus Italia pelleret, resque direptas Adriano Papæ restitueret, & filium suum Pipinum Italiæ præficeret.

Ante hujus quoque Præsulis Adriani tempora, scilicet Gregorii antecessoris ejus diebus, apud CP. hæresis quædam exorta Anastasio & Leone Impp. jubentibus, omnium circumquaque ecclesiarum Dei imagines depositæ, & publicè igni traditæ sunt. Cumque etiam id ipsum circa Italiæ ecclesias facere jussissent, Gregorius Præsul una cum Romano populo iniquissimis edictis Imperatorum constantissime contradixit. Adhuc enim CP. Imperator urbem Romam & nonnulla Italiæ castra sub sua ditione tenebat: quæ post modicum Carolo coronam Romani

40 HADRIANI PAPÆ I. VITA.

Imperii suscipiente amiserunt. Sed nunc ad propositum redeamus. Igitur cum hæresis prædicta apud CP. ebulliret, Adrianus, ut diximus, Sedem apostolicam regendam suscepit imperante Constantino & Irene matre ejus. Qui etiam ad eundem Papam elegantem epistolam miserunt, rogantes ut ipse ad illum locum ascenderet, ubi ipsi universale Concilium decreverant fieri, & firmitatem antiquæ traditionis super venerabilibus imaginibus confirmaret. Initium autem epistolæ hujusmodi est.

*Divalis sacra directa à Constantino & Irene Augustis
ad sanctissimum Adrianum Papam senioris Romæ.*

Qui à Domino nostro Jesu-Christo vero Deo nostro suscipiunt sive Imperii dignitatem, sive principalis Sacerdotii honorem &c. quo veniat paterna vestra beatitudo ad nos legimus. Data IIII. Kalend. Sept. Indiæ. VII.

Perlectis igitur Adrianus Præsul Imperatoris litteris, misit & ipse eloquentem valde epistolam, cujus initium est. Adrianus Episcopus servus servorum Dei, dominis piissimis & serenissimis victoribus Imperatoribus ac triumphatoribus filiis diligendis in Deo Domino nostro J. C. Constantino & Hirenæ Augustis. Deus qui dixit de tenebris lumen splendescere &c. Romanæ ecclesiæ ulnis suscipiamini. (Ab hinc usque ad finem hujus epistolæ græcus codex non habetur &c. ut in Act. 2. Concilii 2. Nicæni). Data VII. Kalendas Novembris Indictione IX.

Conc. to. 7.
col. 99. ad
15. edit.
Lubbeana.

Misit etiam idem reverendissimus Papa strenuissimos & doctissimos viros, qui vice ejus Concilio interessent, id est Petrum reverendissimum archipresbyterum sanctissimæ Romanæ ecclesiæ sancti apostoli Petri, & Petrum reverendissimum presbyterum, monachum & abbatem monasterii sancti Sabæ Romæ siti. Cumque in regia urbe Concilium celebrari decrevissent, resistentibus quibusdam Dei inimicis impediti sunt. Sed post annum hinc & inde collecti quam plurimi Episcopi eorumque legati, factum est sanctum septimum Concilium in Nicæa Bithiniæ, imperante, ut diximus, Constantino & Irene matre ejus, præsidente quoque domino Adriano I. Papa per suos Legatos in eodem Concilio.

Hic etiam cum ad regem Carolum pergeret, ut veterum
pandit

pandit memoria, in locum qui Spinum-Lamberti vocatur, vitam finivit VII. Id. Julii, & ad ecclesiam monasteriumque beati Silvestri, quod Nonantula dicitur, perductus, honorificè sepultus est: ubi etiam usque hodie miraculis coruscare dignoscitur. Cujus morte Carolus Francorum Rex audita, nimum condoluit, diuque se in lamentis dedit. Nam ab ipso Romanorum Patricius constitutus fuerat, regnumque Italiæ ipso favente susceperat. Cantores etiam doctoresque ecclesiæ ab eo susceperat, & in Metensium urbe constituerat: cujus ecclesiæ cantores usque hodie Romanæ ecclesiæ plus ceteris Gallis in cantu concordant.

Sepulto itaque summo Pontifice & universali Papa Adriano apostolicis infulis involuto, uti mos est Romanum sepelire Episcopum, in prædicto Nonantulo monasterio, sicut superius prælibati sumus, septem de jam dicto cœnobio Diaconi & monachi stolidissimum consilium reppererunt dicentes: Quid huic sancto & animæ defuncti prodest, quod tantæ pulcræ vestes marcescunt terreno humore? Melius certe esset, si hæc sancta ecclesia illis honorem haberet. Ideo hac veniente nocte omnes simul ad sepulcrum ejus pergamus, & lucidis ac coruscis vestibus eum exuamus, & vilioribus vestibus induamus. Luce igitur discedente, & tenebris terram obumbrantibus omnes ad monumentum euntes, eum cum silentio desepelierunt, & vestimenta ejus arripuerunt. Et ut lucidius & apertius hoc ab omnibus credatur, adhuc unam pulcram planetam, quam crassantes ei abstulerunt, in nostro monasterio habemus. Sed ut animi similitudinem de tali facinore contabescant, hoc in veritate scimus, quia nullus evasit impunitus. Omnis namque ille furiosus tumultus in eodem anno suæ vitæ finivit cursus, nisi tantummodo unus.

OBSERVATIONES.

I. **P** Ramisus libellus de vita Hadriani primi exstat in duobus pervetustis codicibus monasterii Nonantulensis; ejusdemque exemplum Romæ invenimus. Inter superiores formulas, quas Pontifex mox à sua promotione direxit ad diversos, desunt illæ quæ pertinent ad Exarchum Ravennatem, quippe qui ab anno DCC LII pulsus est; atque adeo ad Apocrisarium, & judices ejusdem civitatis. Exstincta Imperatorum per Italiam potestate, non tamen continuo cessavit mos ille antiquus, ut novus Pontifex Fidei suæ promus. Ital. Tom. 1.

feſſionem per eccleſias transſmitteret. Neque enim ejuſmodi formulis ſuam dignitatem imminui putabant recens electi Pontifices: quorum maxime intererat, ſuam ipſorum vitam doctrinamque ab omnibus eſſe approbatam. Ubi aptari poteſt id, quod Gregorius M. occasione electionis Conſtantii epiſcopi ſcripſit ad clerum Mediolanenſem. Judicari namque à vobis ultra non debet ſemel prælatuſ: ſed tanto nunc ſubtiliter judicandus eſt, quanto poſtmodum judicandus non eſt, in lib. II. epiſtola XXI. Indiſt. XI.

II. Eodem fere modo Deus dedit cardinalis in libro primo contra Schiſmaticos ait, Decretum electionis futuri Pontificis, quod olim exigebant Imperatores, non infringere vim electionis: propterea quod Decretum illud cum legatur eiſdem Imperatoribus ſæpe directum fuiſſe, nuſquam tamen legitur eoſdem Romanorum electionem mutaviſſe. Tum ſubdit. Hoc quia Domino contrarium erat, ut Eccleſia Pontifice careat, uſque dum Decretum, quod ferebatur, iret & rediret; penitus reſpuere ſequentes Imperatores, pietate religioneque præſtantes. ſic enim legitur in

» Romano Pontificali. Benedictuſ ſecundus, natione Romanuſ,
 » ſuſcepit juſſiones clementiſſimi principis Conſtantini ad venerabilem clerum & populum Romanæ civitatis: per quas con-
 » ceſſit, ut qui electuſ fuerit Pontifex, e veſtigio conſecraretur
 » abſque tarditate. Non tamen tunc deſiit mitti Decretum, tameſi
 ante ejus ſuſceptionem obtinebat electio. At quo tempore abrogari cœperit ille tranſmittendi Decreti rituſ, nono an decimo ſaculo, aliis examinandum relinquimus. Illud conſtat, undecimo ſaculo, per illaſ funeſti Romanorum Pontificum cum Imperatoribus diſcidii tempeſtates, hunc morem penitus intermiſſum fuiſſe. Certe Urbanuſ ſecundus in epiſtola encyclica de ſua electione, quam in veteri codice habemus, generalem tantum exhibet ſua Fidei profeſſionem. Inſcripta eſt hac epiſtola, Venerabili Salceburgenſi archiepiſcopo, ceteriſque reverentiſſimiſ epiſcopiſ, Patavienſi, Vvrceburgenſi, Vvorma-
 tienſi, Auguſtenſi, Conſtantienſi; & venerandiſ Abbatibuſ, & glorioſiſſimiſ Vvelphoni B. & B. atque omnibuſ majoribuſ & minoribuſ. Sic vero ad propoſituſ loquitur. De me porro ita in omnibuſ confidite & credite, ſicut de beatiſſimo patre noſtro PP. Gregorio: cujuſ ex toto ſequi veſtigia cupiens, omnia quæ reſpuit, reſpuo; quæ damnavit, damno; quæ dilexit, proruſ amplector: quæ vero rata & catholica duxit, confirmo & approbo; & ad poſtremum in utramque partem qualiter ipſe ſenſit, in omnibuſ omnino ſentio atque conſentio. Hac ille. Porro

jam dictus Deusdedit in libro quarto integrum caput de petitione ad dedicandum Oratorium, quod in Diurno exstat pag. 92 refert ex libro Romanorum Pontificum. Nulla Fidei professio (quam quidem sciaraus) a Romanis Pontificibus edita est post Bonifacium VIII. cujus formula apud Bzovium vulgata est ad annum M CC XCIV.

III. *Integras formulas, quales in Hadriani vita referuntur, tanti non visum est ut recuderemus, cum ex Diurno libro facile repeti possint. Satis sit variantes lectiones, qua quidem insigniores sunt, adnotasse.*

In INDICULO PONTIFICIS pag. 26. lin. 7. humilis apostolicæ ms. cod. hujus apostolicæ, & ita etiam in veteri Diurni exemplari, uti & sequentia. Pag. 28. lin. 1. & seqq. item quæcumque..... a te traditæ. ms. id est quæque.... traditionem. ibid. lin. 19. nuper Constantino, lege nuper sub Constantino. pag. 29. lin. 11. quæque synodaliter statuerunt, rectius, quæque vel synodaliter, vel specialiter statuerunt. pag. 30. lin. 8. & sequipeda totis viribus meis conatibusque tradita conservare, ms. codex exsequi, ac totis mentis meæ conatibus, quæ tradita comperio, conservare. pag. 31. lin. 8. curanti, in hac vita corruptibili constituto, adjutorium quoque ut præbeas obsecro. alias, curanti adjutorium quoque ut præbeas obsecro in hac vita corruptibili constituto.

IN SECUNDA PROFESSIONE ad pag. 34. lin. 4. dilectissimi adde filii. pag. 34. lin. 21. nos facturos dele cum utroque exemplari. pag. 35. lin. 2. custodiemus, quam venerandum, utrumque, custodiens, venerandum. ibid. lin. 7. revelante, redegit in Symbolum, cod. revelante, fidem catholicam redegit in Symbolum. pag. 36. lin. 10. subsistentiarum, lege, substantiarum. pag. 37. lin. 14. simul Verbi caro animata anima rationali, rectius cum utroque, simul Verbi caro, simul caro animata, rationalis. pag. 38. lin. 5. proprietate, utraque natura, lege, proprietate utriusque naturæ, lin. penultima, semini-Nestoriani, emenda, Semi-nestoriani. pag. 39. lin. 4. Zoara, ms. Zohora. ibid. lin. 22. Præ-sulum, lege, Patrum atque Præsulum. pag. 40. lin. 10. de qua humanitas ei accessit, utrumque, de qua & initium humanitatis ejus accessit. ibid. lin. 12. subsistentiam, lege, subsistentias. pag. 41. lin. 10. Cyrum, in utroque Cyrinum. ibid. lin. ult. contra veritatem fidei, utrobique, etiam veritate fidei.... declarata atque prædicata. pag. 42. lin. 8. congregatam, melius concretam. ibid. lin. 10. ita de, lege, ita idem de. pag. 43. lin. 21. synodaliter

statuerunt, *sic emenda*, synodaliter atque decretaliter statuerunt. *ibid. lin. 24.* eorundemque præsidio cum hominibus esse sequipedam. Unde &c. *Vita habet*, & cum Dei adjutorio, eorum in omnibus esse præsidio. Unde &c. *ibid. lin. 27.* evangelicam, adde atque apostolicam. *ibid. lin. ult.* annitenda, rectius admittenda. *Pag. 44. lin. ult.* consolidandam, in utroque conservandam.

Ceterum in illa secunda Professione id observandum, quod Hadrianus Spiritus sancti processionem ex Patre Filioque confiteatur: id quod superiores etiam Pontifices agnoverant. Cur ergo Leo tertius, Hadriani successor, additamentum Filioque a Gallis in Symbolo factum non probavit? Nempe quia doctrinam quidem illam Pontifices approbabant: verum Symbolo CP. quidquam addi non ferebant. Nam, ut Græci loquuntur in Concilio Florentino, etsi pium est quod fuit additum: qui tamen hoc patrare ausus fuerit citra cognitionem synodicam, culpa nequaquam vacabit, apud Labbeum col. 494. Itaque Pontifices in novis, quas post Concilium CP. condidere, formulis particulam Filioque facile admiserunt: in ipso Symbolo citra legitimum auctoritatem addi nefas esse ducebant. quod tamen postmodum usu invalescente approbarunt.

ADMONITIO

IN SEQUENTIA CAPITULARIA.

Capitularia tria, quæ mox referemus, descripta sunt ex veteri codice bibliothecæ Chigianæ, qui olim fuit monasterii sancti Pauli ad Urbem, scriptus ante annos ferme octingentos. In eo diversus est in multis ordo ab editis, diversi contextus, ac diversalectiones non contemnenda. Verum his minutiis omisissis, ea tantum huc afferimus, quæ sunt majoris momenti, hoc est tria Capitularia, quorum priora duo sunt Caroli M. tertium Ludovici Augusti ejus filii. Quæ in tertio dicuntur de judicio ad Crucem, ex Notis ad Capitularia Baluziana, & ex Glossario Cangiano abunde illustrantur.

His Capitularibus propter argumenti affinitatem adjungimus ex Chartario Farfensi tria præclara instrumenta: quorum duo Placita sunt, alterum Luponis Ducis Spoletani, cujus est etiam Præceptum de conditione parthenonis sancti Georgii prope Reate, quod hæc Placita præcedit: alterum Adalhardi abbatis Corbeienfis, Misi Dominici in.

CAPITULARIA PLACITA, &c. 45

Italia sub Bernardo rege, Pippini filio. quod postremum datum est anno XL Caroli M. in Italia regnantis, Bernardi vero ejus nepotis anno V. Indictione VII. hoc est anno Christi DCCC XIV. & quidem mense Febuario. ac proinde paullo post Caroli obitum, qui contigerat Ianuarii precedentis die XXVIII. sed necdum in Adalhardi cognitionem venerat. Hinc probatur id, quod auctor libelli de translatione sancti Viti scribit, Adalhardum non modo sub Pippino, (quod Paschasius in Adalhardi elogio testatur) sed etiam sub Bernardo, Pippini filio; Italiam administrasse: de cujus in reddenda justitia studio & aequitate idem Paschasius testis est luculentus.

His succedet ex eodem Farfensi Chartario Narratio contentione de Cella sanctæ Maria in Minione inter monachos Farfenses, & sanctorum Cesæ & Damiani in Mica-aurea. Cella hæc sita erat in territorio Tuscanæ, prope fluviculum Minionem, a quo vocabulum traxit.

INCIPIT CAPITULARE.

Qualiter dominus Rex ad placitum suum fidelibus suis ammonuit.

I. Volumus atque ammonemus &c. *ut tom. I. Capitular. ecl. 355. artic. XX XVII.*

II. Ut abbates, qui monasteriis regularibus præsunt, volumus atque jubemus ut secundum Regulam vivant & doceant, & de subjectis de hoc, quotquot illis & carnaliter & spiritaliter ministrare curent, & vigilantiam habeant.

III. Ut abbates, qui Canonicam debent normam illis, similiter suis provideant clericis, sicut Ordo Canonicus docet, & juxta vires certent, qualiter ipse Ordo ibidem servetur, & officium debitum ipsi explere queant, &, ubi opus est, sua monasteria emendare procurent: & ut abbates monasteria sibi commissa magis frequentare delectent, & suos clericos instruant, ut Dei servitium expleant, & Ordinem suum custodiant, quos per cetera delectamenta pro voluntate sæcularium vacare non sinant, nisi forte contingat eos in servitio domni Imperatoris nostroque esse occupatos; & hoc ad tempus erit, non semper.

IV. Ut vassi & austaldi nostri in ministeriis vestris, sicut decet, honorem & plenam justitiam habeant: & si præsentem esse non possunt, suos advocatos habeant, qui eorum res ante Co-

46 CAPITULARIA PLACITA, &c.

mitem defendere possint: & quicquid eis quaeritur, justitiam habeant.

V. Volumus atque jubemus, ut Advocati in praesentia Comitum eligantur, non habentes famam malam: sed tales eligantur, quales lex jubet eligere.

VI. Volumus etiam atque jubemus, ut Comites & eorum iudices non dimittant testes habentes malam famam testimonium perhibere: sed tales eligantur, qui testimonium bonum habeant inter suos pagenses. Et primum per ipsos iudices inquirentur, & sicut ab aliis rectius inquirere potuerint, ita faciant, non voluntati malorum hominum assensum praebentes: ut & ipsi Comites vel eorum iudices, quos noverunt, causam, de qua inter eos agitur, compertam esse, sine blandimento ipsius, qui causam habet, faciant ad eandem causam venire, & per eorum inquisitionem definita fiant. Et jubemus ut testimonia ab invicem separentur, sicut lex jubet: quia si ita agant, multi falsi testes possunt convinci.

VII. Sed & hoc volumus, ut Comites plenam justitiam de latronibus faciant per eorum ministeria, & ut malefactores & fures non patiantur quietos residere, sed semper eos, in quantum valent, infestent.

VIII. Ut ante Vicarios nulla criminalis actio definiatur, nisi tantum leviores causae, quae facile possunt dijudicari. Et nullus in eorum iudicio aliquos in servitio homines conquirat, sed per fidem remittantur usque in praesentiam Comitum: & ingenuos homines nulla placita faciant custodire, postquam illa tria custodiant placita, quae instructa sunt: nisi forte contingat, ut aliquis aliquem accuset, exceptis illis scabinis, qui cum iudicibus residere debent.

IX. Volumus ut sicut nos omnibus legem conservamus, ita & omnes legem nobis conservare faciant, & plenam justitiam in eorum ministeriis, quicquid ad nos pertinet, facere studeant.

X. Inhibemus ut propter ullam distractionem, quam nos facere jubemus, aut pro quibuslibet causis servi non mittantur in distractionem, sed per Missos nostros vel domini eorum, aut illorum advocati, ipsos servos distringant, & ipsi, sicut lex jubet, rationem per servos reddant, utrum culpabiles sint, an non: ipsi vero domini distringant & inquirent servos suos, sicut ipsi amant.

XI. Ut nemo forcapium de mancipiis aut de qualibet causa

recipere præsumat, sicut sæpius dominus Imperator commendavit.

XII. Ut mancipia adventitia & fugitiva nullus recipere præsumat.

XIII. De mannire vero, nisi de ingenuitate aut de hereditate non sint, aperte observandum: de ceteris vero inquisitionibus per distractionem Comitis ad mallum veniant, & juste examinentur ad justitiam faciendum, &c. *ut* *tom* 2. *col.* 1105.

Si quis Langobardus faciem Dei & statum humanæ fragilitatis recogitans, pro salute animæ suæ de rebus suis voluerit judicare, &c. *tom* 1. *col.* 347.

XIV. Si quislibet contempta jussione nostra, ceteris in exercitum pergentibus, domi residere præsumpserit, plenum harribannum secundum legem Francorum, id est sexaginta solidos, sciat se debere componere, &c. *ibid.*

I I.

CAPITULA PLACITI MANTUANI.

I. De singulis Capitulis, qualiter Mantua ad placitum generale.... omnibus notum fecimus.

II. De justitiis ecclesiarum Dei, viduarum, orphanorum minus potentium volumus atque omnimodis præcipimus, ut omnes Episcopi, & Abbates, & Comites secundum legem pleniter justitiam faciant, & recipiant.

III. Hoc statuimus, ut unusquisque clamator tertiam vicem ad Comitem suum se proclamet, & inde idoneos homines habeat, qui hoc veraciter sciant quod proclamasset, & nullam exinde justitiam habere potuisset: & si * qualiter fecerit, & antea ad placitum se proclamaverit, legem suam componat.

* *f. aliter*

IV. Comites vero de illorum parte per testes affirmant, quod ei justitiam facere voluissent, & omnia notarium suum scribere faciant quanti ad se proclamassent, vel quantas justitias factas habent: ut nullam excusationem habere possint. nisi veritas clara sit, & justitiam facere voluisset, & hoc ipse Comes aut ejus advocatus per sacramentum firmare possit, quod de illorum justitia nullam negligentiam habeat, & per ipsa breviam cognoscere valeamus, utrum ad se proclamasset, an non.

V. Hoc omnibus notum sit, si quislibet post causam legibus finitam pro se clamaverit, aut xv. accipiat * gamatos, aut solidos x v. componere cogatur.

* *id est*
Percussiones

48 CAPITULARIA PLACITA, &c.

VI. Ut nullus alterius presbyterum recipiat, antequam ab Episcopo loci illius examinatus vel inquisitus sit : neque liceat ibi Missas celebrare.

VII. Ut quando Episcopus pro sua parrochia cercata fecerit, Comes vel sculdaís ei adiutorium præbeat, qualiter ministerium suum pleniter perficere valeat secundum canonicam institutionem.

VIII. Ut nullus mancipia christiana vel pagana, nec quælibet arma, vel armifcos foras regno nostro vendat : & qui hoc fecerit, bannum dominicum componere cogatur : & si ea mancipia minime revocare potuerit, vvidringum suum componat.

IX. Ut nullus alteri teloneum præsumat tollere, nisi secundum antiquam consuetudinem ; & alibi non tollat, nisi in locis antiquis & legitimis : & cui injuste tollitur, secundum legem componatur, & insuper bannum nostrum Missis nostris componat.

X. Ut nullus post calendas Augusti istos denarios, quos modo habemus, & usi sumus, dare audeat aut recipere : si quis hoc fecerit, bannum nostrum componat.

XI. De latronibus, qui ante Missos nostros minime venerunt, ut Comites eos perquirant, & ipsos aut fidejussores, aut sub custodia servant, donec Missi ibidem revertantur.

XII. Ut nullus quemlibet hominem Langobardum cum in vassatico vel casa sua recipere audeat, antequam sciat unde sit, vel quomodo natus est : & qui aliter fecerit, bannum nostrum componat.

XIII. De synodochiis volumus atque præcipimus ut restaurata fiant.

XIV. De vassis regalibus & de justitiis illorum, ut ante Comitem suum recipiant & reddant.

III.

IN NOMINE DOMINI NOSTRI JESU CHRISTI

HLUDVVVICUS nutu divino a Deo coronatus serenissimus Augustus, omnibus Episcopis, Abbatibus, Ducibus, Comitibus, seu cunctis fidelibus nostris. Capitula quæ nobis addere placuit hæc sunt.

I. Si quis cum altero de qualibet, &c. *ut tomo 1. col. 601. cap. x. his exceptis.* In ecclesiasticis vero negotiis Crucis judicio

dicio rei veritas inquiratur. Hoc de timidis atque imbecillis sive infirmis, qui pugnare non valent, ut nullatenus propter hoc iustitia sua careant, censemus faciendum. Testes vero de qualibet re non aliunde, &c.

IV. Si duo testimonia de qualibet re fuerint, & inter se discordent, tunc Comes eligat unum ex una parte, & alium ex altera parte: ut illi duo decertent cum scutis & fustibus. Nam si flebiliores fuerint ipsi testes, tunc ad Crucem examinentur. Quod si majoris ætatis sunt, & non possunt ad Crucem stare; tunc mittant aut filios, aut qualemcumque hominem possunt, qui pro eis hoc contendat: & ille qui de illa falsitate convictus fuerit, dextram manum perdat.

*vide tom. 8.
col. 688.
n. x.*

V. De omnibus debitis solvendis, sicut antiquitus fuit constitutum, per xii. denarios solidus solvatur per totam Salicam, excepto leudes. Si Saxo aut Friso aliquem occiderit, per xli. denarios solidus solvatur. Infra Sâlicos vero ex utraque parte de omnibus debitis, sicut diximus xii. denarii pro solido solvantur, sive de homicidiis, sive de rebus.

VI. De mannire vero nisi de ingenuitate, &c. *ut in editis.*

ITEM ALIA CAPITULA.

VII. Primum omnium placuit nobis, ut cartulæ, *ut in edit. tom. i. col. 689.*

VIII. Qui pulsat quod res venundasset, & non justo pretio; accedant ambæ partes super res, quas venundavit, & existimatores cum ipsis, & rememorent & appretient res ipsas, sicut tunc valebant, quando res ipsæ bene restauratæ fuerunt, antequam nos huc cum exercitu nostro issemus. Et si res ipsa sic appretiata fuerit justo pretio, sicut in ipsa cartula legitur, quod res ipsæ justo legitimo pretio venundassent, sicut tunc valuerunt, ut dictum est; venditio ipsa firma permaneat. Nam si res ipsas amplius æstimaverint quod tunc valuissent, quam pretium ipsum quod accepit; & ipse qui venundaverit ostendere potuerit, ut ex necessitate famis venditionem ipsam fecisset; aut in cartula ipsa manifestaverit tempore necessitatis famis: cartula ipsa frangatur, & pretium juxta ut in ipsa cartula legitur, reddat, & recipiat res suas sicut modo invenit eas: ante posito ædificio aut labore, qui postea ibi factus est, ipse qui fecit tollat, aut sicut inter eos convenerit: & de ista venditione ipsa persona agat quæ venundavit, aut filius ejus, non alter propinquus.

50 CAPITULARIA, PLACITA, &c.

* pretium
venditionis
V. Glossar.

IX Cartulæ illæ quæ leguntur de donatione, similiter volumus ut appretientur. Si amplius valuerint res ipsæ, quando restauratæ fuerunt, quam ipse * *launegild* fuisset, quando accepit; & ipsam donationem similiter strictus ex necessitate famis fecisset, & si probare potuerit, reddat *launegild*, & recipiat res suas, & cartula ipsa frangatur.

* exercitus

X. De donatione vel venditione, quæ in loca venerabilia facta sunt, suspendi iussimus, dum enim compensaverimus in synodo cum Episcopis & Comitibus, quomodo fieri debeant: & hoc iubemus, ut illis partibus iustum procedat iudicium, ubi nos aut nostra * ostis fuerimus per illud quod supra scriptum est. Et hoc statuimus, ut cartulæ illæ, quæ tempore DESIDERII factæ fuerunt per distractionem famis, aut per quaecumque ingenium, ut ista causa non computetur: sed juxta legem ipsorum exinde procedat iudicium. Et hoc damus in mandatis, ut quicumque homo ab hac præsentis die xx. mensis Februarii suas vendere res voluerit, in omnibus eorum pertineat potestatem: tantum sic faciant, sicut eorum fuerit lex. Unde qualiter nobis placuit præsentem deliberationis notitiam pro amputandis contentionibus fieri iussimus, & nobis legi fecimus, & volumus ut sic procedat iudicium. Facta notitia anno dominorum nostrorum.....

PRÆCEPTUM LUPONIS DUCIS SPOLETANI

De conditione monasterii S. Georgii prope Reate.

IN Dei nomine domnus LUPO & domna HERMELINDA gloriosi & summi Duces, monasterio sancti Georgii martyris Christi, sito prope muros civitatis nostræ Reatinæ, quem Christo protegente monasterium puellarum esse constituimus. Laudabilis & misericors omnipotens Deus, qui dedit remedia nobis mundanda peccata, sicut rogos, inquit, extinguatur latice, ita eleemosyna sæva purgantur peccata. Non te excuses per multitudinem divitiarum tuarum: quoniam qui nobis dedit, & in alios ipse pro sua pietate largitur. Quid modi-

CAPITULARIA, PLACITA, &c. 51

cæ fidei, quid adhuc dubii sumus? nam centies retribuet, & vita æterna fruebitur: quia auctor noster pro nostra salute suum sanguinem effudit, & nos non volumus pro nostro Redemptore res nostras amittere. Estο propitius Christe delictis nostris, & hoc monasterium puellarum sit tibi placabile, Deus, quod pro nostris facinoribus tribuimus, donamus, & in æterna traditione concedimus prædictum monasterium sancti Georgii martyris Christi cum omni substantia sua, quam ibidem pertenuit, & usque nunc possessum est, in eo ordine, ut ibidem congregatio sanctimonialium feminarum esse debeat, quas ibi Dominus dignatus fuerit aggregare, tam * incorales, quam de diversis provinciis, undique Dominus adauxerit, hoc est Langobardas vel Francas: ut secundum Deum & sanctam Regulam in ipso sancto cœnobio vitam suam degere debeant, & quotidianis diebus pro Christianarum animarum salute hostias & Deo laudes referre debeant: & qualiter Dominus inspiraverit omnem ipsam congregationem, uno consensu sive Priorem eligant, sive Abbatissam in Dei timore. Et hoc namque monasterium vel ipsa sancta congregatio sub tuitione & defensione debeat esse sanctæ Dei genetricis Mariæ monasterii * in Acutiano, & nunc ibi modo DOMNOLINAM abbatissam constituimus, ut usque dum ei Dominus vitam dignatus fuerit largire, custos & rector ibi esse debeat regulariter, uti competit Dei famulam & abbatissam. Post vero ejus defunctionem, sicut casus humanus fragilis est, dum ab hac luce fuerit subtracta, ipsa congregatio monacharum, ut superius affati sumus, uno consensu, qualis earum congrua fuerit, una cum permissione & consensu abbatis monasterii sanctæ Dei genetricis Mariæ, vel ejus successoris, qui post ipsum abbas fuerit, licentiam habeat prædicto tenore sibi eligere abbatissam. Quod vero præceptum offertionis nostræ nullus gastaldus vel actionarius noster de his, quæ nostra constituit largiter potestas, audeat vexare quandoque: sed omni tempore firmum & stabile permaneat. Ex jussione superscriptæ Potestatis scripsi ipse ego Dagar. Notarius. Dat. juss. Spolet. in palatio, anno Ducatus nostri in Dei nomine v i. mense Aprili, per Indictionem i v. sub Immone gastaldo nostro feliciter.

* id est
hujus provin-
ciarum

* scil.
Farsensis

PLACITUM EJUSDEM LUPONIS DUCIS.

IN Dei nomine dum residerem ego domnus Lupo, gloriosus & summus Dux gentis Langobardorum in Spoletio, in palatio, una cum iudicibus nostris, id est Gademario, Arechis Diac. Perto Stol. Allone Sculd. Camerino gastaldo de Valva, Immo de Reate gastaldo, vel aliis pluribus adstantibus, ibi venerunt in præsentia nostra Claudianus presbyter & monachus una cum Vitulo germano suo, & nepotibus suis, id est, Ansualdo presbytero, Saxoreo, Aufone, habentibus cum eo altercationem de substantia sua. At ubi proponebat ipse Claudianus presbyter, dicens. Sunt modo anni non minus triginta, ex quo habuimus substantias divisas cum istis fratribus meis; & in portione, quæ mihi venit in Terentiano, ædificavi pro anima mea monasterium sanctæ Mariæ & sancti archangeli Michaëlis. Postea dum mihi contigisset infirmitas usque quo ad transitum venirem, feci per scriptum, ut omnes portiones substantiæ meæ, vel conquistum quod habui, cum ipso monasterio post meum discessum reverterentur omnia in dominatum vel potestatem monasterii sanctæ Mariæ in Acutiano. Dum hoc factum est, fecit in me Deus suam pietatem, & reductus sum ad medelam salutis de ipsa infirmitate. Modo vero compungente me divina maiestatem, volo cum omni ipsa substantia esse servus sanctæ Mariæ, & in monasterio introire, & regulariter vitam meam ibi finire.

Respondebat pars Vituli & Ansualdi & nepotum meorum, qui causam suam aliorumque fratrum suorum, qui in Reate remanserunt, vindicabant. Non faciat Deus ut veritas sit sicut proposuisti, sed nos dicimus veritatem, qualiter acta est causa inter nos de substantiæ nostræ divisione. Verum est quod jam plures anni sunt, ex quo habuimus divisas substantias, & in quo modo dicimus. Dum ad dividendum venissemus, habuimus substantias per singula loca, & domum cultam non habebamus, nisi unam casam in Terentiano: alias casas tantum colonicias habebamus. Et dum in plures partes nobis eveniret, ad sortiendum ipsam domum cultam, sic a nobis postulavit iste frater noster Claudianus, ut dimitteremus illi super totam partem substantiæ nostræ ipsam casam, domum cultam in Terentiano cum omnibus suis pertinentiis, in tali tenore, ut commune

nobiscum ibidem ædificare deberet monasterium : ita ut filii nostri ibi tenderent, & in ejus traderentur servitio, & ad discendum litteras: post ejus vero decessum, ipsum monasterium vel ejus partes reverterentur in nostram vel filiorum nostrorum potestatem. Nos vero communiter cum eo construximus ipsum monasterium, & filios nostros ut nobis repromitteret tradidimus ei ad serviendum; & chartulam nobis in eo tenore fecit, ut post ejus obitum nobis remaneret. Modo autem vult eam subtrahere nobis, introiens cum rebus ipsis in monasterium sanctæ Mariæ, quod nobis major comparescit præjudicium esse.

Sed proponebat Claudianus dicens. Quid plura habeo dicere quam dixi? nequaquam dixerunt verum, nec aliquando placitum istum ad eos feci de mea portione, aut scriptum ut proponunt.

Dum talia nos qui supra domnus Lupo eorum cognovissemus intentionem una cum prædictis iudicibus nostris, interrogavimus ipsum Claudianum, si haberet chartulam ut dixit, quam intransitu suo fecisset. At ille nobis dixit, quia ecce chartam præ manibus habeo illam. Fecimus eam in nostra relegi præsentia. Continebat enim, qualiter prius dixerat, ut post ejus obitum reverteretur in sanctam Mariam. Iterum ipsi fratres vel nepotes ejus ostenderunt a parte sua chartam, ut dicebant, quam Claudianus eis fecisset. Fecimus & ipsam relegi. Comparuit fraudulentia, in qua re nec Notarium verum habebant, nec testimonia. Comparuit nobis rectum, & decrevimus Deo medio una cum supra scriptis iudicibus nostris, ut pars Claudiani diceret eorum justitiam ad sancta Dei Evangelia, quod suam portionem eis nullo modo obligasset, nec chartulam ipsam ad eos fecisset: sed ab illa hora liceret ei cum rebus suis in jam dictum monasterium introire. Quod de præsentia præparavit se ipse Claudianus facere eis ipsum sacramentum. Ipsi vero donaverunt ei, & amiserunt sacramentum ipsum ante præsentiam Immonis gastaldi, Andualdi Sculd. Theuderadi presbyteri, Alifredi actionarii, Teudualdi gasindii, Guederici seu Ursi centurionis, & Probatii atque Gustantii: & finita est inter eos causa. Quod vero judicatum ex jussione superscriptæ Potestatis scripsi ego Dagar. Notarius mense Decembri per Indictionem IIIL. feliciter.

P L A C I T U M

Adalhardi abbatis, Missi dominici.

CUm venissem ego ADALHARD abbas, Missus domini Imperatoris Caroli, civitatem Spoletium, & resedissem in iudicio in palatio cum Sigualdo, Gradigis, & Hilemundo episcopis, Leone iudice domini Regis; Fratello abbate, Johanne, Leodegar & Magio, Maximo, Hilderico, seu Hilpidiano Cast. Benedicto & Basso scavinis, Tribuno scavino de Camerino, ibique veniens ad reclamandum BENEDICTUS abbas monasterii sanctæ Dei genitricis Dei Mariæ, siti Sabiniensis, una cum Johanne avvocato suo, quod quidam Leo de Reate fecisset traditionem in eodem monasterio de rebus suis, & haberet exinde convenientiam factam cum Herfoaldo genero ejusdem Leonis, filio Rumualdi Cast. ipso ejus genitore consentiente, ut super se aut ejus heredes res ipsas retollere quæssissent per quodlibet ingenium, aut contra eos exinde habere voluerit causationem, componeret eis argenti libras L X. Sed modo contradicunt ei ipsas res, & non permittunt ipsum monasterium habere secundum suam obligationem. Et dum ipse Rumualdus & Herfualdus essent præsentés, & audissent hanc proclamationem, fecimus nobis in primis relegi breve illud traditionis, quod Leo fecerat in eodem monasterio de rebus suis. Deinde fecimus relegi illam convenientiam obligationis, quam ipse Herfualdus, ipso genitore suo consentiente, eidem Benedicto Abbati factam habebat: ubi continebatur, sicut superius asseruerant. Et post relecta munimina ipsa, interrogavimus ipsum Rumualdum & Herfualdum, si aliquid adversus hæc dicere voluissent. Qui dixerunt: Nos illi de rebus ipsis numquam contradiximus, nec contradicere quærimus. Et replicans ipse Johannes advocatus aiebat: Certe tu contradixisti; & contra nos exinde causationem opposuisti, & ita possumus comprobare. Tunc affati sunt ipse Herfualdus & Rumualdus: Certe negare non possumus, nec volumus, quia contradiximus ipsas res, & causationem exinde opposuimus. Hoc dicto venit è contra Scaptolfus de Reate, similiter gener ejusdem Leonis, & dixit: Convenientiam istam quam tibi isti Herfualdus & Rumualdus fecerunt, facere non potuerunt de

rebus ipsius Leonis, eo quod ex se convenientia obligationis, quam mihi fecit iste Rumualdus, ante ipsam, quam vos ostenditis, ut res ipsas, quas vos quæritis, mecum dividere debuisset: & si non divisisset, & aut ipse, aut Herfualdus filius ejus ita non adimplessent, & aliter remove quæsisset per quaecumque ingenium; componerent mihi mancos c x c. Et dum ipsam nobis relegi fecissemus, continebatur ibi, sicut ipse Scaptolfus asseruerat. Et relecta convenientia ipsa, interrogavimus ipsum Rumualdum, cur talia fecisset: & quando se primo obligaverat Scaptulfo, se iterum quare ad partem monasterii obligasset. Qui dixit, quod nescienter hoc fecisset. Et adhuc interrogavimus eum, si posset aliquid contradicere, quod pœnas in ipsis convenientiis obligatas componere non debuisset. Qui dixit, quod nullatenus posset contendere, ut pœnas ipsas non solveret. Hoc dicto, fecimus eum dare guadium supra scripto Johanni advocato, ut componeret ad partem ejusdem monasterii secundum ipsam convenientiam, & juxta suam obligationem libras l x. Et deinde fecimus eum dare guadium eidem Scaptulfo de compositione mancos c x c secundam chartam ipsius obligationis, quam ei fecerat: & data guadia ista, suspendimus causas ipsas usque ad alium diem.

Et dum conjungeremus cum Suppone Comite Palatii, Guinichis & Heccideo Ducibus, & pertractaremus quomodo aut qualiter finem inter eos fecissemus; venientes alio die in eodem palatio supra scripto, Comiti & Ducibus per ordinem illorum causas, sicut actæ fuerant, intimavimus. Et dum ipse Rumualdus inventus fuisset culpabilis, cœpimus rogare misericordiam, ut eum non opprimerent, sicut poterant, de ipsis compositionibus. Et statim supra scriptus Benedictus abbas cum Johanne advocato suo dixit: Certe nos à nostra parte nullam compositionem ei tollere quærimus, nisi tantummodo volumus habere res ipsas, quas ad partem monasterii ipse Leo tradidit. Deinde Scaptolfus dixit: Certe & ego ex mea parte nullam compositionem quæro illius: solummodo liceat mihi habere meam portionem, quæ mihi pertinet à conjuge mea de hereditate ejusdem Leonis soceri mei, vel quam per chartam in eadem conjuge mea vel filiis ejus dederat. Et statim sua bona & spontanea voluntate primo omnium ipse Benedictus abbas cum Johanne advocato suo cesserunt, & perdonaverunt eidem Rumualdo & Herfualdo filio ejus ipsam compositionem nimi-

rum lib. LX. & susceperunt ab eis *Launecild*, manicias par unum. Et deinde Scaptolfus sua sponte cessit & perdonavit eis ipsos ex c. mancos, & suscepit ab eis *Launecild*, similiter manicias par unum. Et cum ita factum fuisset, guadiaverunt inter se ipsi simul & Mausio, tutor Liupæ, cognatæ ejusdem Scaptolfi, filii supradicti Leonis, ut ambulant ad dividendas ipsas res ejusdem Leonis: & pars monasterii tolleretur medietatem, quæ fuerat portio ejusdem Leonis; & ipse Scaptolfus & Rumualdus cum filio suo atque Mausione, tutore ejusdem Liupæ, tollerent medietatem secundum legem: ita sane, ut quicquid exinde ipse Leo in conjugē ejusdem Scaptolfi vel filiis ejus per chartam dederat ante, haberent sibi: & dimisit ipse Scaptolfus eidem Rumualdo & Herfualdo suam portionem, quæ ei de conjugē sua debebatur in Amiterno. Reliqua omnia diviserunt, sicut supra scriptum est, tantum ut hoc quod ipse Leo alii donaverat, aut in ecclesia obtulerat, vel servos pro anima sua liberos dimiserat, in illa Leonis ejusdem portione sit omne computatum: & munimina omnia obligationis & convenientiæ, quæ inter se Scaptolfus & Rumualdus, seu & Benedictus abbas facta habuerant, statim præsentibus nobis sua voluntate cassaverunt, & dixerunt quod amplius convenientias vel promissiones non haberent, quas alter adversus alterum ostendere posset: tantummodo superscriptum breve traditionis, & illa charta, quam Leo in conjugē ejusdem Scaptolfi vel in filiis ejus emiserat, stabilitæ remaneant: & finita est causa. Unde qualiter acta vel deliberata est causa, præsentibus testibus notitias uno tenore pro eorum securitate Urfinianum notarium domini Regis facere commonuimus: & ego quidem Martinus notarius ex ipsius Urfiniani supra dictatu subscripsi anno dominorum nostrorum Caroli & Bernardi Regum x L & v, mense Februarii, Indictione septima. † Ego Adalhardus subscripsi. Signum vel manus Supponis Comitis palatii qui interfuit. † Ego Accideus Comes interfui. † Ego Hismundus episcopus interfui. † Ego Maximucast. ibi fui. † Ego Tribunus interfui. † Ego Hildericus interfui. † Ego Johannes Sculd. ibi fui. † Ego Guinich. ibi fui. † Ego Leo bassus domini Regis concordem me subscripsi.

NARRATIO CONTENTIONIS

DE CELLA S. Mariæ IN MINIONE

Inter monachos Farfenses & sanctorum Cosmæ & Damiani.

Contentio igitur quæ fuit de Cella sanctæ Mariæ in Minione inter hoc nostrum monasterium, & monasterium sanctorum Cosmæ & Damiani, quod ponitur in Mica-aurea, ita exorta est, ut inferius referemus: quam huic operi inferuimus, ex authenticis schedantes, ob id maxime, his ut auditis deinceps caveatur à rectoribus cœnobii hujus, ne similis proveniat eventus. Obsecramus autem omnes seniores, qui audituri estis, pro Dei amore sanctæque Mariæ servitio diligenter auscultetis, atque discrete discernatis, si unquam plus injustam absurdamque litem audistis, quam seniores prædicti monasterii sanctorum Cosmæ & Damiani de hoc fecerunt. In veritate quæ Christus est vobis dicimus, quia per centum & eo amplius annorum curricula fuit prædicta Cella de Minione sub jure & dominio hujus monasterii sanctæ Mariæ, antequam præfatum monasterium sanctorum Cosmæ & Damiani fuisset inceptum, quemadmodum in sequentibus audietis.

Karolus denique, piæ memoriæ piissimus imperator, prædictam Cellam per suum præceptum huic monasterio in primis contulit. Deinde Hludovicus filius ejus & omnes sui successores confirmaverunt: & hoc monasterium semper illam tenuit, usque dum Sarraceni venerunt, qui cuncta monasteria extra Romam divastarunt funditus: ita ut etiam hoc monasterium XLVIII annis absque habitatore esset. Et post hanc divastationem hujus monasterii restaurator præcipuus exstitit venerabilis abbas Ratfredus. Post ejus mortem Campo abbas tenuit hujus regimen monasterii: qui ordinavit in prædicta cella unum Præpositum ad ipsum locum restaurandum, nomine Venerandum, quem acquisivit ab Abbate monasterii sancti Justi de Tuscana: ac fecit ei de prædicta cella destructa libellum in tribus personis monachorum; succedentibus uno duobus, sicut consuetudo sæcularium monachorum tunc erat, unde & apparum ipse Abbas apud se retinuit Quo ingressus,

58 CAPITULARIA , PLACITA , &c.

cito incolumem locum restituit : Valentinus quoque, Centumcellensis Episcopus, ipse ecclesiam consecravit. Venerandus vero jam dictus præpositus, quamdiu ibi habitavit, ita obediebat Camponi abbati suisque successoribus, sicut & alii præpositi facere consueverant.

Hoc namque tempore cœpit Benedictus, qui dicebatur Campaninus, ædificare prælibatum monasterium sanctorum Cosmæ & Damiani in sua proprietate, sicut pæne omnes Romani sciunt, & adhuc supersunt plures qui recordantur. quo completo, cœpit jam dictus Benedictus quærere utilem monachum, quem ibi abbatem præponeret. Cui cum à quibusdam de ipso Venerando indicatum fuisset, cum consensu istius monasterii abbatis, cujus erat præpositus, ordinavit eum abbatem : qui quamdiu advixit, cellam Minionis sæpe dictam tenuit ad jus & fidelitatem hujus monasterii, & pensionem quæ in libello superius nominato, quem secum portare solebat, annualiter reddebat, & aliud servitium Abbatibus hujus monasterii libenter exhibebat. Quo mortuo successor suus abbas, Silvester nomine, cui libellum prædictum dimisit, cœpit subtrahere illam pensionem quam dare debebat : qua de causa magna controversia orta est inter illum & Johannem Abbatem hujus monasterii ante præsentiam domni Ottonis imperatoris primi in Synodo generali, quæ tunc facta fuit in basilica sancti Petri majori, in qua ceteris videntibus reinvestivit idem Imperator Johannem abbatem de prædicta cella, & dedit illi suum nuntium usque illuc, qui & ibi eum investisset. Sed Lambertus Cæcus restitit illis, qui favebat parti alterius abbatis. Imperator verò ipse ivit ad alias partes : & tunc ratio ipsa dilata est usque ad tempus Ottonis secundi Imperatoris. qui videlicet Imperator ira motus contra Johannem præfatum abbatem, tulit ei abbatiam, & alteri dedit. Qua de causa egressus Johannes abbas de hoc monasterio, abiit ad Azonem abbatem de Aventino, suum germanum, portans secum quædam præcepta & aliquantas chartas hujus monasterii : inter quas erat præceptum de cella Minionis, & apparum jam dicti libelli : quæ duo furatus est Ursus malivolis præbyter, qui dicebatur de Malepascia, qui & camerarius erat ejusdem Johannis abbatis, atque vendidit a prædicto Silvestro abbati sanctorum Cosmæ & Damiani, & tulit inde triginta libras denariorum. Ad quorum exemplar fecit sibi facere idem Abbas

unum falsum præceptum, quod dicebat factum fuisse à rege Hugone.

Ab hoc tempore ceperunt ipsi abbates jam securius ipsam tenere cellam usque ad tempus Ottonis III. imperatoris atque Hugonis hujus monasterii abbatis : quam contentionem ideim Imperator legaliter cum consilio Silvestri venerabilis Papæ atque consensu, necnon & Hugonis inclyti marchionis, ceterorumque judicium Romanorum judicio finivit, ut inferius veraci stilo demonstrabimus. Ex quo jam tempore præfatus Hugo abbas, ejusque successores tenuerunt ipsam Cellam quiete, scilicet sub ipso Imperatore & Hugone marchione per xxxii annorum pæge curricula. quibus mortuis invasit eam Cadulus Comes, sed citò emendavit. Deinde sub domino Heinrico imperatore, qui reconfirmavit eam huic monasterio per suum præceptum, ac sub Raynerio marchione : sed neque Romani Pontifices, quibus pertinet monasterium ipsum sanctorum Cosinæ & Damiani, & ibi juxta habent civitatem Centumcellensem, aliquam umquam molestiam abbatibus hujus monasterii sanctæ Mariæ de ipsa cella fecerunt.

Hanc autem cellam Minionis monasterio sanctæ Mariæ confirmavit Otto, & Heribertus cancellarius vice Petri Cumanus episcopi recognovit, data III Non. Decembris, anno dominicæ Incarnationis DCCCXCIX, Indict. XIII. anno domini Ottonis regnantis XVI, imperii IV. Actum Romæ feliciter.

Anno vero pontificatus domni Gregorii V. Papæ secundo, imperii autem domini Ottonis imperatoris similiter secundo, presbyteri ecclesiæ sancti Eustachii, sitæ in Platana, reclamaverunt ad dominum Gregorium papam & imperatorem Ottonem, residentes in basilica beati Petri apostoli, super Hugone abbate hujus monasterii, dicentes quod contenderet eis duas ecclesias sanctæ Mariæ & sancti Benedicti, ædificatas in Thermis Alexandrinis, cum casis, cryptis, hortis, terris cultis & incultis, areis, columnis, & oratorio Salvatoris infra se, vel omnibus earum pertinentiis, sitas Romæ regione IX. Casu autem accidente affuit ibi Hugo prædictus abbas. qui iussus ad ipsum placitum venit, & inquisitus respondit : Rogo vos date mihi inducias, quia neque iudices habeo, neque advocatum. Tunc voluerunt ei dare Romanum advocatum, Et Abbas : Res monasterii nostri sub lege Langobarda viguit : propterea nolo

Romanum advocatum. Et illi: Velis, nolis, legem Romanam facere habebis. Et hoc se abbas nullatenus facturum respondit, nisi audisset ex ore domini Imperatoris. Tunc per cucullam apprehensus, ibidem sedit coactus: jussu autem domini Imperatoris inducias accepit à tertia feria usque in sextam feriam. Abiens autem abbas, die quo jussus est cum advocato & iudicibus reversus est. Interrogatus autem per quam se legem defendere vellet, respondit Hubertus Dativus iudex, & hujus monasterii advocatus: Secundum legem Langobardam nos defendimus, quia per centum & eo amplius annos res nostri monasterii sic defensata est. Quod cum Imperatori fuisset relatum, dixit: Si ipsum monasterium per legem Langobardorum fuit defensatum, à sua lege nullatenus subtraham eum. Tunc præfatus abbas ostendit confirmationem factam a Lothario imperatore, ubi continebatur, quomodo diffinitum est ante præsentiam prædicti Imperatoris & domni Paschalis papæ, quod hoc monasterium sub lege vivere debeat Langobardorum, & sub tali privilegio, sicut cetera monasteria regni Francorum, id est Luxoviensium, Lirinensium, & Agaunensium: & Pontificem Romanum nullum dominium in jure ipsius monasterii habere, excepta consecratione. Quam confirmationem advocati presbyterorum voluerunt reprobare. Ad hæc advocatus hujus monasterii jubente domino Leone, qui erat archidiaconus, & ex parte domini Imperatoris, voluit sacramentum præbere cum suis sacramentalibus, quod scripta ipsa falsa non essent, & quod hoc monasterium per ipsam confirmationem per centum & amplius annos se defensavit per legem Langobardorum. Insuper per pugnam & per testimonia probare voluit: sed presbyteri recipere noluerunt, dicentes, quod non oporteret eis. Ad hæc dominus Leo: Modo scio pro certo, quod idem monasterium semper fuit sub tuitione Regum, & per legem Langobardorum est defensatum. Nunc querite abbatem, & respondeat vobis secundum suam legem.

Tunc advocatus presbyterorum quaesivit dominum abbatem de duabus ecclesiis superscriptis, & dicebat, quod de eis ab anterioribus illorum presbyterorum charta tertii generis facta fuisset anterioribus ejusdem abbatis in tribus personis ad pensionem reddendam. Ad hæc Hubertus advocatus respondit, quod hoc monasterium per x x x x annos possedit eas ad proprietatem: & ostendit capitulum, ubi continebatur, quod de

CAPITULARIA, PLACITA, &c. 61

pensione non deberet respondere, sed de possessione secundum suam legem. Et tum induciatum est in alteram diem, in qua querimonia facta sicut prius, responsumque est ut supra relatum est. Tunc presbyteri accusare cœperunt nostrum advocatum ad domnum Leonem, dicentes; illum esse fallacem. Sed domnus Leo accepto utiliori consilio, fecit eundem advocatum jurare per quatuor Evangelia, ut ex illa hora & deinceps verum iudicium judicaret. Et dedit alium advocatum pro eò Petrum, filium Raynerii, Comitatus Reatini: & inquisivit domnus Leo iudices Romanos, quid sibi videretur de hoc. Et responderunt: Iudex Hubertus, qui est Langobardus, diffiniat, quia nobis non pertinet de hoc judicare. Tunc Hubertus ostendit capitula, ubi continebatur, quod sancta & venerabilia loca secundum legem Langobardam per x et annos possent per sacramentum probare suam possessionem. Et ita iudicavit Hubertus iudex. Tunc præparavit se ad vocatus domni abbatis, ut sic juraret cum sacramentalibus suis: & omnes iudices Romani affirmarunt, quod recte iudicasset Hubertus secundum suam legem.

At contra advocatus presbyterorum dare volebat testimonia, quod infra ipsorum curricula annorum pensionem accepissent ab hoc monasterio. Deinde Hubertus respondit: Nostra lex non præcipit, ut de pensione respondeat advocatus domni Abbatis, sed tantum de possessione: nec ego aliter iudico. Tamen si placet domino Leoni & iudicibus, dent presbyteri testimonia; dabit & domnus Abbas sua: & discernatur per pugnam. Et placuit omnibus. Et dederunt presbyteri tria testimonia, quorum nomina sunt, Castorius, Johannes tutor, & Benedictus Leonis subdiaconi: qui secundum legem ab invicem separati, & interrogati bis. Et primo quidem discordes, tunc inventi sunt per omnia fallaciores. Tunc iudicaverunt iudices, quod falsi essent testes, & abjiciendi ex placito; & presbyteri refutarent ipsas ecclesias domno abbati cum pertinentiis suis.

Iterum pars presbyterorum dicebat, ut advocatus domni abbatis de possessione supradicta juraret cum sacramentalibus suis. De quo interrogatus Hubertus, respondit: Non est lex. sed, si iudicibus placet, faciat advocatus domni abbatis sacramentum. Ad hoc omnes iudices Romani concorditer dixerunt, non debere Langobardum sine *asto jurare. Tunc affir-

* id est non
voluntarie.

62 CAPITULARIA, PLACITA, &c.

maverunt omnes, ut aut unus presbyterorum, aut advocatus juraret eorum, ut hoc quod quæsierant rectum quæsisent: & post hoc advocatus domni abbatis juraret cum sacramentalibus suis. Sed neque presbyteri, neque eorum advocatus jurare voluit. Inventi sunt enim fallaces. Post hoc judicantibus iudicibus presbyteri apprehenderunt baculum, & in manibus domni Hugonis abbatis & Huberti ejus advocati præfatas ecclesias refutarunt cum charta, per quam litigant: & si quolibet modo litem renovare voluerint vel tentaverint, componere se statuerunt libras decem auri optimi, medietatem Regi, & medietatem rectoribus hujus monasterii.

OBSERVATIO.

HÆc in specimen retulimus ex chartaceis libris monasterii Farfensis, cuius Chronicon, prouta Chesnio partim editum est, truncum ac lacrum, exemplaris dignitati haud quaquam respondet. Dignum est certe quod integrum edatur: sed res esset magna molis, si omnia privilegia, uti inserta sunt, in lucem ederentur. Quatuor omnino codices hac continent, quorum tres priores à Gregorio monacho in ordinem redacti sunt: quartus per Iohannem monachum, qui se Grammaticum vocat, ingens volumen conficit.

Gregorius in præfatione ad secundum librum suum, qui gloriosissimo semperque venerando magnificentissimo patri, Christique vices gerenti domno & abbati BERALDO, hujus nominis primo, nuncupatus est, primum suum codicem vocat Cleronomialem, id est hereditalem: secundum vero Largitorium vel Notarium, eo quod res monasterii notet ab ejus rectoribus possessas, vel alicui petenti legaliter sive usualiter largitas. In præfatione autem ad tertium codicem idem auctor ait, ex priori Chartario magno, & sequenti breviori libello hoc tertium opus brevissimum ab se confectum: ut lectus & relectus sine tadio hic liber & frequentius, notitiam bonorum omnium hujus monasterii administret præsentibus posterisque rectoribus. Quia in descriptione se ab omni falsitate abhorreere asserit, indignum esse ratus gratis mendacio uti, quippe qui sæpissime, etiam in rebus mihi, inquit, concessis & necessariis penurias ultra modum patiar. In hoc autem codice tertio exstant primo loco sancti Laurentii episcopi, primi cœnobii conditoris; tum beati Thomæ abbatis acta, aliorumque abbatum, cum privilegiis & instrumentis sub unoquoque abbate confectis.

CAPITULARIA, PLACITA, &c. 63

Tertium volumen magna molis concinnavit Iohannes monachus, in eoque retulit cœnobii Farfensis omnia instrumenta cum sigillis &c. Beraldo abbati secundo inscribitur hic codex sub hoc titulo & exordio. INCIPIT PROLOGUS DOMNI JOHANNIS GRAMMATICI super hujus opera libri. Imperante domno Henrico quarto, Romanorum patricio & imperatore, ab Incarnatione Domini nostri Jesu-Christi anno M XC II, Indictione XI, XIII Kal. Maias, divina inspirante gratia placuit domno Beraldo, reverentissimo abbati hujus ecclesiæ Farfensis, nobilissima gente progenito Florentiæ urbis, quatenus hujus sacri cœnobii universa privilegia & præcepta, necnon & tomos & legales chartas, nimia vetustate jam præne consumpta, in unum volumen colligere, eaque ad memoriam posteritatis studiosissime declarata, veracissime transcripta relinquere, eo scilicet modo, quo scripta erant per manus confratris nostri magnæ sagacitatis GREGORII, Comitatu Sabinensi oriundi in castro Catiniensi, nobilissimis parentibus progeniti, & nostræ ecclesiæ fere ab infantia lacte enutriti. Subdit Iohannes quosdam versus de Gregorio, ejusque fratre Donadeo, quos ambos genitor eorum Deo in monasterio Farfensi obtulisse memoratur sub Berardo abbate, ejus nominis primo. Et Donadeum quidem obiisse dicit anno M LXVIII. Gregorium vero anno octavo-decimo post susceptas monasticas vestes. Ex his duobus auctoribus seriem Ducum Spoletanorum, Abbatumque Farfensium hic subicere opere pretium putamus. Et primum quidem referemus verba brevium Annalium, qui majori Chartario inserti sunt: deinde quadam ex aliis codicibus addemus.

I N D E X

DUCUM SPOLETANORUM ET ABBATUM FARFENSIIUM.

A Nno DC LXXX sanctus Thomas abbas.
 DC XCI Transmundus Dux, pater Faroaldi.
 DCC III Faroaldus Dux.
 DCC XVI Haunepertus abbas.
 DCC XXII Fluvius Tiberis intumuit per dies octo.
 DCC XXIV Lucerius abbas. Transmundus dux filius Faroaldi.

64 CAPITULARIA, PLACITA, &c.

DCC XXXV Cœnobium Domini Salvatoris ædificatur in Leta-
niis.

DCC XL Fulcoaldus abbas.

DCC XLVI Lupo dux.

DCC LVII Albuinus dux.

DCC LIX Guandelbertus abbas.

DCC LX Gisulfus dux Spol.

DCC LXI Halanus abbas.

DCC LXII Theodericus dux.

DCC LXX Probatas abbas.

DCC LXXIV Hildebrandus dux.

DCC LXXXI Ragambaldus abbas.

DCC LXXXVI Alpertus abbas.

DCC LXXXIX Guinichus dux.

DCC XC Morraldus abbas.

DCC XCVII Inundatio aquæ fit Romæ in via Lata ad duas
staturas.

DCCC II Benedictus abbas.

DCCC VI Romanus dux.

DCCC XIV Guinichus dux.

DCCC XVI Ingoaldus abbas. Geraldus dux.

DCCC XXXII Sichardus abbas.

DCCC XXXVI Berengarius dux.

DCCC XLV Ecclesiæ apostolorum Petri & Pauli divastantur.

DCCC XLVII Hildericus abbas.

DCCC LVII Perto abbas.

DCCC LXVII Domnus Hludovic imperator venit in hoc mo-
nasterium.

DCCC LXXII Johannes abbas.

DCCC LXXXI Anselmus abbas.

DCCC LXXXII Teuto abbas.

DCCC LXXXVIII Nordebertus abbas. Spento abbas.

DCCC LXXXIX Vitalis abbas.

DCCC XC Petrus abbas.

DCCC XCI Monasterium Salvatoris a paganis incenditur.

CM XIX Johannes II. abbas.

CM XX Rimo abbas.

CM XXX Ratfredus abbas.

CM XXXI Theobaldus dux.

CM XXXVI Campo abbas.

- CM XXXIX Hildebrandus abbas.
 CM XL Anſcharius marchio obiit.
 CM XLIII Sarilo abbas.
 CM XLVI Bonefatus & Thebaldus duces.
 CM XLVIII Dagibertus abbas.
 CM LIV Albericus princeps Romæ obiit.
 CM LXVI Johannes abbas.
 CM LXVII Hodelricus reſceſſit : Johannes abbas fit.
 CM LXXII Domnus Hugo abbas naſcitur menſe Aprili.
 CM LXXIV Eccleſia Domini Salvatoris ædificatur in Boiano.
 CM LXXXVI Hugo abbas ingreditur monaſterium ſancti
 Quirici.
 CM XCVII Albericus abbas.
 CM XCVIII Domnus Hugo abbas.
 M IX Guido I. abbas.
 M XIV Hugo abbas reordinatur ſecundo.
 M XXVII Guido abbas.
 M XXXVI Hugo abbas reordinatur v. Idus Junii.
 M XXXVIII Guido II. abbas obiit.
 M XXXIX Hugo abbas obiit. Suppo abbas.
 M XL Almer. abbas.
 M XLVII Suppo abbas obiit.
 M XLVIII Domnus Berardus I. abbas.
 M LXXXIX Domnus Berardus I. abbas obiit. Rainaldus
 abbas.
 M XC Berardus II. abbas.
 M XCIX Berardus II. abbas obiit.

INCIPIUNT CATALOGI OMNIUM
Abbatum, cum ſuis temporibus quibus præfuerunt.

LAURENTIUS igitur, beatus fundator hujus monaſterii
 primus, præſbyter & abbas, temporibus Gothorum prioribus:
 poſt cujus obitum monaſterium iſtud a Langobardis deſtruitur.
Ejus vita exſtat in ſæculo noſtro I.

THOMAS autem venerabilis, poſt deſtructionem reſtaura-
 tor hujus monaſterii primus, præſbyter & abbas temporibus
 domni Adeodati papæ, & Constantini ac Tiberii auguſtorum,
 atque Johannis VI papæ, necnon & Giſulfi Beneventani du-
 cis, ſive Tranſmundi & filii illius Faroaldi ducum ducatus Spo-
Muſ. Ital. Tom. I.

66 CAPITULARIA, PLACITA, &c.

letani. Præfuit vero annis xxxv & mensibus vii ac diebus v. Obiit autem iv. Idus Decemb. in pace. *Vita ejus in Seculi III parte 1.*

HAUNPERTUS, Aquitania Tolosana civitatis provincia exortus, præfuit annis vii, mensibus v, ac diebus xviii.

LUCERIUS ex Maurigena provincia, præfuit annis xvi, menses vi, dies x. Obiit xiii Kal. Julii, temporibus Liutprandi regis, & Transmundi atque Luponis ducum.

FULCOALDUS ex Aquitania, temporibus Haistulfi regis, & Luponis, Transmundi ac Albuini ducum, præfuit annis xviii, menses vi, dies xii. Obiit iv Non. Decemb.

GUANDELPERTUS presbyter & abbas ex Aquitania, præfuit anno i, & menses vii. quem postulantem absolverunt ab hoc regimine fratres.

HALANUS ex Aquitania, presbyter & abbas temporibus Constantini imperatoris, & Desiderii & Adelchis regum, & Gisolfi & Theoderici ducum. Præfuit annis viii, menses tres, dies viii. Obiit v Non. Martii. *In alio codice sic.* Hic Alanus abbas in extremo obitus sui die quemdam episcopum, Guichbertum nomine, suavit facere promissionem Regulæ; & continuo rudem adhuc & hospitem, & Anglorum exortum gente, constituit abbatem, contra sanctos Canones & Regulam sancti Benedicti agens. Qui per undecim menses exercuit tyrannidem, quosdam ex monachis cædens, alios in carcerem trudens, alios in exilium mittens; & in tantam superbiæ audaciam prorumpens, ut nonnullos ejus fugientes vesaniam furoris, seque abscondentes in velamina altaris, exinde pellere faceret: & quia inconditos habuit mores, rogantibus monachis, jussu regis Desiderii Alefridus castaldus Reatinus eum de monasterio exire compulit, & eligendi abbatem demum congregationi licentiam dedit. Septimus ab omni congregatione electus huic sacro cœnobio præfuit abba PROBATUS, diaconus quidem, sed Sabinensi provincia natus &c.

PROBATUS presbyter & abbas ex provincia Sabinensi, temporibus Desiderii & Adelchis regum, & Hadriani papæ, & Theoderici & Hildeprandi ducum, & Karoli regis, præfuit ann. xi, mens. iv, dies xv. Obiit iv. Idus Augusti.

RAGAMBALDUS presbyter & abbas ex Gallia, temporibus Karoli regis & Pipini filii ejus, præfuit annos tres, menses vii, dies xxiii. Obiit v Nonas Martii.

CAPITULARIA, PLACITA, &c. 67

AUPERTUS presbyter & abbas ex Parisius civitate Galliarum, temporibus Karoli & Pipini regum, & Hadriani papæ, & Hildebrandi ducis, præfuit ann. v. menses x. dies xv. Obiit xviii Kal. Jan.

MAUROALDUS presbyter & abbas ex Franciæ Guarnacia civitate, temporibus Karoli & Pipini regum, præfuit ann. xii, mens. iv. dies xv. Obiit viii Kal. Novemb. temporibus domni Leonis Papæ III.

BENEDICTUS presbyter & abbas temporibus Caroli & Pipini regum & Leonis papæ, præfuit ann. x, mens. v. dies iii. Obiit iii. Id. Augusti.

INGOALDUS presbyter & abbas temporibus Ludovici regis & Leonis papæ, & Stephani papæ, & Paschalis papæ & Bernardi regis præfuit.... Obiit vii Kal. April.

SICHARDUS presbyter & abbas temporibus Ludovic & Hlotharii imperatorum, præfuit ann. xiv, menses vi, dies x. Obiit xiv Kal. Octob.

HILDERICUS presbyter & abbas temporibus Hlotharii & Ludovic filii ejus imperatorum.

PERTHO presbyter & abbas temporibus Ludovici imperatoris.

JOHANNES presbyter & abbas temporibus Hludovici & Karoli filii ejus imperatorum.

ANSELMUS presbyter & abbas temporibus Karoli imperatoris.

TEUTO presbyter & abbas temporibus Karoli imperatoris.

NORDEPERTUS presbyter & abbas.

SPEMTO presbyter & abbas anno Dominicæ Incarnationis DCCC LXXX viii.

VITALIS presbyter & abbas.

PETRUS presbyter & abbas anno Domini DCCC xc, temporibus Guidonis imperatoris, & Lamberti imperatoris, & Hugonis imperatoris.

JOHANNES presbyter & abbas.

RIMO presbyter & abbas.

RADFREDUS presbyter & abbas temporibus Hugonis regis & Hlotharii filii ejus, & Theobaldi ducis.

CAMPO presbyter & abbas temporibus Hugonis & Hlotharii filii ejus regum, & domni Leonis Papæ, & Bonifatii & Tebaldi filii ejus Ducum, & * Bernardi & Adelberti filii ejus

* Berengarii

68 CAPITULARIA, PLACITA, &c.

regum, & Stephani papæ, & Leonis ducis, & Johannis papæ,
& Marini papæ, & Sarilonis marchionis, & Rainerii ducis
Sabinensis.

Ex alio codice.

HILDEBRANDUS iste concubinis & filiis ac filiabus res
hujus monasterii dedit.

DAGIBERTUS presbyter & abbas præfuit anno.

ADAM presbyter & abbas præfuit anno.

SARILLO marchio & abbas præfuit anno.

JOHANNES III. presbyter & abbas.

ALBERICUS presbyter & abbas anno DCCCC XCVI.

HUGO iste in utroque restitutor, sed & in plurimis discre-
tus largitor, præfuit anno DCCCC XCIX.

GUIDO presbyter & abbas anno M IX.

*GUIDO presbyter & abbas.

SUPPO, presbyter & abbas anno M XXXIX.

ALMERICUS presbyter & abbas anno M XL.

D. BERARDUS Hortanus, & primus, presbyter & abbas
M XLVIII.

BERARDUS Florentinus presbyter & abbas, secundus,
præfuit anno M XC.

D. BERALDUS diaconus & abbas anno M XCIX. Hic
ab Henrico V. imperatore obtinuit confirmationem omnium
sui monasterii possessionum anno M C XVII.

Anno ab Incarnatione Domini M C XL. mense Febuario,
quidam Henricus spontanea voluntate fecit hominum, & ju-
ravit fidelitatem domno ADENULFO abbati venerabili sanctæ
Mariæ in Farfa, de podio quod fuit ante roccam Septem-
janulæ & de ejus pertinentiis.

INCIPIT EPISTOLA

JOHANNIS S. R. E. DIACONI

AD SENARIUM VIRUM ILLUST.

*De variis ritibus ad Baptismum pertinentibus, & aliis
observatione dignis.*

ID Omino merito inlustri, semperque magnifico filio S E-
NARIO, JOHANNES Diaconus. Sublimitatis ve-
stræ paginam filio nostro spectabili viro R E N A T O deferente
suscepimus, in qua & antiquæ gratiæ nobis jucundam fecistis
memoriam, & quantus pectori vestro divini cultus ardor infi-
deat, catholica sollicitudine non cessas. Nam, ut vestræ lo-
quuntur litteræ, quædam vobis scribi, quædam dirigi tran-
scripta voluistis. Sed in transcribendo curam nostram utcum-
que notariorum labor adjuvit: in his vero quæ scribenda
sunt, multum fateor laboris indicitis, & superaddere hoc
mensuram meam adducta fronte respondeo. Primum, quod ea,
sicut opus est, differere, non ita, ut credit amici æstimatio,
meum valet ingenium. Fallitur enim amantium sæpe judicium,
cum plus dilectioni tribuit, quam meritis dilectus ostendit.
Accedit deinde quod infirmus corpore, ut alia taceam, eccle-
siastico jugiter adstringor officio. Postremo otiosum tempus
res postulat, ut majorum volumina recensentibus quid de una-
quaque re dici debeat, illorum tuta juvamine procedat ora-
tio. Quid igitur in hæc possumus, nisi forte quod me posse
vota desideriaque vestra præstiterint? Idcirco quæsitæ breviter
conabor attingere, ne si omnino taceam, infructuosi silentii
pœnas excipiam. Confido enim orationibus tuis me posse juva-
ri, qui ut hæc auderem tam ardua compulisti. Unde quæso, ut
nihil in me eloquentiæ, nihil summæ doctrinæ desideres: quia
nec illi plene studui, & doceri adhuc malo, quam doctoris no-
men audire. Igitur si in hac inquisitione, mea, qualiscumque est,
placet aut expectatur oratio, jam nunc de singulis quæ sunt
proposita videamus. Illud interea prudentiæ vestræ prædico,

70 JOHANNIS DIAC. EPISTOLA.

quia inquisitionum ordo, non ita, ut vestra legitur pagina; consequetur: sed ut se unaquæque suggererit, absolutione congrua terminabitur. Itaque inquisitionis tuæ verba ita se habent.

- » II. Requiro, inquis, a vobis, quare antequam baptisma
 » quis consequatur, Catechuminus fiat: vel quid sibi habeat hoc
 » vocabulum, aut hæc catechizatio, aut qua regula in veteri
 » Testamento præmissa sit: aut certe, si novella regula est, &
 » magis a novo Testamento sumpsit exordium. Simul etiam scru-
 » tinium quid sit, aut quare tertio ante Pascha scrutinentur in-
 » fantes; aut quid sibi hæc districtio vel sollicitudo scrutaminis
 » vindicet, &c.

III. Ad hæc ita respondeo. Studium vestrum nosse confidimus: quia omne genus humanum in ipsis, ut ita dicam, mundi cunabulis prævaricatione primi hominis in morte fuerit jure conlapsum; nec ab ea posse redimi, nisi affuerit gratia Salvatoris: qui dum ante sæcula genitus esset ex Patre, propter nos ex sola matre fieri non sit designatus in tempore. Non est ergo dubium, quod priusquam aliquis renascatur in Christo, diabolicæ potestati teneatur adstrictus: cujus laqueis nisi inter ipsa primitus fidei rudimenta veraci professione renunciens exuatur, ad salutaris lavacri gratiam non accedit. Et ideo hunc oportet prius catechuminum auditorium introire. Catechesis enim græce, instructio dicitur. Instruitur namque ecclesiastico ministerio per benedictionem imponentis manum, ut intellegat quis sit, quisve futurus sit, hoc est quia ex damnabili sanctus fiat, ex injusto justus appareat, ad postremum filius fiat ex servo: ut qui in primo parente perditus fuerat, secundi reparatus beneficio, hereditatis paternæ possessor existat. Exsufflatus igitur exorcizatur: ut fugato diabolo, Christo Deo nostro pareatur introitus; & a potestate erutus tenebrarum, transferatur in regnum gloriæ caritatis Dei: ut qui dudum vas fuerat satanæ, fiat nunc domicilium Salvatoris. Exsufflatur itaque, quia tali dignus est ignominia desertor antiquus. Exorcizatur autem, id est conjuratur, ut exeat & recedat, illius agnoscens adventum, cujus erectam in paradisi felicitate imaginem prava suasionem dejecerat. Accipiet jam catechuminus benedictum sal, in quo signatur: quia sicut omnis caro sale condita servatur, ita sale sapientiæ & prædicationis verbi Dei mens fluctibus sæculi madida & fluxa conditur, ut ad soliditatem stabi-

litatis atque permanſionis digeſto penitus corruptionis humore divini ſalis ſuavitate perveniat. Hoc ergo agit frequens impoſitio manus, & reverentia Trinitatis, & invocata ſuper caput ejus tertio benediſtio Conditoris.

IV. Dehinc quodam profeſſu atque proveſſu ille, qui dum exſufflatus diabolicis laqueis pompique renunciaverat, Symboli ab Apoſtoliſ traditi jam meretur verba ſuſcipere: ut qui paullo ante ſolum Catechumini dicebatur, nunc etiam vocetur Competens vel Eleſtus. Conceptus enim eſt in utero matris Eccleſiæ, & vivere jam incipit, etiam ſi nondum ſacri partus tempus explevit. Tunc fiunt illa, quæ ab eccleſiaſtica conſuetudine Scrutini dictantur. Perſcrutamur enim eorum corda per fidem, utrum menti ſuæ poſt renunciationem diaboli ſacra verba defixerint; utrum agnoverint futuram gratiam Redemptoris; utrum ſe credere fateantur in Deum Patrem omnipotentem. Et cum hæc ita eſſe illorum reſponſione claruerit, quia ſcriptum eſt, Corde creditur ad juſtitiam, ore autem confeſſio fit in ſalutem; tanguntur ſanctificationis oleo aures eorum, tanguntur & nares: ſed aures ideo, quia per eas ad intellectum fides ingreditur Apoſtolo dicente, *Fides autem per auditum, auditus vero per verbum Dei*: ut quaſi quodam ſanctificationis muro aures inſtructæ, nihil noxium, nihil quod retro revocare poſſit admittant.

V. Cum vero tanguntur nares eorum, ammonentur ſine dubio, ut quamdiu ſpiritum vitæ hujus naribus trahunt, in Dei ſervitio mandatiſque perdurent. Unde ille vir ſanctus dicebat: *Vivit Dominus qui abſtulit judicium meum, & Omnipotens, qui ad amaritudinem adduxit animam meam: quia donec ſupereſt halitus in me, & ſpiritus Dei in naribus meis, non loquentur labia mea iniquitatem, nec lingua mea meditabitur mendacium.* Aliud quoque in narium unctione ſignatur: ut quia illud oleum in nomine benediſtum eſt Salvatoris, ad ſpiritualem ejus odorem quadam ineffabili interiores ſenſus ſuavitate ducantur, ut delectati cantent: *Unguentum effuſum eſt nomen tuum: poſt odorem unguentorum tuorum curremus.* quo myſterio ſenſus narium præmunitus, nihil voluptuoſum ſæculi, nihil quod mentem reſolvere queat, poſſit admittere.

VI. Dehinc peſtus eorum oleo conſecrationis perungitur, in quo eſt ſedes & habitaculum cordis: ut intellegant firma ſe conſcientia & puro corde debere promittere, quod jam relic-

72 JOHANNIS DIAC. EPISTOLA.

ro diabolo Christi mandata sectentur. Hi etiam nudis pedibus jubentur incedere, ut depositis morticinis & carnalibus indumentis, agnoscant se illius viæ iter arripere, in qua nihil asperum, nihil potest inveniri nocivum. Hæc igitur ecclesiastica sollicitudo per successiones temporum cæta dispositione constituit: quamvis horum vestigia vetus pagina non ostendat. Proinde cum istis quasi vehiculis spiritalibus Electus sive Catechuminus in fide processerit, tunc & necesse est unici lavacri baptismate consecrari, in quo sacramento baptizatus trina demersione perficitur. Et recte. Nam qui in nomine Trinitatis baptizandus accedit, ipsam utique Trinitatem trina debet demersione signare, & illius se agnoscere beneficiis debitorem qui tertia pro eo die resurrexit a mortuis. Sumptis dehinc albis vestibus, caput ejus sacri chrismatis unctione perungitur: ut intellegat baptizatus regnum in se ac sacerdotale convenisse mysterium. Chrismatis enim oleo sacerdotes & principes ungebantur: ut illi offerendo sacrificia, illi populis imperarent. Ad imaginem quippe sacerdotii plenius exprimendam, renascentis caput lintei decore componitur. Nam sacerdotes illius temporis quodam mystico velamine caput semper ornabant: cuncti vero regenerati albis vestibus induuntur ad ministerium resurgentis Ecclesiæ, sicut ipse Dominus & Salvator coram quibusdam discipulis ac Prophetis ita in monte transfiguratus est, ut diceretur, *Resplenduit facies ejus velut sol: vestimenta vero ejus facta sunt candida sicut nix.* Quo facto splendorem, ut dictum est, resurgentis in futurum figuravit Ecclesiæ, de qua item scriptum est: *Qua est ista qua ascendit dealbata?* Utuntur igitur albis vestibus: ut quorum primæ nativitatis infantiam vetusti erroris pannus fultaverat, habitus secundæ generationis gloriæ proferat indumentum: ut ad mensam sponsi cælestis nuptiali veste circumdatus homo novus occurrat.

VII. Illud autem ne prætermissum videatur, ante prædicimus, quod ista omnia etiam parvulis fiant, qui adhuc pro ipsius ætatis primordio nihil intellegunt. Unde scire debetis, quia dum a parentibus aut a quibuslibet aliis offeruntur, aliena eos professione salvari necesse est, qui fuerant alieno errore damnati. Ac proinde adjungis ut dicam, cur sanctum Chrisma soli Pontifici liceat consecrare, quod presbytero non videtur esse concessum. Et merito: quia Episcopus summi Pontificis gradum obtinet, presbyter vero secundi sacerdotii locum retine-

re cognoscitur. Omnis enim Pontifex est sacerdos, non omnis sacerdos Pontifex dici potest. Nam in veteri Testamento, ut alia taceam, etiam indumentorum habitu differebant: ita ut sacerdotes quatuor quibusdam mysticis vestibus uterentur, quæ illis cum Pontifice videbantur esse communes: at Pontifex quatuor aliis utebatur, quibus indui sacerdotibus penitus non licebat. Adicitur etiam quod in sancta sanctorum semel in anno solus Pontifex habebat accessum. Unde jam in novo populo Episcopus ordinandi presbyteros meruit potestatem. Recte igitur benedictionis & unctionis quodammodo potestas apostolica huic traditioni servatur, quam constat ecclesiasticorum Ordinum tenere principium.

VIII. Illud quoque non prætereundum videtur, quia nec eadem benedictionis verba presbyterii consecratio promeretur, quæ pontificalis apex consuevit audire. Nam si nihil speciale reservatum esset Episcopo, gradus indifferens esse videbatur: nec opus esset diverso vocabulo, quod eadem benedictio consecraret. Sed nec illud tangat animum, quod sibi aliquando quædam vis necessitatis assumit, veluti (quod nunc per Africam fieri dicitur,) ut Presbyteri sanctum chrisma conficiant. quod merito moveret, si istam pontificalis auctoritas licentiam non dedisset. Unde constat etiam nunc à Pontificibus quodammodo fieri, quod in tanta rerum necessitate, ut a presbyteris effici possit, superior ordo constituit.

NOTA.

IX. Illud etiam vultis scire, quos Ecclesia catholica redeuntes non baptizet hæreticos? Quod ego pro meo modulo brevi responsione concludam: illos venientes baptizari, quos non constiterit in nomine Trinitatis æque suscepisse mysterium. Nam siue Patrem solum quis confiteatur, negans Filium & Spiritum-sanctum, baptizandus omnino est: siue Filium confitens, neget Patrem vel Spiritum-sanctum, sine dubio confequi debet baptismatis sacramentum: vel si Spiritum-sanctum denegans, Patrem fateatur ac Filium, æque, ut meminimus, mystico fonte purgabitur, juxta illam Domini regulam dicentis: *Ite, baptizate omnes gentes in nomine Patris & Filii & Spiritus-sancti*. Verum si Trinitatis nomen accepit, inæqualitatis quolibet modo faciens differentiam, veluti qui illo in tempore Arrium sunt secuti, baptizari omnino non possunt: quia illam dominicam consecuti sunt regulam, licet videantur errare. Unde hujusmodi docendi sunt potius quàm baptizandi, &

incorporandi matris Ecclesiæ visceribus benedictione succedente Pontificis : ut per caritatem , qua Deus proximusque vere diligitur , quid minus habuerint , quidve in eis completum fuerit , recognoscant. De Pelagianis autem , Eutycianis , sive Nestorianis aperta & vulgata sunt omnia , quæ in libro de hæresibus cum legeritis , plenius poteritis advertere.

X. Acolythi autem exorcistis hoc ordine differunt , quod exorcistis portandi Sacramenta , eaque sacerdotibus ministrandi negata potestas est ; tantumque manus impositioni vacent , propter quod exorcistæ dicuntur ; vel cetera quæ intra acolythorum ordinem esse probantur , explere festinent. Acolythi verò Sacramentorum portanda vasa suscipiunt , & ministrandi sacerdotibus ordinem gerunt. Ideoque exorcista fieri potest acolythus : iste verò ad exorcistarum officium nulla penitus promotione descendit. qui si optime suum officium ministraverint , ad subdiaconatus gradum poterunt pervenire : cujus hic apud nos ordo est , ut accepto sacratissimo calice , in quo consuevit Pontifex Dominici sanguinis immolare mysterium , subdiaconus jam dicatur. Qui si rursus nullo fuscatus vitio inculpabilis perseverat , ad diaconii vel presbyterii sacratissimas dignitates poterit pervenire.

XI. Quod de septem altaribus inquisisti , quæ in urbe Roma sabbato Paschæ moris est consecrari ; hoc dico , quia majores nostri , sive in septiformis gratiæ spiritu decreverint faciendum ; sive quia septem regionibus ecclesiastica apud nos militia continetur , à qua hæc ipsa parantur altaria , ut singulis benedictio præstaretur : an quia septenarius ipse numerus mysticus & sacratus est , hoc est , quia in Trinitatis nomine orbis credit universus , qui quatuor partibus ab Scriptura sæpe describitur ; ac per hoc ternarius quaternario junctus septenarium efficiat , qui quasi inter illa sacra terribilia totius mundi repræsentat imaginem : an alia quadam ratione constitutum sit , certe mihi habetur incognitum. Illud tamen firma mente custodio , quod non a majoribus tradita custodiret Ecclesia , nisi certa sui ratio poposcisset. Nec ea possumus dicere inania videri ac fribola , quia eorum minime rationem accepimus. Nam multa qui proximè ante nos fuerunt , & nos , ut nobis ratio persuadet , in ecclesiis quædam nova sancimus : quæ dum ad posteros transmittimus observanda , etiam si qua id ratione a nobis factum sit , longe posterior ætas ignoret , non putabit tamen inania , si in

Deum piam præcedentium intellegat voluntatem. Hoc ergo modo etiam nos quod... majorum ratio ipsa non venit, nam quorum pervenit, & ipsa tenentur & res: quorum autem causa latet, & res fidei non resultat, observari ac teneri necesse est.

XII. Quod autem quæstistis, cur in sacratissimum calicem lac mittatur & mel, & Paschæ sabbato cum sacrificiis offeratur? illud in causa est, quia scriptum est in veteri Testamento, & novo populo figuraliter repromissum: *Introducā vos in terram repromissionis, terram fluentem lac & mel.* Terra ergo repromissionis terra est resurrectionis, & in illa felicitate semper permanentis, quæ nihil est aliud quàm terra corporis nostri, quæ in resurrectione mortuorum incorruptionis pacisque gloriam consequetur. Baptizatis ergo hoc sacramenti genus offertur, ut intellegant, quia non alii, sed ipsi qui participes fiunt corporis & sanguinis Domini, terram repromissionis accipient, cujus iter inchoantes, tamquam parvuli lacte nutriuntur & melle, ut incipiant decantare: *Quam dulcia faucibus meis eloquia tua Domine, super mel & favum.* Lac ergo & mel potantur novi homines post amara delicta: ut qui in prima nativitate corruptionis lacte nutriti sunt, & amaritudinis lacrymas inchoarunt; secunda generatione lactis ac mellis dulcedinem in Ecclesiæ visceribus sumant, ut nutriti talibus sacramentis incorruptionis perpetuæ mysteriis consecrentur.

XIII. Illud etiam quod interrogare dignatus es, cur *Alleluia* usque ad Pentecosten in Ecclesia decantatur? scire vos convenit, alia esse in Fide catholica, quibus per totum mundum omnis Christianus adstringitur, veluti est auctoritas novi ac veteris Testamenti: alia rursus esse instituta Patrum, à quibus nulli licet catholico deviare, veluti Nicæni Canones, & si quid hujusmodi est: itemque alia esse, quæ una quæque ecclesia tamquam propria retinet, & à suis majoribus tradita sibi custodit, quæ salva fide & pace catholica cum alterius regionis non observat ecclesia, ut est Romana, quæ sabbatis omnibus jejunit, quod Orientalis facere non videtur: vel quod hîc septem altaria componuntur, quod alibi nullus attemptat: & rursus fiant alia alibi, quæ hîc fieri non probantur. Hæc autem omnia ita diversis ecclesiis diverso modo fiunt; ut tamen omnes illius Reginæ vestem faciant, de qua dictum est: *Adfuit Regina à dextris tuis in vestitu deaurato, circumamicta varietate.* Nihil ergo moveat, cum videntur hîc aliqua in Dei lau-

dibus fieri, quæ alibi alio modo fieri comprobantur. Sive enim usque ad Pentecosten *Alleluia* cantetur, quod apud nos fieri manifestum est; sive alibi toto anno dicatur; laudes Dei cantat Ecclesia. Sed reservatur aliquid apud nos paschali reverentiæ, ut majoribus gaudiis, & quasi mentibus innovatis ad laudem Dei recurrat affectus: propter quod *Alleluia*, latino sermone *Laudate Dominum* dicitur. Quamquam & aliis verbis id quotidie populorum vox dicentium resonet: *Laudate Dominum de celis, laudate eum in excelsis.* itemque, *Laudate Dominum omnes Angeli ejus.* & iterum, *Laudate Dominum omnes gentes.* Semper ergo cum Deus quoquo modo fideli corde laudatur, *Alleluia* cantatur.

XIV. Restat nunc illud quod interrogandum putastis: Si baptizatus sine chrismatis unctione ac benedictione Pontificis ex hac vita migraverit, utrum ei obfit aliquid, an non? De qua re magis à doctis plenius audire vellem, quam ipse aliquid dicere. Quid tamen mihi videatur, salva meliore intelligentia & majorum plena sententia, quod in omnibus supradictis volo tenere; quia ita vestræ voluntati parere studui, ut tamen de omnibus quid melius (quod non dubito) à majoribus dictum est, hoc uterque servemus. Quid ergo videatur breviter dicam. Ducatur ergo similitudo ab hac prima nativitate, in qua orti sumus, ut intellegamus illam secundam, ex qua vere vivimus, & in qua justificati sumus. Cum natus fuerit infans, & lucis hujus participationem contigerit, perfectum hominem natum esse dicimus, & est ejusdem substantiæ, cujus est ille qui genuit, hoc est, animal rationale mortale, quamquam ille grandis, hic parvus. quæ sunt accidentium vocabula, non naturæ. Si ergo accidant adjumenta ad ætatis proVectum, numquid adjectum est aliquid definitioni substantiæ? absit. quia non extenditur aut minuitur naturæ proprietas. *Cetera desunt.*

OBSERVATIONES.

I. **I**llustris est superioris epistola scriptor Iohannes Diaconus: sed quis sit ille Senarius, ad quem scribit, ignoramus. Hanc epistolam eruiamus ex vetusto codice Christinæ reginæ, qui olim fuit monasterii nostri Ferrariensis. In ea quadam occurrunt observatione digna de ministro Confirmationis; de septem altaribus, sabbato sancto in ecclesia Romana erigi ac consecrari solitis; deque immistione lactis

& mellis in calicem eodem die : cujus utriusque postremi ritus nullam invenimus mentionem etiam in Ordine Romano. Nisi si benedictio lactis & mellis , quæ post benedictionem agni in die sancto Pascha præscribitur , huc referenda est.

II. Quod attinet ad Iohannem , vir fuit pro sua ætate doctissimus , atque accurato iudicio præditus , ut probant libri quatuor ab eo conditi de vita sancti Gregorii Papa primi , qui recentioribus scriptoribus vitas sanctorum ex propriis eorum scriptis contexendi exemplum præbuerunt.

III. Præter hos libros Iohannes commentarios in Pentateuchum , & in binos subsequentes Iosua & Iudicum libros composuit ex sententiis Patrum , Augustini & Hieronymi passim , Origenis , Eusebii ex quæstionibus Pentateuchi , Victoris Capua episcopi ex libello suo Reticulo vel de Arca Noë ; item ex libro Paradisi ; tum ex scholiis Diodori Tarsensis episcopi ; ad hæc ex sermone sancti Basilii de dogmatibus apud eundem Victorem ; Ambrosii ex tribus libris Officiorum , & ex libro de martyrio Agricola & Vitalis , & Hilarii ex libro quinto de Fide ; ac denique Pagani seu Pacati contra Porphyrium. Hi commentarii in optima nota codice nostro perantiquo ita inscripti sunt : EXPOSITUM JOHANNIS ROMANÆ ECCLESIAE DIACONI IN GENESIM. Sic vero incipit hæc expositio : In principio Deus creavit cælum. In primo libro Augustinus contra adversarium Legis & Prophetarum. Aut sic intellegendum est quod scriptum est , &c.

IV. Sed nullum majoris momenti ac pretii opus à Iohanne excogitatum fuit , quam consilium scribendæ universalis historiae ecclesiasticae. Ad id exsequendum Anastasius Iohanni petenti suppetias tulit ex copiis græcis ab se latine versis. Quod argumento est Iohannem græce nescisse. In primis historiam seu Chronographiam tripertitam contexuit Anastasius ex tribus auctoribus græcis , Nicephoro , Georgio Syncello , & Theophane , cum præfatione ad Iohannem Diacopein urbis Romanæ , quam ita exorditur. Ecclesiasticam , carissime frater & digne Christi Levita Iohannes , scripturus historiam , exigis à me , quædam in latinum stylum ex græcis voluminibus transferenda : quo & ipsa quoque proposito inferas operi & intexas. Alterum Anastasii opus in gratiam Iohannis est , Collectanea de iis quæ spectant ad historiam Monothelitarum hæreticorum , quæ collectanea Iacobus Sirmundus publici iuris fecit. Quid ex his suppetiis à Iohanne patratum sit , non constat. Quidam tamen ei tribuunt Historiam Miscellam , quasi ex illis tribus historicis

78 GAUDERICI EPISC. EPISTOLA.

græcis aliisque consarcinatum, quæ ab aliis Paulo Vvarnefridi, diacono ac monacho Casinensi adscribitur.

V. *Insuper Iohannes, rogante Gauderico Veliterno antistite adorsus est descriptionem gestorum sancti Clementis Papæ, quemadmodum ex sequenti Gauderici epistola intelligitur. Idem attestatur Iohannes ipse in fine libri quarti de vita Gregorii M. Ego tamen divinæ spei fiducia roboratus, quia Gaudericus Veliternus episcopus expostulat, ad Clementem Romanæ sedis antistitem, suffragante Domino, stilum convertam: quatenus qui continuis infortuniis attenuatus, amicis meis, à quibus utcumque sustentor, meritum rependere nequeo, saltem verba, quæ valeo, minime denegasse cognoscar. At imperfectum hoc opus ob mortem auctoris remansisse ex subsequente epistola manifestum est.*

VI. *Eadem epistola de Iohanne duo nos docet: alterum, Iohanni cognomen fuisse HYMONIDEM: alterum, eundem morte decessisse superstitute Iohanne VIII. cui Gaudericus suam inscribit epistolam, in qua Iohannis Diaconi mortem commemorat. Ceterum idem Iohannes Anastasio fuit auctor de græco in latinum transferendi passionem sancti Demetrii martyris, cuius in domo sua Iohannes miræ antiquitatis & pulcritudinis oratorium habebat. Hac satis de Iohanne cuius facta obscuriora erant.*

GAUDERICI VELITERNI EPISCOPI

AD SANCTISSIMUM PAPAM JOHANNEM

S. CATHOLICÆ ET APOSTOLICÆ ROMANÆ ECCLESIAE

In vitam sancti Clementis Papæ,

P R Æ F A T I O.

Domino semper beato, summo Pontifici & universali Papæ Johanni, Gaudericus, episcoporum novissimus, perenne gaudium in Domino Jesu-Christo. Dignum esse putavi ad honorem & laudem tui prædecessoris beati Clementis, martyris atque pontificis, aliqua de genere vel vita ipsius Deo institutore in unum colligi; & quam generosa fuerit oriundus profapia, quamque philosophando contra idola disputans, divino præfatio veritatem cognoverit, enucleatius invenire:

præsertim cum ego valde inutilis hujus eximii martyris Christi ecclesiæ Veliterno oppido sitæ præfuerim. Jam quia meritum mihi non suffragatur, vel amoris & studii mei affectus, quem erga servitia ejus possideo, cum mihi propitium faceret, ut aliquantulum pro peccatis meis adjuvante Domino intercessor existeret. Hujus rei gratia quemdam olim JOHANNEM DIACONUM, cognomento HYMONIDEM, virum peritissimum postulavi, quia multa legerat, pauca ex iis ad ædificationem multorum colligere; & quæ forte nonnullis comperta non erant, ipse relegens breviter referare. Quod ille meis precibus humiliter satisfaciens, cœpit quidem a genealogia ejus perstringere, & quæ legerat vel expertus fuerat, liquido coartare. Sed quo minus ad conclusionem hujus opusculi scriptitans pervenisset, hunc Dominus ab hoc sæculo morte, quam ipse permisit, præventum, ad æternam quietem vocavit. Cujus ego pedissequus adspirante Deo existens, hoc quod deerat, non tam strenue quam devote collegi, & in tribus libris conglutinans ordinavi. In primo siquidem libro Clementis genus, patriam, nativitatem, institutionem, propositum, vitam, conversionem, & qualitatem recognitionis ejus innuimus. In secundo vero Deo auxiliante profunditatem doctrinæ, dignitatem episcopalis apicis, auctoritatem singularis pontificatus, & audaciam contra idola sophisticè disputantis subdidimus. At in tertio miraculorum prodigia, exsulationis angustias, martyrii laureas, reversiones ejus ad propriam sedem post plurimos annos, & miracula colligere procuravimus: quatenus qui multos libros aut habere nequeunt, aut habitos perscrutari contemnunt; istorum compendio, quantum pertinet ad præsens negotium, non incongrue fulciantur. Quapropter, summe Pontificum, sanctimoniam tuæ paternitatis deponco, ut hæc eadem studia nostræ, quæ non nostro libitu, sed auctoritate veterum probabiliumque virorum decerpimus, approbans, si in his aliquid dignum correptione repereris, tu Pater beatissime, corrigas: quatenus te præceptore & judice, alienis judiciis non submittatur; & qui tibi forte non displicemus, aliis super hoc opere placeamus, quia nos, ut meminimus, quæ vidimus & legimus, ipsius Christi martyris fisci orationibus, colligentes transcripsimus, & ad laudem Dei omnipotentis ex multis paucissima defloravimus, præstante eodem Deo nostro & Domino Jesu Christo, cui est honor & gloria, potestas & imperium per infinita sæcula sæculorum, amen.

INCIPIT TEXTUS LIBRI PRIMI.

Juliorum familia, de qua Cæsarum generosa descendit pro-
sapia, vetustior creditur urbe Romana, præsertim quæ à
Trojanis per Ascanium, cognomento Julium, filium scilicet
Æneæ, Creusa generante descendens, trecentis ferme annis
sub quatuordecim Regibus, id est usque ad Romuli Romanæ
urbis conditoris tempora feliciter penes Albam civitatem re-
gnavit, &c.

INCIPIT PROLOGUS

ANASTASII S. R. E. BIBLIOTHECARI

In passionem sanctorum M CCCC LXXX Martyrum.

PETRO egregio episcopo sanctæ Gavinensis ecclesiæ,
ANASTASIIUS summæ & apostolicæ ecclesiæ Bibliothhe-
carius, apostolicam salutem. Post translata à me ad petitio-
nem sanctitatis tuæ passionem præcipui doctoris & martyris Pe-
tri, Alexandrinæ urbis episcopi, mihi præcipere voluisti, quod
passionem sanctorum mille quadringentorum octoginta Mar-
tyrum, apud Græcos habitam, latino traderem eloquio.
Quod considerata imperitia scientiæ meæ, primum quidem
hoc aggredi non præsumpsi: deinde vero paternitati tuæ ino-
bediens apparere fugiens parui; & quod jussisti, cælitus ad-
jutus explevi, malens penes doctos de inscientia reprehendi,
quam apud paternitatem tuam pro inobedientia culpabilis ex-
hiberi: præsertim cum sanctitas tua in amore Martyrum fla-
grans, non rusticitatem, qua & Apostolos ante vocationem
non caruisse manifestum est; sed triumphos eorum, qui ex ipsa
minus urbana peritia utrumque scire possunt, attendat, & ad
venerationem multorum enucleatos habere desideret. Bene-
valens diutius in Domino paternitas tua pro nobis orare di-
gnetur.

*Sume Pater placidus multorum gesta piorum.**Rusticus est sermo, calamus quem vertit achivo.*

INCIPIT

INCIPIT PASSIO.

S Alvatore nostro Adrianus & Antoninus imperatores prælium cum Eufratensibus habuerunt. Elegerunt viros numero mille quadringentos octoginta, potentes in fortitudine, & illustres in bello. Ascenderunt ergo simul cum eis adversus hostes. Habebant autem secum Apollinem & Jovem, &c.

OBSERVATIONES.

V *Aria sanctorum acta e græco in latinum vertit Anastasius Bibliothecarius, cujus versiones quedam absque nomine & indicio auctoris, quedam typis inedita, alia vulgata sunt. Editæ sunt vitæ sancti Iohannis, cognomento Eleemosynarii, ipso Anastasio interprete, cum ejus præfatione ad Nicolaum Papam primum: in qua fas non esse ait, ut absque Vicario Dei, absque unico Papa, aliquid consummetur aut divulgetur. quod etiam Iohannes Diac. sensit in epistola ad vitam Gregorii M. Iohanni Papæ VIII. inscripta. Item passio sancti Demetrii martyris, ab eodem Anastasio translata, exstat in tomo I. Analectorum nostrorum, Domino piissimo imperatori Karolo semper Augusto, cognomento Calvo, nuncupata. Ineditæ sunt Anastasii aut versiones, aut saltem præfationes, una in vitam sancti Petri, Alexandrina urbis episcopi, de qua mentio in superiori præfatione, quæ Romæ in bibliotheca sanctæ Crucis in Ierusalem habetur: item alia nonnulla, ex quibus aliquot hic in lucem proferimus. Anastasius vitam Basilii Magni ab se scripta meminit in præfatione subsequenti, quam accepimus ex codice Vaticano. Hanc laudat Baronius in Notis ad Martyrologium ad Ianuarii diem primum; ibidemque indicat præfationem Vrsi S. R. E. Subdiaconi in vitam Basilii, ab eodem Vrsō latinitate donatam. Verum illa præfatio non alia est ab Anastasiana, quæ subsequitur, excepta inscriptione, quæ apud Rosweidum aliosque detracta est. Ex hac manifeste colligitur, Anastasium interpretem esse vulgatæ vitæ, quæ Vrsō perperam tribuitur in editis. Idcoque in posterum vitæ illius interpretatio tribuenda erit Anastasio, qui eam Vrsō instigante aggressus est.*

II. PROLOGUS

EJUSDEM ANASTASII

In quædam miracula sancti Basilii episcopi Cæsariensis.

URso venerabili subdiacono sanctæ Romanæ ecclesiæ, seu Medico & Domestico domini nostri sacratissimi Papæ Nicolai, Anastasius exiguus abbas monasterii sanctæ Dei genitricis Mariæ Virginis, siti trans Tiberim, ubi olim circa Domini nativitatem fons olei fluxit, in Domino salutem. Beati Basilii Cæsareæ Cappadociæ Præsulis vitam me in latinam vertisse dictionem secundum postulationem tuam cognosce. Neque enim inobediens esse tibi debeo, qui omnibus fratribus meis & proximis debitor sum. Sed utinam tam bene, quàm prompte; tam utiliter, quam fideliter quod postulasti fuerim exsecutus. præsertim cum necessario super hoc fueris exhortatus, & ut tantus vir apud Latinos, quemadmodum apud Græcos, celebris habeatur jure fategeris. Denique licet ejus quædam salutifera scripta sermo latinus haberet, vita tamen illius quam sit ammirabilis hætenus ignoravit. Et certè satis incongruum est quid docuerit sciri, & quid fuerit operatus nesciri: cum sanctus vir, utpote imitator illius, de quo Lucas scripsit, quia cœpit Jesus facere & docere; non solum verba Dei docebat homines, sed ut Magnus vocaretur in regno cælorum ante faciebat. Fruere igitur salubrius doctrinis ejus. Et ne forte dicas, illum docuisse, & non fecisse; jam nunc scies quia fecit quod docuit, & de cetero habebis quod imiteris: licet ante hoc opus ego non præsumpserim aggredi, putans, ut ipse nosti, ab alio jam translatum. In quo merito ipse me reprehendi. Numquidnam quia Scripturam sacram quidam interpretati sunt, idcirco posteriores interpretes hanc minus interpretati sunt? Si hoc esset, eamdem sanctam Scripturam latinitas ex ipso Hebraico fonte per beatum Hieronymum ecclesiæ Romanæ presbyterum & divinæ Bibliothecæ cultorem hætenus non hausisset. Verum diligenter inquirens, nihil scriptum de vita hujus sancti apud Latinos inveni, nisi duo miraculorum ejusdem, de puero Christi negatore liberato, & muliere a peccatis erepta. Quæ tamen adeo depravata repperi, ut rursus ea in-

terpretari, quam emendare maluissem. Sane notandum est, quia cum quidam legunt in his actibus, quæ sanctus Amphilochius scripsit, discrepasse autumant ab his quæ Gregorius Nazianzenus in epitaphio hujus magni viri commemorat: cum alter fortè tacuerit, quod alter non tacuit, id ipsum nobis inter Evangelistas repperientibus: præsertim cum & idem Amphilochius qui super tanti viri vita scripserint, hæc expositurus aperte designet.

CAPUT I.

De Hebræo qui secundam potiunculam accepit.

ITaque cum divinum celebraretur officium &c.
Helladius sanctæ recordationis, qui inspector & minister fuit &c.

Mulier autem quædam &c.

III. PROLOGUS

ANASTASII item BIBLIOTHECarii

In versionem Passionis Sanctorum Cyri & Iohannis.

NOn me
. . . pusillitatem meam cogere volueris, Passionem sanctorum Kyri atque Iohannis ex Græco in Romanum vertendi sermonem: & quia pro causa tanta nos ad hoc instantia in aliis multis implicitos urseris, mecum tractavi. Sed aliud nihil prorsus occurrit, nisi quia caritatis fraternæ teneris affectu, gestientis profecto, non solum græce, sed & latine accedentes proximos salutaris pabulo verbi reficere, & ad pia exempla & horum fortes pro Christo agones accendere: præsertim cum ecclesia, in qua divinis penes Urbem cultibus & obsequiis incumbis, horum victoriosissimorum Martyrum memoria, immo miraculis fulgeat, & eorum annuæ celebritatis en dies festus immineat. Ergo, prout potui, caritati tuæ satisfeci, & omisso parumper opere præ manibus habito, votis parere tuis etiam languidus malui. Sane passionis horum duas editiones

Hujus autem scriptor sanctus Sophronius, qui post Jerosolymitanus claruit episcopus, exstitit, cujus celebris memoria in mul-

tis majorum conscriptionibus, sed & in sancta sexta & universali Synodo repperitur : præsertim cum nonnulla ad instructionem multorum opuscula ediderit, & sana orthodoxæ Fidei dogmata prædicaverit. Sed & horum insignium Martyrum non tantum passionem, verum etiam septuaginta (qui numerus apud nos sacratus est) capitula miraculorum ipsorum conscripserit. Quin potius principibus mundi non solum Christianæ, sed & externæ religionis pro domo Domini murum inexpugnabilis veritatis opposuerit, & constantia fortis invectionis arguerit. Quorum videlicet miraculorum Bonifatius Consiliarius ad petitem Theodori primicerii, Defensoris ecclesiæ Romanæ, duodecim cum præfatione capitula olim interpretatus est. Cætera, si Deo auctore vita fuerit comes, nostri.

Deum orare dissime Christi . . . sacerdotis sacerdos. Data IIII. Kalendas Februarii, Indictione VII. anno vero domini nostri [Johannis] octavi Papæ.

*Sume sacer tandem Sanctorum latus agones,
Qui fuerunt facti gratii, nunc arte Latinos.*

INCIPIT TEXTUS PASSIONIS.

DIvinus nobis Sermo, qui vere Veritas est, Christus videlicet Deus noster, in Evangeliiis altissime prædicat, dicens, Omnia possibilia credenti. Beatus quoque Paulus &c.

OBSERVATIO.

Superioribus Anastasii præfationibus visum est etiam hanc, tametsi mutilam, subicere ex veterrimo codice bibliotheca nostra sancti Petri apud Carnutas. Hujusce passionis historiam, ab Othone Zyllo Societatis Iesu ex græco latine redditam, cum Anastasii versionem non vidisset, Bollandus edidit ad Ianuarii diem XXXI. Sed quem ille incertum auctorem existimavit, is est sanctus Sophronius Ierosolymorum antistes, ut ex hac præfatione constat. Anastasii nomen, quod in vitioso atque ex situ corrupto exemplari oblitteratum erat, ex conjectura restitimus : quod tempus atque stilus Anastasio convenient.

Horum Sanctorum reliquie Romam allate sunt, & depositæ in ecclesia, dudum ante sub ipsorum nomine Deo dicata secus Tiberim, viâ Portuensi, dicta Sancta Passara. quod a sanctæ Praxedis primæ patronæ vocabulo tractum Baronius existimat. At forte non sine veri

simili coniectura dici potest, id ex nomine Abba-Cyri (sic enim non raro Cyrus appellatur) corruptè deductum fuisse. Reliquia sacra in eam ecclesiam nondum illata fuerant, cum hæc scriberet Anastasius. Hujus versio magis litteræ inheret, quam illa Bollandiana: in qua omis- sum est loci nomen in Arabia, ubi Cyrus & Iohannes monasticam vitam professi sunt, de quo sic Anastasius. Ad Arabiam, quæ est Ægypti maritima, venit, & in castello, quod vocatur Cetzto, habitavit, & cum habitatione etiam habitum commutavit. Idem artis medicæ officinam vocat ergasterium, quod nos labora- torium appellamus.

IV. PROLOGUS

EJUSDEM ANASTASII BIBLIOTHECARI

In Vitam sancti Donati episcopi apud Euriam in Syria.

DEsideranti tibi, famula Dei Anastasia, ut vitam beati Do- nati episcopi de græco in latinum transferrem sermo- nem, videlicet ut merita ipsius, quæ legendo cupis decurrere, melius intelligendo cognoscas: cum tibi apertius natura sit lo- cutionis janua patefacta, & totum subtilitatis admiseris sen- sum. Nam & mihi hanc rem infructuosam esse non arbitror, si tanti viri virtutes, quæ nonnisi gravis litteris continentur, per me etiam latine scribantur lectoribus. Orationibus ergo tuis adjutus, facta, ut dixi, de alia in aliam linguam libri transla- tione, religioni tuæ direxi: ut habeas, quod & libenter lege- re, & legendo religiose possis imitari.

INCIPIT VITA.

Temporibus Theodosii principis erat in provincia Syriæ veteris, in civitate quæ dicitur Euria, sanctus Donatus episcopus. Sub ipsius territorio civitatis est possessio, quæ dici- tur nomine Iforia, in qua est transitus publicus. In ipso erat fons aquæ tam noxius, ut si quis exinde biberet, statim more- retur. Quod audiens homo Dei Donatus, convocatis ad se clericis dixit. Fratres carissimi, accepto sancto Evangelio & Cruce, eamus ad locum fontis, & oratione facta deprecemur Dominum, ut effugetur malum, quod in aqua est. *Cæso ac con- sumpto dracone, qui aquam inficiebat, populus tamen non audebat adhuc suspecti fontis poculum, appetere.* Adproximans autem

fonti homo Dei, facta oratione orarium suum plicans, in circulo posuit in terra, ipseque rediit ad turbas, dixitque puero suo: Accipe stolam, & vade ad locum, ubi me vidisti ante modicum stare orantem, & invenies aquam, quam hauriens affer ut bibamus &c.

OBSERVATIO.

E*Thanc versionem esse Anastasii non dubito, tametsi ejus nomen desideratur in Casinensi codice, ex quo superiora descripsimus. Integrum libellum edere non visum est opera pretium, tametsi in Aprili Bollandiano ad diem xxx non alia Donati acta referantur, quam ex Menæis Græcorum, rejectis iis, quæ apud Mombrinium vulgata sunt, ipsissima quæ in codice Casinensi.*

His subjicimus Concilii Romani in causa Formosi supplementum, quod ex pervetusto ac præclaro codice Patrum Græcorum Romani descripsimus.

CONCILIUM ROMANUM

Quo acta Stephani vi. contra Formosum habita
rescinduntur anno DCCCC IV. tempore
Iohannis IX.

Lectum est quoddam indiculum, quatenus ventiletur a cunctis Ecclesiæ status & pacis. Johannes Aretinus dixit: Et nos optamus ut ea ventilentur quæ pertinent ad sanctæ Ecclesiæ exaltationem & pacis robur. Petrus Albanensis dixit: Vult dominus Papa ut legatur Synodus acta a Theodoro Papa. Et factum est. Tunc Amolo dixit: Canonicum est, ut qui injuste damnatus est, restituatur, & canonica servetur de exspoliatis sententia. Et lecta est Synodus Johannis Papæ. Tunc professi sunt Petrus Albanensis & Silvester Portuensis inter se in depositione Formosi, licet coactè: & interrogati sunt ab Amolone, cujus temporibus judicatum est. Qui responderunt: Dicant ceteri. Tunc Johannes Aretinus dixit: Perlegatur judicium finis istius Synodi. Et factum est. Quo finito Amolo Taurinensis: Legatur Synodus facta a Stephano contra Formosum. Quod & factum est. Cumque venisset, ubi Paschalis, Petrus, & Silvester contra Formosum dixerunt accusationem perjurii & læcæ

communione; interrogati sunt, si vera essent quæ legebantur. Qui dixerunt: Minime. Iterum Paschalis dixit, nequaquam illi interfuisse synodo. Et perlecta synodo, dixit Johannes Aretinus: Dicant si interfuerunt. Petrus Albanensis dixit: Interfui, sed non subscripsi. Et inducias petiverunt. Et cum datæ eis essent, surrexerunt Petrus, Silvester, Paschalis; & interrogati dixerunt minime interfuisse.

Amolo dixit: Veniat Benedictus Protoſcriniarius, & dicat quæ scripserit. Cumque venisset in medium, Johannes Aretinus dixit: Benedicte, scripsisti hanc synodum? Qui dixit: Non ego scribere debui, sed Subdiaconus de armario. Et interrogati præfati Episcopi diligenter; iterum professus est Petrus interfuisse. Stephanus Ostensis dixit: Omnes contra dominum Papam insurgitis. Tunc Antonius Brixienſis in persona omnium dixit: Jam quia nos separatos dicis a gremio apostolico, in crastinum sit examinandi suspensio. Et datæ sunt induciæ in crastinum.

Altera autem die cum reſediſſent, Amolo Taurinenſis dixit: Quia indiſcuſſa heſternò remanſit propter datas inducias ratio; oportet, ſi vobis placet, ut accipiamus nunc reſponſum. Johannes Aretinus dixit: Ubi heri remanſit, ibi, ſi placet, debet incipi. * Surgens Petrus Albanenſis, dixit Johannes Aretinus: Volunt fratres ut detur reſponſum. Petrus Albanenſis dixit: Veniant ceteri qui mecum fuerunt. Johannes Aretinus dixit: Aut veraces dicite litteras, aut falſas. Petrus Albanenſis dixit: Veniant ceteri qui interfuerunt, quia Sedes ibi apoſtolica erat. Johannes Aretinus reſpondit: Non nos Sedem judicamus apoſtolicam. Cum ſæpius Petrus alia non renueret nequaquam interfuiſſe, dixit Aretinus Episcopus: Legatur ſynodus. Et ſubjunxit: Dicat ſancta ſynodus, ſi illi ea quæ deſtruxerunt reſtituere potuerunt. Quia ſi ita eſt, illud apoſtolicum, *ſicæ qui ædificavi iterum deſtruxero, peccatorem me eſſe conſtituo*. Amolo Taurinenſis dixit: Non hic apoſtolica facta eſt ſententia: quia primitus deſtruxerunt, & poſtea idipſum reædificare conati ſunt. Johannes Aretinus dixit: Ut malum in Eccleſia perpetratum funditus eradiceſtur. Sancta ſynodus acclamavit: Et nos ac petimus, ac omnes optamus. Et audita eſt juſſio apoſtolica, ut daretur reſponſum. Petrus Albanenſis dixit: Interfui, ſed coacte. Interrogatus Silveſter ab Amolone, dixit, interfuiſſe illi ſynodo. Ildegerius Laudeniſis dixit: Culpabilem heſterno in

* Surgente.

conspēctū omnium te reddidisti , qualiter interfuisses synodo. Amolo Taurinensis dixit : Silvester Portuensis, dic, fuisti in electione Formosi Papæ ? Qui dixit : Interfui , & omnes illum inthronizavimus. Adelardus Veronensis dixit : Dic , Silvester , si fuisti in synodum Franciæ ? Respondit : Interfui. Item interrogatus si interfuisset illi horrendæ synodo Romæ ? Respondit : Interfui, sed coacte. Interrogatus Johannes Bellitranus si interfuisset illi synodo , respondit : Interfui coactus & invitus. Similiter interrogatus Johannes Gallisanus si interfuisset , respondit : Interfui coactè. Interrogatus similiter Stephanus Ortenfis si interfuisset , respondit : In fine fui , & subscripsi coactè. Interrogatus etiam Johannes Tuscanensis , respondit , non interfuisse , sed postea subscripsisse coacte. Interrogatus similiter Bonosus Narniensis , respondit , nec interfuisse , nec subscripsisse , nec assensisse.

Interrogatus Johannes qui dicebatur Mutinensis episcopus , si haberet aliquam proclamationem adversus Gamenuſum Mutinensem episcopum , vel si repeteret ipsam ecclesiam , an non ? Respondit : Non repeto , neque proclamo super ipsum Gamenuſum episcopum , sed terra prostratus , veniam atque misericordiam peto.

Prostrati post præfati Episcopi, qui interfuerunt illi Stephani synodo contra domno Formoso , misericordiam deprecati sunt. Tunc omnis sancta synodus petiit misericordiam domni Apostolici , ut illud funditus eradicetur , ne ulterius Episcopi cogantur quid contra canonum auctoritatem per vim facere , aut ullo modo Episcopi in custodiam tradantur. Quibus libenter domnus Papa assensit. Interrogati Petrus presbyter tituli Eudoxiæ , & Benedictus tituli Damasi , si interfuissent illi synodo ? Responderunt interfuisse coacte , & misericordiam petiverunt.

CAPUT I. Synodum tempore piæ recordationis sexti Stephani Papæ &c. *ut in Concilio Romano Tomo IX Labb. col. 502. nisi quod perturbatus est ordo Capitulorum, quorum duo desunt in ms. nempe VIII & IX adduntur vero in ms. canones , qui habentur col. 506. apud Labbeum : quibus additur caput sequens in codice Vallicellano.*

Si quis sanctorum Patrum regulas contempserit , & gloriosissimorum Imperatorum , Karoli videlicet Magni Imperatoris , & Hludovici atque Hlotharii ; necnon & filii Hludovici , de ecclesiasticis decimis in eorum Capitularibus statuta atque sanc-

cita

cita sunt, non observaverit, & eas aliubi, nisi in baptismalibus ecclesiis, absque consensu Episcopi dare temptaverit, vel retinere præsumperit, & qui dat, & qui recipit, auctoritate sanctæ Sedis apostolicæ & sanctione sanctæ Synodi excommunicationi subiaceat.

A D M O N I T I O IN SEQUEMTEM PRÆFATIONEM.

GEZO, subsequæntis opusculi scriptor, monachus & abbas fuit cænobii sanctorum Petri & Martiani apud Dertonam Liguria opidum: quod cænobium Gisebrandus, illius urbis antistes, sub medium sæculum decimum, Ottone Magno imperante, construxit, attestante Vghello in Italia sacra tomo quarto col. 856. Codex, ex quo subjectam præfationem cum adjuncta capitulatione descripsimus, existat in Padolironensi sancti Benedicti monasterio prope Mantuam. Idem liber, sed sine præfatione, habetur in alio codice Conventus sanctæ Crucis Minorum observantium apud Florentiam: quo ex codice præmemoria Cardinalis Bona exemplum describi, & ad nostrum Ache-rium transmitti olim curavit, absque nomine auctoris. Non dubium est quin Gezo Paschasii Radberti doctrinam pro catholica habuerit: cum librum Paschasii fere integrum in suum transtulerit, eumque discipulis suis proposuerit ad credendum. Non visum est operæ præ-
tium Gezonis opus integrum exhibere, cum nihil singulare contineat: ratis sufficere indicem capitulorum in specimen operis. Si cui tamen secus placuerit, exemplum ejus habemus in promptu ex codice Florentino.

His succedent epistola quatuor, quæ ad ritum Ambrosianum pertinent, descripta ex codice bibliotheca Ambrosiana.

P R O L O G U S V E L E P I S T O L A S E Q U E N T I S O P E R I S G E Z O N I S M O N A C H I

De corpore & sanguine Domini.

Dilectissimis fratribus, quibus ex divina dispensatione, quantum propria permittit infirmitas, paternam impen-
Mus. Ital. Tom. I. M

do sollicitudinem, Gezo, Dei & Domini nostri Jesu-Christi servus. Deceveram quidem olim, Fratres carissimi, gravissimorum mihi conscius delictorum, patriam parentesque relinquere, & in aliquod me conferre consecrētum: ubi a sæcularium negotiorum strepitu omni modo sequestratus, in omnipotentis Dei servitio ævum transigerem, peccata mea jugiter deplorens, & continua pænitiæ satisfactione clementissimum Dominum & Judicem univerſorum ad miserendum invitans. Quantum autem huic decreto voluntatis meæ, reverendæ memoriæ dominus GISEBRANDUS, illo tunc tempore noster episcopus, & vi & auctoritate restiterit, non habetis incognitum, asserens non esse canonicum; ut relicta ecclesia, in qua nutritus & ordinatus fueram, meo arbitrio alio demigrarem: se vero numquam mihi ad ista præbiturum esse consensum: præsertim cum jam ipse decreverit in propria ecclesia, ubi beatissimi martyris Martiani corpus humatum quiescit, monasterium construere: in quo si omni modo statueram mutare propositum, & solitudo mihi non deesset, & ad serviendum Deo juxta libitum cuncta suppetere. Quam ergo pollicitationem pro mea tunc imperitia ægre suscepi: quia ætuantis desiderio nimis prolixa tanti temporis videbatur expectatio. Prævaluit tamen ejus auctoritas: quoniam tanti viri jussionibus non parere, & consiliis non acquiescere, non modo temerarium, verum etiam infantiæ simile diceretur. Acceleravit igitur quantocius implere promissum; & postpositis curis omnibus sæculi, quibus nimium impediabatur, ad monasterii fabricam se totum transtulit, indulta mihi bono animo licentia monachum profitendi. Nec diu moratus, ubi prosperari in manibus suis cœptum opus Domino cooperante perspexit, omni mihi instantia cœpit imminere, ut totius loci curam susciperem, & in lucrandis Deo animabus sollicitum me vigilemque præberem. Repugnanti itaque mihi, & pondus regiminis non segniter fugienti, eo usque institit, & inrevocabilis mansit; ut nulla a me excusatione suscepta, sub divini se nominis obtestatione constringeret, quod nisi eo die voluntatis ejus arbitrio me committerem, ut subirem sarcinam quam jubebat; sine aliqua dilatione eliminatis hinc his ipsis, qui pauci admodum habebantur, monachis, canonicis, quos jam ad hoc præparaverat, locum traderet incolendum. Suscepi itaque infirmis humeris grave pondus regiminis, & nimia necessitate compulsus, illius professionis magister factus sum, cu-

jus non fueram ante discipulus. Dispensationis igitur mihi per
 vos creditæ ex eo tunc tempore curis mordacissimis occupatus,
 dum utilitati vestræ plurimum intendo, & quæ potissimum
 vobis expediant mecum ipse pertracto; occurrit animo de Do-
 minici corporis & sanguinis Sacramento mellitum vobis atque
 florulentum, sacrisque permixtionibus sobrie temperatum po-
 culum pro mei ingenii paupertate conficere, quod dilectioni
 vestræ & voluptati sit, & saluti. Sanctorum siquidem catholi-
 corum Patrum scripta lectione percurrens, & intenta, quan-
 tum potui, meditatione retractans, quicquid in eisdem abso-
 lutius atque enodatus ad intelligendum de tantæ, tamque subli-
 missimæ rei mysterio invenire valui, in unius libelli corpusculum
 compendiosa brevitæ redegî. Quod vobis, si Spiritus-sancti
 favor adspiret, nec ex intellectus difficultate displiceat, & ex
 sui parvitate complaceat: imitatus in hoc opusculo Pascha-
 sium Ratbertum, qui de hac eadem re Placido cuidam suo dis-
 cipulo libellum luculento sermone composuit; eosdem ipse
 quos & ego secutus auctores, beatissimos scilicet Domini sacer-
 dotes, Cyprianum, Hilarium, Ambrosium, Augustinum,
 Gregorium, Johannem, Isidorum, Isidum, Hieronymum &
 Bedam: de quorum omnium scriptis quosdam sententiarum de-
 cerpimus flores, causæ valde necessarios, item Domini cor-
 poris & sanguinis suavissimum odorem exhalantes. Ipsius vero
 Paschasis libellum totum pæne, sicut invenimus, ita in no-
 strum transtulimus, sensum ejus potius in aliquibus locis, quam
 verba sequentes, & superflua quæque vitantes. Ut autem tanti
 mysterii gratia liquidius & purius vestris mentibus favore sancti
 Spiritus commendetur, miraculorum copiam congeffi, quæ
 sanctis ac diligentibus se olim Dominus revelare dignatus est
 ad laudem & gloriam suam; ut ostenderet quid eis præparave-
 rit in cælis, quibus tantum munus reliquit in terris; simul etiam
 illud attendens, ut si quibus forte, vel propter tarditatem sen-
 sus, vel propter litterarum imperitiam, redemptionis hujus sa-
 cramentum ex Patrum scriptis non poterit esse perspicuum,
 signorum fiat revelatione manifestum. Qua verò reverentia,
 quove timore sacro altari debeatis assistere, participationem
 tantæ gratiæ præstolantes, ne forte (quod absit) communi-
 cantibus vertatur in perniciem, quod sumere cupitis ad salutem;
 libello huic, quantum potui, studiose adnexui: ut in omnibus
 Domino placentes, & ego ex vestro provectu, & ex meo vos

labore atque sollicitudine misericordiam invenire valeamus in die Domini. Accipite igitur, Fratres carissimi, eo quo offertur aff. An qualecumque parvitas meæ munusculum; nec ex mea vobis humilitate vilescat, quod ex sensus sui continentia gloriosum est atque præclarum. Non enim sine miraculo poterit a legente contemni: quia etsi minus habet aliquid in eloquio, nihil tamen præstantius esse potest in materia, qua digne credentibus vita præstatur incorruptibilis & æterna. Nec parvipendatis obsecro gratiam Domini, sed de ejus lectione intelligite, quanta sit virtus vitam æternam in terris accipere, angelicisque dapibus quotidie saginari. Quoniam etsi Deo plena sunt omnia, nos quoque coram oculis divinæ majestatis semper versamur; plurimum tamen coram sanctis altaribus & Dei vultum, & Angelorum præsentiam observare oportet atque vereri: ubi tanta tamque excellentia nobis Verbi Dei virtute atque miseratione præstantur, quanta nullus hominum eloqui potest. Ipse autem Deus & Dominus noster, Verbum, virtus & sapientia Patris, hanc eandem gratiam, quam jam præstitit, conservet simul & tueatur in vobis; & oculos quos vobis aperire jam cœpit, plenius illuminare dignetur: per quem, & cum quo æterno Patri est laus omnis & gloria, honor atque magnificentia & potestas cum sancto Spiritu a sæculis & nunc, & semper, & in omnia sæcula sæculorum, Amen.

Sequuntur versus domni Odonis de Sacramento corporis & sanguinis Domini

Convivas epulis mundos Deus esse superni, &c.

Incipiunt versus Paschalis Ratberti ad Placidum discipulum

Regis adire sacræ, &c.

C Ap. I *Quod humana infirmitas non facile debeat divina discutere. Ex lib. B. Hilarii episc. & conf. de Trinitate.*

Cap. II *De Dominici corporis origine.*

III *De nativitate Filii Dei.*

IV *Quod formis sæpe corporabilibus erudiamur ad intelligenda divina.*

V *De Dei Patris substantia.*

VI *De nativitate Filii Dei ex Patre.*

VII *Recta fides.*

VIII *De Filii Dei generatione.*

IX *Dominum nostrum Iesum-Christum per assumptam carnem naturaliter manere in nobis, & nos per perceptionem corporis & sanguinis ejus manere in eo.*

- X** *Ecclesia fides catholica.*
XI *Non est confidendum in humana prudentia.*
XII *De Dei verbo Cyprianus vel Hilarius.*
XIII *Augustinus de Dei verbo.*
XIV *De libello Paschasii Ratberti ad Placidum discipulum, Christi communionem verum ejus corpus & sanguinem esse non dubitandum.*
XV *Quod hoc mysterium Christi nullus fidelium debeat ignorare.*
XVI. *Quid sint sacramenta, vel quare dicantur.*
XVII *Virum sub figura, an veritate hoc mysterium calicis fiat.*
XVIII *Quid sit inter immolationem veterum, figuraeque legalium, & inter sacramentum dominici corporis ac sanguinis.*
XIX *Quid sit digne ad vitam percipere corpus & sanguinem Christi.*
XX *Quibus modis dicitur corpus Christi.*
XXI *Quod in hac communione aut judicium percipiatur, aut premium.*
XXII *Quod necesse fuerit quod semel gestum est, Christum quotidie immolari: quid boni tribuant hac mysteria digne accipientibus.*
XXIII *Cur in pane & vino hoc mysterium celebratur.*
XXIV *Cur in calice aqua misceatur.*
XXV *Verum plus habeat aliquid hoc mysterium, quoties a bono; aut minus quippiam quam Veritas repromittit, si à malo conficiatur ministro.*
XXVI *Vt quid nec colorem, aut saporem in sacramento minime permutant.*
XXVII *Quod hac saepe visibili specie apparuerint.*
XXVIII *Quibus verbis hoc mysterium conficiatur.*
XXIX *Vtrum hoc corpus post consecrationem panis jure queat vocari.*
XXX *Vtrum plus ex eo habeat qui majus, an qui minus accepit.*
XXXI *Cur hoc mysterium ante passionem discipulis traditur.*
XXXII *Vt quid in sanguine Christi fragmentum corporis admiscetur.*
XXXIII *Cur generaliter hoc a jejunis mysterium sacra communione celebratur, cum Dominus discipulis post cenam hoc tradidit.*
XXXIV *Quid sit quod Dominus ait, Non bibam amodo de hoc genimine vitis, donec illud bibam novum in regno Patris mei.*
XXXV *Si ulla differentia sit in hoc mysterio iusto & penitenti reconciliato.*
XXXVI *Quid digne vel indigne sumentibus dominici corporis & sanguinis praestet Eucharistia.*
XXXVII *Quid beatus martyr Cyprianus affirmat se presente contigisse his, qui polluti de idolaticis, dominici corporis & sanguinis sacramenta temere susceperunt.*

- XXXVIII *Quare peccatis criminalibus irretiti a sacramentis dominicis arceantur.*
- XXXIX *Iudeos ab omni conventu fidelium arcendos, præcipue ubi Christianorum celebratur oblatio.*
- XL *Qualiter accedendum sit ad dominici corporis & sanguinis sacramentum.*
- XLI *De revelationibus, quibus Dominus de veritate corporis & sanguinis sui hæsitantium corda firmavit.*
- XLII *Miraculum de quodam Iudeo.*
- XLIII *Item de quodam sene Eremita, cujus dubitationem Dominus eadem veritatis revelatione firmavit.*
- XLIV *Item miraculum quod Romæ actum est.*
- XLV *Item aliud miraculum quod est actum Romæ.*
- XLVI *De sacramento Calicis quid revelatum sit beato Cypriano.*
- XLVII *Qualiter in Domini nostri Iesu-Christi passione mysticum sit pascha, & in ejus immolatione rei veritas sit ostensa.*
- XLVIII *Verum Pascha istud legitimum post anni spatium vel post longa intervalla dierum, an quotidie fidelibus sit edendum.*
- XLIX *Quantum sacra oblationis immolatio mortuorum spiritibus prodest.*
- L *De quodam monacho, qui per salutarem hostiam supplicium evasit.*
- LI *De quodam cujus vincula in captivitate oblato pro eo sacrificio solvebantur.*
- LII *De quodam nauta, qui post longa maris discrimina dicti virtute sacramenti mortem evasit.*
- LIII. *Quibus immolatio Dominici corporis profit.*
- LIV *Qua disciplina, qua modestia orandum sit, cum sacerdos sacrificat, & unusquisque in suo ordine horam sacre communionis expectat.*
- LV *Quid cavendum in oratione sit, & qualiter facienda preces.*
- LVI *Cyprianus ad clerum Domini deprecandum.*
- LVII *Visio beati Cypriani.*
- LVIII *Quod etiam in exteriori cultu sacro scilicet Dei altare orandum sit.*
- LIX *Quod hic nihil super altare ponendum sit præter sacrosanctam oblationem.*
- LX *Quod pro homicidis & latronibus non sit sacrificandum.*
- LXI *De iis qui eleemosynam faciunt, & peccata non dimittunt.*
- LXII *Stupendum nimis de quodam presbytero.*
- LXIII *Quod qualiscumque sacerdotis excommunicatio valde formi-*

EPISTOLÆ DE RITU AMBROSIANO. 95

danda sit; nec attendendum cuius sit meriti, per cuius auctoritatem hoc facit, etiam si injusta videatur (quod absit) excommunicatio.

LXIV *Laudabile nimis exemplum Theodosii Imperatoris.*

LXV *Item exemplum nimis parvendum.*

LXVI *Quanta reverentia episcopali cathedra habenda, de domno Petro Alexandrino Patriarcha.*

LXVII *Quam grave peccatum sit sacra loca temerare, vel aliqua sorde polluere.*

LXVIII *De quodam sepulto.*

LXIX *De quodam latrone in cœmiterio B. Iohannis sepulto.*

LXX *Item beatus Augustinus, Hieronymus & Salomon.*

LXXI *De Sacramento Baptismi beatus Ambrosius.*

I. EPISTOLA DOMINI PAULI SACERDOTIS

& Gebhardi religiosorum virorum sanctæ ecclesiæ Ratishponensis, missa ad presbyterum Martinum, thesaurorum sancti Ambrosii Custodem, pro officio Ambrosiano.

MArtino fidelissimo Custodi thesaurorum beati Ambrosii, Paulus & Gebhardus Germani, investigabiles divitias Christi. Tertius annus est, quod una tecum & cum ceteris Ambrosianis lectissimam sancti Spiritus festivitatem celebravimus, & adhuc sollemnizant mentes nostræ ex memoria dulcedinis vestræ. Multum enim humane & honeste tractati sumus a vobis. Hinc etiam eodem anno misimus vobis suavissimam expositionem Ambrosii specialis vestri Doctoris in partem gratiarum actionis. Nunc autem & quam intime salutantes dilectionem vestram, impense rogamus, ut transcribi nobis faciatis Sacramentarium ejusdem sancti Ambrosii cum Antiphonario ejus, nobisque sine dubio redempturis pretium scriptori transmittendum designetis. Hoc verò gratuitum caritatis tuæ munusculum esse volumus, ut nobis initia & fines evangelicarum & apostolicarum lectionum, secundum morem vestræ ecclesiæ ad Missas legendarum, in breviario comprehendas. Insuper & catalogum, quem mihi Paulo promisisti, Mediolanensium Episcoporum subjungas. Præterea primum susceptorem nostrum abbatem de sancto Dionysio, deinde ab-

96 EPISTOLÆ DE RITU AMBROSIANO.

batem de sancto Victore, clerum quoque sancti Nazarii, & venerabilem Ambrosium presbyterum, benefactores nostros, ex parte nostra salutare te deprecamur. Gratia Domini nostri Jesu Christi cum omnibus vobis, Amen.

II. ITEM EPISTOLA EORUMDEM nobilium virorum ad eundem missa, venerabili laude plena sub nomine ad Anselmum.

Anselmo, stellæ prælucidæ in firmamento Mediolanensis ecclesiæ divinitus positæ, Paulus & Gebehardus desideratores luminis ejus; nobilem claritatem in splendoribus sanctorum. Quoniam princeps in divinis laudationibus apud Latinos præfulsisse cognoscitur mellifluus doctor Ambrosius, idcirco ne ingrati simus tam sanctis primordiis, habere delectamur notitiam tantæ auctoritatis. Hoc dicimus, quoniam probitatem tuam admirari comperimus, cur nos, qui habemus Ordinem Romanum, simul habere gestiamus Ambrosianum. Fuit olim tanta Mediolanensis ecclesiæ gratia & excellentia, ut Aurelio & Augustino, ceterisque Africanis præsulibus non sufficeret in dubiis rebus Romanum consulere Pontificem, nisi pariter consulerent & a Mediolanensem. Desine ergo admirari imitatrices sanctorum Patrum inquisitiones nostras, & adhibe oportunas opitulationes tuas: ut Ordo Ambrosii, dulcissimi sancti Spiritus organi, quem discipulus ejus doctor eximius Augustinus traduxit in Africam, nobis transferatur in Germaniam, ad excitandam & dilatandam boni odoris fragrantiam. Nam & nos parati sumus ejus cunctorumque fratrum tuorum voluntatibus satisfacere, sicubi forte nos aliquid Ambrosiani operis, quod vos non habetis, contigerit invenire: sicuti Veronæ positi fecimus, quando expositionem quinti-decimi Psalmi, in qua de morte Gratiani Imperatoris agitur, domino Martino, ejusdem beati Ambrosii thesaurario, transmisi-mus. De cetero optamus, ut cum beatissimi Ambrosii præsidio, numquam tibi desit sanctissimæ Dei genitricis Mariæ, ejusque proximæ Teclæ veneranda intercessio.

a Hoc spectat ad Consilium tertium Carthaginense, ejus Patres consultationem direxerunt ad Siricium Papam & ad Simplicianum Mediolani Pontificem.

III. ITEM AD MARTINUM pro dubitatione Sacramentarii.

MArtino, fidelissimo Custodi paucorum bonorum beatissimi Ambrosii, Paulus & Gebehardus humiles amici ejus, super multa constitui in introitu gaudii Dominici. Magnas referimus gratias benivolentiæ tuæ, Pater amantissime, quoniam caritatis nostræ notitiam non solum dignatus es in gremio tuo confovere, sed etiam principalis cleri piis manibus & oculis curasti exhibere. Quod autem ambiguitatem removeri postulas ab appellatione Sacramentarii; nos nullum appellamus Sacramentarium, nisi librum Missalium orationum absque lectionibus evangelicis, apostolicis & propheticis, quarum fines & principia secundum Ambrosianam exceptionem petentibus nobis annotare pollicitus es. Nam illum titulum, quem tu ita ponis, *Incipit liber Sacramentorum*, nos non habemus. quippe qui non unum tantum, sed & sex Ambrosianos libros de Sacramentis lectitare solemus. Verum quod interrogas, utrum Antiphonarium cum notulis, vel sine notulis habere velimus; nihil Ambrosianæ integritatis deesse nobis volumus: quoniam ipsa species operum ejus & usum eorum nescientes oblectat. Mitte ergo nobis Antiphonarium cum notulis, & Sacramentarium cum solis orationibus & præfationibus Ambrosiinis. Nam gestis sanctorum, quæ Missarum celebrationibus apud vos interponi solent, non indigemus, quoniam his abundamus. Etiam dicenda de pretio quod mandasti, vel de gratiarum actione quam meruisti, litterarum injunximus portitori. De cetero optamus, ut post thesauros beatissimi Ambrosii, cum eodem possidere merearis inenarrabiles divitias Christi.

IV. INVECTIVA DOMINORUM PAULI & Gebehardi ad Martinum sacerdotem pro Rege Cunrado.

MArtino, fidelissimo Custodi thesaurorum sancti Ambrosii, Paulus & Gebehardus intimi dilectores ejus, Ambrosianis intercessionibus redintegrare quidquid corruptum est perfidorum contagione. Quod Agareni nostri tamdiu illudere poterunt nobilissimæ Mediolanensium ecclesiæ, scias nos vehem-

98 EPISTOLÆ DE RITU AMBROSIANO.

menter admiratos graviter doluisse, magnoque stupore defixos scribendi ad te consuetudinem intermisisse. Nunc verò quia beati Ambrosii meritis cessasse feruntur Ismahelitæ, & ingenuæ retractationis lumen dicitur refulsisse, libet iterum scribere caritati tuæ, hortantes te deinceps Ambrosiano exemplo declinare Eugenium, & amplecti Theodosium. Nobis quoque, sicut sæpius postulatum & laudatum est, duplicem Ambrosianæ auctoritatis Antiphonarium, diurnum videlicet ac nocturnum, sine mora transmittere comparandum à præsentium latore, exceptis orationibus quas jam misisti, & hymnis, quorum non minor copia nobis est, quam tibi. Nostrum erit cogitare, ut ingratitude non accusemur, neque ex tua benevolentia, neque ex nostra conscientia. De cetero Dominus custodiat te ab omni malo, custodiat animam tuam Dominus, beati Ambrosii patrociniis super te vigilantibus.

V. RELATIO MARTINI SACERDOTIS

& thesaurorum S. Ambrosii Custodis ad carissimos fratres & amicos Paulum & Gebhardum.

Gebhardo & Paulo venerabilibus fratribus & amicis, Martinus thesaurorum beati Ambrosii Custos, in agone fideli persistere, & a vestigiis beati Petri non deviare. Quod de vestris Agarenis, qui proselyti sive vana vallis esse probantur, intimandum transcribendo inveſtitive procurastis; nunc a nobis rescribendo rem & rei causam suscipiatis. In deserto enim populus rebellis & incredulus ex Aaron digitis vitulum conflatilem ex igne & auro ad suam superstitionem sibi conflavit. Ipsi tamen Aaron & Hur conscientia totiusque stirpis Leviticæ sana interius existente, conscientia intemerata & impolluta permansit. Insulsi quippe populi voce non minus acclamante, *Hii sunt dii tui Israël, qui eduxerunt te de terra Egypti, & de domo servitutis.* Eadem vero ratione. Siccimitæ contra Joathan filium Hierobaal legitimum, Abimelech filium ejusdem Gedeonis, aliqua tamen sibi materna consanguinitate conjunctum, sine aliquo respectu Dei sibi dominum constituerunt, interfectis septuaginta filiis Hierobaal super lapidem unum &c. Quod autem de Eugenio & Theodosio intulistis, verbis Cusai Arachitæ ad Absalon de fuga David requirente vobis respondere non pigebit. Dicebat ergo Absalon Cusai: *Esne gra-*

sia David patris mei amici tui, ut sine te vellet abscedere? Cui respondit Cusai: Ave Rex, ave Rex. Et adjecit: Illus ero quem Dominus elegerit. Illud vero quod de Ismahelitis interpolare voluistis, qui obediētes sibi, & non Deo interpretantur; adhuc grana cum paleis in area dominica versantur, quæ ventilabro examinis dominici discernentur. Hinc rursus Paulus ad Thessalonicenses scribit: *Qui tenet nunc teneat, donec de medio fiat.* Item Ambrosius in libro Sermonum cap. xi. Qui navem Petri non ascendit, diluvio inundante peribit. Hanc Dominus noster ascendit, quando Evangelium mundo nunciavit: & in illa, quam Dominus Petro tradidit, Deo juvante nostra fides inconvulsa permanebit. Unde idem Ambrosius quibusdam dicit in libro i. Pœnitentiæ: Non habent hereditatem Petri, qui Petri fidem non habent, quam impia divisione quidam discerpunt. Multum enim ille qui videbatur auster esse, & qui leniter flare debuerat, hanc Christi navem turbavit. Sed ut illa omittamus, ad cetera quæ nobis mandastis, quantumcumque valuimus, fideliter sicut decet explevimus. Pretium etenim libri est sol. xlv. & vix pro tanto habere potuimus. Sed ibi poteris invenire omne Officium: & cantus illi qui sunt absque notulis, & abbreviati omnes sunt cum notula inantea. Sciatis namque nos in litteris vestris & in memoria vestri valde jocundatos esse: & quia in tanto amore habetis doctrinam beati patris nostri Ambrosii, quamplures gratias Deo & vobis cum clero nostræ civitatis indifferenter referimus. Valete. Amen.

Ambros.
lib. i. de
Pœnit. c. 6.

OBSERVATIONES DE RITU AMBROSIANO.

I. **N**on erunt inutiles (ut speramus) superiores quinque epistola ad illustrandum ritum Ambrosianum, qui hætenus viget in ecclesia Mediolanensi. Iam dudum nos tenet cogitatio, ut ad hanc rem, sane præclaram, explicandam aliquid conferre conemur. Quam ob rem in brevi mora, quam fecimus a quod Mediolanum, nihil non tentavimus, ut istius ritus originem & primam institutionem e tenebris pro modulo erueremus. Ita enim in obscuro sunt ea principia, ut quid de his statuere liceat, ignoretur. Sed diuturniori mora opus fuisset ad id exsequendum. Interim quod in illis temporis angustiis concessum est nobis, nonnulla observavimus de illo ritu, quæ hic in pauca conferenda sunt.

II. Scripta sunt præmissæ epistola eo tempore, quo, mortuo Heinrico primo Imperatore, Conradus Salicus & Cono Dux de principatu de-

certabant, id est anno M. XXIV. Id patet ex epistola quarta. Paulus & Gebhardus, epistolarum auctores, Canonici erant Ratisponenses: ex quibus Gebhardus postea in sedem ecclesie Ratisponensis euectus est Conradi favore, qui eius frater erat. Illi amore Ambrosii ejusque doctrina capti, cum Mediolanum ivissent, visa ritus Ambrosiani majestate, cum in suam ecclesiam cum Ordine Romano inducere cogitarunt. Petunt proinde libros huc necessarios, Sacramentarium, Antiphonarium, initia & fines evangelicarum, apostolicarum, & propheticarum lectionum, una cum catalogo Mediolanensium Episcoporum. Nam hymnos, & acta Sanctorum, qua in sacris apud Mediolanenses legebantur, jam penes se habebant. Sacramentarium appellant Librum Missalium orationum & præfationum: Antiphonarium vero codicem, qui antiphonas in diurnis nocturnisque officiis cantari solitas continebat. In beneficii hujusce proxenium Martino, Ambrosiana basilica custodi seu thesaurario, Veronæ positi, aliquid Ambrosiani operis, quod non habebant Mediolanenses, præmiserant, nempe expositionem * quinti-decimi Psalmi, in qua de morte Gratiani Imp. agitur. Ex quibus intelligimus, egregium illud par, Paulum scilicet & Gebhardum, Italiam peragrasse, ut Ambrosii operum reliquias colligerent.

* l. sexagesimi-primi

III. In Ambrosiana bibliotheca, quæ superiores nobis litteras suppeditavit, invenimus vetus Ordinis Ambrosiani Antiphonarium, & antiquum catalogum Mediolanensium Antistitum, quem mox subijciemus, secuti hac in re Pauli & Gebhardi consilium. Præter ea in eadem bibliotheca & in archivo ecclesie metropolitana exstant veteres item codices, qui tum Orationes & Præfationes Missarum, tum Evangelia, aliasque lectiones ritus Ambrosiani continent: sed nullus codex annos octingentos superat. Hoc loco inquirendum occurrit, primo an illius Ordinis seu ritus, qui Ambrosianus appellatur, primus auctor fuerit Ambrosius: deinde qualis fuerit ille ritus; & an idem hactenus in ecclesia Mediolanensi immutatusque perseveret, tum in iis quæ ad Missam, quam in illis quæ ad cetera divina officia pertinent.

I.

IV. Ambrosium hujusce ritus primum institutorem non fuisse censent recentiores, Iosephus Vicecomes, & præter alios pia memoria Cardinalis Bona in cap. XVIII divina Psalmodia. Verum contraria fuit veterum persuasio, Valafridi Strabonis, qui ante annos octingentos vivebat; Landulfi senioris, atque Pauli & Gebhardi in superioribus epistolis: quibus sine dubio consentit antiqua traditio ecclesie Mediolanensis. Iosephus Vicecomes ait in lib. II. de ritibus Missæ

OBSERVAT. DE RITU AMBROSIANO. 101

cap. XII, *Missæ ordinem a sancto Barnaba apostolo; psallendi autem regulam a Mirocleto archiepiscopo Mediolani institutam fuisse. De psallendi norma repugnat Paulinus in libro de Ambrosii vita: ubi tempore Iustina persecutionis primo antiphonæ, hymni, ac vigiliæ in ecclesia Mediolanensi, inquit, celebrari cœperunt: cujus celebritatis devotio usque in hodiernum diem, non solum in eadem ecclesia, verum per omnes pæne Occidentis provincias manet. Adstipulatur iisdem fere verbis Augustinus in lib. IX Confessionum cap. VII. Tunc hymni & psalmi ut canerentur secundum morem Orientalium partium, ne populus mæroris tædio contabesceret, institutum est, & ex illo in hodiernum retentum, multis jam ac pæne omnibus gregibus tuis & per ceteras orbis partes imitantibus.*

V. *Missæ ordinem atque ritum a primis Christianæ religionis apud Mediolanenses institutoribus, qualis primis illis temporibus erat, traditum fuisse non infitiamur. Verum sine multo rituum apparatu sacra tunc fiebant, nec rata fixave erat eorum dispositio, nec uniformis. Paullatim ad certam quamdam Liturgiæ formam se se composuerunt ecclesiæ: quæ forma in ecclesia Occidentali non una fuit. Aliæ quippe Romanis, alia Gallis, alia Hispanis, Afris alia competebat: tamen si præcipua liturgiæ capita ubique concordabant. Sua etiam fuit, superestque etiam nunc ecclesiæ Mediolanensi forma sacrificii, ab aliis diversa: cui id privilegii concessum est, ut ceteris ferme abrogatis & ad Romanam redactis, sola retenta sit cum Romana apud occidentales. Necdubium quin hoc tributum fuerit Ambrosio, quem huiusce ritus auctorem majores nostri semper habuerunt, ob idque ab auctore Ambrosianum Ordinem appellarunt. Notum est quod ait VValafridus Strabo in lib. de ritibus ecclesiasticis cap. XXII. Ambrosius Mediolanensis episcopus tam Missæ, quam ceterorum dispositionem officiorum, suæ ecclesiæ & aliis Liguribus ordinavit. quæ & usque hodie in Mediolanensi tenentur ecclesia.*

II.

VI. *Qualis fuerit Ambrosii tempore divinatorum Officiorum, sive in vigiliis, seu in Missis ab eo instituta disciplina, non facile est explicare. Atque ut a lectionibus incipiamus, hæ duplicis generis erant: una fortuite, & ut ferebat vel præsentis arbitrium, vel librorum sacrorum continuata lectio: altera sollemni ritu constituta. De hoc sollemni lectionum more loquitur Ambrosius in epistola XIV ad Marcellinam, ubi exponit persecutionem ab Arrianis, Iustina duce, ad Dominicam Palmarum Ecclesiæ intentatam. Postera die, audistis fi-*

102 OBSERVAT. DE RITU AMBROSIANO.

lii, inquit Ambrosius, librum Job hodie legi, qui SOLLEMNI MORE est decursus & tempore. Deinde feria quarta lectus est DE MORE liber Jonæ. Erat autem dies, quo sese Dominus pro nobis tradidit, quo in Ecclesia pænitentia relaxatur. Itaque feria secunda hebdomada sacra sollemni more liber Job recitari solebat: feria quarta liber Iona. Morem legendi in Ecclesia Scripturas sacras Ambrosio antiquiorem esse, adeoque ejus originem Ambrosio auctori non esse tribuendam existimamus. Secus est de alterno cantu Psalmorum & hymnorum: cuius ritus Mediolani institutor Ambrosius ex dictis censendus est. Quippe ante Ambrosium, id est ab exordio nascentis Ecclesie, certis diebus & horis Fideles conveniebant in ecclesiam ad audiendas lectiones & Psalmos recitandos: sed hæc recitatio apud Mediolanenses absque cantu fiebat ante Ambrosium: qui tamen fortasse illius ordinis disciplinam certis legibus adstrinxit.

VII. Pauca hujusce disciplina vestigia supersunt in Ambrosii libris. Iam vidimus feria secunda majoris hebdomadae librum Job sollemni more fuisse decursum & tempore: & feria quarta sequente librum Iona de more. Decembris die VII. quando sancti Doctoris ordinatio annua festivitate recurrebat, Pulcre mihi, ait, hodie legitur Legis initium, quando mei natalis est sacerdotii. quæ verba leguntur in ejus commentario super Lucam lib. VIII. num. 73. novæ editionis. Hoc Legis initium videtur fuisse desumptum ex Deuteronomio, non vero ex Evangelio Luca, quod tunc sanctus Doctor ad populum interpretabatur. Ad hæc in concione de basilicis non tradendis contra Auxentium, meminit lecti Evangelii de ingressu triumphali Christi Domini in urbem Ierosolymorum. Audistis quod hodie lectum sit. Pullum sibi asinæ Salvator per Apostolos jussit adduci, mandavitque, ut si quis resisteret, diceretur: Dominus ejus operam desiderat. Alia eodem die lectio item facta de vinea Nabutha ex libro tertio Regum cap. XXII. Post hæc de evangelica lectione subdit ibidem Ambrosius: Lectio nempe ista nulla nostra dispositione recitata est, sed casu, quæ præsentibus bene aptatur temporibus. Lectio hæc casu facta dicitur, habita ratione urgentis persecutionis, sed non ratione temporis, in quod illa persecutio incidebat. At difficile est statuere, cui temporis assignata fuerint prædictæ lectiones. Neque vero Evangelium de Christi super asinam processione antiquitus in ecclesia Mediolanensis legebatur Dominica Palmarum, ut in Romana, sed Dominica quarta Adventus: quo die ibidem legitur etiam nunc. An vero tempore Ambrosii, affirmare non auserim. Saltem hæc observatio viam

aperire potest ad conciliandum id, quod Ambrosius de illis turbis Auxentianis scribit, tum in hac concione, tum in epistola XIV ad Marcellinam sororem. quam controversiam erudite tractavit V. Cl. Godefridus Hermannus in Observationibus ad Vitam Ambrosianam: ubi recte advertit, non ad idem illius persecutionis tempus spectare epistolam XIV ad Marcellinam, & concionem prædictam contra Auxentium: sed hanc concionem videri posteriorem. Atque adeo epistola XIV ad Dominicam Palmarum anni CCC LXX XVI referenda est; concio vero illa fortasse ad subsequenter Adventum, si Evangelium de ingressu Domini triumphali in urbem Ierosolymorum tempore Adventus lectum est, uti modo legitur, legebaturque olim in multis ecclesiis, immo etiam in Romana, ut patet tum ex Homiliario Pauli Diaconi, ubi hoc Evangelium ponitur Dominica prima Adventus; tum ex variis capitularibus Evangeliorum. In Quadragesima porro Evangelium Iohannis de caco nato lectum fuisse patet ex epistola XLV ad Bellicium. Audisti, frater, lectionem Evangelii, in qua decursus est, quod præteriens Dominus Jesus vidit à generatione cæcum. Et infra: Veni ad baptismum: tempus ipsum adest: veni festinus. Hæc verba tempus Quadragesima denotant, quando Electi seu Competentes ad suscipiendum baptismum excitabantur.

VIII. Multa alia loca exstant apud Ambrosium, ubi fit mentio de lectione librorum sacrorum, sed quibus diebus facta fuerit, non satis perspicuum est. In lib. II de Iacob & vita beata cap. v. Ubi enim fuerit thesaurus tuus, ibi erit & cor tuum, sicut legi audisti hodie, ex Luca cap. XII. In libro de Elia & jejunio cap. XIX. Audistis hodie quid lectum sit: Mercatores, inquit, Phœnicum transmittentes mare, Isaia cap. XXIII. Quod quidem lectum fuisse instante Quadragesima jejunio colligitur ex sequenti cap. XXVIII. Canamus tuba, tamquam in prælium progredientes: certamen imminet; certamen nostrum jejunium est. Præter ea libri Tobia expositionem aggressus est Ambrosius, lecto prophetico libro, qui inscribitur Tobias, ut ipse initio expositionis sue declarat. Denique, ut cetera prætereamus, in epistola XVIII ad Marcellinam diserte scribit, prophetia Ieremia caput primum de baculo nucino fuisse recitatum; simulque Evangelium de convivio Pharisei. In libro prophetico scriptum: Sume tibi baculum nucinum... Hæc de prophetica lectione libata sunt. Evangelii quoque lectio quid habeat, consideremus. Rogavit quidam Phariseus Dominum Jesum ut manducaret cum illo, &c. Lectionem Evangelii sancti Io-

hannis de adultera memorat idem vir sanctus initio Apologia David: & cap. v ejusdem libri Evangelium Luca de homine divite, qui abiit in regionem longinquam. Postremo in epistola LII ad Studium quindecim Psalmos graduales, quos anabatimos vocat, comparat cum historia Ezechia de quindecim gradibus ascensionis Solis, & cum quindecim diebus, quibus Paulus apud Petrum commoratus est.

III.

IX. Non eundem lectionum ordinem, atque tempore Ambrosii, saltem in omnibus, observari modo in ecclesia Mediolanensi, facile probari potest ex duobus indubitatis locis. Inter istos, ut superius vidimus, legebatur feria secunda sacra hebdomadis: & prophetia Iona feria quarta sequente. Nunc vero neutra legitur ipsis diebus, neque ad matutinum officium, neque ad Missam. Nam utraque feria ad matutinas horas recitantur lectiones ex prophetia Ieremia: ad Missam vero ex Isaiâ. Porro Ionas modo legitur ad Missam feria secunda hebdomade quinta in Quadragesima, itemque feria quinta in Cena Domini: quo die prolixa ex Iona lectio nunc recitatur. Attamen verisimile est, Evangelium de caco nato, quod nunc in usu est Dominica tertia Quadragesima, unde & vocabulum accipit Dominica de cæco, iidem Ambrosii tempore lectum fuisse eodem die, aut certe in Quadragesima, ex dictis. Denique Psalmum Dilexi in exsequiis mortuorum, uti etiam nunc, recitatum fuisse satis innuit Ambrosius in Concione de obitu Theodosii: in quo Plalano, inquit, dum legitur, velut ipsum Theodosium loquentem audivimus.

IV.

X. Ordinem & usum ei, qui nunc in usu est, antiquitus non multum ab similem fuisse colligimus ex paucis, qui nobis restant, hujus argumenti apud Ambrosium locis. Unus est in epistola XIV ad Marcellinam. Sequenti die (erat autem Dominica, scilicet in Palmis seu in Ramis olivarum, ut loquuntur Mediolanenses) post lectiones atque tractatus dimissis catechumenis, Symbolum aliquibus competentibus in baptisterii tradebam basilica. Vbi tria observare juvat, unum ad propositum, nempe lectionibus prophetis, apostolicis & evangelicis successisse, ut modo, tractatum seu concionem. Alterum est, Symboli traditionem Competentibus Ambrosii ævo factam fuisse, quemadmodum apud Gallos etiam & Hispanos, ipsa Dominica Palmarum, non sabbato precedente, ut in Ambrosianis Missalibus posterioribus notatur. Alius in Africa ritus, alius item in ecclesia Romana, in qua Symbolum feria quarta hebdomada quarta Quadragesimalis tradebatur ex Ordinis Romani præscripto. In Africa vero quinto-
decimo

decimo die ante Pascha. qua de re vide sis Augustini sermonem LIX novae editionis, & Notationem ad sermonem CC XII. Tertium observatione dignum est, baptisterii basilicam, celsi majori vicinam, ab ea tamen tantisper separatam fuisse: ut in multis Italiae locis etiam nunc advertere licet.

Evangelio recitando non nudum venerandi nominis JESU vocabulum profercebatur Ambrosii aeo: sed DOMINUS JESUS semper appellabatur. In epistola XVIII. Rogavit quidam Phariseus DOMINUM JESUM. & in epistola XLV. Præteriens DOMINUS JESUS vidit a generatione caecum. Idem ritus hætenus servatur in ecclesia Mediolanensi: quod etiam in Gallicana olim fiebat.

XI. *Ceterum Ambrosius non modo Dominicis, sed singulis diebus sacra celebrabat: cujus rei unicum adducimus testimonium ex epistola XIV saepe memorata. Vos quoque ipsos mihi bonos filios gestiebat eripere, pro quibus ego quotidie instauro sacrificium.*

XII. *An vere tunc Eucharistia sacra in Viaticum apud Mediolanenses asservaretur, questio esse potest. Sane id colligi videtur ex Paulino in Ambrosii vita: qui cum morti proximus esset, ab Honorato divinitus excitato absque mora Viaticum accepit, indicta Missa, quod temporis angustia non ferebat. Accedit etiam locus ex epistola XX ad Felicem Comensem episcopum, ubi agens de cuiusdam basilicae dedicatione & de ejus altari; Ibi, inquit, arca Testamenti undique auro tecta, id est doctrina Christi, doctrina sapientiae Dei. Ibi dolium aureum habens manna, RECEPTACULUM scilicet SPIRITALIS ALIMONIAE, & divinae promptuarium cognitionis. Nam dolium illud aureum ad Eucharistiam referri exigit mannae mentio, & interpretatio subsequens, receptaculum scilicet spiritualis alimoniae. Quod vero sequitur pertinet ad libros sacros.*

XIII. *Neque hoc loco pratermittendum est, Ambrosii aeo in ecclesia Mediolanensi frequentes fuisse & pene quotidianos tractatus. quo nomine conciones sacras & Scriptura ad populum expositiones appellabant. Hinc in epistola XXVI ad Vercellenses: Ecclesia quotidie in lectionibus sacris, in sacerdotum tractatibus, laudem pudicitiae, gloriam integritatis personat. Unde Auxentius Arriavorum episcopus eodem munere etiam in dies defungebatur: sed tractanti quotidie non crediderunt, ut legitur in Ambrosii concione adversus ipsam. Saltem Ambrosium singulis Dominicis sermonem ad populum habuisse constat ex Augustino, qui eum quidem in populo verbum veritatis recte tractantem omni die Do-*

106 OBSERVAT. DE RITU AMBROSIANO.

minico audiebat, ex lib. VI Confessionum cap. III. Hi vero tractatus fiebant tum in Missa post lectionem Evangelii, tum in Vesperis. qui ritus hodie quoque in ecclesia Mediolanensi observatur, ubi sermo, qui fit in vesperis, Lectio appellatur. Ex quibus omnibus intelligitur, ritum Ambrosianum primum in quibusdam cum hodierno convenire, in aliis ab eo discrepare.

V.

XIV. Quo tempore hodiernus Ordo Ambrosianus ad eam, quæ nunc est, formam redactus sit, conicere possumus ex Landulfo seniore in historia Episcoporum Mediolanensium. Narrat quippe hic auctor, qui ante annos sexcentos vivebat, temporibus Caroli secundi (Magnum appellamus) & Hadriani Papæ I. numerosam Synodum Episcoporum Romæ convenisse, in qua cum multa tractarentur, improvide contra mysterium Dei, beatique Doctoris & confessoris Ambrosii se se intulerunt, nempe ut ritus Ambrosianus abrogaretur, parvi penso, quod Gregorius M. Romani ritus instaurator, Ambrosianum inviolatum reliquisset. Hoc loco id observandum, quod olim Episcopi, qui erant ex ordinatione Sedis apostolica, in Cautione sua, qualis in libri Diurni cap. III, titulo VII habetur, spondebant se divina officia Romano more persoluturos, qui ritus ibidem exponitur. Non dubium quin hac lege, quæ forte Gregorium M. auctorem habet, solutus fuerit episcopus Mediolanensis, qui eandem Cautionem faciebat. Et huc forte respexit prædictæ narrationis auctor. Post Synodum memoratam, instigantibus episcopis, Carolus satis egit, ut quidquid in cantu & ministerio divino inveniret a Romano diversum, totum deleret, & ad unitatem mysterii Romani redigeret. Quam ob rem Mediolanum profectus, omnes libros Ambrosiano titulo sigillatos, nimirum qui ad divina officia pertinebant, quos vel dono, vel pretio, vel vi habere potuit, alios combussit, alios trans montes, quasi in exilium misit. Interim cum Romam venisset gloriose memorie Eugenius transmontanus episcopus, amator & quasi pater Ambrosiani mysterii, & Caroli pater spiritualis, factum indigne tulit, conquestus mysterium perire mysteriorum, de quo Gregorius M. sinistram quid proferre timuisset, ex quo denique multa Romano ritui inseruisset. Sic Eugenius Episcopos, ipsumque Pontificem ad meliora consilia revocavit, & ut intemeratus servaretur Ambrosianus Ordo, tandem evicit, non sine attestatione divina. Cum enim in id consensissent omnes, ut positus super altare sancti Petri duobus codicibus, uno qui Gregorianum, altero qui Ambrosianum ritum contine-

ret, sig illatis, si quis ex alterutro, nemine resignante, celitus apertus fuisset, is altero abrogato retineretur; contigit, ut ambo sponte aperti fuerint. Ex quo id consecutum est, ut Sedes Ambrosiana Ambrosianum mysterium (ita semper loquitur Landulfus) retineret: at cetera latini orbis partes Gregoriano uterentur. Mox Eugenius voti sui compos factus Mediolanum properat, Ambrosiani ritus libros recolligit: sed nihil præter Manuale recuperare potuit, quod pius quidam sacerdos furtim subduxerat. Manuale autem postea, curante Eugenio, nonnulli sacerdotum & clericorum, qui multa memoriter retinebant, convenientes in unum, Deo opitulante restituerunt. Hac fusius referuntur tum in ms. historia Landulfi senioris, quæ Datio archiepiscopo perperam tribuitur, tum ex eo apud Mombrinium & in veteri Breviario Mediolanensi: quæ in narratione, licet quadam sublesta fides subesse videantur, tamen res ipsa vera esse potest. Certe ab eo tempore ritus Ambrosianus semper mansit uniformis, ut ex relictis antiquis libris deprehendimus: nisi quod subinde facta est novorum festorum, ut moris est, accessio.

XV. Unus ex antiquioribus codicibus est Antiphonarium de universis festivitatis anni circuli Mediolanensis ecclesiæ, asservatum in bibliotheca Ambrosiana, quod incipit à fisco sancti Martini, cuius officium tam ad Missam, quam ad reliquas horas in eo codice exhibetur. Subsequuntur in eodem officia de Sanctis & de tempore, nempe Idib. Novemb. S. Antonini, xiv. Kal. Decembris Romani sacerdotis & martyris; x. eisdem Kal. translatio S. Cæcilie: die sequenti Natalis S. Clementis; prid. Kal. S. Andreæ, & Baptisimum sancti Ambrosii. In officio de sancto Andrea referuntur verba ex vulgatis eius actis, & orationes de Baptismo Ambrosii, quem ipso die baptizatum fuisse constat. Inde est, quod in pervetusto Kalendario Gellonensi, scripto Caroli M. principatu, prid. Kal. Decemb. fit memoria, Mediolano Ambrosii Episcopi & Confessoris, cuius depositio ibidem præcesserat prid. Nov. Aprilis. Sed ad Antiphonarium Mediolanense redeamus.

Decembris die vii Ordinatio S. Ambrosii, postea sancti Zenonis, sancti Syri, sancti Thomæ. Inde incipit officium de Adventu Domini, cuius sex Dominica assignantur, ut in vulgatis. In Nativitate Domini unica Missa, Lux fulgebit. Mox S. Stephani, sancti Johannis, sanctorum Innocentium, die xxix Natale S. Jacobi apostoli, sancti Silvestri. Ianuario Epiphania cum Vigilia: quatuor post eam Dominica: Festa sanctorum Sebastiani, Agnetis, Vincentii, Babilæ & trium parvulorum, & prid. Kal. Febr. sancti Julii.

108 OBSERVAT. DE RITU AMBROSIANO.

Februarii Kal. sancti Severi : deinde Purificatio , sanctæ Agathæ , Cathedra sancti Petri , in cujus oratione habetur , animas ligandi arque solvendi pontificium tradidisti &c.

Martio sancti Gregorii : sancti Benedicti , sanctæ Mariæ. In festo sancti Benedicti notatur illa Prefatio , sub his aliisque verbis : Hic est ille cælestis negotii Mercator egregius , per quem ad viam salutis multorum corda conversa sunt : quique monachorum innumerabilium Pater existens , quos verbis imbuerat , adstruebat exemplis : ut non solum exanimatis redderet corporibus vitam , sed erroris obscuritate deterfa , animas resuscitaret multorum. Hæc Prefatio non solum in miss. sed etiam in primis vulgatis Missalibus Ambrosianis refertur : at deest in Missali edito anno M D L X. ubi nihilo minus habetur Missa propria de sancto Benedicto in Martio , ejusque nomen in Canone Missa extremo loco memoratur : secus quam in recentioribus Missalibus , in quibus Missa propria rejecta , & festo sancti Benedicti in mensem Julium relato , nomen ejus e Canone expunctum est.

In predicto codice , quem modo examinamus , notantur in Martio Dominica Septuagesimæ , & subsequentes ; tum Dominica in caput Quadragesimæ : quam sequuntur Dominica de Samaritana , de Abraham , de Cæco , de Lazaro : quæ vocabula hodie quoque retenta sunt in ecclesia Mediolanensi. In sabbato ante Dominicam Palmarum , Missa completa Diaconus dicit excelsa voce ad cornu altaris : Si quis catechumenus , procedat. Tum , Si quis Judæus , procedat. Deinde , Si quis paganus procedat. Postea , Si quis hæreticus , procedat. Postremo , Cujus cura non est , procedat. His dictis caneatur cum infantibus Resp. Venite filii audite me , timorem Domini docebo vos &c. Hæc pro traditione Symboli , quæ in recentioribus Missalibus amplius non comparent.

Aprili sancti Georgii , ubi hymnus de ejus gestis.

Maior Philippo & Jacobi , Inventio sanctæ Crucis , Passio S. Victoris ad Ulmum , nempe die octava : & die xxv depositio sancti Dionysii : sequenti Sisinnii , Marii & Alexandri.

Junio xv Viri martyris xix Protasii & Gervasii ; xxi Juliani Martyris ; postea S. Johannis Bapt. SS. Petri & Pauli : Julio , die tertia translatio sancti Thomæ Apostoli ; natale S. Margaretæ absque dici designatione : xii Naboris & Felicis. Tum S. Marcellinæ : S. Apollinaris : S. Jacobi Apostoli , Christophori & Christinæ : xxviii Nazarii & Celsi.

Augusto , i Maccabæorum & Eusebii ; deinde Sixti , Donati ,

OBSERVAT. DE RITU AMBROSIANO. 109

& Carpophori, Laurentii, Hyppoliti & Cassiani. xv translatio Sifinnii & Alexandri, & depositio S. Simpliciani: Festivitas beatæ Mariæ: *postea* Mammetis & Agapiti: xxii Bartholomæi, x xv Genesii, x x v i Alexandri, xxviii Augustini, & *sequenti* Decollatio Johannis Baptistæ.

Septembri, vii Id. Dedicatio sancti Michaëlis sub Domo: *Die sequenti* Nativitas sanctæ Mariæ: xviii Kal. *Octob.* Cornelii & Cypriani: *tum* Exaltatio sanctæ Crucis, Nicomedis, Euphemie, Satyri, Eustorgii, Matthæi, Mauricii, Domnini martyris: Dedicatio majoris Mediolanensis ecclesiæ. *In hymno hæc habentur.*

Hæc domus rite tibi dedicata

Noscitur, in qua populus sacratum.

Corpus assumit, bibit & beati.

Sanguinis haustum.

Octobri Lucæ, Cosmæ & Damiani, Simonis & Judæ.

Novembri denique, omnium Sanctorum: Vitalis & Agricolæ.

XV. *Minutiora sunt hæc, & qua fortasse relatu indigna quibusdam videbuntur: sed ex his saltem facile intelligitur, quantum creverint postremis temporibus sollemnitates, quæ longe pauciores erant in ecclesia Mediolanensi ante annos quingentos: quo tempore eodex ille calamo exaratus est. In Missali anni M D LX & deinceps exstat Missa propria de sancto Barnaba apostolo, de quo in Prefatione legitur: Hic Mediolanensis ecclesiæ primus Pontifex perspicuis eam miraculis insignivit &c. Sed tamen in Canone Missæ nulla ejus mentio. In sequenti vero Catalogo Mediolanensium Antistitum perantiquo, manu recentiori Barnaba nomen primo loco positum est. Preclara sunt Ambrosii verba in Confectione adversus Auxentium. Absit ut tradam hereditatem Patrum, hoc est, hereditatem Dionysii, qui in exilio in causa Fidei defunctus est; hereditatem Eustorgii Confessoris, hereditatem Myroclis, atque omnium retro Fidelium episcoporum.*

INCIPIUNT NOMINA EPISCOPORUM

Mediolanensis civitatis.

BARNABAS, manu recentissima.

BANATALON sedit annos xiii. depositus est viii Kal. Oct.

GAGIUS sedit annos xxii. depositus est vi Kal. Oct. ad Concilia sanctorum.

110 INDEX EPISCOP. MEDIOL.

- CASTRICIANUS sedit annos xli. depositus Kal. Dec. ad S. Johannem ad Conca.
- KALIMERUS sedit annos liii. depositus prid. Kal. Aug.
- MONAS sedit annos lviii. depositus viii Kal. April. ad sanctum Vitalem.
- MIROCLES sedit annos xxii. dep. prid. Kal. Decemb. ad S. Victorem.
- MATERNUS sedit annos xii. dep. xv Kal. Aug. ad sanctum Naborem.
- PROTASIUS sedit annos xxv. depositus viii Kal. Decemb. ad sanctum Victorem.
- EUSTORGIUS sedit annos xvii. depositus xiiii Kal. Oct.
- DIONYSIUS sed. annos xiiii. dep. viii Kal. Jun.
- AMBROSIIUS sed. ann. xxvi, mens. iiii, dies v. dep. die v mens. April.
- SIMPLICIANUS sed. ann. x. dep. xviii Kal. Sept.
- VENERIUS sed. ann. viiii. dep. die iiii mens. Maii ad S. Nazarium.
- MAROBUS sed. ann. xv. dep. viiii Kal. Maii ad sanctum Petrum, ad S. Naz.
- MARTINIANUS sed. ann. xxx. dep. iiii Kal. Jan. ad S. Stephanum.
- CLICERIUS sed. ann. xviii. dep. xvii Kal. Oct. ad S. Nazarium.
- LAZARUS sed. an. xi. dep. xiiii die mensis Martii ad sanctum Nazarium.
- EUSEBIUS sed. ann. xvii. dep. die viiii mens. Aug. ad S. Laurentium.
- GERONTIUS sedit ann. vi. dep. die vii Maii ad S. Simplicianum.
- BENIGNUS sed, ann. viii. dep. x Kal. Dec. ad S. Simplicianum.
- SENATOR sed. ann. iiii. dep. iiii Kal. Jun. ad sanctam Eufimiam.
- THEDORUS sedit ann. viiii, mens. viii, dies xvii. dep. v Kal. April. ad sanctum. . . .
- LAURENTIUS sed. ann. xxii. dep. viii Kal. Aug. ad sanctum Cassianum.
- EUSTORGIUS sed. ann. vii. dep. viii Id. Jun. ad S. Xystum.
- MAGNUS sed, ann, xxx. dep. Kal. Novemb. ad S. Eustorgium.

INDEX EPISCOP. MEDIOL. 111

DATIUS sed. ann. xxii. dep. xviii Kal. Feb. ad S. Victorem.

VITALIS sed. ann. iiii. dep. ad S. Vitalem.

AUXANUS sed. ann. ii. dep. iii Non. Sept. ad S. Stephanum ad R.

HONORATUS sed. ann. ii. dep. ad Noceram.

FRONTUS sed. ann. xi^a. dep. in Genua ad sanctum...

LAURENTIUS sedit annis xviii, mens. vii. ob. xii Kal. Septemb. sepultus est in Genua ad S. Syrum. Vixit annis lxxxv.

CONSTANTIUS ^b episcopus sed. ann. xviii. ob. die iii mens. Sept. sepultus in Jenua in domo S. Ambrosii. Vixit annis c.

DEUSDEBIT episc. sed. ann. xxviii, mens. unum, dies xiiii. ob. iii Kal. Novemb. sepultus in Jenua ad S. Syrum. Vixit annis xc.

AUSTERIUS episc. sed. ann. x, mens. v, dieb. vii. ob. die iiii mens. Julii, sepultus in Jenua ad S. Syrum. Vixit ann. lxx.

FORTIS episc. sed. ann. iiii.

JOHANNES episc. sed. ann. x. ob. iiii Non. Jan. sepultus est ad S. Mikaelem in Domo.

ANTONIUS episc. sed. ann. ii. ob. prid. Kal. Nov. sepultus est ad S. Simplicianum.

MAURICILLUS episc. sed. mens. iiii.

AMPELIUS episc. sed. ann. v. sepultus ad S. Simplicianum.

MANSUETUS episc. sed. ann. viii. ob. xi Kal. Mart. sepultus est ad S. Ambrosium.

BENEDICTUS episc. sed. ann. xlvii. ob. v Id. Mart. sepultus ad S. Ambrosium.

THEODORUS episc. sed. ann. xiiii. sepultus in monasterio Auronæ.

NATALIS episc. sed. mens. xiiii. ob. prid. Id. Maii. sepultus est ad S. Georgium.

ARIFRETUS episc. sed. mens. viii. sepultus est ad S. Nazarium.

STABILIS episc. sed. ann. ii, mens. iiii. ob. Id. Decemb. sepultus est ad sanctum Ambrosium.

LÆTUS episc. sedit ann. xiii, mens. xi. ob. prid. Non. April. sepultus est ad S. Ambrosium.

a. Haecenus verbum *depositus*: in sequentibus *obit*. Ex quo conjectura est priorem hanc partem concinnatam fuisse post obitum Frontonis.

b. Abhinc Episcopi dicuntur, quæ nova formula est.

THOMAS episc. sed. ann. xxviii, dieb. v. ob. v Kal. Octob. sepultus ad S. Laurentium.

PETRUS episc. sed. ann. xvii, mens. ii. ob. Id. Maii. sepultus est ad S. Ambrosium.

O DELBERTUS episc. sed. ann. viii, mens. vii. ob. v Kal. Martii. sepultus est ad S. Ambrosium.

ANSELMUS episc. sed. ann. v. ob. v Id. Maii. sepultus est ad S. Ambrosium.

BONUS episc. sed. ann. iiii. ob. x Kal. Febr. sepultus ad S. Ambrosium.

ANGELBERTUS episc. sed. anno i, mens. ii, dieb. xxii. ob. vii Id. Oct. sepultus est in ecclesia hiemali.

ANGELBERTUS episc. sed. ann. xxxv, mens. v, dies xvii. ob. Id. Decemb. sepultus ad S. Nazarium.

TADO episc. sed. ann. vii, mens. vi, dieb. xiii. ob. vii Kal. Junii, sepultus ad S. Ambrosium.

ANSPERTUS episc. sed. ann. xvi, mens. v, dieb. xiii. ob. vii Id. Decemb. sepultus est ad S. Ambr.

ANSELMUS sed. ann. xiiii, mens. vi, dieb. xxii. ob. v Kal. Octob. sepultus est ad S. Ambrosium juxta altare sanctæ Marcellinæ.

LANDULFUS sedit ann. iii, diebus minus xxxviii. ob. nono Novembris, sepultus est ad S. Ambrosium.

ANDRAS sedit annis vi, mens. iiii. ob. prid. Kal. Mart. sepultus ad S. Ambrosium.

ACHO sed. ann. xii, mens. vi. ob. vii Id. Sept. sepultus est in ecclesia hiemali.

VVARIMBERTUS sed. ann. ii, mens. viii. ob. xviii Kal. Sept. sepultus est ad S. Stephanum ad Fonti.

LAMPERTUS sedit ann. viiii, mens. viii, dieb. xv. ob. xiii Kal. Julii, sepultus est in ecclesia hiemali.

HILDUINUS sed. ann. v, dieb. xxv. ob. viiii Kal. Augusti, sepultus est in ecclesia hiemali.

ARDERICUS sed. ann. xii, mens. ii. ob. iii Id. Octob. sepultus est in ecclesia Apostolorum intra capellam sancti Lini Papæ.

ALDELMANNUS & Manasses v annis inter se diviserunt.

VVALPERTUS sed. ann. xviii. ob. viii Id. Novemb. sepultus in ecclesia hiemali.

a. Hic desinit episcopi vocabulum, & formula prior resumitur.

INDEX EPISCOP. MEDIOL. 113

ARNULFUS sed. ann. III, mens. III. ob. XVI Kal. Maii, sepultus in ecclesia hiemali.

GOTTFREDUS sed. ann. V, mens. I, dieb. XXIII. ob. XIII Kal. Octob. sepultus est in ecclesia hiemali.

LANDULFUS sed. ann. XVIII, mens. III. ob. X Kal. Octob. sepultus ad monasterium S. Celsi.

Domnus ARNULFUS sed. ann. XVIII, mens. VIII, dies VI. ob. V Kal. Martii; sepultus est ad S. Victorem ad Corpus.

Domnus HERIBERTUS sed. ann. XXVI. sepultus est ad S. Dionysium.

Domnus GUIDO sed. ann. XXVI. ob. X Kal. Sept. sepultus est in Bergullio.

Domnus TEDALDUS^a archiepiscopus sedit annos VIII & menses tres & dies XXI. ob. VIII Kal. Junii, sepultus in Arona.

Hactenus primaria manu.

Domnus ANSELMUS archiepiscopus sedit ann. VII & menses V & dies IIII. ob. prid. Non. Decemb. sepultus in basilica Apostolorum.

Domnus ARNULFUS archiepiscopus sed. ann. XII & menses VIII & dies XVIII. ob. VIII Kal. Octubris, sepultus est in Claviensi (*aliis Clivaënsi*) monasterio.

* Venerabilis memoriae ANSELMUS archiepiscopus sed. ann. III & mens. X & dies XXVIII. ob. II Kal. Octub. sepultus est Constantinopoli, ut peregrinus, in monasterio S. Nicolai.

** Hæc duæ
verba non
sunt ejusdem
scriptura.*

GROSOLANUS hanc sedem ann. novem & mens. IIII perturbavit.

Domnus JORDANIS archiepiscopus sedit ann. VIII & menses VIII & dies III. ob. IIII Non. Oct. sepultus est apud S. Ambrosium juxta pulpitem

Domnus OLRICUS archiepiscopus sed. ann. V & menses VI diesque undecim. ob. V Kal. Junii, sepultus in ecclesia hiemali juxta pulpitem.

Ab electione domni ANSELMⁱ de Pusterula usque ad electionem domini Ribaldi, qui tunc erat Alben^sis episcopus, sunt anni VIII & dies XXVIII. *Recenti manu sic substitutum est*, Anselmus de Pusterula sedit ann. X mensem I, dies XIII. ob. decimo nono Kal. Octob. sepultus est in Roma ad S. Johannem Lateran.

^a. Abhinc Archiepiscopi titulus, non tamen ad finem catalogi.

*Superiores VII Episcopi scripti sunt manu paullo recentiori :
sequentes vero tres longe recentiori.*

ROBALDUS sedit annis x, mensibus IIII & diebus XXVI.
ob. autem III Kal. Januar. sepultus est in ecclesia B. Ma-
riæ, quæ dicitur hiemalis, juxta pulpitem. Fuerunt autem ab
ipsius obitu usque ad electionem domini Oberti dies XXVI.

OBERTUS sedit annis xx, mensibus II & diebus VI. obiit
autem VI Kal. Aprilis, Sepultus est Beneventi exulans pro
fide in ecclesia sanctæ Sophiæ. Fuerunt autem ab obitu ip-
sius usque ad electionem domini Galdini dies xx.

GALDINUS sedit annis x, eadem die consecratus & mor-
tuus. Obiit autem XIIII Kal. Maii supra pulpitem beatæ
Teglar, prædicans populo verbum fidei & veritatis, & præ-
cipue contra Catharos. Sepultus est in eadem ecclesia jux-
ta pulpitem. Fuerunt autem ab obitu ipsius usque ad elec-
tionem domini Algisii septimanæ x & dies IIII.

ALGISIUS sedit annis VIII & mensibus VIII, quinque die-
bus minus. Vacavit autem sedes per mensem unum & dies
XI. sepultus est autem in ecclesia hiemali juxta pulpitem.

Dominus **UBERTUS**, qui & papa Urbanus, sedit annis duo-
bus & mensibus quatuor, & diebus x. Vacavit autem sedes
mense uno & diebus sedecim. Sepultus vero est in ecclesia
Ferrariensi.

MILO sedit annis VII & mensibus octo, & diebus octo. Va-
cavit autem sedes per XXVI dies.

UBERTUS, dictus Ciago, sedit mensibus novem & diebus
v. & vacavit sedes diebus XXVIII.

PHILIPPUS sedit annis x & mensibus IIII & diebus VII.
Vacavit autem sedes diebus XXI. Sepultus est in ecclesia
sanctæ Mariæ Majoris Mediolan.

MCCC XLIII Dominus **JOHANNES** de Vicecomitibus
factus fuit archiepiscopus Mediolanensis, & vixit in archiepif-
copatu annis XI. Obiit MCCC LV, quinto Octubris, die Do-
minico. Qui etiam fuit Dominus generalis civitatum Medio-
lani, Bononiæ, Januæ, Parmæ, Placentiæ, Bobii, Laudæ,
Brisacæ, Pergami, Cremonæ, Cumarum, Vercellarum, No-
varæ, Asti, Tretonæ, Alexandriæ: qui multa bona parave-
rat & parabat suæ ecclesiæ, si proximi ejus ipsi ecclesiæ dimi-
sissent, ipse non potuit attingere, si libros in officio, & theologia,
calices, cruces, figuras sanctorum, auræas mitras, baculos, &c.

INDEX EPISCOP. MEDIOL. 115

OBSERVATIONES.

I. **H**unc Indicem Archiepiscoporum Mediolanensium exscripsimus ex veteri codice bibliotheca Ambrosiana, signato B n^o. 245. Non una, sed diversa manu scriptus est Index, uti suis locis notarimus. Post Calimerum, qui quinto loco numeratur, sequitur in hoc catalogo Mirocles, deinde Maternus: secus quam apud Ughellum, ubi Maternus Mirocli preponitur. Hos sequitur in nostro Indice Protasius, & post eum Eustorgius, Dionysius, Ambrosius. Verum plura nomina & alius ordo apud Ughellum: apud quem hoc modo recensentur: Mirocles, Profius vel Grosius, Eustorgius, Iulius, Protasius, Dionysius, Auxentius, Ambrosius. Præter ea postremus eorum, qui primaria manu descripti sunt, Tedaldus est: sed inter eum & Guidonem duos alios intermedios ponit Ughellus, Gotifredum & Athonem. Ast major est hiatus sub finem catalogi, ubi post Philippum desunt in nostro indice Ubertus Pirovanus, Gerardus Sessius, Henricus Septalius, Guillelmus Ruzolius, Leo de Perego, Otho Vicecomes, Rufinus, Franchinus, Cassonus, Aicardus: quos sequitur Iohannes Vicecomes, qui in nostro catalogo postremus est.

II. Verum quantumvis mancus sit sub finem hic catalogus, in priori parte videtur integer; eritque non levis momenti ad quædam illustranda: quale est illud de die obitus sancti Ambrosii, ex quo pendet anni eius supremi definitio. Eruditus Papebrochius in Propyleo ad tomum 1 Aprilis, mortalem Ambrosii diem assignat XVII Aprilis, annum Christi CCC XCVIII. Nec dissimulat diem quartum Aprilis a Beda, ceterisque Martyrologiorum scriptoribus notari: sed omnes corrigendos existimat vir doctus, nempe quod mortuus sit Ambrosius anno CCC XCVIII ex Chronico Marcellini, & quidem, teste Paulino, Sabbato sancto Paschatis, quod anno CCC XCVIII in XVIII Aprilis incidebat. Quod vero ultra quantum Aprilis producendus sit Ambrosii obitus, hoc argumentum affert, ejus scilicet ordinationem contigisse die VII Decembris; sedisse vero in episcopatu annos XXIV, menses IV & dies V. ut notatur in vulgatis indicibus. Itaque adjectis ad mensis Decembris diem septimum mensibus quatuor & diebus quinis, consequens esse, ut saltem ad duodecimum Aprilis dies mortis Ambrosiana producenda sit. Atqui diem V pro X scribi potuisse facili lapsu, ac proinde Ambrosii obitum accidisse XVII Aprilis anno CCC XCVIII.

III. Ex adverso alii existimant, retinendum esse annum CCC XCVII. & diem quartum Aprilis. Diem quidem ob auctoritatem

veterum omnium Martyrologiorum: annum vero tum ob testimonium Paulini, qui Ambrosium ait fere triennium supervixisse Theodosio M. quem anno CCC XCV ante Idus Martias obiisse constat: tum ex eo quod Patres Concilii Carthaginensis tertii, anno CCC XCVII celebrati, consultationem direxerunt ad Siricium Papam, (qui anno sequente amplius in vivis non erat) & ad Simplicianum, Ambrosii successorem. Quod attinet ad Marcellini Chronicon, multa subinde in eo referri conglobate & confuse, ut de sancto Chrysostomo, quæ uno eodemque anno fieri non potuerunt.

IV. Favet huic sententia Index noster, in quo Ambrosius depositus dicitur V Aprilis. Nam depositio pro die sepulture non raro usurpatur apud veteres, immo etiam apud Ambrosium ipsum in epistola LVI ad Marcellinam, ubi loquens de recondicione corporum sanctorum Gervasii & Protasii: Acclamavit populus, inquit, ut in Dominicum differretur diem Martyrum depositio. Ambrosius autem ipso die Pascha dilucescente, qui anno CCC XCVII Aprilis quinta die accidit, terræ mandatus est, ut ex Paulino intelligitur. Illud obstat, quod a die VII Decembris, quo die ordinatus est Ambrosius, usque ad IV Aprilis, non integri quatuor menses intercedunt. At si menses quatuor computeamus, ut fit non raro, per quatuor singulatim hebdomadas; omnino quatuor menses & quinque dies continet intervallum temporis a septimo Decembris ad quartum Aprilis. In libello de vita sancti Zenobii episcopi Florentini, qui libellus sub nomine Simpliciani Ambrosii successoris in vetustis codicibus exstat. Ambrosius ipsa Dominica Pascha obiisse dicitur. Sed hoc constare non potest cum narratione Paulini: quo teste Ambrosius, ante lucanam horam defunctus, in ecclesiam majorem delatus est: ibique eadem fuit nocte, qua vigilatum in Pascha: postremo luceſcente die dominico corpus ipsius, peractis sacramentis divinis, de ecclesia levatum, portatumque ad basilicam Ambrosianam, in qua positum est. Ex qua rerum serie nemo non intelligit, virum sanctum ante lucem Sabbati sancti obiisse.

V. Vnum ad hac observare convenit de pontificatu Laurentii, cujus Cautioni seu fidei professione Gregorius M. tum Urbis Prator subscripsisse invenitur. Laurentio duodecim dumtaxat pontificatus annos tribuunt indices vulgati, substituuntque Constantium, quem anno D XCIII sedem inisse manifestum est ex epistolis Gregorii M. ad Exarchum Italia, & ad Iohannem Subdiaconum, datis Indictione XI. qua Indictione predictus erat jam dictus. annus D XCIII. Detrahe annos duodecim, quibus Laurentius Mediolanensem ecclesiam

rexit: habebis annum D LXXX. quo anno proinde Gregorius etiam tum Prator urbanus erat, eoque nomine subscripsit Laurentii cautioni. Hinc infert Baronius brevi tempore in Monasterio versatum fuisse Gregorium: cum ex eo eductus sit anno D LXXXIII ad capeffendam legationem C P. Sed hunc nodum, quem antea ex conjectura solvere tentaveram in Dissertatione de Gregorii monachatu, penitus resolvit Index noster, qui Laurentio tribuit pontificatus annos, non duodecim, sed novemdecim. Alia mittimus, quæ ex hoc indice illustrari possunt.

IN APOLOGIAM SEQUEMTEM ADMONITIO.

Manasses, Remorum Pontifex eo nomine primus, multas in se turbas excitavit ob varia crimina, de quibus fuit accusatus. Id in causa fuit, ut Demochares eum ex albo Remensium Antistitum penitus expunxerit. Præcipua criminum seu accusationum capita erant, Simoniaca in Remensis ecclesia Pontificatum intrusio, sacra suppellectilis direptio, spoliatio clericorum, ecclesiarum, abbatiarum, & injusta in plerosque excommunicationes. Accusatores ejus erant in primis Manasses alter, Bruno, & Pontius. Manasses is esse videtur, qui eidem Manassa post Rainaldum in Sedem Remensem successit: Bruno vir ille sanctissimus, qui cum ex ecclesia, Colonienſi in Remensem translatus fuisset, Manassa flagitiis offensus, cum nullum eis modum imponi cernebat, cessit tandem; & sæculi perſectus, in solitudinem secessit in pago Gratianopolitano, ubi sacri Cartusiani Ordinis fundamenta jecit. Hanc ejus secessus causam affert Guibertus abbas de Novigento in libro de vita sua. Manasses primus Sedem Remensem occupavit ab anno M LXVIII post mortem Gervasii. In Concilium Augustodunense ob crimina, quæ ipsi objiciebantur, ab Hugone Diensi episcopo, Gregorii VII in Galliis Legato, accitus, cum adesse recusasset, damnatus est anno M LXXIX. Is verò cum ad Romanum Pontificem appellasset, ab eoque mitius fuisset tractatus, perseverante iniquorum facinorum dedecore, à Legato in Lugdunense proximum Concilium denuo vocatus (in quo postea redactus in ordinem est) hanc Apologiam edidit in sui defensionem, aut potius aliquis alius ab eo conductus. Manassen quippe litterarum expertem fuisse testatur Willelmus abbas Mettensis in epistola tertia ad ipsum his verbis. Certe olim apud quosdam Philosophos de revolutionibus animarum grandis erat opinio: quæ per te non inani-

118 MANASSÆ ARCH. REM. APOLOGIA.

ter confirmatur, dum, sicut illi Euphorbum in Pythagoram, sic in te Gervasium putent nostri temporis homines esse transfusum. Verum non id ego tibi concesserim, ut ille in te totus transierit: cum in illo tyranno quondam bonarum artium vestigia fuerint; quibus omnino tu cares, ille excelluit. *Gravia sunt qua in Manassen intorquet hic Guillelmus, quem ex abbazia sancti Remigii exturbaverat. Nec magis speciosi sunt colores, quibus eundem Manassen depingunt Gregorius VII in Registro, Guibertus abbas Novigenti in libro de sua ipsius vita, atque Hugo abbas Flaviniacensis in Chronico. Vnus ex omnibus eum laudat Fulcoius, subdiaconus Meldensis, in suis carminibus ineditis, quorum unum inscribit Alexandro Pape II. alterum Gregorio VII. ad Manassen commendandum. In priori canit Richerium Senonensem, & Manassen Remensem antistites esse duo luminaria: Richerium nocti pro luna, Manassen diei pro sole præesse. In altero Gregorium ita compellat.*

Nec tibi Roma parem, Manassæ nec Remis habebit.

Fallitur, & fallit, qui detrahit æmulus illi.

In ejusdem Manassæ gratiam scribit Hugoni episcopo Diensi. Verum poeta non multa fides, cujus propensio in Manassen non fuit à cupiditatis vitio aliena, uti indicant hi versus ad Milonem Decarum Parisiensem.

Quid rogo Musa gemis? misisti carmina Remis:

Misisti Romæ. quæ sunt tibi commoda pro me.

Cum te laudavit, cum te vehementer amavit,

Quid plus Roma dedit? quæ plus tibi portio cessit?

Quid tibi divisit? carmen pro carmine misit.

Remis venisti: tecum tua scripta tulisti.

Te sibi captavit, præsentarique rogavit.

Te Manases legit, perlegit, & inde relegit.

Te commendavit, post se cum laude locavit:

Mercedemque dedit, quæ non à mente recedit.

Hæc illa venalis causa elogiorum. Idem Fulcoius condidit Epitaphium Adelhaidis matris Archiepiscopi Manassæ. Adeoque falluntur quotquot ejus genus texuere, qui Manassæ patrem Manassen Calvum Comitem de Rocciò; matrem vero Beatricem de Hainaco tribuunt. Ceterum præmissa Manassæ Apologia Roma in veteri codice Christina Regina, qui olim erat bibliotheca Petaviana, sed in duo fragmenta divulgata exstat. Vnum ex his fragmentis olim viderat clarissimæ memoriæ Jacobus Sirmundus, qui quatuor aut quinque ex eo versus submitit Marloto, Metropolis Remensis Historia inserendos. De eodem Manassæ iterum fit mentio in epistola sub-

sequente, quæ epistola Clericorum Noviomensium ad Cameracenses, iidem ex Bibliotheca Regina cruta est.

APOLOGIA MANASSÆ

ARCHIEPISCOPI REMENSIS.

D Omino H. Diensi episcopo M. Remorum archiepiscopus salutem. Monuistis me Lugduni ad Concilium vobis occurrere. Ad quod quare non veniam, dignum duxi litteris vobis & omni Concilio significare, ne quis fortè vel in secreto, vel in publico sit, qui nos pro hac causa merito possit inculpate. Etenim non solum per omnes fere Gallias, verùm etiam Italiæ & Romæ est notum, qualiter ante hoc biennium in eadem provincia à vobis & ab aliis quibusdam in nos violenter ac injustè res gesta est: & ego vim ac præjudicium passus Romam processi, ibique super hoc Romanum & apostolicum iudicium appellavi. Quia verò vos aberatis, jussu domini Apostolici in ipsa regione remansi, & adventum vestrum per xi. fere hebdomadas expectavi. Cumque non veniretis, tandem in præsentia domni Apostolici & in Concilio generali inter nos, & eos qui ibi loco vestro, utpote à vobis directi, aderant, altercatio habita est, & ex eorum accusatione ac nostra defensione, quidquid passi eramus, temere ac violenter actum esse & constare non debere, judicatum, atque correctum est. Tum ego domno Apostolico renuntiavi cunctis audientibus, quod nec me ultra in iudiciis ecclesiasticis, si vellem, committerem manibus vestris, & quia vobis ultrà jure subjici non deberem, congruam in ipsius Romani conventus audientia reddidi rationem. Ipso autem domno Apostolico subsequenter interrogante, cujus potius in conciliis infra Gallias iudicium vellem subire, meque in hoc Abbatem Cluniacensem protinus eligente, statutum est, ut in conciliis Gallicanis, sicut jam diximus, aliorum causas censura vestra tractaret: porro Abbas Cluniacensis de nobis judicaret. Deinde etiam idem instituit domnus Apostolicus, ut sibi hujusmodi facerem sponsonem, quod si ad concilium in partibus Galliarum vel Nuntio, vel litteris Sedis apostolicæ vocatus essem, non omitterem venire, nisi canonica excusatione præpeditus essem: sed hoc non addidit, ut si contra-mandaretur, à professione desisterem.

Quapropter cum nuper Concilium apud Trecas à vobis monitum est, in qua monitione nomen Abbatis Cluniacensis pariter insertum est; ego illuc incunctanter cum abbatibus meis, & clericis, & beneficiatis ecclesiæ meæ processi: quia, ut superius dixi, nullam à domno Apostolico in jam dicta sponse contra-mandationis mentionem audivi: & quia Abbatem Cluniacensem, qui me judicare debebat, affuturum accepi; & quia in ipsa contra-mandatione à vobis facta nec impedimentum ullum, quo fieri non posset, vos habere comperi; nec litteras, ut par erat, in conciliis contra-mandandis à vestra parte vel prædicti Abbatis habui. Unde illuc, ut dictum est, proficiscens, quamvis vos non veniretis; ego tamen partem ipsius concilii, quæ ad me adtinebat, implevi, & me a prædicta sponse secundum propositæ rationis consequentiam liberavi. Ad istud verò Lugdunense concilium ideo non venimus, quia non unam, sed plures excusationes canonicas cur venire non debeamus habemus.

Primo quia in ejus monitione nullam vel mentionem domni Abbatis Cluniacensis, qui nos jussu domni Apostolici judicare debet, accepi. Deinde quia in eis partibus Galliarum non geritur, ubi ejus subire judicium jussi sumus, sicut in sequentibus explanabimus. Tertio quia regio ipsa, inter nos & Lugdunum adjacens, ex captione Comitum Nivernensis & Episcopi Autissiodorensis & militum eorum adeo bellorum tempestate turbatur, ut nulli ex regno Francorum per eam liber transitus concedatur. Cum enim ipsi propter dominum nostrum Regem Franciæ capti, & trusi ergastulo teneantur; nos proculdubio similiter propter Regem, eo quod regii Episcopi sumus, ab hominibus ipsius provinciæ captioni & ergastulo traderemur. Et ideo secundum legem Justinianam in secundo libro codicum, legitimam excusationem habemus, quando salutis periculum & corporis cruciatum in eundo metuimus. Præterea cum hoc Concilium in eadem provincia & ab eisdem ipsis celebrari noscamus, ubi & à quibus in altero concilio violenter & inhumanè tractati sumus, & tam injustè, ut Romæ totum illud destructum viderimus, pro qua re etiam in generali & Romano Concilio de eorum manibus ablati sumus; consequenter nec nos deinceps judicium eorum habemus subire, nec ipsi super nos habent manum apponere. Super hæc omnia sacris auctoritatibus edocemur, quia si vim temerariæ multitudinis metui-

mus,

mus, locum debemus eligere nobis proximum, in quo non sit difficile testes producere, & causam finire. Vim temerariæ multitudinis illos vocamus, quibus in eadem provincia, sed in altero concilio tale quid in nos violenter ac temerarie actum est, quod Romæ non firmatum, sed potius infirmatum est. Locus ipse profecto, nec nobis proximus, nec testibus producendis facilis est: quia itinere fere quindecim dierum à nobis abest.

Quia vero de hoc uno concilio infra tres hebdomadas valde sibi dissimiles monitiones a vobis accepimus; primo de prima, deinde de secunda tractabimus. In prima dixistis, ut accusatoribus nostris, scilicet MANASSÆ & sociis, responsuri ad concilium veniremus. Et ego dico vobis, quia ego & Manasses pro omnibus sociis suis concordiam fecimus, exceptis duobus, quorum unus, scilicet BRUNO, nec noster clericus, nec noster natus aut renatus est, sed sancti Cuniberti Coloniensis in regno Teutonicorum positi Canonicus est: cujus societatem non magnopere affectamus, utpote de cujus vita & libertate penitus ignoramus; & quia quando apud nos fuit, multis beneficiis a nobis in eum collatis, male & nequiter tractati sumus. Alter vero, id est Pontius, in Romano Concilio nobis præsentibus est falsatus: & ideo nec uni, nec alteri in ecclesiastico iudicio respondere aut volumus, aut debemus. Dixistis etiam vos in Lugduno loci aptitudinem elegisse, eo quod prædicti clerici non ausi venire Trecas, illic non timerent adesse. Nos e contra dicimus, quia multo magis nos timeamus Lugdunum procedere, quam illi Trecas venire: quia quanto illis majores & ditiores videmur, tanto & citius capi, & gravius pro ampliori redemptione distringi a tyranno quolibet quæreremur. Jam enim ex abundantia iniquitatis in consuetudinem versum esse videmus, ut de die in diem Episcopos capi, & tradi ergastulo doleamus, sicut in eo, de quo supra diximus, Episcopo Autissiodorensi cernitur factum: sicut in Episcopo Leodiensi, quem nuper in vigilia Natalis Domini novimus captum: sicut vos ipsi nostis domnum Apostolicum in nocte Natalis Domini, in ipsa Missæ celebratione nondum peracta, ab altari per summum scelus abstractum. Unde quia, sicut vulgo dicitur, Levius ex aliorum, quam ex nostris periculis castigamur; satis apparet nullam nobis apud Lugdunum esse loci aptitudinem, nullam nobis esse ad illum sine periculo processionem. Et ideo secundum præmemorata Leges Justinia-

næ sententiam, & juxta perpetratam in nos olim in ea provincia temeritatem, legitimam super hoc habere excusationem.

De secunda monitione consequenter hoc dicimus, quia dixistis, ut si accusatores deessent, ad Concilium venirem, paratus cum sex Episcopis, quorum vita non notetur infamia, me expurgare. Et nos e contra respondemus, quia si accusatores desunt, nos ex hoc respondere cuiquam non debemus: si verò adsunt, non nisi illis qui se præsentialiter vel vidisse, vel audisse affirmant, nos respondere debere probamus. Quod & in sacris auctoritatibus est statutum, & in sæpo dicto Romano Concilio nobis à domno Apostolico sub hac eadem conditione laudatum est. Cujus rei etiam testes idoneos qui interfuerunt habemus, & per eos derationare valemus. Quamvis nullam a prædicto Manassæ & sociis speremus accusationem, eo quod ipsi, nisi forte pro hujus concilii occasione ad vomitum redeunt, nobiscum fecerunt concordia compositionem, exceptis duobus, ut dixi, Brunone & Pontio, quibus juxta præcedentem rationem respondere nec volo, nec debeo. Et si aliqui ex eis, quos concordare per Manassæ legationem diximus, illuc rupta pace profecti sunt, & contra nos quidpiam dicere volunt, recipiendum non est: quia tunc temporis nec familiares mei erant, nec Canonici, ita ut de vita mea testimonium ferre possent.

Ceterum quod me paratum cum sex Episcopis ire monuistis, in tanta nobis hoc temporis angustia constrinxistis, ut soli viginti dies numerarentur ab illo die, quo mihi delatæ sunt litteræ vestræ, usque ad illum, quo, si proficisceremur, debeamus movere. In sacris vero auctoritatibus fixum habetur, quod si quis inferioris ordinis clericus, nedum Episcopus, de crimine aliquo pulsatur; aut annum integrum, aut dimidium; aut simul integrum & dimidium induciarum habere debeat, quo sibi in tanto spatio providere & prospicere valeat. Vos autem hoc vel majori, vel minori induciarum spatio intermisso, hoc a nobis exigitis in viginti tantum dierum circulo: cum nostri Episcopatus non, sicut circa Romam, vel in quibusdam regionibus, intra septimum vel decimum milliarium coarcentur; sed plures ex eis quadraginta, & quinquaginta, vel etiam sexaginta milliariis & eo amplius ab invicem separentur. Ut ergo de anno vel dimidio taceatur, quo quibuslibet pulsatis crimine legitimæ induciæ a sacra auctoritate donantur; quo-

modo in viginti diebus sex Episcopi patriæ nostræ , & maxime qui non notentur infamia , valeant colligi : cum in totidem diebus de uno ad alium vix queat ambulari ?

Jam vero de ipsis Episcopis, quorum vita non notetur infamia, quid dicemus ? cum etiam Dominum nostrum Jesum-Christum voracem & potatorem vini, & publicanorum & peccatorum amicum, & dæmonium habentem appellatum fuisse noverimus. Quis, inquam, tam sanctus fuit, tamque perfectus, qui non aliquando a quolibet maledico alicujus infamiæ nota sit appetitus ? Non possumus animadvertere, quo pacto hujus sanctitatis sex Episcopos valeamus colligere ; nisi sanctos patres, Remigium, Martinum, Julianum, Germanum, Hilarium, Dionysium contingat a sepulcris exsurgere. Si iusta monitio esset, & plane tantum sex Episcopos, quales apud nos habemus, adhiberi exposceret ; omni modo eos in tam modico tempore congregare impossibile esset. Et quid dicemus de illa impossibilitate, qua non nisi ab omni nota infamiæ alienos jubemur exquirere ? Pro certo dicimus & firmamus, quod hæc monitio vestra, quæ talia nobis injungit, eadem pro sui impossibilitate canonicam excusationem nobis adducit. Non enim impossibilitatem tantum prædicta monitio, sed etiam quiddam stupendum nobis ingerit : dum primo si accusatores desint, deinde sex Episcopos, tum qui non notentur infamia, ut exhibeamus imponit. Si enim absentibus accusatoribus sex clericos solummodo adhibere queramur ; inauditum est : si sex episcopos, mirabile dictu est : si & sex episcopos, & tales qui non notentur infamia, & sine accusatoribus a nobis exposcatîs, sicut facitis, hoc a sæculis auditum non est.

Quod vero dicitis, infamiam nostram Galliam, Italiamque repleisse ; & propter hæc cum sex episcopis ; qui non notentur infamia, me ad purgandum debere paratum esse : omnino dicimus, quod accusatores quidem nostri, & illi qui nos temere tractaverant, ipsi Galliam & Italiam infamia nobis injuste imposita replere voluerant. Sed nos Romam pergendo, & quod temere actum fuerat destruendo, Galliam & Italiam infamia vacuavimus, & quidquid ab eis diffamatum fuerat annullando penitus, ne hoc infamia vel esset, vel veraciter dici posset, Domino juvante effecimus. Quod inquam dicitis, ut etiam si accusatores desint, me debeam cum tot & talibus, & tam brevi spatio perquisitis testibus expurgare : cur ego si etiam infamia

- esset, cum re vera non sit, hoc absentibus accusatoribus de
beam agere? Nonne docemur in canonibus & decretis, nul-
lam causam criminalem inter episcopos & clericos sine legiti-
mis accusatoribus debere finiri? Quid fiet de illo decreto sanc-
ti papæ & martyris Evaristi: Ut mala audita nullum moveant;
nec passim dicta, absque certa probatione quisque umquam
credat? Quid? quod Dominus Judam furem esse sciebat, &
quia non est accusatus, ideo non est ejectus, sed permansit in
Apostolatu? Ait enim beatus papa Euticianus de non com-
mutandis sanctorum Patrum auctoritatibus: Prohibemus ut
nullæ causæ ab ecclesiasticis iudicibus audiantur quæ legibus
non continentur, vel quæ prohibitæ esse noscuntur.

Est & alia ratio excusationis, quod etiam si justum esset sex
Episcoporum testimonium in tam brevi spatio adhiberi, &
hoc ab aliis Archiepiscopis vel Episcopis quæreretur; à me
tamen quærere non debeatis: pro eo quod plures ex suffra-
ganeis nostris Episcopis tunc temporis, vellent nollent, inter-
fuerunt in illa violentia, quæ in nos tunc gesta, Romæ fuit;
ut diximus, infirmata. De quibus etsi certum est quod nobis
ad testimonium præsto essent, si eos & ratio canonum adhi-
beri exposceret, & temporis plenitudo ad congregandum
sufficeret: tamen & vobis, & multis disconveniens esse videtur,
eisdem hic nunc socios & testes adjungere, quos tunc illuc
vobiscum quomodocumque contigerit interfuisse.

Sed jam postquam de his satis pro tempore diximus, dignum
est ut ad sponsonem, quam domno Apostolico nos fecisse su-
pra diximus, redeamus. Ea fuit hujusmodi, quod ego ad
Concilium in partibus Galliarum, vel Nuntio, vel litteris Sedis
apostolicæ vocatus venirem, nisi canonica excusatione præ-
peditus essem: & quod in ipsis partibus Concilia apostolica
fieri non perturbarem. Quod dictum est, in partibus Galliarum,
nullus æstimare debet de omni parte citra montes Alpium esse
dictum. Hoc enim satis potestis conjicere, quia ubi de non
perturbandis conciliis in partibus Galliarum quæsitum est,
non nisi de illis partibus, in quibus juvare & nocere possemus,
dictum est. Ubi autem nos juvare posse creditis aut nocere;
nisi in regno Franciæ? Quid enim vel apud Lugdunum, vel
alibi extra regnum Francorum perturbatio nostra posset, ubi
nec Regis nostri, nec nostra cognitio aut reverentia ulla viget?
Quapropter si vultis, satis cognoscitis, quod de illis Galliarum

partibus sine dubio dictum est, ubi regnum Franciæ situm est.

Quod verò nos ad Concilium venire, nisi canonica excusatione præpeditos, promissimus; paulo superius diximus, quia ad hæc non unam, sed plures excusationes canonicas haberemus. Hoc jam quasi recapitulando probabimus. Quandoquidem enim ipsum concilium in ipsa provincia, & ab ipsis geritur, ubi & à quibus quondam in nos violenter ac temere res gesta est; sicut etiam æquitas Romana testata est, ne ad illud eamus, canonica excusatio est. Quando locus ipse nec nobis proximus, nec testibus producendis facilis est, canonica excusatio est. Quando locum propter bellorum tempestates sine periculo salutis & libertatis adiri non potest, canonica excusatio est. Quando dominus Abbas Cluniacensis, qui nos post dominum Apostolicum judicare debet, abest, canonica excusatio est. Quando intra viginti dies, sex Episcopos congregare, & nobiscum ducere jubemur, quod in tam brevi spatio impossibile est, canonica excusatio est. Quando eos tales, quorum vita non notetur infamia, adhibere monemur, quo nihil impossibilius est; canonica excusatio est. Quando eosdem Episcopos, etiam si accusatores desint, paratos habere præcipimur, quod nusquam in sacris auctoritatibus invenitur, canonica excusatio est. Constat ergo si ad Lugdunense concilium non venimus; in nullo sponfionis prædictæ prævaricatores existimus, dum tot canonicas excusationes habemus.

Ceterum scire vos volumus, quod si quis sophisticè loquens, aliquam ex his excusationibus voluerit infirmare; noveritis pro certo, quod nos illas, quæ majoris sunt auctoritatis, & infirmari non possunt, admittimus & tenemus. Quamvis vero nos apud vos canonice excusaverimus, quasi subjectionis vobis debitores simus; tamen evidenti ratione ostendere possumus, quia etiam si canonicæ excusationes aliter nobis non adessent, non tamen ad vestrum Placitum proficisci ullatenus deberemus. Quod enim vobis, pace vestra, dicere liceat; etsi aliis Nuntius apostolicæ Sedis estis, nobis tamen non estis: propter quod neque vos habetis nos ad concilium evocare, neque nos ad vocationem vestram, si nolumus, habemus venire. Quod jam subsequenti declarabitur ratione. Post diffinitam etenim Romæ & solutam Placiti nostri quæstionem, audientibus & videntibus Archiepiscopis, Episcopis, & clericis Fran-

ciæ, præsentibus etiam clericis qui hic præsenteshabentur; dominus Papa laudavit, ut vobis in nullo, si nollem, amplius subjicerer; sed domino abbati Cluniacensi per omnia subditus essem. Postea mihi præcepit, & etiam vellem nollem, sibi spondi, quatenus si a Nuntio suo vocatus essem, nisi canonica excusatione præpeditus essem, pro hac causa iterum ad concilium irem. Et quoniam in nostra promissione de Nuntio suo, quasi indefinite, mentionem fecit, & ad nostram vocationem faciendam vos quasi non excepit: quod & fecit, quando priusquam promissio fieret, prælationem nostram a vestra subjectione removit, putans ad eandem vocationem ea de causa vos inter alios Nuntios debere computari, quod non procedit. Nam si nos, ut superius dixi, priusquam promissio fieret, dominus Papa a vestra subjectione removit, iterum vos admittere non potuit: quoniam, si sic fieret, profecto se ipsum impugnet; & quod audiente concilio juste laudavit, injuste destrueret: & ut amplius loquar, injuste, quod absit, judicaret. Etenim in decretis Pontificum legitur, quod si aliquis Legatus, ut Zacharias & Rodoaldus, ut Vitalis & Misenus, super aliquem injuste judicaverint; præjudicatus præjudicantis amplius non debet subdi iudicio: & vocatio qua dominus Papa se ipsum impugnet, quæque falsitatis, temeritatis & inconstantiæ possit argui, possit etiam falsi (quod absit) laudari iudicio; nec laudanda, nec recipienda est. Et ideo quamdiu dominus Abbas Cluniacensis defuerit, & quamdiu dominus Papa ut vobis obediam, nec mihi loquendo, nec litteris præcipiendo jusserit, etiam si canonica excusatio, sicut superius multis modis est ostensum, defuerit; tamen hæc ratio sola sufficere deberet; & ut altius loquar, deberet sufficere tum pro reverentia summi Pontificis, tum pro honore suo, si eum diligitis. Nam scriptum est: Servus nec diligit, nec reveretur dominum, quem facit esse contemptibilem in conspectu omnium.

At vero quamvis ita prosecuti sumus, quod nobis causa observatæ veritatis concedendum est, licet juxta prædictam rationem vobis respondere non debeamus; tamen propter reverentiam domini Papæ aliam vobis rationem ostendere nobis visum est. Etenim ne forte judicia ecclesiastica diffugere videamur, ne forte pertinaces esse, & mandata apostolica perturbare velle putemur: sciatis quod non pertinaces in hoc existimus, nec concilia fieri prohibemus: sed potius ut in Fran-

cia concilium celebrare nobis cooperantibus veniatis , offerimus , & locum nobis proximum , sicut a sacra auctoritate jubemur,eligimus.Offerimus,inquam,hoc ex parte nostra & Regis nostri,vel proQuadragesima,vel post Pascha in Franciam veniatis causa concilii : & ego & coepiscopi nostri vobis occurrentes, sanum & incolumem vos deducemus in domibus & cameris nostris, & cum honore Legatis Sedis apostolicæ congruente suscipiemus,& cum omni abundantia procurabimus. Locum nobis proximum eligimus,si vultis,apud nos Remis,si vultis Sueffionis, vel Compendii, vel Silvanectis : & in quocumque horum vobis videbitur concilium vos tenere , Rege quoque nostro cooperante juvabimus , & quod vobis debebimus facere , faciemus.

Ecce coram isto Concilio cum caritate & humilitate vos precamur , & si attendere vultis consilium utile vobis damus, ut libram moderaminis erga nos teneatis ; nec modum ac rationem excedere affectantes, pondus, quod nec nos , nec patres nostri portare consuevimus,super nos imponere appetatis. Melius est ut mitius agendo , & justitiam non excedendo, Romanæ ecclesiæ commodum & honorem per Franciam adquiratis , quam exasperando Franciam , ejus justitiam & subjectionem Romanæ ecclesiæ impediatis. Quod si in pertinacia vestra, sicuti domno Papæ iisdem verbis mandavimus , permanere disposueritis ; & pro sola voluntate vestra , nos vel suspendere , vel excommunicare volueritis : ostensa est nobis via quam sequamur , apposita forma cui imprimamur. Sequar verba beati Gregorij, qui dicit : Sæpe in ligandis ac solvendis subditis suæ voluntatis motus , non autem causarum merita sequitur Pastor. Unde fit, ut & ipsa ligandi ac solvendi potestate se priver, qui hanc non pro subditorum meritis , sed pro suæ voluntatis motibus exercet. Unde per Prophetam dicitur : *Mortificabunt animas quæ non moriuntur, & vivificabunt animas quæ non vivunt.* Ait etiam beatus Augustinus in libro de verbis Domini : Vide utrum juste, an injuste obliges fratrem tuum , quoniam injusta vincula disrumpit justitia. Afferam etiam , quod si me excommunicaveritis , deerit privilegium Petri & domni Papæ , id est , potestas ligandi atque solvendi. Unde Leo Magnus in sermone de anniversario suo sic ait : Manet Petri privilegium, ubicumque ex ejus æquitate fertur judicium. Ex quibus verbis aperte colligitur , quia non manet Petri privilegium , ubicumque ex ejus æquitate non fertur judicium.

EPISTOLA NOVIOMENSIUM CLERICORUM AD CAMERACENSES,

De filiis Clericorum ad sacros Ordines admittendis.

SANCTÆ CAMERACENSIS ECCLESIAE FRATRIBUS IN CHRISTO DILECTIS, NOVIOMENSES, MELIUS SPERARE IN ADVERSA, & SALVA FIDE VIRILITER RESISTERE EMERGENTIBUS ADVERSARIIS. ORATIONIS NOSTRÆ PROLIXITATEM, FRATRES CARISSIMI, CASTIGANTES PROUT POTUIMUS; QUÆSTIONI VESTRÆ PLURA QUAM SATIS EST, REPONERE NON NECESSARIUM DUXIMUS: PRÆSEPTIM CUM ECCLESIAE VESTRÆ STATUS MODUM ANTIQUITATIS HUC USQUE SIBI RETINUERIT, & COLUMNIS SAPIENTIAE SUBNIXUS, IN SEIPSO CONSISTENS, ALIENIS SUSTENTATIONIBUS NON INDIGENS, NULLIS TENTATIONIBUS VIOLARI POTUERIT. FUNDAMENTUM ENIM QUOD IPSE APOSTOLUS POSUIT, A SOLIDITATE SUA NON POTEST MUTARI, APOSTOLO ATTESTANTE QUI AIT: *Fundamentum aliud nemo potest ponere, præter id quod positum est, quod est Christus Iesus.* Quantumlibet itaque ruant venti & fluant flumina, domus superædificata immobilis manet, videlicet sancta Ecclesia, inter turbines hujus sæculi constituta. Ecce jam valida tempestas incumbit: ad defendendam libertatem parata sunt arma in propugnaculis, sacrae scilicet Scripturae, quibus facile obtunditur gravitas novæ impositionis, partem quarum prælibastis, partem habemus suggerere vobis. si quidem contra illud quod filios clericorum a sacris Ordinibus repellendos esse moliuntur, in expositione generationis Jesu-Christi ita scriptum invenitur. Dominus noster

„ Jesus-Christus non solum ab alienigenis, sed etiam de adulterinis voluit nasci commixtionibus, nobis magnam fiduciam

„ præstans, ut qualicumque modo nascamur, tantum ut illius

„ vestigia imitemur, ab illius corpore non separemur, cujus per

„ fidem membra effecti sumus. Et sicut ille verus est Pontifex, ex adulterinis nascens commixtionibus, ita qualicumque ordine natus sit aliquis, tantum ut perfectam fidem habeat, & quod fide tenet, operibus impleat; sitque litteratus & vir unius uxoris, nequaquam a sacerdotio repellatur. Judas enim patriarcha concubuit cum Thamar nuru sua, & ex illo coitu nati sunt Phares & Zara, Inde postea Salmo, qui fuit dux in deserto

deserto ; inde Obed ex Ruth , indeque Boos de Rahab ; inde postea Isaï , qui fuit pater David. In nulla verò progenie origo Domini ducitur , qui est verus sacerdos : ideoque filii ejus sumus , & quæ ipse fecit , imitari per omnia debemus. Ipse quoque Dominus in Evangelio ait : *Omniem qui venit ad me non ejiciam foras.* item de eodem : *Omnis qui facit voluntatem Patris mei qui in calis est , ipse meus frater , soror & mater est.* Ad confirmandam verò evangelicam doctrinam Victor Papa in epistola Afris directâ dicit : Nulli liceat evangelicam doctrinam deferere , & sacerdotali honore congruere. Nihil quippe prodest hominibus legem , quæ per servos data est , defendere , qui gratiam Evangelii , quæ per Filium facta est , noluerunt recipere. Callistus quoque Papa in decretis ait : Sententiam , fratres , quæ misericordiam vetat , non solum tenere , sed & audire refugite : quia potior est misericordia omnibus holocaustis & sacrificiis. Et Vigilius Papa : Certe etiam si mens sit recti conscientia , vindicta digna est , qui alii existit causa periculi. Et in Concilio Anchiritano cap. x de conjugatis Diaconis ita reperitur : Diaconus cum ordinatur , si in ipsâ ordinatione protestatus fuerit dicens , velle se habere uxorem , nec posse se continere ; hic postea si ad nuptias venerit , maneat in ministerio , &c. Quod autem filius non reprobandus sit propter iniquitatem patris , Dominus per Prophetam protestatur dicens : *Filius non portabit iniquitatem patris , & pater non portabis iniquitatem filii.* Gregorius in Pastoralis de excellentia Pastorum : Plerumque rector oblitus sui , in voce se spargit aliena. Talem se credit , qualem se foris audit , non qualem intus discernere debuit : subiectos despicit , eosque æquales sibi naturæ ordine non agnoscit ; & quos sorte potestatis excesserit , transcendisse etiam vitæ meritis credit. Porro ne quis in Ecclesia duplici potiatur honore , & ut una tantum quisque contentus vivat præbenda , nulla nobis aperit ratio : cum sub religiosis Patribus in clericali ordine talis semper usitata fuerit consuetudo , quæ & singulis ecclesiis salva fide conceditur ab introeunte Episcopo. Cujus consuetudinis licitum Gregorius commendat in epistola ad Leandrum Spalensem episcopum dicens : Illæsa una fide , in divino officio sanctæ Ecclesiæ consuetudo diversa est. Et beatus Augustinus de consuetudinibus ad Januarium inter cetera dicit : Ea quæ in diversis locis & regionibus multipliciter sunt instituta , & contra fidem & bonos mores non esse probantur ,

130 EPISTOLA NOVIOMENSIIUM CLERIC.

- indifferentem habenda sunt, & consuetudine uniuscujusque
ecclesiæ congruenter & simpliciter observanda : nec quid-
quam aliud in eis requirendum. Et ut ad rem reducamus stilum,
miramur valde, cum ad præterita sive præsentia retorquemus
oculum. Longe enim ante nos audivimus, & nos ipsi cognovi-
mus, quosdam ex filiis concubinarum fuisse religiosos presbyte-
ros & diaconos, venerabiles quoque Episcopos & Abbates,
insuper etiam Christianissimos Reges, necnon ipsius Romanæ
Sedis aliquos summos Præsules. Quocirca non immerito sto-
machamur adversus eos, qui ad id destruendum, linguam suam
quasi arcum intendunt : cum satis noverimus illos non melio-
res esse, quam sui antecessores fuerunt. Adhuc multa ad ea quæ
nobis obijciuntur, necessaria habemus vobis dicere : sed quæ-
dam nobis obstant causæ, quarum una est expectatio Archi-
episcopi nostri Manassæ, cujus excommunicatio fertur potius
per invidiam, quam per justitiam nimium accelerata fuisse.

ADMONITIO IN SEQUEM Historiam Belli sacri.

Subsequens liber de sacra expeditione Ierosolymitana absque
auctoris nomine habetur in Casinensi bibliotheca. Hunc librum
vidit, atque in compendium redegit auctor ille, qui primo loco inter
Gesta Dei per Francos editus est : at multa singularia prætermisit,
quæ in libro sequenti referuntur, ex quibus nonnulla in fine ob-
servabimus. Rerum testis oculatus fuit, quisquis est hic auctor,
nec propter epitomatores visus est prætermittendus. Hunc quidam
existimant non alium esse à Gregorio Tarracineni episcopo, qui
versus de transitu Peregrinorum ad Sepulcrum Domini &
captione Ierosolymitanæ urbis rogatu Bernardi Valvensis pul-
cherrimos fecit, testante Petro Diacono in libello de viris illu-
stribus Casinensibus cap. XXXII. Verum Francum aut Normannum
auctorem, & quidem laicum fuisse, veri similia probant argu-
menta. Militabat sub Stephano Comite Carnotensi apud Antiochiam
ex num. LXXVI. Erat, inquit, caput nostrum, quem omnes
nostri majores elegerant, ut esset nostrorum ductor, nempe
ad defendendam Antiochiam, cujus obsidioni & expugnationi au-
ctor interfuit. Laicum se prædit his verbis num. LXXXI. Episcopi
nostri, & presbyteri, & clerici, & monachi, sacris vestibus in-

duti, exhibant cum crucibus, orantes & deprecantes Deum, ut nos custodiret & eriperet ab omni periculo. *Vocabula quedam & certi loquendi modi Francum arguunt, montanæ passim, diabolica montanea, minutæ gentes pro infima plebe, & alia id genus. Nonnulla tamen dicit de Francis num. 111. quæ cum erga illos non ita bene affectum probant, nempe quod Francigenæ erant tumidi superbia. Et erant apud Antiochiam sub Stephano non tantum Franci, sed etiam populi aliarum nationum. Penes alios esto hæc de re iudicium. Lombardos a Longobardis non uno in loco distinguit. Narratio desinit in expugnatione Ierosolymorum & Tortosa, & in morte Boamundi Principis Antiocheni, quæ anno centesimo supra millesimum accidit.*

Huic historia ex bibliotheca Christina regina subijcimus Stephani Comitæ Carnotensis epistolam ejusdem argumenti ad Adelam uxorem suam: ad quam alia ejusdem exstat epistola in Spicilegii tomo IV. pag. 257. Quod Stephanus de Alexio C. P. Imperatore scribit, longe aliud de eo iudicium, quam alii scriptores, ingerit. Animus erat hic subijcere acta ecclesiæ sancti Sepulcri, quæ expugnata Ierosolymorum civitate, Canonicis regularibus tradita est. Verum hæc in aliud tempus remittere satius postea duximus.

IN-CIPIT HISTORIA DE VIA

Hierusolymis, qualiter recuperata sit, qualiterque etiam Antiochia, & eadem Ierusalem ab invasione Gentilium per fideles Christi liberata fuerint.

TEmpore, quo Alexius imperii Constantinopolitani regabat habenas, quo & beatæ recordationis Urbanus Papa secundus Romanæ ecclesiæ pontificium administrabat; fuit quidam eremi accola in Galliarum regione, Petrus nomine, vir quidem summæ religionis, sanctisque deditus actibus, ac omnis vitæ hujus extremitate contentus, cujus nimirum color penitus incultus erat, spiritus fervens, pedes nudi, statura brevis, facies macilenta, tegimen vilissima cappa: qui non equi, non muli, mulæve, sed asini tantum vehiculo, quocumque pergebat, utebatur. Qui desiderio videndi Sepulcrum Domini valde accensus, post multos prolixi itineris labores, Ierusalem tandem oraturus advenit. Erat autem Ierusalem illis diebus, nescitur quo Dei iudicio, Gentilium, id est Sarrace-

norum, subiecta dominio, unde & idem Sepulcrum, ceteraque sacra loca sub omni contemptu ab ipsis male tractata habebantur. Nam & templum Domini in eorum mahumeriam versum erat, & stabula equorum secus ejusdem Sepulcri basilicam impie statuebantur. Hanc quoque tam magnam irreverentiam circa ipsa sacra loca habitam cum Petrus prædictus facta oratione conspexisset, ingemuit valde, atque ex intimo cordis trahens longa suspiria, multas etiam lacrymas ab oculis effudisse perhibetur.

Factum est autem cum nocturnæ quietis tempus redisset, Petrus consuete naturæ membra dedit. Qui etiam in visu Jesum-Christum Dominum vidit talia dicentem sibi: Petre, surge citiusque revertere, Urbanum Papam aditurus: cui ex mei parte dicatur, quatinus fratres meos cunctos commovens, eis præcipiat, ut huc quantocius properantes, & Jerusalem, immo meum Sepulcrum à profanæ gentis hujus invasione atque spurcitia, aliaque sacra loca per circuitum, me quoque adjuvante liberare festinent. Nam & regni cælestis janua mei amore venturis ad istud peragendum nunc omnibus patet. Qui consurgens, iætus de tanta sibi divinitus revelatione ostensa effectus est. Deinde precibus ad Sepulcrum iterum fuis, sine dilatione remeavit, Papam prædictum adiens, eique secundum quod per visum audierat cuncta narravit. Qui audiens quod ei cælitus delegatum fuerat, gaudio magno exçipit, satagens implere quod etiam corde jam ipse agendum sæpius tractaverat. Erat & ipse, secundum quod decebat tanti culminis honorem, statura vultuque elegantissimus, sermone luculentissimus, sapientia excellentissimus; necnon religione præcipuus.

Igitur præparatis omnibus, quæ itineri necessaria erant, montes alpinos transivit: veniensque in Arvernæ provinciam, ibi apud Clarum montem oppidum, Archiepiscoporum, Abbatum, clericorum, cum innumerabili populo undique concurrentium, Concilium celebravit: cui videlicet sancto conventui non virorum illustrium, non magnatum, nec etiam Comitum concursus defuit. Sanctus vero Papa Urbanus eidem sancto Concilio præsidens, post nonnullas institutiones ecclesiasticas, quas Spiritu-sancto dictante promulgaverat; divinæ jussionis sibi destinatæ non inimemor instituit atque præcepit, ut milites & pedites, quicumque scilicet ire possent ad Jerusalem, aliasque Asiæ ecclesias, à paganorum potestate eruendas.

pro Dei amore, omniumque remissione peccatorum sibi adipiscenda unanimes arma gerentes pergerent: atque in eorum bonis, usque ad reditum ipsorum, securitatis pacem continuam haberi decrevit. simulque etiam disposuit, ut cuncti illuc euntes, signum crucis in scapulis re aliqua vestimentis impressum, seu in fronte gestarent, quo tanti itineris religionem atque peregrinationem aliis cernentibus ostendentes, ab aliquo non impedirentur. Tunc universi qui aderant, tam bonum & desiderabile edictum percipientes, voces ad aera ovantes attollunt, unanimiter clamantes sæpiusque repetentes: *Deus illud vult, Deus illud vult, Deus illud vult.*

Igitur Gottifredus Dux Lothariæ, Robertus Comes Normanniæ, Ugo Magnus Comes, frater Philippi Francorum Regis, Stephanus Comes Blesensis, Raynaldus sancti Ægidii Comes, atque Robertus Comes Flandrensis, hujuscemodi rem ab Apostolico dispositam percipientes, divinitus mox afflati, uno animo unaque voluntate ad eripiendam Jerusalem & sepulcrum Domini simul ire disponunt: sub quibus militum, & peditum tanta fuit coadunatio, ut arenæ, quæ est in litore maris, comparari possent. Verum quia de tot tantisque Proceribus mentio habita est, debemus & ipsorum genealogiam exprimere, & singulorum mores annotare.

Dux Gottifredus, Eustachii Boloniæ civitatis comitis filius existit: cujus nobilitas virtutibus cumulata; tam in sæcularibus, quam in divinis rebus excelluit. Divinis quidem, quia largus erga pauperes, erga delinquentes vero misericors fuit: porro humilitate, mansuetudine, sobrietate, justitia, castitate insignis, potius monachorum lux, quam militum dux putabatur. Ex his vero, quæ sæculi sunt, non minus noverat agere, videlicet præliari, ordinare militum acies, armis gloriam propagare. Primus autem in primis ferire hostem adolescens didicit, juvenis assuevit, vir postea factus id numquam agere destitit.

Sequitur Robertus Normanniæ Comes, qui Guilielmi Expugnatoris, & Regis Anglorum filius fuit, genere, divitiis, facundia quoque non secundus duci Gottifredo, sed superior; par illius in his quæ sæculi sunt, & in his quæ Dei, minor. Cujus pietas largitasque valde fuisset laudabilis: sed quia ipse in utrisque modum non tenuit, in utrisque erravit. Siquidem misericordia ejus ita vigore justitiæ penitus carebat, ut raptorum impunita malignitas per totam Normanniam, nec Deo,

nec homini parceret. Quapropter nullus vinctus in conspectu ipsius lacrymabatur, quin ipse mente solutus continuo in mutuas lacrymas effunderetur. Largitate autem in tantum diffusus erat, ut accipitrem sive canem pro nullo quantovis ære dimitteret, quin compararet: cum interim unicum haberet supplementum, rapinarum scilicet consensus. qui tamen hæc dum intra patriam esset exercuit, verum fines patrios egressus à tam nefando luxu perdomitus est, cui ante per magnarum opum affluentiam succubuit.

Ugo Magnus, Comes, filius Henrici regis Franciæ, frater Philippi regis ejusdem Franciæ, fuit magnus genere, magnus cognomine, magnus probitate, magnus etiam & potens in præliis; venerabilior tamen regii sanguinis gloria, quam aut opum ubertate, aut præcellenti multitudine, aut triumphalibus meritis.

Denique Blesensis Comes, Stephanus nomine, & ipse Regum proximus fuit, videlicet Gallorum pronepos, & gener Anglicorum. cujus largitas si hilaritate, aut audaciæ fervore illustraretur, & ad Ducatus culmen, & ad strenuissimum militem omnino sufficeret.

Sequitur hunc Robertus Comes, Flandriæ scilicet, nutricis equitum, feracis equorum, tritici, atque pabulorum: qui puellarum quoque decoritate præcellens, reges generos, id est Gallicum, Anglicum, & Dacum meruit habere. Quorum quidem affinitate Comes ipse sublimis, populare regimen amministrare dedignabatur, dum ipse super omnes exercituum rectores in ense & lancea laudari gestiret. Unde postea contigit, ut ipse quidem multo plus ceteris ducibus celebraretur habere famam, neglectaque regiminis cura multo minus de duce...

Subsequitur Raymundus, Comes sancti Ægidii, divitiis, potentia, consilio militari, multitudine non illis minor. Nam in his omnibus à primordio inter ceteros claruit, & cum mox aliorum defecisset pecunia, hujus semper affluerunt divitiæ. Illa nimirum gens, id est Provincialium, non prodiga, paritati potius, quam laudis famæ serviebat: quæ quoque exemplo aliorum territa, non sicut Franci in distrahendo, sed semper in augendo substantiam desudabat. Quam ob rem populus ipse præsciis futurorum, non permisit suum egere Comitem, unum quidem æquitatis cultorem, iniquitatis ultorem: qui etiam ad timidos se velut agnum, ad tumidos autem tamquam leonem ostendebat.

In hoc autem loco Boamundi genealogia exprimenda est. sed quia de eo ejusque genere paulo inferius in loco suo recitandum est, præpoiterum esse hic eam memorari videtur. Verum quia à serie narrationis longiuscule digressi sumus, nunc ubi dimisimus, redeamus. Igitur prædicti Principes, cum in animo, sicut superius dictum est, Jerusalem petere proposuissent; antequam moverentur à prædicto Papa, quidam illorum quaesierunt, ut simul cum eis in ipso itinere pergeret. quibus ipse respondit: Ego, inquit, ad præsens vobiscum hoc iter agere nequeo, quoniam pluribus ecclesiasticis negotiis explendis, quæ nunc evitare perniciosum est, operam dare prius oportebat. Quibus expletis, si vita comes non defuerit, Deusque deinde facultatem eundi dederit, vos vere subsequi, vobisque in partibus illis adesse in animo propositum habeo. At illi his auditis unanimiter petierunt, quatinus vel quemlibet, qui vice sua in his, quæ Dei salutisque animarum ipsorum essent, illis præset, præordinare curaret. Sanctus ergo Apostolicus dignam illorum petitionem exaudiens, Episcopum Podiensem, virum æque tam in divinis, quam in sæcularibus rebus prudentissimum, simulque religione præcipuum, eis præfecit, dans illi potestatem, ut sua vice eis præsidens, illorum curas ageret. Post hæc autem prædicti Principes tempus statutum, quando se moturi essent, sitienter præstolabantur, quorum exercituum numerus, ut dictum est, velut arena in litore comprehendi nequiverat.

Hoc in tempore Boamundus, Roberti Guiscardi Ducis Apuliæ filius primogenitus, vir quidem paternæ virtutis strenuissimus æmulator, atque à tempore ejusdem patris militaribus exercitiis probatissimus, in eadem Apulia, videlicet Barensis, Tarentinis, Ydruntinis, aliisque quam pluribus maritimis terraneisque urbibus, ex successione hereditaria principabatur. Nam Rogerius frater ejus ex solo patre, patre ipso obeunte, Ducatum acceperat. Hic audiens Jerusalem iter à summo Pontifice constitutum esse, atque ad liberandum Sepulcrum Domini, ceteraque sacra loca ab infidelium jugo prædictos Principes ultramontanos se esse moturos, lætus effectus, cum eis & ipse simul properare pro divino amore armatur. De quo fertur, quod aliquando, patre adhuc vivente, tantæ strenuitatis existit, ut imperatorem Alexium bis in fugam ire coegit, primo quidem in oculis ejusdem patris sub Dyrachii mœnibus: secundo

autem apud Larissam urbem, dum iidem pater Romam ad succurrendum Gregorio Papæ, qui ab Henrico rege Teutonico obsidebatur, petiit.

* *al* Marchisus.

Igitur ceteri circumquaque, de prope videlicet & de longe, cognoscentes Boamundum Jerusalem iturum, sine numero ei adhæserunt, dominum illum ac rectorem super se habere in tanto itinere affectantes. Adhæsit & ei quidam exadelfus suus, Tancredus nomine, nepos ejusdem patris Roberti Ducis, ex sorore sua nomine Emma genitus, à patre quidem, qui * Marchusus dictus est, non ignobilis filius; à matris autem fratribus nepos longe sublimior. Qui videlicet fratres patriam, id est Normanniam, egressi, gloriam suæ militiæ in Italia extulerunt. Quis enim Roberti Guiscardi vires non probet? qui Calabriam, & Apuliam, Siciliamque bellando sibi subjecit: cujus etiam victricia arma post sub uno, ut aiunt, die Alemannorum Rex Henricus, Græcorum Imperator Alexius tremuerunt.

Romam namque præsens ab ipso Alemannorum Rege eripuit: Græcorum autem Imperatorem per Boamundum filium suum bellicosissimum superavit: reliqui verò fratres, octo numero, Campaniam, Apuliam, Calabriam, debellavere. Excipiendus est Rogerius Siciliensis Comes, qui subacta gentilitate. Siciliæ gloriam super fratres suos adeptus est, scilicet a præfato Roberto Guiscardo secundam.

Nunc redeamus ad Tancredum ipsum, quem nec paternæ opes ad lasciviam, nec ad superbiam cognatorum suorum potentia traxit. qui dum adhuc adolescens esset, juvenes agilitate armorum, morumque gravitate senes transcendens, nunc his, nunc illis de se novum virtutis spectaculum præbebat. In adolescentia vero præceptorum Dei sedulus auditor, summo-pere studebat & audita recolligere, & recollecta opere implere. Nemini detrahebat, etiam cum sibi detrahebatur: immo aiebat hostem magis esse feriendum, quam rodendum. De se autem ipse nihil dicere cupiebat: at dici ab alio insatiabiliter sitiebat. Proinde somnos vigiliis, quietem labori, satietatem fami, otium studio, postremo superflua omnia necessariis postponerebat. Sola namque laudis gloria juvenis mentem agitabat: nihil esse crebri vulneris jacturam ducebat, dum glorias cotidianas adipisci malebat. Hunc ergo sibi Boamundus diligenter asciscens, cunctæ suæ expeditioni, cum movenda esset, pro ejus magnifica strenuitate atque virtute præposuit. Dumque omnia

quæ

quæ itineri necessaria erant præpararentur, interim adven-
tum illorum, qui superius dicti sunt, Principum inbianter præ-
stolabatur, quatinus se cum eis conjungens trans mare simul
incederet.

INCIPIT PROLOGUS IN HISTORIA

*Peregrinorum euntium Ierusalymam ad liberandum
sanctum Sepulcrum de potestate Ethnicorum.*

IN nomine Jesu, qui est Verbum & Sapientia Dei Patris,
dicamus ejus miranda gesta & fortia facta, qui dum esset
in nostra carne dixit: *Qui reliquerit domum, patrem, matrem,
fratres, & sorores, uxorem, & filios, agros, & vineas propter
nomen meum, centuplum accipiet, & vitam aternam possidebit.* Et,
*Qui vult post me venire, abneget semetipsum, & tollat crucem suam
cotidie, & sequatur me.* Hanc vocem audientes, & hujus jussu
implere cupientes sancti Peregrini ex omnibus partibus mundi,
primitus ab occidentali plaga, deinde à meridiana, & sep-
temtrionale, demum vero, & ab orientali tam magnam fece-
runt commotionem, adjuvante & faciente ipso Domino, ut
nullus sensus excogitare, nulla lingua, etiamsi ferrea esset,
ad plenum valeret enarrare. Sed quia, ut ait Scriptura, se-
cretum Regis celare, opera autem Dei enarrare honorificum
est; si ex toto silet lingua carnis, & quamvis non ad plenum,
sed vel aliquantulum exinde non dicet, pigritia & negligen-
tia est, & in peccatum deputabitur, ut ait Sedulius:

Cum sua gentiles studeant fragmenta poëta,

Grandisonis pompare modis tragicoque boatu:

cur nos famuli Christi tacemus tam mira facta Christi? quia
si ipse non fecisset, numquam ab hominibus fieri potuissent.
Nunc revertamur ad priorem sensum. In eodem collegio
abierunt Archiepiscopi, Episcopi, Abbates, & omnis Eccle-
siæ gradus: in eodem exercitu abierunt Reges, Principes,
Præfecti, Marchiones, Duces, Comites, & omnis gradus
secularium, & vulgus tam maximum virorum & mulierum, ut
nemo nisi a Deo scire possit. Sed non insimul ibant: quia
nullus cogeatur, nisi quorum corda ipse Deustangebatur, &
sicut erant omnes viæ, & omnia loca plena vivorum euntium,
ita plenæ omnes viæ sepulcris sanctorum Peregrinorum erant,
habentes fixas cruces ad capita. Et non solum spatia terrarum,

& maria plena erant corporibus sanctorum Peregrinorum: multi ex eis moriebantur ægritudine, plurimi fame & siti, alii frigore & æstu, atque alii ferro à paganis: & tamen nec desinebant, nec contristabantur, habentes in cordibus suis:
Quidquid patimini propter iustitiam beati.

Isti sunt qui contempserunt vitam mundi, & pervenerunt ad præmia regni. Isti reliquerunt regna, & prædia, & divitias, & abnegaverunt semetipsos, & secuti sunt Domini nostri vestigia. Et dum in Ecclesia legitur, & cantantur fortia facta Macchabæorum, qui quamvis pro patriis legibus, tamen, & pro suis heredibus, & hereditatibus pugnaverunt: isti vero non pro sua, neque pro aliquo suorum, sed solummodo pro regno cælorum abierunt, & viriliter pugnaverunt, & vicerunt, adjuvante eos Domino, & visibiliter mittente eis in adiutorium sanctos suos bellatores, quorum animæ in cælo jam collocatæ erant, videlicet Mercurium multotiens, aliquando Georgium, necnon & interdum Theodorum, aliquando totos tres cum suis dealbatis exercitibus, videntibus non solum Christi militibus, sed etiã ipsis inimicis paganis: unde exterrebantur, & in fugam convertebantur. Propterea nimis sunt laudandi, & omnimodis præconandi, quibus Deus dedit talem tolerantiam atque victoriam, & tam maximum triumphum. Unde ad gloriam & laudem nominis Dei per universum mundum, debet esse laudandum, prædicandum, memorandum, etiam & in ecclesiis Dei semper præconandum per eum a quo peractum est, qui vivit, & regnat in sæcula sæculorum, amen. *Explicit Prologus*

INCIPIT LIBER.

I. **O**mnipotens Dominus propterea dicitur omnipotens, quia omnia potest quando vult, & quomodo vult. Cum voluntas sua fuit, & placuit ei liberare sanctum Sepulcrum Filii sui de potestate paganorum, in qua erat pro delictis hominum, & aperire viam Christianis, desiderantibus illuc pro redemptione animarum suarum pergere, multis signis & virtutibus, prodigiis, & portentis ostendit ad acuendas mentes Christianorum, ut desiderabiliter illuc properarent. Nam stellæ de cælo per totum mundum visæ sunt fluere in terra, ita crebræ & spissæ, uti grandines vel flocci dum ninguent. Post

pauco vero tempore via ignea in cælo apparuit. Transacto namque parvo tempore, medietas cæli versa est in colorem sanguinis. Somnia & revelationes plures visæ sunt, quas enumerare nemo potest. Tunc in anno millesimo nonagesimo quinto, cum appropinquaret terminus ille, quem Dominus Jesus cotidie demonstrat suis fidelibus, atque specialiter ostendit in Evangelio dicens: *Si quis vult post me venire, abneget semetipsum, & tollat crucem suam, & sequatur me*: misit Deus in corde Apostolici Romanæ sedis Urbani, & perrexit in ultramontanis partibus cum suis Archiepiscopis, Episcopis, Abbatibus, & presbyteris, & cœpit subtiliter sermocinari, & prædicare dicens: ut si quis animam suam salvam facere vellet, non dubitaret humiliter vias Domini incipere. Quin etsi ei denariorum deesset copia, divina ei satis daret misericordia. Hortabatur sic dominus Apostolicus: Fratres, oportet vos pati multa pro Christi nomine, videlicet misérias, paupertates, persecutiones, egestates, infirmitates, nuditates, famem, sitim, & aliâ hujusmodi, sicuti idem Dominus ait suis discipulis: *Oportet vos multa pati pro nomine meo*; & Nolite erubescere loqui ante faciem hominis, ego enim dabo vobis os, & eloquium, ac deinceps sequetur vos larga retributio, videlicet regna polorum. Cumque hic sermo cresceret per universas regiones, Galliarum scilicet ac Francorum, Alamannorum, Anglorum, & omnium regionum occidentalium, meridianorum, & septentrionalium, & omnium partium, facta est tam maxima commotio virorum ac mulierum in universis partibus, ut viderentur omnes velle arripere sanctum Iter. Pater non audebat prohibere filium, nec uxor prohibere virum, & dominus non audebat prohibere servum: omnibus liberum erat iter propter timorem & amorem Dei. Et omnes qui ibant, suebant cruces in dextro humero, imitando Christum, qui in humero suo portavit Crucem, eundo ad passionem pro nobis. In tantum fuit maxima commotio, ut nulla esset via, nullum iter, nulla civitas, nullum castrum, nulla planities, nulla montana erant, quæ non essent plena papilionibus & tendis, nobilibus hominibus, & ignobilibus viris ac mulieribus, omnes portantes cruces in scapulis: & ita ibant gaudentes, qui ex longinquis regionibus veniebant, tamquam supremo die exissent de domibus suis. Et inter eos erant omnia genera musicorum, & tubarum, & corneorum, & mille modis ludentium, & aliis multis mirabili-

Anno
1095.

bus secum portabant ligneis, ferreis, aureis, argenteis, quæ enarrare nequimus. Arma vero illorum ex omnibus generibus erant, scilicet lanceis, ensibus, loriceis, clypeis, galeis, arcubus, gisarmis, salibis, etiam & accettis. Hæc de minutis diximus gentibus.

II. Principes vero, comites, duces, & magnates ita divites erant, ut papiliones eorum & tentoria essent deaurata, lecti vero illorum auro & coloribus erant depicti, & sub eisdem lectis ita jacebant marcæ argenteæ, sicut solent jacere ligna sub rusticorum lectibus. Et portabant lintres, quas in aqua mittebant, & retia ponebant desuper, & desubter: & quot pisces ibi erant, omnes capiebant. Et deducebant secum accipitrem, qui cognominatur gyrifalcus: qui dum dimittebatur ad volandum, omnes aves, qui eum videbant, vel sentiebant, præ timore ejus statim in terra projiciebant se, & capiebantur manibus, & plura alia, quæ enarrare longum est. Sed & hoc non est prætereundum: omnes viæ ita erant plenæ tentoriis peregrinorum euntium ad liberandum viam sancti Sepulcri, ut nulla esset civitas, nullum castellum, nullum pratum, ubi non invenirentur tentoria extensa. Alii euntes, atque alii eos sequentes, & ibant læti dicentes: *Deus lo vult, Deus lo vult, Deus lo vult*, & in pluribus ex his qui moriebantur in eadem sancta via, apparebant cruces in scapulis eorum; & propterea multi accendebantur ad idem sanctum Iter. Nunc revertamur ad priorem motionem.

Anno 1097

III. Primum cœperunt arripere iter, fecerunt tres partes. Una pars Francorum in Ungariæ intravit regionem, scilicet Petrus Eremita, & Dux Gottifredus, & Balduinus frater ejus, & comes Balduinus de Monte. Isti prudentissimi milites, & alii plures, quos ignoro, & quorum nomina penitus dictare careo, venerunt per viam, quam antiquitus Carolus mirificus rex Franciæ aptari fecit usque Constantinopolim. Petrus vero Eremita Constantinopolim venit in Kal. Augusti, & cum eo maxima generatio Alamannorum. Illic invenit Lombardos, & Longobardos, & alios plures congregatos, quibus Imperator Græcorum jusserat dari mercatum, sicuti mos erat in civitate. Dixitque illis: Nolite transmeare Brachium, donec veniat maxima Christianorum virtus, quia vos tot non estis, quod cum Turcis præliari valeatis. Ipsique Christiani nequiter deducebant se, quoniam civitatis palatia sternebant,

& incendebant, & auferebant plumbum, unde ecclesiæ erant coopertæ, & vendebant Græcis. De quo magis iratus Imperator, mox iussit illos transeire ultra Brachium. Postquam vero transfretaverunt, non cessabant agere omnia mala. Incendebant enim & devastabant ecclesias & domos. Tandem pervenerunt Nicomediam. Illic divisi sunt Lombardi, & Longobardi, & Alamanni à Francigenis, quia Francigenæ erant tumidi superbia. Elegerunt autem Lombardi & Longobardi dominum super sese, cui nomen Raynaldus; & Alamanni similiter: & intraverunt in Romania, & per quatuor dies iverunt ultra Nicæam civitatem, & invenerunt quoddam castrum, cui nomen Scerogorgo, quod vacuum erat gente; & apprehenderunt illud: in quo invenerunt satis frumentum, & vinum, & carnem, & omnia bona.

IV. Audientes itaque Turci, quia Christiani essent in castrum, venerunt continuo obsidere illud. Ante portam castrum erat quidem puteus, & ad pedem castrum erat fons unus, juxta quem exiit Raynaldus, excubare scilicet Turcos. Venientes autem Turci in die dedicationis sancti Michaelis archangeli, scilicet duobus diebus stantibus mensis Septembris, invenerunt Raynaldum, & alios omnes qui cum eo erant, & occiderunt multos ex eis. Alii qui remanserunt vivi, fugerunt in castrum. Quod Turci obsederunt continuo, eisque abstulerunt aquam: fueruntque nostri in tanta afflictione sitis, quod flebotomari faciebant suos equos & asinos, quorum sanguinem bibebant. Alii mittebant zinziclas in piscinam, & eas deprimebant in os suum. Alii quippe mingebant in pugillum alterius, & sic bibebant. Alii autem fodiebant humidam terram, & supini jacebant se, & mittebant terram super sua pectora aut corpora pro nimia ariditate sitis. Episcopi namque & presbyteri, qui illic aderant, confortabant, & submonebant nostros dicentes: Estote ubique fortes in Christi fide, & nolite timere eos qui occidunt corpus, animam autem non possunt occidere. Hæc persecutio fuit per octo dies. At dominus Alamannorum consiliatus est cum Turcis, qualiter traderet alios omnes: & fingens se exire ad bellum, fugit ad illos, & cum eo multi ex aliis. Turci ceperunt castrum: illi autem, qui Deum abnegare noluerunt, capitalem sententiam susceperunt: qui vivi remanserunt, decapitati sunt à Turcis. Postea diviserunt illos ad invicem, sicut aliquis dividit oves: alios miserunt ad signum, & sagittabant eos: & alios vendebant & donabant, sicut

animalia : alii in Corosanum conducebant suos , ubi ipsi habitabant : alii in Antiochiam , alii in Aleph. Isti primo acceperunt feliciter martyrium pro Christi nomine. Audientes autem Turci , quod Petrus Eremita & Gualterius sine habere fuissent in civitate , quæ est supra Nicæam , venerunt illuc gaudendo occidere illos. Cumque venirent , lætantes obviaverunt Gualterius & sui milites , quos omnes confestim occiderunt. Petrus vero Eremita paululum ante recesserat Constantinopolim : eo quod nequibat retinere illam diversam gentem , quæ nolebat eum audire , nec verba ejus obsecrare. Turci vero post hanc malignam illorum victoriam , ubicumque inveniebantur peregrini , irruebant super eos : quorum alios inveniebant vigilantes , alios dormientes , alios nudos jacentes , quos omnes interficiebant. Presbyterum quoque unum invenerunt celebrare sanctam Missam super altare , eumque statim martyrizaverunt. Alii qui potuerunt evadere , fugerunt ad civitatem : alii miserunt se in mare , alii in silvis , alii ascenderunt in montaneis , & introierunt in quoddam castrum. Turci namque persequentes illos , adunaverunt ligna , ut eos incenderent simul cum castro. Christiani igitur , qui in castello erant , miserunt ignem in lignis adunatis , & reversus est ignis adversus Turcos , quoniam Deus noluit suos relinquere. Illos vero , qui erant capti à Turcis , diviserunt inter se , sicut prius fecerunt per universas eorum regiones. Hoc totum factum est in mense Octobri.

V. Audiens hoc Imperator , quod Turci ita dissipassent nostros , lætus & gavisus fuit : & mandavit , & fecit eos transmeare Brachium ; & postquam reversi fuerunt , comparavit ab eis omnia arma eorum. Secunda vero pars intravit in Sclavoniæ partibus , scilicet Raymundus comes sancti Ægidii , & cum eo Podiensis Episcopus : in qua Sclavonia multa pars passi sunt pro Christi nomine , & sancti Sepulcri. Nam per quadraginta dies ambulauerunt per obscura loca propter nebulas , quæ erant tam densæ , ut vix paululum longe conspiciere possent ; & Turci undique eos insidiantes. Sed bellipotens & providus Comes minutam gentem faciebat ire in medio , & ipse cum exercitu suo custodiebat eos ante & retro ab insidiis Turcorum. Itaque plures ex suis militibus perdidit fame & gladio , quoniam mala terra erat. Viam etiam nesciebant , nisi per ortum solis , Tertia pars per antiquam viam Romam venit. In ista vero

parte fuit Robertus comes Flandrensis, & Robertus comes Normannus, & Ugo Magnus, & alii plures: ac deinde appropinquaverunt ad portum Brundusii, aut Bari, aut Tarenti. Ugo vero Magnus, & Gailielmus Marchusi filius, confestim miserunt sese in mare ad portum Bari, & transfretantes applicuerunt Durachium. Audiens itaque Dux illius civitatis illos prudentissimos viros illuc esse applicatos, continuo mala cogitatione in cor ejus ascendente jussit illos moveri, & Constantinopolim ante infelicem Imperatorem caute deduci, quo ei fidelitatem facerent.

VI. Dux itaque Gottifredus, nostrorum comitum primus, Constantinopolim venit cum suo magno exercitu diebus duobus ante Nativitatem Domini nostri, & hospitatus est juxta Constantinopolim: fuitque ibi, donec iniquus Imperator jussit eum honorabiliter hospitari in burgo. Cumque hospitatus fuisset secure, mandabat armigeros suos foras per unumquemque diem, quatenus paleam & alia necessaria apportarent. Cum vero jam putabant cum fiducia exire quocumque voluissent; inimicus Imperator, Alexius nomine, sagaciter faciebat eos observari: suisque Turcopolis & Piccinacis imperabat, quod eos invaderent, & occiderent. Balduinus itaque, Ducis frater, audiens hoc, quod traditor Imperator suis imperabat hominibus, statim misit se in nimiam attentionem, si forte illos invenire posset. Ad ultimum invenit eos occidentes gentem suam, illosque invasit toto corde, & Deo adjuvante superavit, & apprehendit sexaginta .. ex eis partim occidit, & partim ante conspectum Ducis conduxit. Cumque vidisset hoc Imperator infelix, valde iratus est. Videns autem Dux quod Imperator eis esset iratus, jussit suis militibus exire de burgo, & hospitari extra civitatem, ubi fuerant prius. Sero autem superveniente, mandavit infelix Imperator exercitum suum, & fecit invadere Ducem simul cum Christi gente: quos persequens invictus Dux una cum Christi militibus, occidit septem ex illis, & persequendo alios, venit usque ad civitatis portam. Reversus itaque Dux ad sua tentoria, & fuit in campo illo fere per quinque dies, donec pactus est cum Imperatore: dixitque illi Imperator, quod transfretaret Brachium sancti Georgii: promisitque facere illuc conduci omnem mercatum, sicuti erat Constantinopoli, & pauperibus eleemosynam erogare, unde vivere possent.

VII. At bellipotens Boamundus, Roberti Ducis filius, cum essent in obsessioe Amalfi, scilicet scaphati pontis, audiens venisse innumerabilem gentem Francorum, quatinus sancti sepulcri viam de manu eriperet pessimorum paganorum, ut fieret liberata, & Christianis omnibus undique staret patefacta; continuo cœpit sapientissime ac diligenter inquirere, quæ arma pugnandi hæc gens deferret, & quam ostensionem Christi in via portaret, vel quod signum in certamine sonaret. Cui per ordinem dicta sunt omnia: taliter deferunt arma jugiter ad bellum undique convenientia; in dextrâ, vel inter utrasque scapulas Crucem Christi bajulant: sonum vero illorum non est aliud, nisi *Deus lo vult, Deus lo vult, Deus lo vult*, omnes simul una voce conclamant. Mox sancto commotus spiritu, jussit pretiosissimum pannum sericum, quem apud se habebat, afferri; eumque incidi præcepit, totumque statim in cruces expendit. Cœpit namque vehementer ad eum concurrere maxima pars militum, qui erant in obsessioe illa, & tam mirabiliter fluebant ad eum, quod comes Rogerius pæne solus remansit, vix reversus Siciliam, dolens ac mærens, quod gentem amisisset suam. Reversus itaque dominus Boamundus iterum in terram suam (diligenter enim undique honestavit sese ad incipiendum sancti Sepulcri iter) tandem transfretavit mare cum suo exercitu, & cum eo prudentissimus Tancredus Marchusi filius, & Robertus Girardi filius, & Riccardus de Principatu, & Raynaldus frater ejus, & Robertus de Sordavalle, & Robertus filius Trosteri, & Unfridus filius Rau, & Riccardus filius Comitis Raynulf, & Goffridus Comes de Rossilione, & Episcopus, & Girardus frater ejus, & Episcopus de Ariano, & Boëllus Carnotenonensis, & Alberedus de Cagnano, & Goffridus de Monte-scabioso. Alii vero, qui ante transierunt mare, promiserunt Boamundo, quod eum expectarent in Bulgaria. Ipse autem eis promisit, quod quicquid illi perderent in expectatione illa, libenter eis redderet.

VIII. Postquam vero illi cognoverunt dominum Boamundum transfretasse, venerunt festinanter ad eum ad Ebelonam in omnium Sanctorum festivitate. Hi omnes quos superius commemoravi, transfretaverunt ad domini concorditer Boamundi famulatum, & applicuerunt in Bulgariæ partibus. Illic invenerunt nimiam abundantiam frumenti, & vini, & alimenti corporalis. Deinde vero descendentes in valle Andronopoli, & illic

poli, & illic applicando expectaverunt gentem suam, donec omnes æqualiter transfretaverunt. Tunc sapiens Boamundus ordinavit consilium una cum gente sua, suoque confortabat, & ammonēbat dicens: Viri prudentes abstinete vos à malo. Nos sumus peregrini Dei: oportet nos modo esse bonos, & humiles plusquam antea fuimus. Et nolite deprædare terram istam, quia Christianorum est; & nemo accipiat plusquam ei quod sufficiat ad edendum pro benedictione.

IX. Tunc exeuntes venerunt per nimiam plenitudinem de villa in villam & castello in castellum, & de civitate in civitatem, quousque pervenerunt Castoriam, ibique Nativitatem Domini sollemniter celebrarunt. Fuimusque ibi per plures dies, & quæxivimus mercatum: sed ipsi noluerunt dare nobis, eo quod valde timebant, & dicebant nos non esse peregrinos, sed putabant nos velle illorum capere terram, & illos occidere. Deinde cœpimus apprehendere boves, & asinos, & equos, & omnia, quæ inveniebamus. Egressi itaque de Castoria, intravimus in Palagoniam, in qua erat quoddam hæreticorum castrum: nobis vero undique aggredientibus illud in lacu, ubi ædificatum fuerat, continuo nostro succubuit imperio. Accenso itaque igne combussimus castrum illud una cum habitatoribus suis, scilicet hæreticorum congregationem.

X. Postea venimus ad flumen Bardarum. Itaque cum domino Boamundo ultra gens sua partim perrexit, & partim remansit. Illic invenimus innumerabilem abundantiam. Remansit autem ibi Comes de Ruscignolo una cum fratribus suis. Venit itaque exercitus execrati Imperatoris, & invasit comites cum fratribus suis, & alios omnes. Quod audiens prudentissimus miles Tancredus, regressus est retro, & projecit se in flumen, & natando pervenit ad alios, & duo milia milites miserunt se in flumen post eum, sequendo Tancredum. Novissime invenit Turcopolos, & Pizzinacos dimicantes simul cum nostris; quos repente fortiter invasit, & prudenter eos superavit, & apprehendit plures ex eis, & duxit illos ligatos ante domini Boamundi præsentiam. Hos allocutus vir sapiens Boamundus dicens: Quare miseri occiditis gentem Christi, & meam? Ego enim cum vestro Imperatore nullam altercationem habeo. Quidixerunt: Nos nequivimus aliud agere. Donativo in roga profani Imperatoris conducti sumus; & quidquid nobis imperat, oportet nos illud adimplere. Quos dominus Boamundus audiens, absque

ulla punitione permisit abire. Hoc bellum factum est in quarta feria, quæ est caput jejunii, unde sit per omnia benedictus Deus in sæcula, amen.

XI. Mandavit itaque infelix Imperator, scilicet filius perditionis, simul cum nuntiis nostris unum ex suis, quem valde diligebat, quem & Chorpalasium vocabat, ut nos secure deduceret per terram suam, usque dum pervenissemus Constantinopolim. Cumque venissemus ante eorum civitates, imperabat hominibus civitatum, ut nobis secure apportarent mercatum. At illi certe tantum timebant fortissimi Boamundi gentem, quod nullos nostrorum sinebant intrare civitatis murum: volueruntque nostri majores quoddam castrum aggredi, & apprehendere, eo quod nimis erat plenum omnibus bonis. Sed vir sapiens Boamundus noluit consentire pro justitia terræ & fiducia Imperatoris, & valde iratus est propter hoc cum Tancredo & aliis omnibus. Hoc factum est in hora vesperi. Mane autem facto exierunt habitatores illius castri, & venerunt cum processione, & omnibus dicentibus * *Kyrieleison*, deferentes in manibus cruces coram domini Boamundi conspectu. Ipse vero gaudens recepit eos, & cum maxima lætitia permisit abire. Deinde pervenimus ad quamdam civitatem, quæ vocabatur Serra, ibique nostra fiximus tentoria, & sat habuimus omnem mercatum, quod in illis diebus conveniens erat: ibique doctus Boamundus optime concordatus est cum duobus Chorpalasiis: & pro amicitia istorum & justitia terræ jussit reddi omnia animalia, quæ nostri peregrini deprædata tenebant, & Chorpalasiis illis promiserat retro missis mandare, & omnia illa animalia per ordinem reddi. Ac deinde pervenimus de castello in castellum, & de villa in villam, usque dum appropinquavimus ad Russam civitatem. Græcorum autem gens exhibat, & veniebat gaudens coram domini Boamundi præsentia, deferens nobis maximum mercatum, ibique nostros tendimus papiliones in tertia feria ante Cœnam Domini: ibique doctus Boamundus dimittens gentem suam, perrexit Constantinopolim loqui simul cum iniquissimo Imperatore; suisque hominibus imperavit dicens: Modeste properate ad civitatem, ego autem ibo prius. Qui eduxit secum paucos milites.

XII. Tancredus igitur honorabilis miles remansit caput ejus Christi militiæ. Qui videns peregrinos cibos emere, ait intra se, quod exiret extra viam, & hunc populum conduce-

ret ubi feliciter viveret. Denique arbitrans hoc, intravit in vallem quamdam plenam atque stipatam omnibus bonis, & omnibus ubertatibus, quæ corporalibus nutrimentis sunt convenientia: in qua Pascha Domini devotissime celebraverunt.

XIII. Postquam iniquus Imperator cognovit honestissimum virum Boamundum ad se venisse, jussit eum honorabiliter recipi, & cautissime hospitari extra civitatem in Sancto argenteo. Cumque feliciter hospitatus esset, tunc malignus Imperator mandavit pro eo, ut iret loqui simul secrete cum eo. Illic quoque invenit ducem Gottifredum cum fratre suo Balduino. Raymundus itaque comes sancti Ægidii simul cum Podiensi Episcopo exiens de Sclavonia, in qua multa pro Christi nomine & sancti Sepulcri via fuerunt passi, quæ minime pati deberent, in qua etiam plures honestissimos milites perdiderunt; pervenit Durachium, quæ civitas Imperatoris est, credens jam esse in terra sua, quandoquidem de Sclavorum evaserat manu. Græcorum autem gens insidians istis prudentissimis Christianis militibus Christi, quocumque modo eis nocere, aut offendere poterat, in die & in nocte, latenter & occulte, non desinebat. Erat autem ibi Dux illius civitatis, qui continuo eis fiduciam, quousque in terra sua essent, læta facie spopondit. Intra istam vero fiduciam, quam eis dono concessit, ejus homines fraudolenter ex nostris interfecerunt quemdam egregium militem, cui nomen Pontius; Raynaldum quoque fratrem ejus vulneraverunt graviter. Interea cæperunt illi statim carpere iter, & obviaverunt Imperatoris litteris de pace & fraternitate danda, sicuti suis filiis.

XIV. Interim dum hæc recitarentur, Turci, & Piccinaci, & Comani, & Sclavi, & Athenasi, & Uli erant insidiantes illis undique, videlicet ut in aliqua parte eos lædere possent. Quadam autem die dum Podiensi Episcopus hospitatus esset, contigit forte quod à Piccinacis captus esset. Qui continuo ejecerunt eum de mula in qua sedebat, eumque exspoliaverunt, & in vertice capitis eum vulneraverunt. Sed quia tantus Pontifex adhuc populo Dei erat necessarius, per ejus misericordiam vitæ reservatus est. Interea sonum audiunt in tentoriis, cucurrerunt omnes ad eum, & sine mora eripuerunt eum de manibus illorum. Taliter itaque pervenientibus illis ad quoddam castrum, quod vocabatur *Bucinat*, dictum est Comiti, quod Piccinaci insidiabantur ei in angusta via cujusdam montis. Qui remansit

retro cum pluribus militibus, & invenit Piccinacos: unam partem illorum occidit, & aliam persecutus fugavit.

XV. Interea Imperator mittebat litteras suas ad illos pacifice, ex alia vero parte exercitus suus undique insidiabatur illis. Tandem pervenerunt ad quamdam civitatem, nomine Ruffam. Cives autem illius civitatis aperte quidquid nocendi ingenio agere poterant, contra illos faciebant. Cumque vidisset hoc Comes, iratus est valde, & iussit milites arripere arma, & sua sonare signa, & oppugnaverunt civitatem, & mirabiliter eam superaverunt. Deinde pervenerunt ad aliam civitatem, cui nomen Rodesto. Die autem illo milites Imperatoris invaserunt illos retro in cauda: cum quibus Comes praeliatus fuit, & interfecit triginta ex illis, & sexaginta equos cepit: & multa alia bella sive anxietates habuit Comes, & multos milites perdidit, quæ non possumus scribere per singula.

XVI. Veneruntque illuc illorum legati, quos Constantinopolim quondam præmiserant, dicentes quod Imperator promitteret illis omnia eorum perdita diligenter reddere, priusquam Constantinopolim pervenirent; & quod dux Gottifredus, & Boamundus; & Flandrensis Comes, & omnes alii Principes, & Comites deprecarentur, ut maximum dimittant exercitum, & cum paucis militibus, & sine armis festinent venire Constantinopolim, quoniam Imperator assumpta cruce ait se venturum nobiscum in Jerosolymitanum iter, & erit noster dux, & nostrum caput. Dum vero Comes audiret hoc, ilico dimisit suum exercitum, & properavit Constantinopolim loqui cum Imperatore. Cui dixit Imperator, quod ejus homo se fieret, & fiduciam ejus faceret, quemadmodum Boamundus, & alii Principes faciebant. Dixitque Comes: Absit hoc a me, ut in hac via nullum dominum mihi faciam nisi Christum, quem habeo dominum, pro cujus amore huc usque veni. Si vero crucem diligenter bajulare vis, & nobiscum vis Jerusolymam venire; ego & mei homines, & omne quicquid in mea contineo potestate, in tua libera erit voluntate.

XVII. Interea cum Comes esset Constantinopoli, veniens exercitus Imperatoris insidiando, & invenit exercitum Comitum solum, quem invasit fortiter, & læsionem, quam ei facere potuerant, fecerunt. Cumque audisset Comes, quod exercitus Imperatoris læsisset suum exercitum, ingemuit, & nimis dolens statim advocavit dominum Boamundum, & alios Prin-

cipes : mandavitque Imperatori , cur causa traditionis eum Constantinopolim venire fecisset , & suum exercitum lædi consensisset. Quod Imperator audiens , hoc negavit dicens : Certe non per meum consilium hoc factum est , & me sciente nulla læsio fuit inter eos. Sed hoc satis sit , quoniam exercitus tuus damnum mihi operatus est , & castella , & civitates in mea dissipaverunt terra : tamen de hoc quod tibi factum est , satisfactionem fideliter concedo. Cum autem venissent ad iudicium , Comes primus promisit , & absolvit suam fiduciam. Et cum fuisset absoluta fiducia sua , exercitus ejus venit Constantinopolim. Mandavit itaque Imperator Comiti , sicut superius diximus , quod faceret ei hominium & fiduciam , quemadmodum ei fecerunt alii. Et dum Imperator mandaret , Comes meditabatur qualiter vindictam de Imperatoris exercitu habere potuisset. Sed dux Gottifredus , & Flandrensis Comes , & alii Principes dixerunt , injustum esse contra Christianos pugnare. Et dominus Boamundus dixit , quod si aliquod injustum Comes ab Imperatore passus esset , ei faceret emendare ex Imperatoris parte.

XVIII. Igitur Comes accepto consilio , Alexio vitam & honorem juravit , quod nec per se , nec per alium ei consentiat auferre. Cumque de hominio appellaretur , respondit non se pro capitis periculo id esse facturum. Fortissimo autem viro Boamundo dixit Imperator , quem valde timebat in corde , quia jam sæpe eum cum suo exercitu ejecerat de campo : quod si libenter ei jurasset , quindecim dies terræ in longitudine ab Antiochia retro daret , & octo in latitudine : eique tali modo juravit , ut si ille fideliter observaret illud sacramentum , iste suum numquam præteriret. Nec est mirum , quod ante tam duri , & ante tam fortes milites hoc fecerunt : multa enim coacti erant necessitate. Et sceleratus Imperator omnibus nobis majoribus , sive minoribus fidem & securitatem dedit , volens nolensque sacramentum juravit , quia veniret nobiscum pariter cum suo exercitu per terram & mare , & nobis mercatum per terram & mare fideliter daret , & omnia nostra perditam diligenter restauraret : insuper autem quod nemo nostrorum peregrinorum numquam ab eo penitus conturbari , vel contristari debuisset in via sancti Sepulcri.

XIX. Comes autem sancti Ægidii hospitatus erat extra civitatem in burgo , & sua gens remanserat retro. Tunc gens

domini Boamundi appropinquavit Constantinopolim. Tancredus itaque honorabilis miles, & Richardus de Principatu latenter transmeaverunt Brachium, & omnis gens domini Boamundi juxta illos ideo ne facerent jusjurandum Imperatori. Statimque omnis exercitus domini Boamundi transvectus fuit, item exercitus Comitis sancti Ægidii, qui appropinquavit Constantinopolim. Comes remansit ibi cum sua gente. Vir autem prudens Boamundus remansit cum Imperatore, ut consilium cum eo acciperet, quomodo mandarent mercatum ultra gentibus, quæ erant apud * Nicomiam civitatem. Dux itaque Gottifredus ivit prius Nicomiam cum universo exercitu, & cum Tancredo, & aliis omnibus: fueruntque ibi per tres dies. Vidit namque Dux Gottifredus quod via patebat, per quam has potuisset conducere gentes usque Nicæam civitatem, quoniam per illam viam, per quam alii prius transierunt, non poterat modo tanta gens transire. Ipseque misit ante se tria milia hominum cum securibus & gladiis, qui inciderent, & aperirent hanc viam, ut patefacta staret nostris peregrinis usque Nicæam civitatem; quæ via fuit aperta per angustam & immensam montaneam, & faciebant per viam cruces ferreas atque ligneas, ut eas nostri Peregrini cognoscerent.

XX. Interea pervenimus ad civitatem, quæ vocatur Nicæa, quæ est caput totius Romanix, in sexto die mense Maii, ibique castrametati sumus. Prius vero quam dominus Boamundus venisset, ubi nos eramus, tanta inopia panis fuit inter nos, quod unus panis vendebatur viginti denariis, aliquando triginta. Postquam vero venire cœpit vir prudens Boamundus, jussit maximum mercatum conduci per mare, & per terram pariter; & fuit maxima ubertas in tota Christi militia. Tunc Raymundus comes sancti Ægidii transfretavit Brachium, & in die Ascensionis Domini cœpimus Nicæam civitatem circumquaque invadere, & ædificare instrumenta lignorum, atque turres ligneas, ut possemus mirabiles turres sternere. Tam fortiter & tam acriter aggressi fuimus civitatem per duos dies, quod etiam perfodi fecimus civitatis murum. Turci autem qui erant in civitate miserunt nuncios aliis, qui veniebant civitati adjutorium dare, quod audacter secureque appropinquant, ut per meridianam introeant portam, quoniam ex illa parte nemo eitis obviam, nec contra stabit. Quæ porta ipso die a Comite sancti Ægidii, & Podiensi Episcopo obsessa fuit,

videlicet in die sabbati post Ascensionem Domini. qui Comes profectus erat divinis virtutibus, atque terrenis fulgebat armis. Hic itaque inveniens contra nos venientes Turcos undique, signo crucis armatus vehementer irruit cum suo fortissimo exercitu super illos. Qui mox superati sunt, & dederunt fugam, & fuit mortua maxima pars illorum. Rursum alii veniebant de nuntio fugientium, & exultantes ad certum bellum, ferentesque secum funes, quibus nos ligatos conducirerent Corosanum. Venientes autem latando cœperunt ex cacumine montis paulatim descendere. Quotquot autem descenderunt in vallem illam, cæsis capitibus a Francorum manibus remanserunt. Delatis itaque a tentoriis eorum capitibus, projecerunt nostri illa cum fundis seu aliis instrumentis in civitatem, unde magis tristarentur illi qui intuserant.

XXI. Comes sancti namque Ægidii, & Podiensis Episcopus consiliati sunt in unum, qualiter facerent suffodere quamdam turrin, quæ erat ante eorum tentoria. Ordinatique sunt omnes ut hanc foderent turrin, & arbalistæ, & sagittarii, ut eos undique defenderent. Foderunt itaque illam usque ad radicem muri, summisseruntque fustes & ligna, ac deinde miserunt ignem. Sero autem superveniente, cecidit turris, & illi qui in ea erant: ideoque quia nox erat, non potuerunt nostri præliare cum illis. Nocte vero surrexerunt festinanter Turci, & restauraverunt murum tam forte, quod veniente die ex illa parte nemo eis nocere poterat. Tunc venit Robertus comes de Normannia, & comes Stephanus, & alii plures, ac deinceps Rogerius de Barnavilla: sapientissimus autem Boamundus obsedit eam in primo capite juxta lacum, & postea Tancredus, & juxta eum dux Gottifredus, ac deinde Robertus comes Flandrensis, & juxta eum Robertus Normannus. Comes vero sancti Ægidii obsedit eam juxta Robertum Normannum, & juxta eum Podiensis Episcopus ex alia parte laci. Unusquisque fecit suum castrum ligneum, effregerunt turre civitatis cum suis machinis atque ingeniis.

XXII. Statimque consiliati sunt Principes nostri in unum, uti legatos in Babyloniam consilio Imperatoris mandarent Ammirario. Elegerunt continuo hos, Ugonem de *Bellafayre*, & Bertrannum de Scabrica, & Petrum de Picca ejus cappellanum. Vocatis vero istis dederunt eis verba in hunc modum. Ite in protectione Dei per mare in Babyloniam, ad Ammirarium

nostras ferte litteras ; scilicet salus , vita , & immensus honor ! Sciât ille quod omnes Francorum Principes Ierosolymorum infimul veniunt itinera & viam ab impiorum liberare manibus paganorum , illosque prudentissime ejicere de Christianorum terra. Videat ergo qualiter erga nos agere vult , aut Christianitatem recipere , & esse una nobiscum ut frater atque amicus ; aut si paganorum vult amicitiam habere , & obviam nobis ad bellum exire.

XXIII. Ita vero obfessa fuit Nicæa civitas per terram , quod nemo audebat exire , neque intrare. Fueruntque ibi omnes congregati in unum. Et quis poterit numerare tantam Christi militiam ? Nullus , ut puto , tot prudentissimos milites antea vidit , nec ulterius videbit. Erat autem ex una parte civitatis immensus lacus , in quem Turci suas mittebant naves , & exhibant & intrabant , & afferebant herbas , & ligna , & alia plura. Tunc nostri majores consiliati in unum , miserunt festinantes nuncios Constantinopolim , dicendo ad Imperatorem , quod faceret naves conduci ad civitatem ubi portus erat ; ac deinde jubeat congregari boves , qui eas trahant per montana & silvas , usque dum pervenient ad lacum. Quod continuo factum fuit , & mandavit cum eis Turcopolos suos : die vero quo naves fuerunt conductæ , noluerunt eas statim mittere in lacum. Nocte vero superveniente impulerunt eas in lacum plenas Turcopolis bene armatis : summo diluculo stabant naves optime in lacu ordinatæ , properantes contra civitatem. Videntes hoc Turci , mirabantur quidnam hoc esset. Ignorabant an esset illorum gens , an Imperatoris. Postquam vero cognoverunt illam esse Imperatoris gentem , timuerunt usque ad mortem , plorantes & lamentantes : sed Franci gaudebant , & dabant gloriam Deo.

XXIV. Videntes autem Turci , quod ex suis nullatenus habere adjutorium possent , legationem mandaverunt spurcissimo Imperatori , quod sponte civitatem redderent ei , si eos impunitos omnimodo abire permetteret cum suis mulieribus , & filiis , & omnibus substantiis. Tunc infidelissimus Imperator plenus vana atque iniquissima cogitatione , jussit illos impunitos , & sine ullo timore abire , & sibi eos Constantinopolim cum magna fiducia deduci. Quos studiose servabat , ut illos ad Francorum nocumenta atque obstacula paratos habere posset , Promiserat ante Alexius Principibus & genti Fran-

corum.

corum, quod totum aurum, & argentum, & equos, & omnem suppellectilem, quæ intus erat, eis daret; & monasterium latinum, & hospitium pauperibus Francorum ibi faceret; præterea tantum de propriis unicuique de exercitu daret, ut illi semper militare vellet. Hæc igitur Franci sperantes verba fidelissima, deditionem laudaverunt. Alexius autem accepta civitate, tam in gratiam actionem dedit exercitui, quod quamdiu vixerit, aliquis de sancto populo semper ei maledicat, & proditorem clamet. Fuimus in obsessione illa per septem hebdomadas, & multi ex nostris ibi fideliter receperunt martyrium, latantes atque gaudentes reddiderunt felices animas Deo, & ex pauperrima gente multi mortui sunt fame. Et beati qui mortui sunt pro Christi nomine, qui in cælum triumphantes ascenderunt, portantes stolam rubeam martyrii, & magna voce dicentes: Vindica Domine sanguinem nostrum, qui pro te effusus est, qui es benedictus, & laudabilis in sæcula sæculorum, amen.

XXV. Reddita civitate, & Turcis deductis Constantinopolim, infelix Imperator maxime gavisus iussit maximas elemosynas erogari nostris pauperibus. Deinde primo die quo perreximus a Nicæa, venimus ad quemdam pontem, ibique mansimus per duos dies. Tertia autem die priusquam lux cœpisset oriri, surrexerunt nostri: & quia nox adhuc erat non viderunt... viam, sed divisi sunt in duo agmina, & venerunt divisi per duos dies. In uno agmine fuit vir Boamundus, & Robertus Normannus, & prudens Tancredus, & alii plures: in alio vero fuit Raymundus Comes sancti Ægidii, & Dux Gottifredus, & Podiensis Episcopus, & Comes Flandrensis, & alii plures. Tertia autem die irruerunt Turci vehementer super Boamundum, & eos qui cum eo erant. Cumque vidissent inimici Dei Turci nostros, continuo cœperunt stridere, & garrire atque clamare excelso clamore, dicentes diabolicum sonum, quem nescio pro extranea lingua eorum.

XXVI. Tunc sapiens vir Boamundus videns innumerabiles Turcos procul stridentes, & clamantes dæmoniaca voce, protinus iussit omnes equites descendere de equis, & cum celeriter tentoria fuissent extensa, dixit omnibus militibus: O fortissimi Christi milites, ecce modo bellum acre est ante nos. Igitur omnes equites eant viriliter contra illos, & pedites prudenter tentoria hac citius extendant. Postquam vero factum est, Tur-

ci-undique jam erant circumcingentes nos dimicando. Nos itaque, quamquam nequibamus resistere eis, neque sufferre pondus tantorum hostium; tamen perstrinximus illic unanimiter gradum, feminæque nostræ in illa die fuere nobis in maximum subsidium: quoniam afferebant ad bibendum aquam nostris præliatoribus, semperque confortabant illos pugnantes, & defendentes. Vir itaque sapiens Boamundus protinus mandavit aliis, scilicet Comiti de sancto Ægidio, & Duci Gottifredo, & Ugoni Magno, & honestissimo Podiensi Episcopo, & aliis militibus, quod festinarent ad bellum, & citius approximarent, dicens: Si certare hodie volunt, atque præliari viriliter, veniant. quod omnimodo non credentes, prohibentes, & deludebant nuncios, dicentes: Profecto hoc falsum est totum. nam non credebant jam Turcos esse tam imprudentes, quod ulterius auderent se se erigere, & præliari cum Christianis.

XXVII. Dux itaque Gottifredus, audax & fortis, simul cum Ugone Magno venerunt prius cum suis exercitibus: Episcopus Podienis illos subsecutus est cum suo exercitu; & Raymundus Comes de sancto Ægidio juxta illos cum magna gente. Mirati sunt valde, unde esset collecta tam maxima multitudo Turcorum, & Arabum, & Sarracenorum, & aliorum quos numerare nequibant. Pæne omnes montes & colles, valles, & omnia plana loca replebantur, & cooperiebantur illis execrabilibus generationibus. Factus itaque sermo secretus inter nos hujuscemodi: Estote omni modo unanimes in fide Christi, & sanctæ crucis vexilli victoria, quia hodie omnes divites, si Deo placet, effecti eritis. Continuo autem fuerunt ordinatæ acies in sinistra parte: videlicet in primo capite fuit sapiens Boamundus, & Robertus Normannus, & prudens Tancredus, & Robertus de Ansa, & inclitus Riccardus de Principatu, & fortissimus atque honorabilis signifer Robertus filius Girardi. Episcopus vero Podienis venit per alteram montaneam, undique circumcingens Turcos. In dextra vero parte fuit Raymundus Comes de sancto Ægidio, & Dux Gottifredus, & Flandrensis Comes, & Ugo Magnus, & alii plures, quos ignoro. statimque venientibus militibus nostris Turci, & Arabes, & Sarraceni, & Agulani, & omnes aliæ barbaræ nationes, ceperunt velociter fugam per compendia montium, & per plana loca. Erat autem numerus Turcorum, & Persarum, & Agulanorum tricenti quadraginta milia præter Arabes, quorum

numerus scit solus Deus: fugientibus nimis usque ad eorum tentoria, ubi diu morari non licuit, sed iterum arripuerunt fugam, nosque illos persequebamur, & occidebamus per totum diem. Tres itaque milites persequentes illos, sedebant super albos equos, & in suis manibus candentia deferebant vexilla cum crucibus, & devastabant Turcos cum equis eorum. Credenda est ista veritas, & nullo modo est prohibenda, quia per tres dies invenerunt nostri postea occisos Turcos, & illorum equos. Hoc vero firmatum est testimonio eorundem Turcorum, qui vivi remanserunt. Isti vero fuerunt Christi milites, quorum nomina sunt hæc, sanctus Georgius, sanctus Demetrius, & Theodorus, quos omnipotens Deus mandavit in adiutorium populo suo. Et nos accepimus spolia multa, aurum, & argentum, equos, & mulos, camelos, & asinos, oves, & boves, & plurima animalia, quæ ignoramus. Sed nisi Dominus esset nobiscum in eo bello, & cito non mandasset aciem suam, nullus nostrorum penitus evaderet: quia ab hora tertia usque in horam nonam perduravit hæc pugna. Sed omnipotens Deus, pius & misericors, qui noluit suos milites perire, nec in manus inimicorum incidere, festinum nobis adiutorium mandavit.

XXVIII. Fuerunt itaque illic mortui duo ex nostris honorabiles milites, Goffridus de Monte-scabioso, & Guilielmus Marchusi filius frater Tancredi, præter alios equites & pedites, quorum numerus fuit multiplex. Audiens itaque vir prudens Boamundus illos honorabiles milites mortuos, valde doluit. Plorabat autem super suum germanum, scilicet Guilielmum, & flebat de alio, quem nimis habebat carum. Quis umquam poterit describere audaciam, & fortitudinem Turcorum: sed tamen qui putabant gentem Francorum terrere minis sagittarum, vel attriverant Arabes, & Sarracenos, & Surianos, Armenios, & Græcos, nec potuerunt resistere Francis, nec, si Deo placet, in posterum valebunt. Veruntamen dicunt sese esse de Francorum generatione, & quod nullus homo debet esse naturaliter miles nisi Francus, aut Turcus. Veritatemque dicam per omnia, quam nemo audebat refellere: profecto si in fide Christi semper firmi fuissent, & unum Deum in Trinitate manentem, natum Dominum Christum de Virgine matre, & passum, & resurgentem a mortuis tertia die, & in cælum triumphans suis cernentibus discipulis, ascendentem, in cælo & in terra æqualiter regnantem recta mente & fide credent, pru-

dentiores eis aut fortiores in bello numquam inveniri possent. Factum est autem hoc bellum in Kal. Julii. Benedictus trinus, & unus Deus sit, qui ubique dedit victoriam populo suo. amen.

X XIX. Postquam vero Turci, inimici Dei & sanctæ Christianitatis, per omnia jam essent devicti, & per quatuor dies & noctes fugientes huc & illuc, contigit dum Solimanus dux illorum, Solimani veteris filius, de Nicæa fugeret, ut quodam die inveniret decem milia Arabum. qui dixerunt ei: O infelix & miserrime omnium gentilium, cur tremefactus adhuc fugis? Solimanus lacrymabiliter inquit: Olim cum habuissemus omnes Francos devictos, eosque putabamus habere in captivitate ligatos, dummodo paulatim vellemus lucrari ad invicem, respiciens retro vidi tam innumerabilem gentem eorum, quod si vestrum aliquis illic adesset, putaret quod omnes montes, & colles, & valles, & omnia plana loca undique plena essent illorum multitudine. Nos igitur illos cernentes, statim cœpimus carpere repentinam fugam, timentes mirabiliter; & vix evasimus de illorum manibus. Unde adhuc in nimio terrore sumus, & si mihi, & meis verbis vultis credere, auferte vos hinc: quia si potuerint solummodo scire ubi nos simus, unus ex nobis vix amplius vivet. At illi audientes talia, cœperunt retrorsum vertere scapulas, & se se expandere per universam Romaniam. At nos veniebamur persequendo iniquissimos Turcos cotidie fugientes ante nos. sed illi dum surgerent ad castra, quasi amplificabant, sive civitates fingendo, & deludendo habitatores illarum terrarum dicebant: Nos ita dejecimus Christianos omnes, quod nullus eorum umquam audebit se erigere contra nos. Permittite nos locum vestrum intrare. Intrantes autem exspoliabant ecclesias, domos, & alia omnia; & ducebant secum equos, & asinos, aurum, & argentum, & omnia, quæ reperire poterant. Adhuc quoque & Christianorum filios secum adducebant, & devorabant, quæ forent nobis convenientia sive utilia, fugientes & paventes ante faciem nostram. Nos itaque persequebamur illos per desertam, & inaquosam atque inhabitabilem terram, ex qua vix vivi exivimus: quoniam fames, & sitis undique coartabant nos; nihilque penitus nobis erat ad manducandum, nisi forte spicæ, quas vellebamus manibus nostris. De tali cibo quam miserrime vivebamus. Illic fuit mortua maxima pars nostrorum equorum, propter quod multi ex nostris equitibus remanserunt pedites,

& pro indigentia equorum utebantur bubus vice caballorum, & pro nimia necessitate subpeditabant nobis hirci, & arietes, & canes, portantes res nostras.

XXX. Interea cœpimus intrare in optimam terram plenam deliciis, & corporalibus alimentis & omnibus bonis. Hic Comes sancti Ægidii aliquantulum exercitum retardavit causa infirmitatis suæ, quod dicturi sumus, si incredulo ingratum sit: nos tamen satis cognovimus, quod divina clementia operata est; ideoque reticere non debemus. Erat quidam Comes in nostro exercitu de Saxonia, qui ad visitandum Comitem Raymundum venit, & legatum se sancti Ægidii afferebat, & semel & secundo ammonitus ab eo ut diceret Comiti, Esto securus, non morieris de hac infirmitate. Ego enim a Domino indutias impetravi; ego semper ero tecum. Et licet hæc Comes bene crederet, tamen ita ex ea infirmitate affectus fuit; ut depositus de lecto in terram, vix etiam vitalem pulsum haberet. Unde Episcopus Aurasicæ urbis officium quasi defuncto ei impendit. Sed Dei clementia, qui eum ducem præfecerat exercitus sui, de illa ægritudine mortali eum ilico relevavit, & hospitati reddidit.

XXXI. Ac deinde appropinquavimus Iconiam. Habitatores autem illius civitatis præmonuerunt, & persuaserunt nos, ut ferremus nobiscum utres plenos aqua, quia illic in itinere diei unius est maxima penuria & paupertas aquæ: in quo itinere multi ex nostris peregrinis mortui sunt. Nos vero itaque facientes consensimus eorum consiliis, donec pervenimus ad quoddam flumen; ibique hospitati fuimus per duos dies. Cœperunt autem præcursores nostri anteire, donec pervenerunt ad Heracleam, in qua erat nimia Turcorum congregatio, expectans, atque insidians, si quo modo posset Christi militibus nocere & contristare. Quos Turcos postquam milites omnipotentis Dei repperunt, audacter invaserunt. Superati itaque sunt Deo annuente inimici nostri in illa die, dantesque scapulas retro tam celeriter fugiebant, quantum sagitta, quando dividit se ab ictu chordæ. Nos igitur intravimus statim civitatem, atque mansimus illic per quatuor dies. Illic vero ab aliis divisit se Tancredus honorabilis miles Marchisi filius, & Balduinus frater Ducis Gottifredi, & insimul intraverunt in vallem de *Botentroth*. Divisit se rursus Tancredus, & venit Tharsum solummodo cum suis hominibus; exieruntque Turci de ci-

vitae, & venerunt obviam eis, atque in unum congregati præparaverunt se ad bellum contra Christianos. Appropinquantes itaque nostri insimul pugnaverunt: statim inimici nostri fugam fecerunt, revertentes in civitatem celeri gressu. Tancredus autem, vir prudens atque honorabilis Christi miles, persequens illos nimis velociter, laxatis loris castrametatus est ante portam civitatis. Ex alia parte venit Balduinus Comes cum suo exercitu, postulans & deprecans Tancredum acerrimum militem, quatenus eum amicissime in civitatis societatem recipere dignaretur. cui ait Tancredus: Te omni modo in hac societate non recipio. Nocte itaque superveniente tremefacti sunt omnes Turci, & una arripuerunt fugam. Exierunt ergo habitatores civitatis sub ipsa noctis obscuritate, clamantes, atque dicentes excelsa voce: Currite invictissimi Franci, currite, quia Turci exterriti vestro timore omnes pariter recesserunt. Recedente autem nocte, cum lux cœpit paulatim surgere, venerunt civitatis majores, & reddiderunt sponte civitatem, dicentes illis, qui ad invicem litigabant: Desinite modo, desinite, quia illum volumus, & petimus dominari super nos. qui etiam viriliter pugnavit cum Turcis. Balduinus itaque Comes altercans, & litigans cum prudentissimo Tancredo, dicebat: Intremus pariter, & exspoliemus civitatem; & quod prius potest capere capiat. Cui obstabat prudentissimus Tancredus, dicens: Absit hoc a me. ego Christianus nolo exspoliare homines istius civitatis. eligunt me esse illorum dominum, meque habere desiderant. Novissime vero nequivit vir prudens Tancredus diu luctari simul cum Boamundo Comite, quia illi major erat exercitus. Tamen volens nolensque dimisit eum, & viriliter recessit cum suo exercitu. Fueruntque ei statim deditæ duæ optimæ civitates, videlicet Athenia, & Mamistra, & universa castella usque Antiochiam.

XXII. Pars vero alia intravit in Armeniorum terram, sitiens Turcorum sanguinem. Tandem pervenerunt ad quoddam castellum, quod tam forte erat, quod ei nihil potuerunt facere. Erat autem ibi homo, cui nomen Symeon, qui in illa ortus regione, hanc petiit terram, quo eam de manibus inimicorum Turcorum defenderet. quam sponte illi dederunt, quique remansit ibi cum suo exercitu. Nos autem exeuntes inde, pervenimus feliciter usque Cæsaream Cappadociæ. A Cappadocia vero egressi, venimus ad quamdam civitatem valde

pulcherrimam, & nimis uberrimam, quam paululum ante adventum nostrum obsederant Turci per tres hebdomadas, eamque minime superaverunt. Mox illa advenientibus nobis continuo tradidit se in nostras manus cum magna lætitia. Hanc igitur petiit quidam miles, cui nomen Petrus, ab aliis nostris majoribus, quatenus eam defenderet in fidelitate Dei, & sancti Sepulcri, & illorum, cui statim cum nimio amore concesserunt eam. Recedente autem die & nocte appropinquante, audiuit bellicosus vir Boamundus, quod Turci, qui fuerant in obsessione civitatis, paululum præcederent nos. Extemplo præparavit se solummodo cum mille equitibus, quatenus illos inventos disperderet: sed eos non potuit invenire.

XXXIII. Deinde venimus ad quamdam civitatem, in qua erat maxima ubertas, referta scilicet omnibus bonis, quæ nobis erant necessaria. Christianos igitur videntes alumni illius civitatis, confestim dederunt se se: nosque fuimus ibi satis optime, atque illic maxime sunt recuperati nostri. Postea vero exeuntes, inde intravimus in diabolicam montaneam, quæ tam nimis erat alta atque angusta, quod nullus nostrorum audebat per tramitem ejus, aut per semitam, quæ in monte patebat, juxta alium ire. Illic præcipitabant se se equi & unus sarcinarius equus præcipitabat alium. Milites ergo stabant undique tristes, & dolentes, claudabant & stringebant manus præ nimia tristitia atque dolore, dubitantes quid facerent de semetipsis, & de suis armis. Vendebant ergo suos clypeos, & loricas nimis optimas, & galeas, solummodo pro tribus, aut sex denariis: qui autem vendere nequibant, ultro jactabant, & ibant. Exeuntes igitur de execrata montanea pervenimus ad quamdam civitatem, quæ vocatur *Marasim*. Cultores autem illius civitatis exierunt lætantes obviam nobis, deferentes maximum mercatum: illicque sat habuimus omnem copiam, ibique expectavimus donec veniret caput nostrum, videlicet fortissimus miles Boamundus. Veniens itaque vir sapiens Boamundus, ilico equitaverunt omnes nostri equites, & applicuerunt in valle illa, ubi regalis civitas Antiochiæ sita est, quæ est caput totius Syriæ, quam Dominus JESUS-CHRISTUS tradidit beato Petro Apostolorum principi, qui tenus eam ad culturam sanctæ Fidei revocaret, qui est benedictus in sæcula, sæculorum, amen.

XXXIV. Cumque cœpimus appropinquare ad pontem fer-

reum, præcursores nostri, qui semper solebant præcedere nos, invenerunt Turcos congregatos ad Antiochiam, qui dare eis adjutorium festinabant. Irruentes igitur nostri uno corde & mente super illos, cum Christi invocatione atque adjutorio vehementer eos superaverunt. Confusi omnes barbari, arripuerunt celerius fugam, & multi mortui sunt ex eis in illo certamine. Nostri igitur superantes illos Deo adjuvante, illic acceperunt spolia multa, videlicet equos, & mulos, asinos, & camelos onustos frumento, & vino & farina, & carne. Venerunt itaque prospere nostri, & feliciter castrametati sunt super ripam fluminis. Protinus equitavit vir sapiens Boamundus, cum quatuor milibus militum, & ivit vigilare ante portas civitatis, ne forte aliquis nocte latenter exiret, aut intraret civitatem. Nihil tamen in illa nocte invenire potuit. Crastina autem die pervenerunt usque ad Antiochiam ad medietatem diei in quarta feria, quod est duodecimo Kal. Novembris, & obsedimus mirabiliter portas civitatis, quoniam in alia parte deerat nobis locus obsidendi: quia alta & nimis angusta montanea coartabat nos: tamen totum planum viriliter obsedimus. Hæc namque civitas valde est pulchra, & honorabilis, & intra muros ejus sunt quatuor maximæ montaneæ & nimis altæ: in altiori vero parte est castellum ædificatum nimis mirabile, & forte, & habet quatuordecim turres: deorsum est civitas honorabilis, atque conveniens, omnibusque ornata honoribus, quæ ecclesias trecentas, & quadraginta monasteria continet. Sub suo quoque jugo continet Patriarcha centum LIIII Episcopos. Clauditur civitas a duobus muris. Major quoque valde est altus, & mirabiliter latus, magnisque lapidibus compositus, in quo sunt ordinatæ quadringentæ quinquaginta turres. Modis omnibus est illa civitas formosa: ab oriente clauditur a quatuor magnis montaneis; ab occidente secus civitatis muros fluit quoddam flumen, cui nomen Farfar.

XXXV. Neque oblivisci debeo hoc, quod audientes Turci gentem Christianam venire super illos, atque civitatem obsidendam; continuo congregati sunt in unum omnes majores, & ordinauerunt concilium, dicentes, ut per unamquamque portam mitterentur præcones, qui ejicerent omnes Christianos, qui bellum facere possent extra civitatem, nisi illos qui forte abnegare Christum vellent. Timebant enim valde, ne
isti

isti Christiani venturis peregrinis civitatem traderent; ideoque jusserunt ut eicerentur foras presbyteri, diaconi, & monachi, & omnes pariter laici, videlicet Græci, Armeni, & Suriani, & omnes, qui arma bajulare valebant, exceptis mulieribus, & parvis infantibus. Erant autem præcones ante portas civitatis ordinati, qui circabant exeuntes Christianos, ne forte aliquid auri, argentique secum portarent, nihilque aliud eis auferre permittebant, nisi solummodo viles vestes. Patriarcham vero retinuerunt ligatum in ferreis vinculis, dicentes: Ille sanctus est, & si exierit, forsitan per ejus preces capiemur à Christianis, qui foris sunt. Christiani vero illi ejecti fuerunt una nobiscum de foris in obsidione, & feminæ eorum intus cum Turcis. Mulieres plorabant propter suos viros, & viri similiter propter mulieres & infantes, ipsique mendicabant per castra nostra, veniebantque omnes isti ejecti Christiani cum immensa processione ad honorabilis viri Boamundi tentorium cum prece & *Kyrieison*, plorantes, & deprecantes dominum Boamundum, ne discederet inde prius quam civitas fieret capta, & ipsi quandoque suis mulieribus jungerentur, & filiis. Mox advenientibus nobis illuc, invenimus in flumine naves, quod flumen erat tam magnum, quod nullus nostrorum transire poterat nisi per pontem. Illi vero ordinaverunt naves super flumen, & fecerunt ingentem pontem, unde transibant omnes nostri, & ibant, & veniebant ad portum, & ad montaneam, & per eum veniebant Græci & Armeni deferentes maximum mercatum. Tantum jam timebant nos Turci, qui erant in civitate, quod nemo illorum audebat offendere aliquem ex nostris fere per spatium dierum quindecim.

XXXVI. Mox hospitati circa Antiochiam, reperimus illic de rore cæli abundantiam, videlicet vineas undique plenas, foveas plenas frumento, arbores refertas pomis jocundis ad edendum, & alia multa bona, quæ alimentis corporeis sunt convenientia. Armeni & Suriani abnegaverunt Christum, qui in civitate manebant, & ibi suas uxores habebant exeuntes; & ostendentes se fugere, cotidie erant una nobiscum. Illi autem ingeniose investigabant nostrum esse & nostram qualitatem, illique referebant omnia quæ videbant facta foris his qui erant conclusi. Postquam Turci fuerunt edocti de nostra notitia atque facto, cœperunt paulatim extra civitatem exire, nostrosque peregrinos angustiare; & non solum ex una parte,

sed undique erant latentes , & insidiantes contra nos ad mare , & ad montaneam. Erat autem non longe ab hoste castellum quoddam , cui nomen Chorca , ubi congregati erant multi fortissimi Turci , qui frequenter conturbabant homines.

XXXVII. Audiens itaque sapiens Boamundus , quod Turci per tot vices dilaniarent & vexarent nostros peregrinos , nimis ingemuit. Mandavit itaque aliquantulos ex suis militibus , dicens : Ite in protectione Christi & Dei , & diligenter investigate , si forte poteritis invenire locum , ubi illi latere solent. Reperto itaque loco , ubi illi nequissimi latebant insidiando nostris : qui subtiliter surgentes ubi erant reconditi insequiebantur illos. At nostri paulatim cesserunt retro , ubi sciebant eorum dominum esse reconditum cum suo exercitu. Ante vero quam liceret reverti , ubi erat acerrimus miles Boamundus , fuit mortuus Alberadus de Cagnano , & Hermannus de Cannis perdidit suum equum. Alii quoque veniebant fugientes , & Turci illos persequentes , ac coartantes , usque dum pervenirent ubi dominus illorum erat : statimque cœperunt una voce clamare , & dicere : Succurre nobis , domine , succurre nobis , carissime , succurre nobis in opportuno tempore , quia ecce jam Turci ex omni parte coangustant & conquassant nos. Hoc audito surrexit ille ut fortissimus Christi athleta. Ilico Barbari irruerunt contra illos , quoniam nostri erant pauci , atque omnes insimul juncti inierunt bellum. Mortui sunt & capti multi ex nostris inimicis in illa die , & fuit maxima lætitia in totis castris nostris Christianorum. Illi autem qui vivi fuerant detenti , ducebantur ante civitatis portam , & decollabantur ibi , ut eos respicerent illi , qui in civitate erant.

XXXVIII. Exhibant quoque alii de civitate , & ascendebant supra nos in quamdam petram , & ita sagittabant , quod sagittæ eorum cadebant in domini Boamundi plateam : & una die quædam mulier occubuit ictu celeris sagittæ. Congregati sunt itaque omnes nostri majores , & ordinaverunt concilium , dicentes : Male tractant nos cotidie inimici nostri Turci ; faciamus igitur castrum in vertice montis (qui mons erat supra exercitum honorabilis viri Boamundi) quo securi atque tuti possimus permanere de Turcorum fortitudine. Facto itaque castro , quod omnes majores ad invicem vigilabant , jam jam cœperant frumentum , & vinum , & omnia alimenta corporis

nimis esse cara ante Domini nostri JESU-CHRISTI Nativitatem. Foras penitus non audebamus exire, nihilque intra Christianos invenire ad vendendum poteramus: in Sarracenorum nemo audebat intrare terram, nisi duceret secum maximam gentem.

XXXIX. Ad ultimum statuerunt majores nostri omnes congregati in unum concilium, quemadmodum has recte regerent gentes. Inventum itaque est in concilio, quatenus una pars nostri iret diligenter adtrahere dispendium, & ubique custodire exercitum: alia quoque pars fiducialiter remaneret custodire castra. Boamundus itaque fortissimus miles prius protulit se ante alios, & dixit: Prudentissimi milites, si vultis, & bonum honestumque vobis videtur, ego iturus ero una cum Roberto prudentissimo Flandrensi Comite. Celebratis itaque gloriosissime sollemnitatibus Nativitatis Domini in die lunis, videlicet sexta feria egressi sunt illi & alii plusquam quinque milia milites, & pedites, & sani & incolumes intraverunt in Sarracenorum terram. Congregati quippe erant multi Turci, & Arabes, & Sarraceni ab Jerusalem, & Damasco, & Aleph, & ab aliis regionibus in unum, qui veniebant ut fortitudinem Antiochiæ darent. Audientes vero isti quod Christianorum gens esset conducta in illorum terra, ilico paraverunt sese ad bellum contra Christianos, atque in summo diluculo venerunt in locum, in quo gens nostra erat in unum. Diviseruntque se Barbari, & fecerunt duas acies, unam aciem ante, & alteram retro, cupientes ex omni parte circumcingere nos. Egregius autem Flandrensis Comes undique regimine fidei, atque signo Crucis, quam fideliter cotidie bajulans, armatus occurrit ille una cum prudentissimo Boamundo, irrueruntque nostri unanimiter super illos. Qui statim arripuerunt fugam, & festinanter verterunt scapulas retro, & mortui sunt multi ex illis: alii qui remanserant vivi, velociter fugientes ierunt ex tunc usque nunc in ira perditionis. Nos autem reversi sumus cum magno gaudio atque tripudio, onerati omnibus bonis, laudantes & magnificantes trinum & unum Deum, qui vivit, & regnat nunc & semper in ævum, amen.

XL. Factum est hoc prælium in die sancti Silvestri, quod est uno die stante mense Decembri. Turci vero, videlicet inimici Dei & sanctæ Christianitatis, qui erant in custodia civitatis Antiochiæ, audientes dominum Boamundum & Comitem Flandrensem in obsessioe non esse, exierunt de civitate, &

Anno
1098

audacter veniebant præliari nobiscum. Insidiantes itaque ex qua parte plus esset obsessio languida, scientes illos prudentissimos milites foris esse, invenerunt quod in una die martis possent lædere, & obstare nobis. Venerunt itaque iniquissimi barbari cooperte, & irruerunt vehementer super nos, nescientes nos hoc bellum, atque ignorantes; occideruntque multos ex nostris militibus & pædonibus. Episcopus namque Podiensis in illa amara die suum perdidit senescalcum conducentem, & gerentem ejus vexillum: & nisi esset flumen, quod erat inter nos, & illos, sæpius invaderent nos, atque nimiam læsionem multotiens in nostra gente fecissent, & in nostras laxatis frenis concurrerent tendas.

X L I. Regrediebatur autem vir prudens Boamundus simul cum suo exercitu de Sarracenorum terra, venitque in Tancredi montaneam, cogitando si forte inveniret aliquid quod deferre posset; totamque terram in expendio miserunt. Alii invenerunt, alii vero vacui redierunt. Illi namque, qui invenire non poterant, protinus reverti festinabant. Tunc vir sapiens Boamundus increpavit eos dicens: O infelix & miserrima gens, & ô vilissima omnium & dolentissima omnium Christianorum, cur tam cito vultis abire? finite modo, finite. usquequo erimus omnes congregati in unum? & nolite errare sicut oves non habentes pastorem, ne forte inimici nostri inveniant nos errantes, qui diu noctuque vigilant atque excubant, ut nos sine ullo ductore segregatos, atque solos inveniant, & nos occidere, atque in captivitatem ducere laborant. Cumque finis esset dictis, respiciens ante & retro, cum jam invenisset se undique solum, tamen cum illis, quos reperire potuit, ad suum revertit exercitum, plus vacuis quam onustis.

X L I I. Videntes hoc Armeni & Suriani, quod nostri penitus vacui redissent, nihilque secum deferentes; consiliati in unum abibant per montaneas, & per præscita loca subtilia, inquirentes, & deferentes frumentum & corporea alimenta, eaque ad exercitum deferebant, in quo fames erat immensa: & vendebant, Sarraceni scilicet, asini onus octo porporatis, qui appretiati erant viginti denariorum solidi: in qua fame quidem multi mortui sunt ex nostris, qui non habentes pretium unde tam carum emere potuissent.

Guilielmus igitur Carpentarius, & Petrus Eremita pro

immensa infelicitate ac miseria , quas in se sciebant , insimul consiliati latenter recesserunt. Quos Tancredus honestissimus miles persequens , illos segregatos apprehendit , secumque duxit cum magno dedecore : dexteramque & fidem illi dederunt , quod libenter ad castra redirent , & satisfactio- nem majoribus facerent : totaque nocte Petrus Eremita , uti mala res , in tenda domini Boamundi jacuit. Crastina autem die in summo diluculo venit erubescendo ante domini Boamundi præsentiam. Hunc alloquens vir sapiens Boamundus prudentissime inquit : O infelix & infamia totius Franciæ , ô dedecus & scelus Galliarum , & ô nequissime omnium quos terra suffert , cur tam turpiter fugisti ? forsitan propter hoc nequam , quod voluisti tradere hos milites Christi , sicut tradidisti alios in Hispania. qui omni modo tacuit , & nullus sermo de ore ejus processit. Adunaverunt itaque sese omnes Francigenæ , & rogaverunt humiliter dominum Boamundum Christi militem , ne deterius ei fieri permetteret. At ille annuit sereno vultu dicens : Hoc pro vestro amore libenter consentiam , si mihi corde toto & mente jurare voluerit , ita quod numquam erit recessurus ab Jerosolymitano itinere , sive bono , sive malo : & Tancredo fortissimo militi , neque per se , neque per alios suos amicos aliquid contrarii facere consentiat. quod statim auditis his verbis libenter concessit. Ipse autem protinus dimisit eum. Postea vero Carpentarius , maxima captus turpitudine , non diu moratus , iterum furtim recessit. Hanc paupertatem atque miseriam pro nostris delictis concessit nobis habere Deus.

XLIII. In toto autem exercitu non valebat aliquis invenire mille milites , qui equos haberent optimos. Interea inimicus *arti ejus audiens quod exercitus Turcorum veniret super nos , arbitrans nos omnes perire , atque in manibus inimicorum incidere nostrorum , fingens & componens omnia fallacia quæ assidua fingere potuerat , dixit : Viri prudentissimi , videte : nos sumus hic in nimia necessitate coacti , & ex nulla parte adiutorium nobis succedit. Ecce modo finite me in Romaniam reverti regionem absque nulla dubitatione. Ego vero faciam huc multas naves venire per mare onustas frumento , vino , hordeo , carne , farina , & caseo , & omnibus bonis alimentis , quæ sunt nobis necessaria , adhuc autem & equos faciam duci huc ad vendendum , & mercatum per terram infidelis Imperatoris.

huc advenire cito faciam. Sic itaque fecit finem dictis : Ecce omnia hæc fideliter jurabo à me implenda fore : adhuc quoque , & domestici mei , & papilio meus jugiter in campo sunt : & ullo modo nolite esse increduli , sed firmiter credite , quia ego quam citius reversurus ero. Ivitque ille inimicus , & omnia sua dimisit penitus in campo eo tenore , quod nunc , & modo & semper perjurus erit.

XLIV. Erat autem in Antiochia quidam Ammirarius , qui omni modo erat perfidus , immitis , superbus , & ferus , qui tantum odiebat Christianos , quod ubicumque eos invenire poterat , trucidabat. Forte duodecim Christiani fuerunt in Romanæ prælio capti , & in captivitatem Antiochiam deducti erant : quos iste nequissimus suis byzantis comparavit , illosque pane , vino , & carne satiavit , simulans quod eos valde diligeret. Cumque jam læti illa satietate gaudebant , putantes quod infelix hoc pro Christi amore fecisset , ac eos a captivitatis vinculo liberare voluisset , & Christianis peregrinis mandare incolumes , mox ille inimicus jussit omnes eosdem Christianos ante se adduci , & super altiorem turrem scandere præcepit , ac deinde dari præcipites , ut eorum membra & ossa dilaniata atque dissoluta jacerent : quia iste pravus Christianorum non diligebat fidem. Quadam enim die exiit , ut Christianos occidere posset cum duobus militibus : obviam quibus advenit Petrus Raimundi de Pullo : alios occidit , illum autem vivum apprehendit , dixitque statim ille : Noli me interficere , quia Ammirarius ego sum , & duos fratres in urbe habeo , qui pro me duas turres reddent. Adduxeruntque eum ante Boamundi portam , ut cum suis loqueretur fratribus , qui videntes eum voluerunt turres reddere continuo : sed turres in tali loco erant , quod nihil esset in eis nostri proficui. Tunc Armeni plorabant , & obsecrabant ne hic dimitteretur vivus. Audientes nostri hoc jusserunt interficere eum , & ita factum est.

XLV. In obsessione autem Antiochiæ civitatis mortuus fuit honestissimus atque prudentissimus Episcopus de Ruscinulo : in prælio quoque Pontis-ferrati frater ejus Comes vulneratus in crure , & ea occasione mortuus fuit. Postquam vero Antiochia fuit capta , mortuus fuit Petrus Raimundi de Pullo , cujus corpus requiescit ante sancti Petri portam. Nostri majores consiliati sunt , ut facerent fossatum circa castra , ne forte cum exissent foras causa attrahendi quod necessarium erat , inimici

irruerent super eos qui ad tentoria vigilarent.

XLVI. Reversi sunt nostri nuntii de Babylonia simul cum nuntiis Ammirarii, qui Ammirarius mandavit nostris primatibus fideles salutes, subjungens: Hæc sciatis quia ero ego in vestro ubique adjutorio, quia valde vos diligo & amo, & obviam vobis in Jerusalem in vestro adjutorio ero, si meam non devastaveritis terram. Fuerunt illi nuntii nobiscum honeste per duos dies: & cum illis remandaverunt primates nostri alios meliores nuntios; sui que nuntii qui à nobis recesserunt, mala nova de nobis dixerunt, scilicet quod Christi exercitus carebat equis. Hoc audiens Ammirarius apprehendit nostros nuntios, eosque misit in carcerem, donec Antiochenum factum fuit prælium: & Turcis ubique jam devictis, statim venit cum suo exercitu, & obsedit Jerusalem, & ejecit de ea omnem Turcorum multitudinem, & mandavit quod fideliter pacisceretur nobiscum, & valde honestavit & vestivit nostros. Sic itaque tali modo. Erat autem nobis maxima contrarietas, quod Turci undique constringebant nos, ita quod nullus nostrorum audebat jam exire extra tentoria: tantus erat Turcorum timor. Illi autem constringebant nos ab una parte, & fames angustabat nos ab alia. Nosque eramus valde tristes ac dolentes. Majores quoque nostri in nimio erant pavore. Succursus quidem & adjutorium nobis penitus deerat. Gens minuta & pauperrima fugivit, alii Cyprum, alii in Romaniam, alii in montaneas: ad mare utique non audebamus ire pro timore pessimorum Turcorum: nullatenus erat nobis via patefacta.

XLVII. Forte quidam Turcus captus in Romania fuit, senex & albus ceu lana alba. Hunc dominus Boamundus habebat in carcere in vinculis ligatum ferreis, qui cotidie ad dominum Boamundum nuntios mandabat, & clamabat dicens: Aut me ad Christianitatem revocet, aut mihi caput detruncet, & noli aliquid dubitare in me. Dixitque vir sapiens Boamundus: Melius est hunc ad Christianitatis culturam revocare, quam ei caput truncare. Jussitque quod Christianus efficeretur homo ille: & ita factum est, deditque ei equos & arma, nomenque ei impressit Hilarius. Continuo ille novus Christianus ambulabat: nimis enim ab omnibus amabatur: sed tamen quia ille ortus erat ex impia & infideli generatione, cum videret exercitum Dei valde modicum esse, quem viderat maximum, in ejus confestim cor inimicus diabolus intravit,

Nocte itaque latenter recessit, & venit in *Aleph* civitatem; accessitque ad Ammirarium, & dixit ei: Ecce nova tibi dico. Christianorum castris mox venio. Si vis utique aurum, aut argentum, equos, & mulos, & honesta ornamenta, quæ de Galliarum duxerunt patriis, veni mecum ad Antiochiam: quoniam Boamundus vir fortis non habet secum plusquam quinquaginta equites, alique minus & minus: omnes namque milites prudentissimi recesserunt. Feminae solummodo stant in campo, & minuta gens. Audiens itaque Ammirarius hæc nova, valde gavisus est, & confestim advocavit omnem suum exercitum. Ille autem qui Christianitatem abnegaverat, protinus ivit Damascum, & Tripolim, & Cæsaream, omnibus dicens hæc nova. Omnes igitur de terris illis congregati in unum venerunt Antiochiam usque prope Pontem-ferreum.

XLVIII. Fortissimus itaque miles Boamundus audiens innumerabilem Turcorum gentem venisse super nos, putantem occidere nos omnes, caute venit ad alios, & dixit: O prudentissimi milites, quid facturi erimus? ecce enim innumerabilis Turcorum exercitus venit super nos, qui volunt nos omnino perdere. Nos autem tot non sumus, quod in duabus partibus pugnare valeamus. Faciamus ergo ex nobis duas partes: pars peditum remaneat jugiter custodire papiliones nostros, & obsistat his, qui in civitate stant; & pars equitum simul nobiscum veniat in occursum inimicorum nostrorum, qui hic stant prope nos in castro, quod vocatur Arenæ, ultra Pontem-ferreum.

XLIX. Sero autem jam facto exiit de tentoriis vir sapiens Boamundus simul cum aliis prudentissimis militibus; venitque jacere inter flumen & lacum. Summo autem diluculo jussit dominus Boamundus protinus speculatores exire, & videre, quot essent Turcorum turmæ, & ubi essent, aut certe quid agerent. Exierunt illi, & cœperunt subtiliter inquirere & investigare, ubi acies Turcorum essent reconditæ. Viderunt autem Turcos innumerabiles segregatos venire ex parte fluminis, divisos per duas acies: maxima autem illorum virtus veniebat retro. Reversi sunt itaque celeriter speculatores nostri dicentes: Ecce veniunt, estote igitur omnes undique parati, qui jam prope nos sunt. Dixitque vir prudens Boamundus aliis: Inviictissimi milites ordinate ad invicem bellum. Responderuntque illi: Tu vir sapiens & prudens, tu magnus & magnificus,

magnificus, tu fortis & victor, tu bellorum arbiter, tu certaminis iudex, hoc totum fac, hoc totum super te sit: omne vero quod utile, & bonum tibi videtur esse nobis & tibi, diligenter operare, & fac. Tunc doctissimus Boamundus iussit, ut unusquisque per se dirigat suam aciem per ordinem. Feceruntque ita: & ordinatæ sunt sex acies, quinque autem ex eis erant adunatim invadere illos. Sapientissimus itaque vir Boamundus paulatim gradiebatur retro cum sua acie.

L. Junctis itaque ambabus partibus, unus cominus percutiebat alium. Clamor utrimque resonabat ad cælum; omnes præliabantur insimul: imbres telorum obnubilabant aerem. Postquam venit maxima virtus paganorum, quæ erat retro, nimis acriter invasit nostros, ita quod nostri jam paululum cedebant retro. Ut autem doctus vir Boamundus vidit cedentes retro, ingemuit. Tunc præcepit suo Conestabili, scilicet Roberto filio Girardi, diligenter exhortans eum taliter: Vade quam citius potes, & recordare prudentiam antiquorum & nostrorum fortium parentum, quales fuerunt, & qualia bella fecerunt; sisque sapiens & prudens, sisque fortis & acer, contuens in adiutorium Dei, & sancti Sepulcri: & revera scias, quia hoc bellum carnale non est, sed cæleste. Esto igitur jugiter memor & providus, & sapiens, & fortissimus Christi athleta: vade in pace, & Dominus ubique sit tecum. Ivit itaque ille undique signo crucis armatus, ut fortissimus Christi athleta, & sicut sapiens & prudens, qualiter leo, qui passus famem per tres aut quatuor dies, exit à suis cavernis, rugiens, atque sitiens sanguinem animalium; irruit inter agmina peditum, & separavit ut oves fugientes huc & illuc, ita agebat iste inter Turcorum agmina: tam vehementissime superstabat illis, quod linguæ honorabilis vexilli volitabant super Turca capita. Videntes autem aliæ acies, quod vexillum domini Boamundi tam prudentissime foret ante alios delatum, ilico reverterunt, & invaserunt unanimiter illos. Turci omnes stupefacti arripuerunt fugam, & verterunt scapulas retro. Nostri itaque illos persequentes detruncaverunt usque ultra Pontem-ferreum. Reversi Turci festinantes in suum castrum, acceperunt omnia, quæ ibi reperire potuerunt, totumque castrum spoliaverunt, miserunt ignem, & fugerunt. Videntes autem Turci, quod male fuissent deducti consilio supradicti sacrilegi, qui Christianitatem abnegaverat, dixerunt: Tu filius perditionis, qui ita deduxisti nos in manus

Francorum. Et si ad eorum accessissemus tentoria, quid de nobis fieret? si illic fuisset inventi, unus ex nobis vix residuus esset. Ecce illi occiderunt nostros fratres atque parentes, & socios: tu ergo amplius non vives. Confestim ei dederunt capitalem sententiam. Armeni & Suriani scientes omnino nos Turcos superasse, exierunt, & observaverunt arcta loca, & occiderunt, & apprehenderunt multos ex eis: & intrantes tenuerunt castellum in fidelitate honorabilis Tancredi. Superati sunt itaque Deo annuente in illa die inimici nostri: satis vero sunt recuperati nostri de equis, & de aliis multis rebus, quæ erant illis valde necessariæ, & detulerunt secum capita mortuorum Turcorum. Factum est in die martis ante caput jejunii favente nobis Domino JESU CHRISTO, qui cum Patre, & Spiritu-sancto vivit & regnat per immortalia sæcula sæculorum, amen.

Anno
1099.

L I. Reversi sunt itaque nostri hæc agente Deo triumphantes, ac tripudiantes de triumpho, quem in die illo habuerunt devictis ubique inimicis, qui erant per omnia superati, fugientes huc & illuc, vagantes & errantes: alii in Corasanum, alii vero in Sarracenorum introierunt terram. Videns autem Cassianus Ammirarius Antiochiæ, quod Franci omnia vicissent bella, & Turcos ubique superassent, contristatus est valde cum omnibus illis, qui in civitate erant: statimque cum eis consiliatus est, ut mitteret nuntios Corasanum Corbanæ principi militiæ Soldani Persiæ, quatenus ei subveniret cum suo exercitu, quia Franci eum obsidebant in Antiochiam. Itaque festinando mandavit Senhadolum filium suum ad Corbanam, uti quanto citius veniret, & sibi statim daret Antiochiam, & aliis daret militibus aurum & argentum, & multa ornamenta: & si hoc agere noller, sciret se Antiochiam perdidisse: sicut Solimanus perdiderat Nicæam & universam Romaniam, sic vero Cassianus perderet Antiochiam. Hoc in re vera sciret Corbanas, quod Franci adhuc expellerent turbas de Corasano, & de Persia, & de omni paganorum terra.

L I I. Inter hoc inimici pagani multis modis lædebant nostros. Videntes autem hoc nostri majores, quod interea male tractarent nos, & constringerent inimici nostri, qui erant in civitate, qui jugiter diu noctuque vigilabant, & insidiabantur, qua parte nos lædere & angustiare possent; congregati in unum habuerunt colloquium, ut subtiliter possent investigare,

quemadmodum valerent eorum insidiis ac dolis contra stare. Quo invento dixerunt omnes una voce: Priusquam perdamus gentem nostram, mandemus Liciæ civitati, & omnibus castellis, & portui sancti Symeonis, & nostram colligamus gentem, cum qua faciamus castellum ad machomariam, quæ est ante civitatis portam; & forsitan ibi poterimus inimicos constringere nostros. Consensere consilio, & laudaverunt omnes quod valde bonum esset ad faciendum. Egregius autem vir Boamundus, & Tancredus una cum sancti Ægidii Comite dixerunt aliis: Si vos omnes vultis, nos adunatim ibimus ad sancti Symeonis portum diligenter conducere illos, qui illic sunt, omnes homines, qui hoc fideliter peragant opus. Et dixerunt: Alii, qui hic sunt remansuri, undique muniant sese ad defendendum, si forte inimici exierint nostri: & in loco illo sint omnes congregati, ubi nos demonstravimus. Factumque est ita. Illi autem cœperunt protinus equitare cum fiducia ad portum. Nobis igitur congregatis insimul, quatenus castellum ædificaremus; Turci videntes hoc illico præparaverunt sese ad defendendum, & exierunt civitatem obviam nobis ad bellum, irrueruntque maxima pars illorum super nos. Alia vero pars separavit se, & perrexerunt obviam illis, qui veniebant a mari. Videntesque Turci nostros homines & milites, cœperunt continuo stridere & clamare vehementissimo clamore, circumcingendo, & sagittando, & vulnerando, ac crudeli ubique detruncando ense: denique tam acriter invaserunt nostros, quod inierunt nostri fugam per proximam montaneam, ac ubicumque via eundi patebat: & qui potuit se celeri expedire gressu, evasit vivus: qui fugere nequiverunt, pro Christi nomine martyrium susceperunt lati. Raynaldus igitur Porchitus custodiebat dominum suum Boamundum, quem omnes alii dimiserant. Sed ejus equus per tres vices subter eum lapsus, apprehenderunt eum Turci, & duxerunt illum per aliam partem fluminis in Antiochiam. Fueruntque in illa die multi martyrizati ex nostris, qui in cælum latantes ascendebant, atque candidati ferentes stolam recepti martyrii, glorificantes ac magnificantes trinum & unum Deum, in quo feliciter triumphabant, & clamabant ad Dominum, una voce dicentes: Quare non defendis sanguinem nostrum, qui effusus est hodie pro tuo nomine? Equites autem nostri fugiendo adjuvante Deo evaserunt vivi.

LIII. Dominus itaque Boamundus recordatus viam, quam

alii tenuerunt, non tenuit, sed celerius venit cum suo exercitu laxatis frenis, donec proquinquasset usque ad nos, qui eramus in unum congregati in custodiam civitatis. Tunc nos in unum pervenimus contra eos ad vicinum bellum, eosque invasimus corde & animo. Stabant autem inimici Dei Turci stupefacti, & vehementer perterriti reversi sunt retrorsum, & arripuerunt celerem fugam per medium angusti pontis ad illorum tentoria. Illi autem qui vivi non potuerunt evadere pontem præ nimia multitudine gentium & caballorum, ibi receperunt sempiternum interitum, & reddiderunt infelices animas diabolo & ejus ministris. Nos itaque illos superatos impellebamus in flumen cum nostris mortiferis lanceis. Unda quoque rapidi fluminis ubique videbatur fluere rubea de Turcorum sanguine. Et si forte aliquis eorum voluisset repere super pontis columnas, vel natando moliretur ad terram exire; nos undique super fluminis ripam stantes impellebamus eos, & necabamus impetu rapidi fluminis. Rumor interea amborum populorum resonabat ad cælum. Pluvia telorum tegebatur cælum: altæ voces perstridebant intus & extra. Christianæ mulieres universæ civitatis spectabant de muris misera facta Turcorum, & venientes gavisæ ad illud spectaculum propter nimium gaudium plaudebant manibus, sicut mos est illorum. Mortui sunt autem in anima & corpore duodecim Ammirarii de Turcorum genere in prælio illo, & omnes prudentissimi illorum milites, qui oppugnando defendebant civitatem: ac deinde illi, qui reliqui fuerunt, jam ulterius non audebant clamitare, neque garrere in die, vel in nocte. Itaque nos & illos non dissepavit nisi nox, quæ dividebat utrosque præliando, & jaculando & spiculando. Superati sunt itaque in illa die inimici nostri sic, ut ulterius non valuerunt jam talem habere virtutem neque in opere. Et fuerunt mortui in bello illo omnes principes & majores illorum, quorum numerus fuit mille quingenti de fortioribus & melioribus, qui in Antiochiæ civitatis defensione erant.

LIV. Nocte autem superveniente, reverterunt retro Turci, & absciderunt capita mortuorum Christianorum, & detulerunt ea in civitatem: alia vero die summo mane ejecerunt illa foras cum manganellis. Quod videns vir honorabilis Boamundus, fecit ea colligi, & sepeliri, & fuerunt nostri in nimio mærore. Nos itaque valde fuimus recuperati de illorum

equis, & de aliis rebus, quæ satis nobis erant necessaria. Crastina autem die exierunt, & venerunt alii de civitate, & collegerunt omnia cadavera Turcorum, quæ reperire potuerunt super ripam fluminis, & sepelierunt collecta cadavera ad machomariam, quæ est ante portam civitatis, & simul cum mortuis illis sepeliebant pallia, byzantios, arcus, & sagittas, & alia plurima ornamenta, quæ nos omnia nominare nequimus. Audientes itaque nostri quod humassent Turci mortuos suos in capite pontis, confestim omnes præparaverunt sese, & venerunt festinantes ad diabolicum atrium, & jusserunt frangi illorum tumbas, & trahi illorum cadavera extra sepulturam, & ejecerunt omnia illorum cadavera in quamdam foveam, & deportaverunt cæsa capita eorum ad nostra tentoria: quatenus perfecte sciretur eorum numerus. Quod videntes Turci, nimis fuerunt tristes, dolentesque usque ad necem: & quotidie nihil aliud quibant agere, nisi plorare, & ululare. Tertia autem die veniente cœpimus gaudentes & exultantes ædificare castrum illud jam supradictum de eisdem lapidibus, quos abstraximus desuper humata Turcorum cadavera.

LV. Peraçto itaque castro, mox cœpimus ex omni parte coangustare prudenter inimicos nostros, quorum tumida superbia ad nihilum jam erat redacta. Quod castrum unusquisque majorum fecit per partes, & munierunt illud muro & immenso aggere, & ædificaverunt in eo duas turres in machomaria. Omnes vero principes nostri commiserunt castrum Comiti sancti Ægidii ad custodiendum, eo quod stabat ante ejus portam. Ipseque custodiebat illud cum suo exercitu cum Gastone de Bearno, & Petrus de Castellone, & Guilielmus de Montepislerio, & Raimundus de Taurina, & Girardus Malafaida, & Galferius * de *Lasturs*, & Petrus Raimundus de Pollo, Guidelmus de Supera, & alii plures, quos numerare nequeo. Et ipse Comes, quoscumque milites invenire poterat, retinebat ad conventionem ad custodiendum castrum, eosque solvebat suis denariis. In uno autem die summo diluculo irruerunt Turci vehementer super illos qui custodiebant castrum, & occiderunt Bernardum de Pardilo, & alios plures; etiam tentoria illorum erant cooperta infixis sagittis: & nisi esset succursus, qui venit de alia acie, maximam læsionem eis fecissent. Statim ordinaverunt primates nostri, ut facerent maximam calpam vitis, cum qua possent perforare pontem: & fuerunt

multi Turci de melioribus occisi, & pons fuit perforatus. Nocte vero dormientibus nostris exierunt, & incenderunt talpam, & restauraverunt pontem. Nos autem secure jam ambulabamus huc & illuc ad portam, & ad montaneam.

LVI. Non post multum temporis venerunt inimici Dei, & duxerunt Rainaldum Porchitum, de quo heri locuti fuimus. Quem miserunt supra civitatis murum, ut loqueretur cum Francis, quatenus eum redimerent maximo munere. Ille vero postquam supra murum fuit, locutus est majoribus nostris ita: Seniores, tantum namque valet, quam si ego mortuus essem; & pro me redimendo nullum munus offeratis. Sed estote fortes atque prudentes, quia Deus nobiscum est. Omnes majores atque prudentes inimicos heri occidistis, nullusque hic est qui præliari valeat, neque civitatem regat vel defendat. Interrogaverunt autem Turci interpretes, quid ille dixisset. Qui respondit: Nihil boni propter nos. Continuo jusserunt illum deponi de muro. Dixeruntque ei: Rainalde vis honeste nobiscum vivere, & gaudere? qui ait, Quomodo? dixeruntque illi: Abnega Deum tuum, quem tu colis, dabimusque tibi omnia quæ petieris, aurum & argentum, equos, & arma, & multa ornamenta, uxores, & prædia, hereditates, & maximo honore ditabimus te. Dixitque ille: Date spatium mihi saltem per unam horam, quo mecum tractem consilium. Quod permisit ei. Tunc Rainaldus projecit se in oratione junctis manibus contra orientem, humiliter Deum rogans, ut ei subveniret, suamque animam in sinu Abrahæ dignaretur suscipere. Mox advocavit eum Ammirarius, dixitque interpreti: Quid ait Rainaldus? dixitque interpres ei: Suum Deum nullo modo abnegare vult, & omnia tua ornamenta, videlicet aurum, argentum, abnegat. Tunc Ammirarius jussit decollari: & decollaverunt eum virum sanctum supra firmam petram fundatum. Animam ejus confestim sancti Angeli susceperunt, & ante conspectum Dei, pro cujus amore martyrium suscepit, gaudentes obtulerunt.

LVII. Iratus itaque Ammirarius vehementer, eo quod sanctum Rainaldum ad suam non potuit revocare voluntatem, statim jussit ad se adduci omnes Christianos, qui in Antiochia capti erant, masculos, & feminas. Cumque ante eum venissent, imperavit ut exspoliarentur omnes. Cum vero exspoliati essent, fecit eos stricte congregari in unum, & allata fune ligaverunt eos omnes in gyrum: adduxeruntque paleas, & fenum,

& circa eos ordinaverunt, ac deinde miserunt ignem, & ligna. Igitur Christi milites in illo tormento valde stridebant: quorum voces resonabant ad cælum directæ ad Deum, pro cuius amore eorum carnes & ossa in igne cremabantur. Martyrizati sunt omnes isti in uno die, & dealbati portaverunt in cælum candidas stolas ante Deum, pro quo fideliter hæc passi sunt, regnante Domino nostro JESU-CHRISTO, cui est honor & gloria nunc & semper in sempiterna sæcula, amen.

LVIII. Jam jam semitæ pœne abscisæ undique erant Turcis, nisi ex illa parte fluminis, in qua erat quoddam castrum in quodam monasterio. Quod si perfecte fieret corroboratum, jam nullus eorum auderet extra civitatis portam exire. Deceverunt autem nostri una concordabili voce dicentes: Eligamus unum ex nostris, qui custodiat inimicis montaneam & planum, & introitum, & exitum. Plures vero ex illis renuebant singulatim se illud servare non posse, nisi cum magna multitudine aliorum. Tancredus igitur honorabilis miles protulit se ante alios dicens: Verumtamen si datis mihi subsidium aliquod pecuniæ, ego sedulo solummodo cum meis hominibus corroborabo castrum, & viam per quam inimici nostri solent frequentius ire, viriliter illis omni modo deventabo. Quod continuo sponponderunt ei quater centum marcas argenti. Audax ergo Tancredus perrexit cum suis solummodo honestissimis militibus, & servientibus, & extemplo abstulit undique viam & semitam Turcis, ita quod nemo illorum audebat jam timore perterritus extra civitatis portam exire propter herbam, ligna, vel ulla necessaria.

LIX. Remansit autem ibi vir prudens Tancredus simul cum suis hominibus, & cœpit vehementer angustiare civitatem. Ipsa quoque die veniebat maxima pars Armeniorum & Surianorum secure de montaneis, qui ferebant alimenta Turcis in adiutorium civitatis. Obviam quibus advenit vir prudens Tancredus, & continuo apprehendit illos, & omnia quæ deferebant, videlicet frumentum, vinum, hordeum, oleum, & alia hujusmodi. Sic itaque prospere, robusteque habebat se vir fortis Tancredus, ut fortissimus Christi athleta, omnes semitas Turcis aliis . . . usque dum Antiochia capta fieret. Omnia quæ fecimus, antequam Antiochia capta fuisset, nequeo enarrare: de his autem, quæ facta sunt postea, aliquantulum volo explicare. Ideo aliquantulum dico, quia nemo est, qui

omni modo, sive clericus, sive laicus, dicendo, aut scribendo possit narrare sicut res est acta.

LX. Videntes autem Turci quod ita districtio esset in civitate, & omnes eorum majores interfecti fuissent, tristes dolentesque erant. Ab illo autem tempore, quod Turci in Antiochiam, heu pro Christianorum delictis ac offensionibus, intraverunt, ejecerunt de beati Petri ecclesia honorabilem Patriarcham, cum quingentis canonicis, & monachis, & aliis clericis: eisque jusserunt ut irent ad sanctæ Mariæ Dei genitricis ecclesiam; ibique devote Deo suo deservirent: & ipsi Turci tenuerunt, potius fœdaverunt ecclesiam sancti Petri, & de illa Domo Dei fecerunt tria oracula diabolo: omnesque imagines, quæ auro argentoque erant pretiosissime compositæ, atque mirabiliter per totam ecclesiam fulgebant, cooperuerunt calce, vel gypso; & per omnem imaginem scripserunt litteras dæmonum. Fecitque Ammirarius suum oraculum valde pretiosissimum & ornatum auro ante ecclesiæ portam in dextera parte, præcipiendo ut nullus Christianorum veniret ibi. Audiens itaque Patriarcha, quod sancta ecclesia ita foret dedecorata, nimis dolens & gemens de pretiosissimis imaginibus, quæ coopertæ erant: mandavitque Ammirario, ne pretiosissima nostri Salvatoris imago operiretur, quæ in medio tabulati cæli ecclesiæ mirabiliter ordinata erat, & ne dedecoraretur ab aliquo per ullum ingenium: & ipse redimeret eam per unumquemque annum quingentis solidis. Tunc concessit illi Ammirarius hoc. Hæc omnia fuerunt facta, priusquam nostri Franci peregrini movissent iter.

LXI. Quadam vero die, cum civitas jam esset districta ab obsidione, dum in ecclesia sancti Petri essent Turci congregati causa concilii, quia ibi adunabant se ad concilium faciendum, quoniam erat valde pulcherrima, & admirabili pavimento decorata. Dum inquam consiliarent secum, quemadmodum facerent de obsessione Francorum, suspicientes viderunt in cælo prædictæ ecclesiæ imaginem nostri Salvatoris tam puram ac pretiosissimam, & tam promptam, quasi cum eis loqueretur. Cui dixerunt: Quid agis hic rustice? Homines tui obsident nos extra, & hic nos observas? Certe nec te, nec tuos homines amplius volumus. Nunc autem descende de sursum: sin autem sagittabimus te illic, si descendere inde non vis. Cœperunt itaque continuo sagittare illum; nullaque sagitta illorum audebat

debat se se appropinquare ad Domini imaginem : & si forte aliqua sagitta aliquantulum ei approximabat, confestim divina fracta virtute ad Turcorum cadebat pedes. Cumque vidissent quod nihil ei sagittando nocerent, irati valde, tunc iussit Ammirarius ut unus illorum ascenderet sursum, ubi imago erat sita, ut eam in terram præcipitaret. Cum vir fiducialiter iussu illius Ammirarii ascendisset, & ad pulcherrimam imaginem appropinquare vellet, mox fracto sub pedibus ejus ecclesiæ cælo cecidit ille; fractoque statim collo, omnibus membris dissolutis jacebat mortuus in ecclesia. Videntes hoc alii, nimio terrore correpti sunt.

LXII. Erat autem ibi quidam Ammirarius de genere Turcorum, cui nomen Pyrrhus, qui maximam amicitiam cœperat assidue cum domino Boamundo. Hunc sæpe vir sapiens Boamundus tangebatur cum nuntiis ad invicem missis, quomodo eum intra civitatem amicissime reciperet: eique Christianitatem promittebat, atque eum valde divitem multo honore facere mandabat. Consensit itaque ille dictis, & promissionibus honestissimi viri dicens: Tres turres ego custodio, easque ei libenter promitto; & quacumque hora voluerit, in eis ipsum voluntarie recipiam. Erat ergo doctissimus vir Boamundus jam securus de introitu civitatis. Gavissus itaque placido vultu serenaque mente venit ad alios omnes principes militiæ, eisque jocunda verba protulit hoc modo: Viri prudentissimi, videtis quomodo nos in nimia paupertate, atque miseria projecti sumus: majores & minores ignoramus penitus ex qua parte melius succedat nobis. Si vobis igitur dulce ac honestum videtur, eligat sibi alios unus unus quicumque vult: & si ullo modo aut ingenio civitatem acquirere aut per se, aut per alios potuerit, concordabili voce ei donari eam permittimus. Quod omni modo prohibentes atque denegantes, ei dicebant: Nemini singulariter unquam erit hæc civitas dimissa, ad omnes æqualiter habebimus illam: sicuti habuimus æqualem laborem, sic inde habebimus æqualem honorem. Hoc audito honestissimus vir Boamundus paululum subfidens protinus recessit. Non post multum temporis audierunt omnes nostri de exercitu hostium nostrorum, videlicet Turcorum, & Publicanorum, Agulanorum & Azymitarum, & aliarum plurimarum generationum gentilium, quas numerare, nec nominare nescio: statimque adunaverunt se omnes insimul majores, &

fecerunt consilium dicentes : Si vir sapiens Boamundus poterit acquirere civitatem aut per se, aut per alios, nos una libenti corde ultro ei donamus eo tempore. Quod si infelix Imperator venerit nobis in adiutorium, & omnem conventionem nobis, sicuti promisit atque juravit, complere voluerit, nos eam reddemus : sin autem, Boamundus in sua semper habeat eam potestate. Mox itaque vir sapiens Boamundus cœpit per internuncios cotidiana humiliter suum flagitare amicum petitione in hunc modum. Ecce tempus habemus modo idoneum, in quo possumus operari quicquid boni volumus. Igitur adjuvet me modo amicus meus Pyrrhus. Quod satis gavisus de nuntio, ait se illum velle adjuvare omnino, sicut promiserat. Nocte itaque proxima veniente mandavit filium suum caute pignus domino Boamundo, eo quod magis fieret securus de civitatis introitu ; & cum filio misit verba hæc : Cras omnem Francorum gentem sub voce præconia moneri faciat, ut in Sarracenorum terram cum eo deprædari vadat, & deinde revertatur celeriter per sinistram montaneam ; & ego ero intentus præstolando illa agmina, eaque diligenter recipiam in turres, quas in mea habeo custodia. Deinde vir prudens ac sapientissimus Boamundus protinus iussit ad se vocari servientem quemdam, videlicet Malam-coronam, eique præcepit ut præconia gentem Francorum maximam, quod fideliter præparent se ad eundem in Sarracenorum terram. Factum est ita.

LXIII. Commisit itaque vir sapiens Boamundus hoc consilium Duci Gottifredo, & Flanrensensi Comiti, quod si placeat Deo, in hac nocte erit nobis Antiochia dedita. Ordinata sunt hæc omnia : equites tenuerunt plapa, & pedites montaneam. Tota nocte ambulaverunt usque prope auroram, ac deinde cœperunt appropinquare ad turres, quas ille vigilabat. Continuo descendit Boamundus vir plenus magna astutia, & præcepit omnibus dicendo hæc verba : Ite securo animo & felici concordia, & ascendite per scalam in Antiochiam, quam statim habebimus, si Deo placet, in nostra virtute. Veneruntque illi usque ad scalam, quæ jam erat directâ, & fortiter ligata ad civitatis propugnacula mergula. Ascendit primus Paganus, & post eum ascenderunt ex nostris fere sexaginta, ac divisi sunt per turres, quas ille vigilabat. Videns autem hoc Pyrrhus, quod tam pauci ascenderant ex nostris,

mox cœpit pavere. Timebat namque sibi ex nostris, ne in manus Turcorum inciderent : dicens : *Micro Francos echome*, hoc est , Paucos Francos habemus. Ubi est acerrimus Boamundus? ubi est miles invictus? Descendit ergo quidam serviens Longobardus , & cucurrit quantocius ad honorabilem virum Boamundum , & dixit : Quid hic stas vir prudens ? Quam ob rem venisti ? Ecce nos jam tres turres habemus. Motus est ergo ille vir prudens cum aliis , & omnes gaudentes atque latantes pervenerunt usque ad scalam. Videntes itaque illi , qui jam erant in turribus, cœperunt jocundam vocem clamare, *Deus loquitur*. Nos itaque similiter *Deus loquitur* dicebamus. Et cœperunt de nostris mirabiliter continuo ascendere , & ascenderunt , & occurrerunt festinantes in alias turres : quoscumque illic inveniebant , mortalem illis continuo dabant sententiam. Fratrem quoque Pyrrhi occiderunt. Interea forte rupta fuit scala , & nostris non erat ascensus , unde maxima angustia est orta sive tristitia. Quamquam fuisset fracta scala, tamen quædam porta erat clausa juxta nos in sinistra parte, quibusdam incognita : & licet nox erat , tamen invenimus eam palando , & subtiliter intrando , ubi ipsa latebat ; omnesque cucurrimus ad eam, & fracta porta intravimus per illam. Jam immensus fragor mirabiliter resonabat per universam civitatem. Non acquievit prudens Boamundus : ilico imperavit honorabile vexillum deferri sursum ante castellum in quodam monte. Summo autem diluculo audientes illi , qui erant foris ad tentoria , vehementissimum rumorem strepere in civitate, exierunt festinantes : & videntes vexillum domini Boamundi sursum in monte , celeri cucurrerunt cursu , & venerunt properantes unusquisque ad suam portam , & intraverunt civitatem ; & interfecerunt Turcos & Sarracenos , quos ibi repereunt , extra illos qui fugerunt sursum ad arcem. Feminae vero fugiebant videntes Francos intrasse civitatem , ferentes iconas in manibus suis & cruces , decantantes *Kyrieleyson* ad ecclesiam virginis matris Dei Mariæ. In illa die extraxerunt Patriarcham , qui erat jam per octo menses in carcere , habens marcida fere crura pro stricta compedum , & nequibat expedite ambulare. Tunc cucurrerunt omnes majores ad eum , & corruiebant proni ante ejus pedes. Alii vero ex militibus Turcorum exierunt per medias portas , & fugientes evaserunt vivi.

LXIV. Cassianus ergo dominus illorum expavescens valde, se dedit omnino fugæ cum multis aliis qui erant cum eo: & fugiendo pervenit in Tancredi terram, non longe à civitate. Fatigatis eorum equis miserunt se in quoddam casale, & mersi sunt in quamdam domum. Cognoverunt ergo habitatores illius montanæ eum, scilicet Armeni, & Suriani: statim apprehenderunt illum, truncaverunt caput ejus, & detulerunt illud ad civitatem ante domini Boamundi præsentiam, unde mererentur accipere libertatem perfectam. Baltheum quoque ejus, & cultellum, & vaginam, qui fuerunt appreciati sexaginta byzantos. Hæc omnia gesta sunt tertia die intrante mense Junii in die Jovis. Omnesque autem plateæ civitatis jam undique plenæ stabant cadaveribus mortuorum, videlicet Turcorum, & Sarracenorum, ita quod quisquam vix poterat sufferre esse ibi præ nimis fœtoribus, nullusque poterat ire per civitatem nisi super cadavera Turcorum.

LXV. Curbanas autem princeps militiæ Soldani Persiæ adhuc erat apud Corasanum, cui Cassianus Ammirarius Antiochiæ multas legationes miserat, quo sibi succurreret in opportuno tempore: quoniam gens fortissima atque robustissima Francorum eum graviter obsidebant in Antiochia: & si ei adjutorium fideliter impenderet, Antiochenam continuo civitatem suis traderet manibus, aut eum dicaret mox magno munere. Cum ergo habuisset Curbanas maximum exercitum Turcorum, ex longo collectum tempore, & licentiam Christianos occidendi à Caliphis illorum Apostolico recepisset; ilico inchoavit tunc longum iter versus Antiochiam. Jerosolymitanus Ammirarius venit cum eo, cum suo exercitu; Rexque Damasci cum magna gente. Idem vero Curbanas congregavit ex omni parte paganorum innumeras gentes, videlicet Turcos, & Arabas, & Sarracenos, & Publicanos, & Azymitas, & Curtos, & Persas, & Agulanos, & alias multas gentes, quas nominare, aut numerare nemo poterat. sed Agulani fuerunt numero tria milia. Ipsi neque lanceas, neque sagittas, neque ulla arma timebant: quia omnes undique erant cooperti ferro, & equi eorum, ipsique nolebant in bellum ferre arma, nisi solummodo gladios. Isti omnes venerunt in obsessionem Antiochiæ ad dispergendum Francorum populum. Et cum appropinquassent civitati, occurrit filius Cassiani Ammirarii Antiochiæ, & confestim cucurrit ad Curbanarum.

lacrymabiliter, rogans eum, & dicens: O invictissime Princeps, te supplex deprecor, tuamque humili devotione prudentiam rogitō, quatenus mihi succurras modo, quoniam ecce Franci undique obsederunt me in Antiochena arce, civitatemque in suo continent imperio; nosque alienare à regione Romanæ & Syriæ, adhuc autem & Corosani deposcunt. Omnia vero patrauerunt, quæ cupierunt: patrem nuper occiderunt meum, nihil aliud superest nisi ut me, & te, & omnes alios ex genere nostro interficiant gladio. Ego jamdudum tuum expectavi fideliter adventum, ut mihi succurras in isto periculo. Qui respondens ait illi: Si vis quod ex toto corde in tuum sim proficuum, tibi que fideliter in isto succurrā negotio, illud in meam statim manum trade castrum: & tunc videbis qualiter in tuo ero adjutorio, & vigilare eum à meis faciam hominibus. Ait namque ille: Si potes omnes Francos occidere & detruncare, mihi que eorum capita diligenter tradere, ego castrum tibi fideliter dabo, ac deinde ero ubique tuus effectus homo, & in tua fidelitate hoc custodiā castrum. Cui Curbanas inquit: Non ita erit, ut tu putas atque cogitas: sed continuo in meam manum committe castrum illud. Tunc ille volens nolensque ei ilico commisit castrum.

LXVI. Tertia autem die postquam civitatem percurrerunt, Rogerius igitur de Bernavilla contra exivit solummodo cum viginti equitibus. Appropinquantibus autem Turci cœperunt continuo præliari cum eis. Forte equus, in quo sedebat, in quadam palude infixus est, & cecidit. Erectus autem statim est super suos pedes, & evaginato ensē mirabiliter defendebat se de Turcorum invasione. Tunc accedentes Arabes cum longis cannis vulneraverunt caput ejus. Nos autem sublevavimus corpus ejus à terra, & deportavimus in civitatem ad sancti Petri ecclesiam: ibique honestissime sepultus est, cujus anima exultat cum Angelis. Unde maxima tristitia atque dolor fuit in tota Christi militia, quia acerrimus ille erat atque bellicosus miles, ipseque multos militares actus faciebat. Exercitus autem illorum ad Pontem-ferreum castrametatus est, & oppugnaverunt unam turrim, & occiderunt omnes, quos illic invenerunt. Et nemo evasit vivus, nisi dominus illorum, quem reperimus ligatum in vinculis ferreis, facto majore bello. Crastina autem die appropinquaverunt usque civitatem, & castrametati sunt inter duo flumina, steteruntque ibi per

duos dies. Recepto itaque castro, tunc Curbanas confestim advocavit unum Ammirarium ex suis, quem sermone sciebat vivacem, mitemque & pacificum, & ait illi: Volo ut intres in fidelitate mea hoc custodire castellum, propterea quod ex tempore longissimo scio te mihi nimis fidelissimum. Ideoque precor te, ut summa cautela hoc contineas oppidum. Scio enim te in opere prudentissimum, nullumque magis veracem & fortem hic modo reperire queo. Cui Ammirarius ait: Tibi inquam de tali nolo obedire officio, sed priusquam me tuo arguas stimulo, hoc consentiam eo tenore, quod si Franci ejecerint nos de nostro confinio, continuo eis dabo castellum. Cui Curbanas dixit: Tam honestum, prudentemque te cognosco, quicquid agere vis age; ego utique consentio. Reversus itaque Curbanas, & voluit intrare in castellum. Dixitque illi Ammirarius: Si vis, accipe de Cassiani auro, & omnes milites, qui hic sunt, si volunt tecum venire, veniant modo cum suis mulieribus & infantibus. Vade, & occide omnes Francos, & deinde revertere, & tuum recipe castrum; ego autem modo nullam castelli fortiam tibi reddo.

LXVII. Riccardus autem de Principatu, & Tancredus; qui Syriacam linguam sciebant, consulebant cotidie Ammirario, ut domino Boamundo redderet castrum, & ille sibi daret honorem maximum. At ille dicebat: Videtis hic Curbanam meum dominum. si autem eum poteritis ejicere de campo statim vobis reddam castrum. Reversus est itaque Curbanas festinanter ad suum exercitum in vallem, in qua erat castrametatus, scilicet ante civitatis introitum. Protinus Turci deludentes Francorum collegium, ante conspectum Curbanæ quemdam vilissimum ensẽm rubigine tectum attulerunt, & teterrimum, & arcum ligneum, & lanceam nimis inutilem, quæ abstulerunt nuper pauperibus peregrinis, dicentes: Ecce arma, quæ adduxerunt Franci contra nos ad pugnandum. Tunc Curbanas videns hæc arma, cœpit ridere in propatulo, dicendo omnibus, qui in illo aderant contubernio: Hæc sunt arma bellica, atque nitida, quæ adduxerunt super nos Christiani in Asiam, orti in Occidentali terra, quibus armis putant ac confidunt nos expellere, & propulsare ultra Corosani confinia, & delere omnia nostra nomina ultra Amazonia flumina, vel ultra superiorem Indiam, ceu propulsarunt

nostros parentes de Romania, & Antiochia civitate regia, quæ est honorabile caput totius Syriæ. Continuo advocavit ad se suum fidelem notarium, & ait: Scribe cito plures chartas, quæ in Corosanum sunt legandæ, scilicet Calipha Apostolico, & nostro Regi dominq, & Soldano militi fortissimo, atque omnibus prudentissimis Corosani militibus salus, & vita, & immensus honor. satis sint læti & gavisi, & satisfaciant ventribus, imperentque, & sermocinentur per universam regionem illam, & omnimodo dent se se ad petulantiam & luxuriam, ut multos filios patrare valeant, quo contra Christianos fortiter bellare possint, & libenter suscipiant hæc trina arma, quæ olim abstulimus à Francorum turma. Et sciant modo quæ adduxerunt super nos gens Francia, qualiter sint optima, atque perfecta concertare contra nostra arma, quæ sunt bis aut ter, sive quater colata ceu argentum & aurum purissimum. Adhuc quoque sciant, quoniam ego omnes Francos intus in Antiochia habeo inclusos, & cæstum in mea libera voluntate, illi autem deorsum sunt in civitate. Ego namque habeo jam jam illos omnes in mea potestate: aut eos faciam capitalem subire sententiam, aut deducam Corosanum in captivitatem perpetuam, eo quod minantur nos suis armis propulsare, & expellere ultra Corosani confinia, aut delere omnia nostra nomina ultra Amazonia flumina, aut ultra superiorem Indiam, ceu ejecerunt nostros parentes de cuncta Romania, sive Syria. Vobis namque juro per Machomet, & per omnia deorum nomina, quoniam ante vestram non ero reversurus præsentiam, donec regalem Antiochiam, & omnem Syriam, sive Romaniam atque Bulgariam, usque dum Apuliam acquisiero mea forti dextera ad deorum nostrorum honorem, & omnium Turcorum de nostro genere. Hic fecit finem dictis.

LXVIII. Mater autem ejusdem Curbanas, quæ erat in Aleph civitate, statim accessit ad eum lacrymabiliter, & dixit: Fili si est vera quæ audio? Cui ille ait, Dic quæ. Et dixit illa: Jam audiivi quod bellum vis committere simul cum Francorum genere. Cui ille ait: Verum hoc verum omnimodo scias. Dixitque illa: Contestor te fili per deorum nomina, & per tam magnam immensamque bonitatem, ne bellum cum Francis committere velis, quoniam tu es miles invictus, & nullam imprudentiam de te, aut tuo exercitu umquam pe-

nitus audiui, & de campo ab aliquo victore fugientem quicumquam minime invenit. Diffamata est enim tua militia ab Oriente usque ad Occidentem, & omnes prudentes tuo milites audito nomine solummodo contremiscunt. Satis namque scimus fili, quoniam tu es bellipotens, & fortis, & bellorum ingeniosus, nullaque gens Christianorum nec paganorum ante tuum conspectum aliquam virtutem habere potuit: sed fugit audito solummodo tuo nomine, quemadmodum oves ante leonis furorem fugiunt. Ideoque obsecro te, carissime & dilectissime fili, ut meis acquiescas consiliis, & ne umquam in tuo sedeat animo, quod bellum incipere velis cum Christianorum collegio.

LXIX. Tunc Curbanas materna audiens monita, feroci quoque respondit sermone: Quæ sunt ista, mater, quæ mihi refers? puto enim te forte insensatam aut furia plenam. Enimvero plures mecum habeo Ammirarios, quam ipsi Christiani sint, promiscue majores & minores. Responditque ei mater ejus: O dulcissime fili, Christiani nequeunt vobiscum bellare. Hoc satis scio, quod ipsi non valent pugnam inferre nobiscum: sed eorum Deus pro ipsis cotidie pugnat, eosque die noctuque sua protectione defendit, & vigilat super eos, sicut pastor vigilat super gregem suum, & non permittit eos ipse lædi nec conturbari ab ulla gente; & quicumque volunt eis obsistere, idem eorum Deus statim conturbat illos, sicuti idem ait per os Prophetæ David: *Effundam iram meam in gentes, quæ te non noverunt & in regna, quæ nomen tuum non invocaverunt.* Ante etiam quam Christiani præparati sunt ad incipiendum bellum, eorundem omnipotens Deus simul cum suis sanctis omnes jam habent inimicos devictos. quanto magis faciet modo vobis qui estis ejus inimicus, & qui præparatis vos obsistere sua tanta virtute? Hoc namque carissime in rei veritate scias, quoniam Christiani isti filii Dei vocati sunt, & per Prophetarum ora filii adoptionis ac promissionis vocantur, & proprie dicti heredes Christi sunt, quibus Christus hereditates repromissas jam donavit, dicendo: *A solis ortu usque ad Occidentem erunt termini vestri: ita quod nemo audax stabit contra vos.* Et quis potest his omnibus contradicere & obstare? Certe si hoc bellum contra illos incœperis, maximum tibi erit damnum ac dedecus: & multos milites tuos fideles perdes, & universa spolia, quæ apud te

te habes, in nimio pavore fugiendo redibis. sed tu in bello non morieris modo. Propterea dico tibi, quod non morieris modo, quoniam Deus eorum non statim judicat offendentem exerta ira, sed quando vult eum punit manifesta vindicta. Ideo timeo, ne te judicet pœnali angustia, & tibi dico modo, quia morieris in hoc anno.

LXX. Curbanas autem valde dolens in intimis visceribus, maternis auditis sermonibus respondit: Mater carissima, quæso quis tibi dixit ista de gente Christiana, quod Deus ejus tantum eam amat, & quod ipse pugnandi in se virtutem retinet maximam, & quod illi Christiani vincent nos in Antiocheno prælio, & quod ipsi erunt nostra capturi spolia, & nos persecuturi cum immensa victoria, & quod in hoc anno ero moriturus morte subitanea? Tunc respondit ei mater ejus dolens: O fili carissime, ecce plusquam centum annorum tempora præterierunt, ex quo inventum est in nostra pagina & in omnium gentilium voluminibus, quod gens Christiana super nos foret ventura, & nos ubique victura, & super nos regnatura, & nostra gens illi ubique foret subdita: sed ignoro an ista sit illa victrix, an alia ventura postea. Et ego utique dolens non desivi sequi te in *Aleph* civitatem pulcherrimam, in qua speculando, atque ingeniose rimando cæli respexi castra, & planetas duodecim, polorum signa, fortes quoque, & numerosum equitatum: & in his omnibus reperi, quod gens Christiana esset nos ubique superatura. Ideoque timeo valde dolens & nimis mæstissima, ne ego infelix remaneam orbata de te fili. Dixitque illi Curbanas: Mater dulcissima, dic mihi omnia quæ in corde meo sunt dubia. Quæ respondens ait: Hoc dulcissime libenter faciam. Audi me dulcissime fili. Deus Christianorum est potens super omnes deos, & omnia quæcumque vult facit in cælo, & in terra. Ipse movet gentes ad pugnam, & quos ipse movet, ipse eos adjuvat, & donat victoriam. Dicit ei Curbanas: Dic mihi, quare sic diligit eos Deus eorum? Cui mater respondit: Quia serviunt ei die ac nocte, & abstinent se a peccatis, & maxime quia isti per suam venerunt jussionem, ut auferant suum Sepulcrum de potestate paganorum, & reducant eum in potestate Christianorum, qui ei serviunt caste & nitide potius quam nos. Et Curbanas: Hoc non credo, nec desistam cum eis præliari. Audiens itaque mater ejus, quod nullo modo acquiesceret ejus consiliis, vehementer dolens recessit retrorsum in *Aleph*

civitatem, deferens secum universa spolia, quæ deferre potuit.

LXXI. Tertia vero die armavit se Curbanas, & maxima pars Turcorum cum eo, veneruntque ad civitatem ex illa parte, in qua castrum erat: nostri autem putantes resistere eis, paraverunt bellum contra illos. Sed tam magna virtus fuit illorum, quod nos nequivimus illis resistere, & volentes nolentesque nos intravimus civitatem: nobisque fuit tam mirabiliter arta & angusta porta, quod multi fuerunt illic mortui oppressione aliorum. Interea alii pugnabant extra civitatem, alii intus in sexta feria per totum diem usque ad vesperam. Inter hos Guilielmus de Grandemasneda, & Albericus frater ejus, & Ibo, & Guilielmus de Bruilla, & Guido Tursellus, & Guilielmus filius Riccardi, & Jambertus pauper, isti viles omnes & detestabiles, timore perterriti de hesterno bello, nocte latenter dimissi sunt cum funibus per murum, fugeruntque pedibus suis contra mare; ita quod neque in manibus, neque in pedibus nihil aliud remansit, nisi sola ossa. Multique alii fugerunt cum illis, quos nominare ignoro. Venientes igitur ad naves, quæ erant ad portum sancti Symeonis, dixeruntque nautis: Quid statis hic miseri? Omnes nostri mortui sunt, & nos de morte vix evasimus, quia exercitus Turcorum undique eos obsedit, & obsidet in civitate. At illi audientes talia, stabant omnes stupefacti, ac timore perterriti: cucurrerunt statim in naves, & miserunt se in mare. Deinde supervenientibus Turcis, quos invenerunt occiderunt; & naves quæ in alveo fluminis remanserant, combusserunt igni, & apprehenderunt spolia eorum. Nunc revertamur ad nos, qui remansimus in civitate, & nequiebamus sufferre pondus, neque arma illorum. Fecimus ergo murum inter nos & illos, quem vigilabamus die noctuque. Interea tanta oppressione famis fuimus oppressi, quod equos & asinos nostros manducabamus.

LXXII. Quadam autem die stantibus nostris majoribus sursum ante castellum cum dolore & tristitia, venit quidam sacerdos, nomine Stephanus, ante eos, & dixit: Si vobis placet, fratres & domini, audite quamdam rem, quam ego in visione vidi. Dum essem unâ nocte in ecclesia sanctæ Mariæ matris Domini nostri Jesu-Christi, apparuit mihi Salvator mundi simul cum sua Genitrice, & cum beato Petro Apostolorum principe, stetitque ante me, & dixit mihi: Agnoscis me? Cui respondi, Non. His dictis, ecce apparuit integra crux in capite ejus. Iterum ergo interrogavit me Dominus dicens: Agnoscis me? Cui

ego dixi: Te alio modo non agnosco, nisi quia crucem in capite cerno tuo, sicuti Salvatori meo. Qui dixit: Ego sum. Tunc ego cecidi ad pedes ejus. Rogavi humiliter eum ut nobis subveniret, & liberaret ab oppressione execrata gentis, quæ super nos erat. Responditque Dominus: Bene hæcenus adjuvavi vos, & bene deinceps adjuvabo. Ego subjeci vobis Nicæam civitatem, & in omnibus præliis victoriam dedi, & induxi vos usque huc, & condolui vestræ miseriæ, quam passi fuistis in Antiochiæ obsidione. Ecce in opportuno tempore intromisi vos sanos & incolumes in ipsam civitatem, & vos multam pravam delectationem operati estis cum Christianis & paganis mulieribus, unde immensus fœtor ascendit in cælum. Tunc alma Virgo & beatus Petrus ceciderunt ante pedes ejus, rogantes eum & deprecantes, ut suum populum in hac tribulatione adjuvaret. Domine per multa tempora tenuit, immo & fœdavit pagana gens domum meam, & in ea multa ineffabilia mala fecerunt: modo vero expulsis inimicis Angeli lætantur in cælo. Dixitque mihi Dominus: Vade ergo & dic populo meo, ut revertantur ad me, & ego revertar ad illos, & intra quinque dies mandabo eis adjutorium; & cotidie decantent *R. Congregati sunt inimici nostri*, totum cum versu. Hoc si non creditis esse verum, finite in hanc ascendere turrim, mittamque me deorsum. Siero incolumis, credite esse verum: sin autem ullam læsionem fuero passus, decollate me, aut in ignem projicite. Tunc Podiensis Episcopus jussit afferri Evangelia & crucem, ut juraret ille hoc, quod dixerat esse verum. sicque factum est. Consiliati sunt itaque omnes nostri majores in illa hora communiter jurare, quod nullus illorum fugeret, quamdiu vita superesset eis. Primo dicitur jurasse Boamundus, deinde Comes sancti Ægidii, & Robertus Normannus, & Dux Gottifredus, & Comes Flandrensis. Tancredus autem juravit sic, quod quamdiu secum quadraginta milites haberet, nec ex illo bello, nec etiam Jerusalemitano itinere esset recessurus. Et nimis exaltata est omnis Christianorum congregatio hoc audiens sacramentum.

LXXIII. Erat autem ibi quidam peregrinus de exercitu nostro, cui nomen Petrus Bartholomæus: cui, antequam civitatem intravissemus, apparuit sanctus Andreas dicens: Quid agis bone vir? Cui ille respondit: Tu qui es? dixit Apostolus: Ego sum Andreas apostolus. hoc tibi præcipio fili, cum intraveris urbem, vade ad ecclesiam beati Petri fratris mei, ibique

invenies lanceam Salvatoris nostri Jesu-Christi, cum qua in crucis pendens patibulo vulneratus fuit. Vade, & dic Podiensi Episcopo & Raimundo Comiti sancti Ægidii, ne timeant neque paveant, quia Deus cum illis est. His dictis Apostolus continuo recessit. Ille autem Peregrinus timens revelare consilium Apostoli, noluit indicare aliis peregrinis, æstimabat enim se visum fallacem videre. In alia ergo hora apparuit ei iterum sanctus Andreas dicens: Quid agis Petre? Cui ille respondit: Tu qui es? dixitque illi: Ego sum Andreas apostolus. Quare non demonstraſti Episcopo & Comiti revelationem, quam tibi ostendi? Et dixit illi: Domine, quis hoc credet? Tunc assumpsit eum sanctus Andreas, & duxit eum in visu usque ad illum locum, ubi lancea erat recondita in terra. Iterum autem cum essemus ita, ut superius dictum est, venit sanctus Andreas rursum dicensei: Quare non abstulisti lanceam, ut ego tibi præcepi? Scias re vera, quia quicumque hanc lanceam in bello habuerit, numquam ab hoste superabitur. Ipse autem continuo revelavit mysterium Apostoli Episcopo, & Comiti, & aliis Peregrinis. Populus autem non credebat, sed prohibebat dicens: Quomodo possumus hoc credere? quod omni modo erant paventes atque timentes, & protinus mori putabant. Accessit itaque ille, & juravit hoc totum veracissimum esse, quod iterum sanctus Andreas in visione venit dicens: Surge, & vade, & dic populo Dei ne timeat neque paveat, sed firmiter toto corde credat in unum verum Deum, eritque ubique victor, & intra quinque dies mandabitei Dominus talem rem, unde læti & gavisi manebunt: & si certare voluerint, statim quod exierint unanimiter ad bellum, omnes illorum inimici undique stabunt jam victi, & nemo stabit contra illos.

LXXIV. Audientes itaque nostri hoc, protinus cœperunt se lætificare, & confortabant se ad invicem dicentes: Expergiscimini, & estote ubique fortes ac prudentes, quoniam in proximo erit nobis Deus in adiutorium, & erit maximum refugium populo suo, quem respicit in mærore manentem. Turci autem qui erant in castello, undique tam mirabiliter coangustabant nos, quod quadam die incluserunt tres milites ex nostris in quadam turre, quæ stabat ante eorum castellum. Exierunt namque gentiles, & irruerunt super illos tam acriter, quod illi nequebant jam sufferre pondus illorum. Duo exierunt de nostris vulnerati, & tertius per totum diem viriliter se defendit de

Turcorum invasione tam prudentissime, quod in illa die duos Turcos mortuos stravit super aditum muri cæsa hasta. nam tres hastas detruncaverunt illi die illa in manibus suis. Erat autem nomen ejus Ugo Forsonea, de exercitu Joffredi de Monte-sca-bioso. Videns vir valentissimus Boamundus, quod nullatenus posset conducere gentem sursum contra castellum ad bellum, conclusa utique latebat in domibus sive pro fame, sive pro timore Turcorum, iratus est valde; jussit itaque confestim im-mitti ignem in illam partem civitatis, ubi Cassianum palatium erat. Videntes autem illi qui erant in civitate hoc, derelinquentes domos, simul cum omnibus suis spoliis fugiebant: alii in castellum fugiebant, alii ad portam Comitum sancti Ægidii, alii ad portam Ducis Gottifredi, unusquisque ad suam gentem. Tunc nimia tempestas subito surrexit, itaut nullus homo poterat stare erectus. Boamundus itaque vir sapiens contristatus est valde pro sancti Petri ecclesia, & aliis ecclesiis. Hæc ira turbinis & incendii perduravit ab hora tertia usque in mediam noctem; fueruntque cremata duo milia ædificia intra ecclesias & domos. Veniente autem media nocte, statim omnis feritas venti cecidit. Itaque Turci habitantes in castello civitatis bellabant nobiscum die ac nocte, ita quod nihil aliud separabat nos nisi arma. Videntes autem nostri, quod non possent diu pati, quoniam qui habebat panem, non licebat ei manducare; & qui habebat aquam, non licebat ei bibere; fecerunt murum inter se & illos de petra & calce, & ædificaverunt castellum & machinas, ut securi essent. Una autem pars Turcorum remansit in castello ad nobiscum bellandum; alia vero pars hospitata erat prope castellum in una valle.

LXXV. Nocte vero superveniente ignis de cælo apparuit veniens ab Occidente, & appropinquans cecidit inter Turcorum exercitus. Unde mirati sunt multum Turci, & nostri. Mane autem factò tremefacti Turci fugiebant omnes pariter pro ignis timore ante domini Boamundi portam, illicque hospitati sunt: pars vero, quæ in castello ad agendum bellum cum nostris die noctuque sagittabant, vulnerabant, & occidebant de nostris: alia autem pars undique obsidebant civitatem, ita quod nullus nostrorum de civitate audebat exire, aut intrare nisi in nocte, & occulte: ita enim eramus oppressi, & obsessi ab illis paganis inimicis Dei & sanctæ Christianitatis, quorum numerus fuit innumerabilis: isti profani inimici Dei ita tenebant

nos inclusos in civitate Antiochiæ, quod multi ex nostris fuerunt mortui fame, quoniam parvus panis vendebatur unum byzantium. De vino autem non loquamur. Equinas carnes, aut asininas quidam manducabant & vendebant. Vendebant gallinam quindecim solidos, ovum duos solidos, unam nucem unum denarium; folia ficus & vitis & arborum manducabant. Alii coria caballorum, & asinorum, & camelorum, atque boum sive bubalorum sicca decoquebant. Omnes anxietates & angustias nominare nequeo, quas passi sumus pro Christi nomine, & pro sancti Sepulcri via deliberanda. Prædictas autem tribulationes, & fames, atque timores passi sunt servi Dei per viginti sex diebus.

NOTA.

LXXVI. Impudens itaque & abominabilis Stephanus Carnotensis Comes, qui erat caput nostrum, quem omnes nostri majores elegerant, ut esset nostrorum ductor, maxima fingens se gravari infirmitate, priusquam Antiochia fieret capta, turpiter recessit ad quoddam castrum, quod vocatur Alexandretta. Nos itaque cotidie præstolabamur eum, quatenus veniret nobis in adjutorium. At ille, postquam audivit gentem Turcorum circumcingentem atque obsidentem nos, latenter ascendit super proximam montaneam, quæ eminebat super omnes montes, qui erant in circuitu ejus prope Antiochiam: videntque innumerabilia tentoria, repente correptus timore nimio una cum suo exercitu turpiter aufugit cum magna festinatione, veniensque ad suum castrum exspoliavit illud, & celeri cursu versus Constantinopolim impudenter iter vertit. Quod postquam obviavit Imperatori ad Filomenam, accessit ad eum, & seorsum vocavit eum dicens: Scias re vera, quoniam Antiochia capta est, & castrum adhuc minime captum est, nostrique omnes in gravi oppressione obsessi sunt, & (ut puto) a Turcorum manibus jam interfecti sunt. Revertere ergo retro quam citius potes, ne forte ipsi inveniant te, ac gentem, quam tecum ducis.

LXXVII. Tunc Imperator timore perterritus clam vocavit Guidonem, fratrem domini Boamundi, omnesque alios, & ait illis: Quid faciemus? ecce omnes nostri in arta obsessione tenentur in Antiochia, & forsitan in hac hora omnes Turcorum manibus mortui sunt, aut in captivitatem deducti, sicut iste infelicissimus Comes impudenter fugiens narrat. Si ergo vultis, revertamur retro celeri cursu, ne & nos moriamur

repentina morte, quemadmodum & illi mortui sunt. Cumque frater domini Boamundi Guido honestissimus miles hanc audivit fallaciam, statim cum omnibus cœpit plorare, & ululare vehementissimo planctu, & una voce omnes dicebant: O Deus verus trinus & unus, quam ob rem hoc fieri permisisti? cur populum sequentem in manus inimicorum incidere permisisti, & viam tui itineris tuique Sepulcri liberantes tam cito perire permisisti? Certe si hoc verum est quod ab istis nequissimis audivimus, nos & alii Christiani derelinquimus te, & non amplius rememorabimus, & nullus ex nobis audebit ulterius invocare nomen tuum. Et fuit hic sermo valde inhonestissimus in tota illa militia, ita quod nullus eorum audebat jam, neque Archiepiscopus, neque Episcopus, neque presbyter, neque clericus, neque quisquam laicus Christi invocare nomen per plures dies.

LXXVIII. Nemo namque poterat consolari Guidonem, plorantem, & plaudentem manibus, suosque frangentem digitos & dicentem: Heu me, domine mi Boamunde, honor & decus totius mundi, quem universus orbis timebat, atque amabat! heu me tristem, qui non merui videre tuam honestissimam speciem! nam nullam rem magis videre desiderabam. heu quis mihi det ut ego moriar pro te, dulcissime amice, & frater domine! Cur ex utero meæ exiens matris non statim mortuus fui! Cur ad hanc lugubrem perveni diem! cur non necatus fui in mari! cur ex equo non cecidi fracto collo, recepique repentinum interitum! utinam tecum recepissem finem. Cumque omnes accurrissent ad eum, & consolarentur eum, ut jam finem daret planctui; reversus in se, & dixit: Forsitan creditis huic cani vilissimo militi, de quo numquam audiui loqui, quod ipse in militia fecerit aliquod laudabile factum: sed turpiter & inhoneste recedit sicut nequissimus & infelix, & quicquid miser nunciat, sciatis per omnia falsum esse. Interea iussit Imperator suis hominibus dicens: Ite & conducite omnes homines istius terræ in Bulgariam, & exspoliare, & devastare universa hæc loca, ut cum venerint Turci nihil possint reperire. Volentes nolentesque nostri reversi sunt retrorsum, dolentes & mærentes amarissime usque ad mortem. Fueruntque mortui multi ex Peregrinis, qui erant languentes in nimia agrotatione: quique fortiter non prævalebant militiam sequi, remanebant morientes in via, & omnes alii reversi sunt Constantino-

polim : nunc revertamur ad priorem sermonem.

LXXIX. Nos igitur auditis sermonibus illius, qui hanc nobis Christi revelationem retulit per Apostoli verba, statim festinavimus ad locum eundem, ubi demonstravit homo ille: & foderunt ibi tredecim homines à mane usque ad vespem; & idem homo invenit lanceam, quemadmodum indicaverat: & acceperunt illam cum magno gaudio & timore, fuitque orta immensa lætitia per totam urbem. Continuo ab illa hora accepimus inter nos consilium belli. Porro statuerunt omnes majores nostri consilium, quatenus nuntios mitterent inimicis Christi Turcis, ut eos interrogarent securo eloquio, quam ob rem superbissime in Christianorum introissent terram, & cur castrametati essent in ea, & quare Christi servos occiderent, & conquassarent. Cumque jam finis esset dictis, invenerunt quosdam viros, quos Petrum Eremitam & Orlinum vocabant, illisque dixerunt hæc: Ite ad Turcorum exercitum, & diligenter narrate eis, & interrogantes eos, cur audacter, & superbissime in Christianorum introierunt terram, & nostram. Illi ergo nuntii abierunt, & venerunt ad profanum collegium, dicentes universa verba Curbanæ, & aliis ita. Satis mirantur nostri majores, quam ob rem sine timore, ac superbissime in Christianorum introistis terram illorum. forsitan ideo huc venistis, quod per omnia vultis effici Christiani, & creditis in unum verum Deum, quem nos in Trinitate colimus. Si vero propter hoc minime huc venistis, rogant vos humiliter omnes nostri majores pariter, quod velociter recedatis à Dei terra, & Christianorum, quam beatus Petrus apostolus jam dudum prædicavit, & ad Christi culturam revocavit. Et illi permittunt vobiscum adhuc reduci omnia vestra, scilicet equos & mulos, asinos & camelos, oves quoque & boves, & alia omnia ornamenta permittent vobiscum ubicumque volueritis deferre.

LXXX. Tunc Curbanas, princeps militiæ Soldani Persiæ, cum omnibus aliis plenis tumida superbia, feroci responderunt sermone. Deum quippe vestrum, & vestram Christianitatem nec optamus, nec volumus, vosque cum illis omnimodo respuimus. Sed valde miramur, quam ob rem majores vestri, quos vos memoratis, terram, quam abstulimus profpere ac prudentissime effeminatis gentibus, illi vocant suam. Revertimini ergo quantocius, & dicite vestris majoribus, quod

quod si per omnia cupiunt effici Turci, & Deum quem colunt abnegare, & leges suas spernere; nos illis hanc, & satis plus dabimus terram, & civitates, & castella, & tot equos, quod nemo vestrorum remanebit pedes: sed erunt omnes effecti equites, sicuti & nos sumus; & habebimus eos semper in amicitiam. Sin autem, sciant se capitalem subire sententiam, aut ducti Corosanum in vinculis, captivitate perpetua servient nobis nostrisque infantibus. Nuntii itaque nostri velociter reversi sunt retrorsum, referendo hæc omnia, & quemadmodum responderat eis gens crudelissima.

LXXXI. Fertur Orluinus utramque scisse linguam, & fuisse interpretem Petro Eremitæ. Interea exercitus nostri utraque tremefacti parte ignorabant quid potius facerent. In una parte coangustabat eos cruciabilis fames: in alia constringebat timor Turcorum. Tunc conversi ad Dominum, prædicaverunt jejunium. Tandem triduo jejunio expleto, & processionibus celebratis de una ecclesia ad aliam, de illorum peccatis confessi & absoluti, fideliter corpore & sanguine Christi communicati sunt, & fecerunt immensos cereos ecclesiæ sancti Petri, & Genitricis Dei; datisque eleëmofynis, fecerunt celebrari Missas. In illa quoque die vendebatur modicum panis uno byzantio, & facto bello vendebatur pro uno denario. Deinde stabilitæ sunt sex acies intra civitatem. In prima acie fuit Ugo magnus cum Francigenis & Flandrensi Comite. In secunda Dux Gottifredus cum suo exercitu. In tertiâ fuit Robertus Normannus simul cum sua multitudine. In quarta Podiensis Episcopus portans secum lanceam Salvatoris cum suo exercitu, & cum illo gens Raimundi comitis sancti Ægidii, qui remansit sursum observare castellum pro timore Turcorum, ne descenderent in civitatem. In quintâ fuit Tancredus cum sua gente. In sexta fuit vir sapiens Boamundus cum sua pulcherrima militia. Episcopi nostri, & presbyteri, & clerici, & monachi sacris vestibus induti, exhibant cum crucibus, orantes & deprecantes Deum, ut nos salvos faceret, & nos custodiret ab omni periculo & ab omnibus malis. Alii stabant super murum civitatis, tenentes sacras cruces in manibus suis, signando & benedicendo nos. Nos ita ordinati, atque signo crucis protecti, incœpimus exire de civitate per portam, quæ est ante macho-
mariam.

LXXXII. Postquam Curbanas vidit Francorum acies

tam pulcre ordinatas, unam post aliam, vocavit quendam Ammirarium qui de civitate exierat, dixitque illi : Nonne dicebas, quod Franci numquam erant bellaturi nobiscum? Exivit ergo ille & vidit honorabiles acies & dixit: Certe non fugiunt Franci, sed firmiter veniunt præliari nobiscum. Et timens valde Curbanas, mox mandavit suo Ammirario, qui omnia in sua habebat custodia, ut ille videret ignem accensum in capite exercitus, protinus præconia ret omnem exercitum ut rediret retro, sciendo Turcos amisisse bellum. Continuo Curbanas cœpit paulatim redire retro contra montaneam; nostrique paulatim persequi. Deinde divisi sunt Turci: una pars ibat contra mare, & alii steterunt illic; putantes nos includere inter sese. Videntes hoc nostri fecerunt similiter. Illic fuit ordinata septena acies ex acie Ducis Gottifredi, & Comitis de Normannia, & caput illius fuit Comes Rainaldus. Hanc mandaverunt obviam contra illos, qui veniebant à mari. Turci autem bellaverunt cum illis, sagittando multos ex eis. Aliæ autem turmæ ordinarunt se à flumine usque ad montaneam, quod distat per duo miliaria. Cœperunt autem Turcorum turmæ ex utraque exire parte, nostrosque omnes circumcingunt jaculando, sagittando, vulnerando. Interea exierunt de montaneis innumerabiles exercitus, sedentes super equos albos, quorum vexilla omnia erant candentia. Videntes itaque nostri hunc exercitum, ignorabant penitus qui essent, donec cognoverunt esse adjutorium Christi; cujus sancti agminis ductores fuerunt sanctus Georgius, Mercurius, & Theodorus. Hæc verba procul dubio credenda sunt, quia plures ex nostris hoc viderunt. Illi autem Turci, qui stabant in parte maris, videntes quod non possent amplius sufferre, miserunt ignem in herbam: ut videntes illi, qui erant in tentoriis, inciperent fugam. At illi cognoscentes hoc signum; arripuerunt omnia honorabilia spolia, & fugerunt. Nostri vero paulatim equitabant, ubi illorum virtus erat, scilicet ad eorum tentoria. Dux Gottifredus, & Flandrensis Comes, & Ugo Magnus equitabant juxta aquam, ubi virtus illorum erat. Isti primitus signo crucis muniti unanimiter invaserunt illos. Exclamaverunt autem Persæ, & Turci: nos vero invocantes Deum vivum & verum, equitavimus contra illos, & sic in nomine JESU-CHRISTI, & sancti Sepulcri incœpimus bellum, & Deo adjuvante devicimus eos. Turci quippe tremefacti, arripuerunt fugam: nostrique illos persecuti sunt usque ad eo-

rum tentoria , sternendo & interficiendo. Magis itaque milites Christi amaverunt illos persequi , quam ulla spolia quaerere : & persecuti sunt eos usque ad Pontem-ferreum , ac deinde usque ad Tancredi castellum. Illi autem dimiserunt papiliones suos , aurum , & argentum , & ornamenta multa , oves , & boves , equos , & asinos , & mulos , & camelos , frumentum , vinum , & farinam , & alia multa , quae nobis erant necessaria.

LXXXIII. Armeni & Suriani , qui habitabant in illis partibus , audientes nos superasse Turcos , cucurrerunt ad montaneam , obviantes illos , & quantos potuerunt comprehendere interfecerunt. Nos autem reversi sumus in civitatem cum magno gaudio , laudantes & benedicentes Deum , qui dedit victoriam populo suo. Ammirarius itaque , qui castellum custodiebat , videns Curbanam & omnes alios fugisse ex campo ante Francorum gentem , valde timens , cum magna festinatione petebat Francorum vexilla. Comes igitur sancti Aegidii , qui illic adstabat ante castellum , jussit ei suum porrigi vexillum. Ille autem recepit illud , & diligenter misit in arce : ipsa vero hora venit vir venerabilis Boamundus , deditque suum vexillum. Ille autem accepit illud vexillum cum magno gaudio , & pactus est Ammirarius cum domino Boamundo , quod illi homines qui vellent Christianitatem recipere , remanerent cum eo ; & qui vellent abire , sanos & absque ulla laesione abire permetteret. Consensit ille quicquid ei Ammirarius postulavit , & misit suos servientes continuo in castellum.

LXXXIV. Non post multos dies baptizatus est Ammirarius cum illis , qui Christum cognoscere & colere voluerunt : qui autem suos voluerunt retinere errores , fecit eos dominus Boamundus conducere , sicut promiserat , usque in Saracenorum terram. Post hæc jussit ut adduceretur Curbanæ tentorium in civitatem , & jussit ut liberarentur illi Christiani , qui illic erant capti & ligati ; & fecit Curbanæ tentorium per mare conducere Barim ad sanctum Nicolaum , ut lætaretur omnis christiana plebs de triumpho , quem dedit populo suo Dominus super paganorum gentem , præstante Domino nostro Jesu-Christo , cui est honor , & gloria per infinita sæculorum sæcula. Amen. Hoc proelium factum est in quarto Kalendas Julii , in vigilia Apostolorum Petri & Pauli.

LXXXV. Et cum jam Deo summo & vero, trinoque & uno dignas referremus grates, & inimici nostri per omnia devicti essent, huc & illuc fugientes, alii semivivi, alii vulnerati in vallibus, & in nemoribus, & in arvis, & in viis deficiebant mortui. Populi autem Christi, scilicet victores peregrini, reversi sunt gaudentes & exultantes felici triumpho in civitatem. Tunc congregati sunt omnes majores, & ordinaverunt concilium, quemadmodum hunc valerent regere & conducere populum, usque dum peragerent sancti Sepulcri iter, pro quo usque huc fideliter multa passi erant incommoda. Inventum itaque est in concilio, quod statim nullo modo in paganorum introissent terram, eo quod valde in æstivo tempore arida & inaquosa est. Novissime statuerunt quiescere usque Kalendas Novembris, videlicet ad omnium Sanctorum sollemnitatem: ac deinde, quia hiemali tempore conveniens esset per illa loca intrare, cum gaudio viam sancti Sepulcri urbem gaudentes ire inciperent.

LXXXVI. Omnes pariter hoc laudaverunt consilium, quod nimis honestum esset ad faciendum, scilicet terminum illum esse expectandum. Denique divisi sunt nostri Principes, & unusquisque profectus in suam terram, morabatur usque dum appropinquaret eundi terminus. Feceruntque præconari per universam civitatem, ut si aliquis egenus esset ibi, qui auro & argento careret, atque cum illis manere vellet, libenter retineretur ab eis. Erat autem ibi quidam honestissimus miles de exercitu sancti Ægidii Comitis, cui nomen Raimundus Piletus. hic plures retinuit homines, videlicet equites & servientes. Egressus est itaque ille, & cum eo Raimundus Vicecomes de Taurina, & Galferius * *Dasturs* cum suis exercitibus, & prudentissime ac viriliter intraverunt in Sarracenorum terram, & profecti sunt ultra duas civitates, & pervernerunt ad quamdam civitatem, cui nomen Talamanz, quam civitatem habitatores illius, scilicet Suriani, confestim sponte & se eis dederunt. Cumque essent ibi omnes per octo dies, venerunt nuntii ad eos dicentes: quod hic prope nos est quoddam castrum Sarracenorum plenum multitudine. Ad hoc ergo omnes ierunt iidem Christi servi, & undique invaserunt illud; & continuo ab illis captum est cum Christi adjutorio. Apprehenderunt igitur omnes illius colonos, &

occiderunt illos, qui Christianitatem nequaquam recipere voluerunt: sed illos qui Christianitatem cognoscere voluerunt, conservaverunt vivos. Reversi sunt autem nostri Franci cum gaudio ad pristinam civitatem.

LXXXVII. Tertia vero die exierunt, & venerunt ad quamdam civitatem, cui nomen Marra, quæ erat prope illos. Erant ibi multi Turci & Sarraceni, & Arabes ab *Aleph* civitate, & ab omnibus civitatibus congregati, quæ in circuitu ejus erant. Exierunt ergo barbari contra illos ad bellum, nostrique putabant lucrari cum illis: sed illi statim arripuerunt fugam. Et tamen per totum diem unum ad invicem invadebat unus alium usque ad vesperam. Æstus namque erat immensus: nequibant autem jam nostri sufferre tantam sitim, quia nullatenus ibi ad bibendum aquam invenire poterant; ideoque voluerunt ad suam civitatem redire. Tunc Suriani & minuta gens mox ceperunt fugam retrorsum, quia illi erant sine aliquo ductore, ceu oves non habentes pastorem. Ut autem Turci viderunt illos fugientes, confestim ceperunt illos sequi: multique ex nostris reddiderunt illic felices animas Deo, pro cujus amore illic congregati erant. Hæc occisio fuit facta v. die stante mense Julii. Reversi sunt denique Franci in suam civitatem, fueruntque ibi cum suis exercitibus per plures dies.

LXXXVIII. Neque hoc prætereundum puto, quod in Assumptione sanctæ Mariæ, dum starent ambo Raimundi cum suis exercitibus in eadem civitate jam supra dicta cum fiducia & securitate, congregati simul multi Turci, Arabes, & Sarraceni ab *Aleph*, & aliis castris illius montanæ, veneruntque occulte illuc, & irruerunt super eos. Tunc ambo Raimundi cum suis exercitibus videntes hanc excommunicatam congregationem, signo crucis undique munientes se se, Christi invocato nomine audacter irruerunt super eos. qui continuo audito Christi verbo arripuerunt fugam, & occiderunt nostri ex illis septem, & retinuerunt decem pulcherrimos equos. Alii autem qui in Antiochena remanserant civitate, steterunt cum magno gaudio & lætitia: quorum rector & pastor exivit Podiensis Episcopus, qui nutu Dei atque voluntate à gravi ægitudine captus est, &, ut Dei voluntas fuit, migravit ab hoc sæculo, & in pace requiescens obdormivit in Domino, in Abrahamæ videlicet, & Isaac, & Jacob

finu receptus in Kalendis Augusti, scilicet in festo sancti Petri ad Vincula, cujus speciosissima anima in cælis exultat cum Angelis: unde maxima angustia, & tribulatio, & immensus dolor fuit in tota Christi militia: quia ille erat sustentamentum pauperum, & consilium divitum. Idemque ordinabat clericos, & prædicabat, & submonebat milites, & dicebat illis: Prudentissimi milites vestras fideliter date decimas de cunctis rebus, quæ super Sarracenos apprehendistis, vestris cappellanis. In quatuor partes dividite decimas, scilicet duas pauperibus, & unam Episcopo, & quartam presbyteris, qui vobis officium impendunt: quia nemo ex vobis salvari potest, nisi honorificet & reficiat pauperes clericos; vosque non potestis salvari sine illis, & illi absque vobis vivere nequeunt. Oportet igitur ut ipsi cotidiana flagitatione Deum pro vestris delictis orent: quem vos offenditis in multis, quod numquam esse deberet. Et vos oportet illos regere, & nutrire: quia nesciunt perquirere neque invenire, sicut vos scitis. Ergo egomet rogo vos, ut pro Dei amore eos diligatis, & in quantum potestis eos sustineatis.

LXXXIX. Non post multum vero temporis vir venerabilis Comes sancti Ægidii intravit in Sarracenorum terram, & pervenit ad quamdam civitatem, quæ dicitur Albara: quam invasit una cum suo exercitu, eam continuo apprehendit, & occidit ibi plures Sarracenos, masculos videlicet, & feminas. Quam ut in suo continuit imperio, ad Christi revocavit fidem. Continuo cœpit quærere cum suis sapientissimis viris, ut Episcopum in ea urbe devotissime ordinaret, qui residuum populi ad Christi culturam fideliter revocaret, & de domo diabolica templum Deo vivo & vero, & oracula sanctorum cito consecraret. Novissime elegerunt quemdam honorabilem ac sapientissimum virum, & duxerunt illum in Antiochiam ad consecrandum: factumque est ita.

XC. Appropinquante autem termino, videlicet omnium Sanctorum festo, regressi sunt omnes majores in civitatem Antiochiæ. Boamundus autem qui erat in Romanix profectus partes, infirmitate gravante eum, prohibitus fuit interesse ad prædictum positum terminum. Cum vero illud tempus advenit, quo equitare potuit, continuo ad civitatem, in qua alii erant congregati, advenit. Omnes itaque cœperunt quærere, qualiter sancti Sepulcri iter valerent peragere, dicentes: Quoniam appropinquavit eundi terminus, nulla mora nos amplius conturbet.

Boamundus vero requirebat cotidie compleri suam conventionem, quam omnes promiserant ei, scilicet de subjicienda civitate. Magis autem querebatur de sancti Ægidii Comite, qui ad conventionem emollicare erga Boamundum se nolebat: eo quod ipse Comes timebat se perjurare circa Imperatorem. Tamen sæpe fuerunt congregati ad justum faciendum in sancti Petri ecclesia. Boamundus enim recitavit suam conventionem, & suum ostendebat computum. Comes sancti Ægidii similiter sua ostendit verba, & iurjurandum, quod fecerat Imperatori cum Boamundi consilio. Episcopi, & Dux Gottifredus, & Flandrensis Comes, & Comes de Normannia, & alii majores, ab aliis segregati sunt, & intraverunt ubi cathedra sancti Petri est, ut illic iudicium inter utrumque decernerent. Postea vero rimentes, ne sancti Sepulchri via negligeretur, nolebant justum aperte dicere. Ait autem Comes sancti Ægidii: Potiusquam via sancti Sepulchri remaneat, si Boamundus nobiscum una venire voluerit, quicquid nostri Pares, videlicet Dux Gottifredus, & Flandrensis Comes, & Robertus Normannus, & alii magnates laudaverint, ego utique fideliter consentiam, salva Imperatoris fidelitate. Hoc totum laudavit Boamundus, & promiserunt ambo in manibus Episcoporum, quod sancti Sepulchri via nullo modo fieret disturbata.

XCI. Tunc accepit Boamundus consilium cum suis hominibus, quomodo muniret castrum urbis de hominibus & victu: & Comes sancti Ægidii similiter accepit cum suis hominibus, quomodo muniret palatium Cassiani Ammirarii, & turrem, quæ est super portas pontis, qui est in parte portæ sancti Symeonis, de hominibus & victu, qui non deficerent longo tempore: & ita nolebant stulte vel inconsulte dimittere regalem civitatem Antiochiam. Et venit per unam civitatem, quæ vocatur Subrea, & per aliam quæ vocatur Albara, & quarto die exeunte Novembris pervenit ad Marram civitatem, in qua maxima multitudo Sarracenorum, & Turcorum, & Arabum, & aliorum paganorum erat congregata; ipseque crastina die Comes invasit eam. Non post multum temporis Boamundus cum suo exercitu secutus est Comitem, & ad eum applicatus est in die Dominico. Secunda vero feria vehementer & nimis fortiter invaserunt undique civitatem tam acriter, quod scalæ stabant erectæ ad murum civitatis, sed tam maxima paganorum virtus erat, quod nostri in illa die illis nihil nocere potuerunt,

XCII. Videntes quod frustra laborabant, iussit Raimundus Comes sancti Ægidii fieri quoddam ligneum castrum nimis forte & valde altum, quod castrum ingeniatum atque ædificatum erat super quatuor rotas, super quod stabant plures milites, & Hemirandus venator tubam fortiter sonando: subter vero erant armati milites, qui illud promoverunt usque prope civitatis murum juxta quamdam turrem. Tunc videns hoc gens pagana, statim fecit instrumentum, cum quo jactabat maximos lapides super nostrum castrum, ita quod pæne nostri milites conquassabantur. Et similiter adhuc ruebant græcos ignes super illud, eo quia putabant illud incendere & dissipare. Castrum vero nostrum imminebat super omnes muros civitatis. Milites igitur Christi, qui erant sursum in solario superiori, videlicet Guilielmus de Monte-Pislerio, & alii multi, jactabant immensos lapides super illos, qui stabant in civitatis muro, & ita percutiebant eos super clypeos, quod cum clypeo inimicus cadebat in civitatem mortuus. Isti sic faciebant, & alii tenebant in hastis honorabilia vexilla, & cum lanceis & armis ferreis putabant illos trahere ad se: & sic præliati fuerunt usque ad vesperam. Post castellum stabant presbyteri & clerici sacris vestibus induti, orantes Dominum, ut suum defenderet populum in sancta Christianitate exultantem & paganitatem deponentem. In alia vero parte certabant nostri milites cotidie cum illis, erigentes scalas ad murum civitatis: sed virtus paganorum erat tanta, quod nihil proficere poterant nostri. Tamen Gofferus de *Lasturs* primus ascendebat per scalam in murum: sed fuit fracta scala præ multitudine aliorum. Tunc Gofferus confestim apprehendit quamdam turrin, eique alii detulerunt adjutorium. Illi ergo, qui ascenderant, expediebant aliis murum: alii vero detulerunt aliam scalam, erexeruntque festinanter ad murum, & ascenderunt per eam multi equites, & pedites: tantique ascenderunt, quod vix capiebat eos murus. Sarraceni ergo tam robuste invaserunt illos per murum & per terram sagittando & jaculando, quod multi ex nostris timore perterriti demiserunt se per murum. Tandiu vero illi prudentissimi viri, qui remanserunt in muro, sustinuerunt illorum instantiam, quamdiu alii, qui sub castro erant, foderunt murum civitatis. Videntes autem Sarraceni, quod nostri fodissent murum civitatis, statim timore perterriti ierunt in civitatem, Hoc totum est factum in die sabbati ad horam vespere, jam occidente

vidente sole, undecimo die intrante mense Decembri. Boamundus igitur fecit suum interpretem loqui Sarracenis majoribus, quod ipsi cum suis mulieribus, & infantibus, & aliis substantiis congregarent se in uno palatio, quod est supra portam, ipseque defenderet eos de mortali sententia. Intraverunt autem nostri omnes in civitatem, & quicquid boni invenire potuerunt in domibus & in foveis, hoc unusquisque ad suum dominium lucratus est. Facto autem die, ubicumque reperiebant quemquam illorum, sive masculum, sive feminam, capitalem continuo eis dabant sententiam. Nullus angulus civitatis deerat vacuus Sarracenorum cadaveribus. Boamundus quoque illos quos jusserat in palatium intrare, apprehendit, & abstulit omnia, quæ habebant, aurum, & argentum, & alia ornamenta, quæ illic habebant: alios fecit occidi, alios jussit conduci ad vendendum Antiochiam. Mora autem Francorum fuit in illa civitate per unum mensem, & quatuor dies: ibique fuit mortuus Orientsis Episcopus. Fuerunt ibi quidam ex nostris, qui non invenerunt sicuti eis opus erat, quantum ex longa mora, quantumque ex districtione famis, quod foris nihil nequibant ad capiendum invenire. Scindebant corpora mortuorum, eo quod in interioribus eorum inveniebant byzantios reconditos: alii autem cædebant carnes eorum per frustra, & decoquebant ad manducandum: alii quoque portabant ad plateam ad vendendum.

XCIII. Boamundus autem non potuit se concordare cum Comite sancti Ægidii, quod de eo quærebat: & iratus reversus est Antiochiam. Comes igitur Raimundus non diu moratus mandavit suos legatos Antiochiam Duci Gottifredo, & Flandrensi Comiti, & Roberto Normanno, & Boamundo, quod ipsi venirent ad Russam civitatem loqui cum eo. Veneruntque illuc omnes illi, & concilium fecerunt per tres dies, quo honeste possent tenere viam sancti Sepulcri, propter quam moti erant. Nequiverunt tamen Boamundus concordare simul cum Comite, nisi Comes Antiochiam ei dimitteret omnino. Sed noluit hoc Comes assentire pro fiducia, quam fecerat Imperatori. Comites itaque, videlicet Robertus Flandrensis, & Robertus Normannus, Dux Gottifredus, & Boamundus, reversi sunt Antiochiam: Comes vero Raimundus reversus est ad Marram, ubi peregrini erant. Mandavit suos homines, Guillelmum Ermingarcum & alios, honestare palatium, & turrin,

quæ est supra pontis portam. Boamundus autem volens habere totam Antiochiam, eiecit omnes homines foras. Videns autem Comes Raimundus, quod nullus Principum vellet secum ire in sancti Sepulcri viam, exivit de Marra in die sancti Hilarii, & processit usque ad Caphardam; fuitque ibi per tres dies. Ideoque festinavit Comes ire ante alios, quia pauperes Peregrini moriebantur fame, & ille cupiebat illos conducere in illa loca, ubi feliciter vivere valerent. Illic adjunxit se Robertus Normannus Comiti Raimundo. Rex autem Cæsareæ multotiens mandaverat suos nuntios Comiti in Marram & Caphardam, ut cum eo pacem haberet: & ipse de suo pretio ei daret, & Christianos peregrinos diligeret, fiduciamque faceret quod per totum suum imperium peregrinis non offenderetur, & mercatum de corporalibus alimentis eis daret. Exierunt namque nostri, & venerunt hospitari juxta Cæsaream super flumen Farfar. Cumque vidisset Rex, Francorum contubernium tam prope civitatem fore hospitatum, in suo doluit animo, & jussit illis devertari mercatum, nisi cessarent à civitatis propinquis.

X C I V. Crastina autem die Rex Cæsareæ mandavit nostris duos Turcos, videlicet suos nuntios, qui eis monstrarent fluminis vadum, eosque conducerent ubi invenire possent ad capiendum. Denique venerunt in vallem quamdam subter quoddam castellum: illic deprædaverunt plusquam quinque milia animalia, & satis frumentum, & alia bona, unde valde fuit refecta tota Christi militia. Illud quoque castrum dedit se Comiti, eique donavit equos, & aurum purissimum, & juraverunt qui erant ibi castellani sua lege, quod peregrinis numquam nocerent amplius. Exinde pervenimus gaudentes hospitari ad quoddam Arabum castrum. Exivit igitur dominus castri, & concordatus est cum Comite.

X C V. Exeuntes vero inde pervenimus ad quamdam civitatem pulcherrimam, & omnibus bonis refertam, in quadam valle sitam, nomine Kephaliâ. Habitatores vero illius audientes Francos venisse, dimiserunt civitatem, & hortos plenos oleis, & domos plenas alimentis corporalibus, & fugerunt. Egredi nos tertia die ab illa civitate, transivimus per altam & imensam montaneam, & intravimus in vallem densam, in qua erat maxima ubertas. Pagana vero gens fugiebat in montes & in valles, & dimittebat domos, & cales, & castella plena omnibus bonis. Fuimusque ibi fere per quindécim dies. Hic

prope nos erat quoddam castrum, in quo erat congregata immensa paganorum multitudo, quod aggressi fuerunt nostri Peregrini: idque fortiter superassent, nisi Sarraceni jactassent foras immensas turmas animalium. Reversi sunt ergo nostri, deferentes omnia bona ad sua tentoria. Summo autem diluculo collegerunt nostri papiliones, & venientes ad castrum jam supradictum, obsidere illud putabant, & tentoria extendere. Sed gens pagana omnino dedit se se fugæ, & dimiserunt castrum. Intrantes autem nostri invenerunt ibi de rore cæli omnem abundantiam, scilicet frumentum, vinum, farinam, oleum, atque quicquid eis opus erat.

XCVI. Illic devotissime celebravimus festivitatem Purificationis sanctæ Mariæ, quæ est * pridie Kalendas Februarii. Venerunt autem illi nuntii de camela civitate, per quos Rex illorum mandavit Comiti, quod fideliter cum eo pacisceret, si ei placeret: & misit ei decem equos, & quatuor mulas, & aurum. Sed Comes ait nullo modo se cum eo pacem firmare, nisi ille Christianus conficeretur. Exeuntes autem de optima valle, pervenimus ad quoddam castrum, quod dicitur *Arche* in die lunis, scilicet secunda feria ad medietatem Februarii: circa quod tentoria tetenderunt. quod castrum plenum erat innumerabili paganorum gente, videlicet Turcorum, Sarracenorum, & Arabum, & Publicanorum: & mirabiliter munierant castrum illud, & defendebant se fortiter. Postea vero exeuntes ex nostris milites, ierunt contra Tripolim civitatem, quæ prope erat. Isti milites fuerunt, Raimundus de Taurina, & Petrus de Stillone, & Bego della Rivera, & Amanei de Lubens, & Guilielmus Buti, & Sicardus. Isti sex milites invenerunt sexaginta intra Turcos, & Sarracenos, & Arabes, & Curtos, qui habebant ante se collectos intra, homines & animalia amplius quam mille quingentos: quos signo crucis muniti audacter invaserunt, & Deo adjuvante mirabiliter superaverunt illos, & occiderunt sex ex illis, & sex equos apprehenderunt. De exercitu Comitis exierunt Raimundus Pilerus, & Raimundus Vicecomes de Torina, & venerunt ante Tortosam civitatem, & aggressi fuerunt fortiter illam, quæ nimis erat munita de multitudine paganorum. Sero autem jam facto recesserunt in quemdam angulum: ibi hospitati sunt, feceruntque innumerabiles ignes, quasi totus Christi exercitus esset ibi.

* lege:
postridie;

XC VII. Pagani autem timore perterriti nocte latenter fugerunt, & dimiserunt civitatem plenam omnibus bonis, & optimum portum secus mare habentem. Crastina autem die venerunt nostri, putantes undique invadere illam, eamque invenerunt vacuam. Intrantes vero habitaverunt in ea, usque dum obsessio posita fuit ante *Arche*. Prope istam est alia urbs, quæ dicitur Marecla. Ammirarius, qui eam regebat, pactus est cum nostris: & susceperunt nostros intra civitatem, & nostra vexilla. Dux Gottifredus, & Boamundus, & Flandrensis Comes venerunt usque ad Licheam civitatem. Inde separavit se Boamundus ab eis, & reversus est Antiochiam. Illi vero ierunt, & obsederunt quamdam civitatem, cui nomen Gibellum. Audiens itaque Raimundus Comes sancti Ægidii, quod innumerabilis paganorum gens rueret super nos, qui eramus in Tortosa ad tertium bellum, continuo consiliatus cum suis hominibus mandavit illis majoribus, qui in obsessione Gibelli erant, quatenus nobis subvenirent. Statim illi audientes hoc, pacti sunt cum Ammirario Gibelli, & fecerunt pacem cum eo, & cœperunt argentum, & aurum: & dimiserunt civitatem, & venerunt usque ad nos in adiutorium: sed illi, de quibus timebamus, minime venerunt ad bellum contra nos. Venientes itaque illi Comites hospitati sunt ultra flumen, ibique obsederunt castrum illud. Non post multos dies equitaverunt nostri contra Tripolim, & invenerunt extra civitatem Turcos, & Arabes, & Sarracenos: quos invaserunt continuo, miserunt illos in fugam, & occiderunt maximam partem nobilium civitatis. Tanta autem fuit paganorum occisio & sanguinis effusio, quod etiam aqua, quæ in civitate fluebat, videbatur rubeas facere cisternas illorum sanguine. Unde nimis fuerunt illi tristes ac dolentes: jam vero erant tanto exterriti timore, quod nullus eorum audebat exire extra civitatis portam. Alia autem die equitaverunt nostri ultra vallem, & invenerunt boves, & asinos, & oves, & multa animalia: camelos vero deprædaverunt fere * tres. Castrum autem illud supradictum per tres menses, minus una die, obsedimus, ibique Pascha Domini celebravimus. Naves quoque nostræ venerunt prope nos in quemdam portum, quamdiu fuimus in illa obsessione, deferentes nobis maximum mercatum, scilicet frumentum, vinum, & carnem, & caseum, & hordeum, & oleum; unde nimia ubertas fuit in tota miliria. In illa tamen

* al. tria milia.

obfessione acceperunt sanctum martyrium plures ex nostris, Pontius de Balau, & Anselmus de * Rilomundo, & Guilielmus Picchardus, & alii quos nominare nequeo. Rex interea Tripolis sæpe mittebat nuntios nostris principibus, ut dimitterent castrum, & cum eo concordarent se. Audientes itaque hoc nostri majores, videlicet Dux Gottifredus, & Raimundus Comes sancti Ægidii, & Robertus Normannus, & Flandrensis Comes, & videntes fructus novos properasse, quoniam in medio Martio manducabamus novellas fabas, & in medio Aprili novum manducabamus frumentum: tunc consiliati sunt Jerusolymitanum cum novis fructibus explere iter.

* al. de Ril-
bodimonte.

XCVIII. Discessimus igitur à castro facientes pactum, & pervenimus Tripolim in sexta feria, quarta-decima die intrante Madio: ibi fuimus per tres dies. Concordatus tandem est Rex Tripolis cum principibus nostris. Continuo dissolvit plusquam trecentos peregrinos, qui illic capti erant, & dedit illis quindecim byzantos, & quindecim equos magni pretii: & pepigit cum illis, quod si ipsi Ammirarium Babylone, qui eis bellum parabat, devincere possent, & Jerusalem apprehendere, ille Christianus efficeretur, & terram ab eis recognosceret: talique modo nos discessimus à civitate illa in secunda feria medii Madii, & transivimus per viam artam & arduam tota una die ac nocte, & pervenimus ad castrum, cui nomen *Bethlon*. Dein appropinquavimus civitati, quæ dicitur Zebari, secus mare, in qua passi fuimus nimiam sitim: & sic defessi pervenimus ad flumen, cui nomen *Bray*. Deinde transivimus nocte ac die Ascensionis Domini per montem quemdam, in quo via est nimis angusta. Illic putavimus inimicos insidiantes nobis invenire: sed Deo annuente nullus illorum properare audebat se ante nos. Præcedentes itaque nos nostri equites liberaverunt ante nos viam illam, & applicuimus ad civitatem juxta mare, quæ vocatur *Barrubec*: & de illa venimus ad aliam civitatem, quæ dicitur Sagata; & hinc ad aliam, quæ dicitur Sur; & de Sur ad Acram civitatem; & de Acra venimus ad castrum, cui nomen Cayphas: ac deinceps hospitati fuimus juxta Casaream, ibique Pentecosten celebravimus, tertia die exeunte Madio. Deinde venimus ad civitatem, quæ vocatur Ramora, quam Sarraceni vacuam dimiserunt propter metum Francorum: juxta quam erat honorabilis ecclesia, in qua requievit pretiosissimum sancti Georgii corpus, qui illic à perfidis pa-

ganis pro Christi nomine feliciter martyrium suscepit. Continuo consiliati sunt nostri majores, uti illic devotissime eligerent Episcopum, qui hanc custodiret & regeret ecclesiam. Cui suas dederunt decimas, & auro argentoque honorabiliter ditaverunt eum, & animalibus, & equis, quo honestissime vivere posset simul cum illis, qui cum eo essent. Remansit itaque Episcopus illic cum gaudio.

XCIX. Per idem tempus legati à Babylonia revertuntur, quos Boamundus aliique Principes ab exordio obsidionis Antiochenæ illuc direxerant, reddituros ex parte ipsorum responsa congruentia verbis, quæ eisdem Rex Babylonius miserat. Nam ipse audito quod Franci venientes jam Antiochiam obsiderent, timens ne ea capta atque Jerusalem, super se irruerent, dolose eis citius promisit, ut si vellent, ipse eorum socius in omnibus, immo frater fieri cuperet, opemque eis in cunctis deferret; terrasque, quas habebat, vel cum eis communiter haberet, vel ab ipsis eas extunc se tenere cognosceret. Hoc autem illis ideo misit, ut hac occasione legati ipsi totum exercitum, qualis quantusque esset, vel quid agerent, quidque essent inantea acturi explorantes, omnia cum reverterentur sibi notificarent. At Francorum Principes, doli ipsius ignari, singulis singulos nuntios simpliciter remittunt, annuentes per eos omnia quæ ipse mandaverat. Qui cum ad eum venissent, per unum jam ab eo annum quamquam honorifice retenti, licentiam ad suos regrediendi habere numquam potuerunt. Sed cum Deo post placuisset, ut redeundi optionem à Rege acciperent, capta jam Antiochia, Marraque dein eversa; tandem cum magnis muneribus, quæ Rex ipse singulis Principibus miserat, conductu ipsius regressi sunt. Boamundo enim, quem plus omnibus aliis personabat, plus cunctis pretiosa munera contulit, videlicet sexaginta sciphatorum milia, & quinquaginta pallia imperia- lia, vasaque aurea plurima, atque tapetia nonnulla grandia ac splendidissima; ad ultimum equam velocissimam ingentissimi pretii, aureis laminis tota opertam. Duci vero Gottifredo sciphatorum quadraginta milia largitus est, palliaque triginta, atque nonnulla tapetia, vasaque aurea, & argentea plurima: inter quæ urceus aureus unus miro opere conditus erat, qui viginti libras auri appendebat. Ceteris vero singulis quibusque, secundum quod unumquemque decebat, singula munera præclara contulit. Qui videlicet legati quædam

tunc Christi magnalia, quæ in Babylone & Jerusalem oculis suis conspexerunt, fideliter recitabant, quæ opusculo huic inferre dignum ducimus ad laudem Dei in perpetuum commemoranda. Nulli igitur sit onerosum, quod facere aliquantulum digressionem videmur: quoniam si ea scripto memoria tradentur, multis revera profutura arbitramur.

C. Referebant namque, quia cum Babylonem venissent, invenerunt ibi Christianorum multos in vinculis teneri, inter quos Tarentinus, Belvacensis, Remensis, duoque alii Episcopi erant, atque simul cum eis Eremita quidam, Guilielmus nomine, vir religiosissimus sapientissimus, atque eloquentissimus. Porro in aula regia erat vir quidam, Ursus nomine, qui olim Barensum Episcopus fuerat, sed captus post in peregrinationis itinere Babylonem ductus est: sicque dein pœnis constrictus fidem Christianam negaverat. Rex enim valde eum diligebat, in tantum ut fere nihil sine ipsius consiliis ageret. Factum est autem, ut quadam die Regem adiens diceret ei: Si vis, inquit, legatos captivosque Christianos juste perimere ex fide sua, quam ostendere non possunt, deprehenso merito interfici poterunt. Fac ergo Episcopos illos, qui vincti tenentur, vocari, atque adstantibus aliis vinctis captivis, simulque cum ipsis Francorum legatis, ab eis sciscitare, utrum sit verum quod Christus eorum in Evangelio suo illis pollicetur: *Si habueritis*, inquit, *fidem, sicut granum sinapis, diceris huic monti, Transfer te, & transferetur*. Si autem illud verum esse confitebuntur, ostendant ergo opere quod credunt. Si autem secundum quod credunt non agere poterunt, quod quidem certum est eos facere non posse; tali modo ipsi deprehenso, spectantibus cunctis tuis, ad confusionem Christianorum omnium merito interficientur. At Rex his auditis lætus effectus, Episcopos vinculatos, simulque Guilielmum Eremitam ante conspectum suum venire præcepit. Qui per interpretem eis loquens, ipsos interrogavit, si verbum illud quod Christus in Evangelio dixit, verum esse confiterentur, videlicet, *Si habueritis fidem ut granum sinapis, diceris huic monti, Transfer te, & transferetur*. Tunc Guilielmus pro omnibus respondens dixit ei: Hoc quidem Rex omnino verum esse fatemur, nec Christianus esse potest, qui hoc verum esse non credit. At Rex, Si, inquit, hoc verum esse creditis, volo ut opere me præsentem proberetur. alioquin præter legatos, vos cunctosque captivos capitibus plecti jubeo. Quo

Guilielmus audito, confidenter ait ad Regem: Dentur nobis trium dierum indutiæ, quibus Dominum deprecemur, ut quod à te à nobis exigitur, in ejus nomine demonstrare possimus. Concessis itaque, acceptisque indutiis, iterum ad vincula redire jubentur. Ceterum Guilielmus cum suos paventes, & quasi diffidentes aspiceret, ait ad illos: Nolite, fratres & domini mei, de verbo Christi quicquam diffidere, sed cum toto corde rogemus, quatinus verbum suum, quod locutus est, verum esse patefaciat, non nobis qui credimus; sed infidelibus, vel ad ipsorum conversionem, vel ad gloriam nominis sui. Si autem ei istud non agere placuerit, nos tamen verbum illud verum esse non negantes, pro ipsius fide morti succumbamus libenter, mercede æterna donandi.

C I. Triduo itaque jejunantibus illis & orantibus, ecce Rex mittens pro illis aliisque concaptivis, ad se eos venire fecit. Quibus Rex per transducem, legatis prædictis adstantibus, ait: Quid dicitis de hoc quod à me exigitur? Tunc Guilielmus Eremita clara voce constanter respondit: Quod, inquit, à nobis requiritur, nos in Christi nomine, qui verbum illud fidelibus suis ore suo protulit, opere vere monstraverimus. Tunc Rex congregatis multis magnatibus, cunctoque fere Babylonito populo, fideli & infideli, cum illis captivis, atque Francorum legatis, extra urbem non longe egreditur. Qui ad montem quemdam mediocrem veniens, Eia, inquit, Christicolæ, modo probabitur, utrum sit verum quod creditis. Nam aut vita modo vos comitabitur, aut mors amara nunc separabit. Tunc Guilielmus servus Dei in loco eminentiori, ut ab omnibus audiri posset, positus, clara voce ait: Audiat Rex, ac omnes dignitates Babylonis, universique populus fidelis & infidelis, qui Regis præcepto ad veritatem cognoscendam convenistis. Dominus noster JESUS-CHRISTUS, sicut verus Deus est, de Deo vero Patre ante omnia sæcula genitus, & post in fine sæculorum de Virgine verus homo factus, vere pro salute humani generis ad terras de cælo descendit, ac mori voluit: ita etiam non solum verbum hoc videlicet, *Si habueritis fidem ut granum sinapis, dicitis monti huic, Transfer te, & transferetur;* sed & quæcumque alia in Evangeliiis locutus est, vera esse omnino constant. Cumque sic audientibus cunctis locutus fuisset, conversus ad montem ait: Ut ergo hoc quod dixi, & Regi, omnibusque, qui cum eo hic adstant, verum esse probetur, idcirco præcipio tibi mons in nomine

nomine & virtute ipsius, qui natus est de Maria Virgine in Betleem, pro cuius amore hic vincti tenemur, & qui tentus est à Judæis in Jerusalem, ibique passus, mortuus, & sepultus in sepulcro, quod usque hodie ibi est; & tertia die resurrexit: deinde post quadraginta dies ascendit in cælum; fuitque discipulis postmodum Spiritum sanctum dedit, eosque deinde prædicare fidem nominis sui per universum mundum misit; ut de loco tuo, quo es modo, movearis, & in alium locum mittaris. Cumque locum, quo mittendus esset digito suo designasset, omnesque fideles circumstantes cum lacrymis Deum exorantes respondissent, Amen, ecce subito tonitruum ingens factum est, ita ut omnes ex eo terrerentur: moxque mons statim de terra erigitur, atque usque ad locum designatum per aërem, qui utique tunc serenus erat, leviter incedens proicitur. Verum Ursus apostata, qui Regi consilium dederat, videns tanta mirabilia amens effectus est, velutque mortuus in terra aliquantulum jacuit. Rex vero cum suis omnibus cernens tam magnum signum, valde obstupuit: qui etiam omnes captivos territis continuo absolvit, eisque munera contulit. Erat enim ingens gaudium non solum Christianis, qui vincti fuerant, verum etiam ceteris fidelibus indigenis, à quibus etiam viso tanto prodigio præ nimio gaudiolacrymæ effundebantur.

CII. Eo tempore Jerusalem Regi ipsi subdita erat, quam jam Regi Ægypti bellando abstulit, qui eam invasam, Christiano expulso dominio, per sedecim annos tenuerat. Quam ob rem placuit ei, ut illuc tendens urbem ipsam, aliasque circa se civitates melius præmuniret: quatenus Christianis Principibus, si super eas irruerent, obistere valentes ab illis non caperentur. Cum ergo Jerusalem petisset, & cum eo legati ipsi Francorum, simulque captivi illi, qui superius dicti sunt, scilicet Tarentinus, Remensis, Belvacensis, duoque alii Episcopi, atque Guilielmus Eremita, putantes illum Jerusalem iccirco iturum, ut eam latinis Ducibus, sicut promiserat, subderet. Erat enim tunc quadragesimalis jejunii tempus. Deinde cum sollemnitatis paschalis dies appropinquasset, Rex prædictos captivos advocans ait illis: Non possum credere, quod sabbato vigiliarum Paschæ ignis ille, ut fertur, apud sepulcrum dominicum per semetipsum in lampadibus accendatur. Ad hæc Guilielmus Eremita, socii ejus, alique indigenæ Christiani, verum esse illud firmiter asseriebant. At Rex, Si verum est, inquit, quod

dicitis, volo ut rei ipsius probatione me adstante atque cernente verum esse monstretur: ita tamen ut lampades à me ipso præparatæ ignem illum recipiant; siu autem, à me numquam alio modo verum esse credetur. Cumque Guilielmus ac socii ejus, ceterique fideles rem illam per virtutem Christi se penitus opere probaturos pollicerentur; Rex appropinquante sollemni die Paschæ lychnos tenuēs de ferri acie fabrefactos in lampadibus, quas ipse ante se aptari, olēoque repleti fecerat, sabbato mitti jussit. Ceterum Christiani cognoscentes quod lychnos ferreos in lampadibus Rex poni jusserit, in infidelitatem quamdam modice demerguntur. At Guilielmus Eremita, vir fide plenus, Deoque devotus, intuens eos in fide paululum hæsitare, in ipsius firmitate fidei illorum animum verbis exhortatoriis consolidavit. Cumque omnes plus solito Dominum precarentur, ut solitus ignis in lampadibus præparatis ad gloriam nominis sui accenderetur; repente hora nona cælitus ignis adveniēns per omnes lampades in lychnis ferreis accensus est, atque ita in eis clarissime ardere cœpit, ac si papyri depilati fuissent. Tanto itaque miraculo divinitus ostenso, & Rex ingenti stupore atque ammiratione excipitur, & omnis plebs Christiana ut vidit dedit laudem Deo.

CIII. Post hæc vero Rex, Jerusalem aliisque civitatibus, quæ circumquaque erant præmunitis, prædictos qui secum venerant captivos, liberos abire dimisit; Francorumque legatis conductum suum tribuens, illos, sicut jam dictum est, cum muneribus, quæ singulis Principibus mittebantur, securos redire fecit. sicque eisdem Ducibus verbis suis delusis, Babylonem reversus est.

CIV. Sed pius Dominus, qui nolens peccatorum mortem tot signa infidelibus ut converterentur ostendit, servis suis, ut in ejus militia firmarentur, suæ stipendio servitutis revelavit. Erat in exercitu illo quidam heros nobilis, cui genus atque honestas magnum contulerat nomen: cujus nimirum vocabulum Ansellus vocabatur. Is cum quadam die, meridiei hora, ut est consuetudo, lassæ membra sopori dedisset, somnium vidit, quod experrectus sapienti viro Arnulfo vicepræfuli mox indicavit. Videbam me, inquit, per somnium super sterquilinum stare, unde palatium excelsum suspiciebam, cujus speciositas, celsitudo, materia, forma, soliditas, ornatusque quam maxime excelebat, cujus fundamentum marmore, ebore, argento

firmabatur: reliquum vero corpus auro prorsus & gemmis construebatur. Deambulabant per atria quæ erant in excelso personæ innumerabiles, qui speciosi, proceri, ornati, atque per omnia venusti proceres eminebant. Cumque perspicacius intuens ammirarer, deprehendi personas quasdam mihi præcognitas, quas militiæ hujus nostræ comites fuisse animadvertebam. Cumque corde studiosius inhiarem, si quis forte aditus mihi anhelanti conscendendi patuisset, apparuit quidam, cujus nomen atque figuram, locumque, & diem obitus recolo. Ille mihi, inquam, taliter ait: Anselme, cognoscis horum beatorum turbam? At ego respondens, Vix inquam agnosco. Tunc ille: Hi sunt, inquit, Jerusalemæ, qui viam Dei, in qua adhuc & tu laboras, ab initio aggressi, à sæculo transmigrarunt, merueruntque habere coronas perpetuas; ad quos tu quoque in proximo absque dubio eris ascensurus. Bonum certamen certasti, cursum consummasti. Ad hæc me stupefactum sopor cum visione dimisit. Unde domine precor, ut mihi timenti tua sapientia consulat. Tunc Arnulfus à viri pectore verbis consolatoriis metum excludens, monet illum confiteri peccata sua, pœnitentiam accipere, & post hæc Eucharistiam dominici corporis sumere: deinde ministris suis atque comilitonibus stipendia reddere. Cumque ille ejus monitis libenter obediens ista peregisset, jam intrepidus equum ascendens, circumdante eum militum caterva, circa muros oppidi, ut solitum est, deducebatur: cum subito silex improvisa de turribus elapsa, Anselmi caput percutit, cerebrumque dispergit. Moxque milites labentem illum excipiunt, illucque corpus reportant cum lacrymis, unde modo ante gaudentes exierant. De quo dubium non est, quin anima ejus, sicut ei promissum fuerat, ad beatitudinem supernam ascendit.

C V. Sepulto itaque ut decuit tanto illustri viro, cum Latinorum exercitus nihil in obsidendo proficeret, immo Jerusalem via, propter quam potius venerant, penitus neglegeretur; Arnulfum vicepræsulem monent; quatinus Antiochiam citius revertens, Gottifredi Ducis, Robertique Flandrensis Comitæ quietem longam increpet, eisque nunciet jam bellum Damascenorum adesse. Arnulfus autem ut erat semper promptissimus ad perquirendum reipublicæ commoda, libens scapham ascendens, propter hostilia tortuosa Heracliar, Valoniar, necnon *Gybel* civitatum vitanda,

tandem Laudociam pervenit , inde Antiochiam per multa pericula , paucis eum comitantibus. Tunc Principibus quæ causa ad eos festinaverit insinuans , monet illos jam expurgari. Nam Damascenorum exercitum imminere dicebat : unde fratribus suis , qui eorum expectabant auxilium , mature succurrerent.

C V I. Accidit per idem tempus in Antiochia quoddam inopinabile prodigium , quod nec ante , nec post sæculum factum esse memini. Quadam die cum Boamundus ad cœnam sederet , Robertus Comes Flandrensis à dextra illius assistebat , Boloniensis autem à læva. Erat autem in eodem palatio multa plebis frequentia , quarum pars una cum eo discumbebat , altera vero ministrabat. Cumque post cœnam adhuc illi , ut sæpe fit , ad mensam loquentes sederent , Boamundus manu dextra cultellum librabat. quod cum Comes Flandriæ perspexisset , alludens sic ait : Quid sibi vult ô Princeps , quod tuus à te cultellus ita libratur ? hæc quidem libratio sollicitum te fore significat. Hoc quidem tempus Antiochia capta , hoste superato , non eget curis : hæc hora gaudii est non curarum. Ad hæc Boamundus : Immo , inquit , domine Comes , alia res est. Non eram sollicitus , dum cultellum trutinabam : sed me illum librante hæc mihi cogitatio erat , quod hunc cereum , qui coram nobis ardet , cujus grossitudo ceteros excedit , in duos uno ictu dissipari possim. Quod cum Comites audissent , visus est eis sermo illius delirus , utpote quem nulla facultas effectus sequi valeret. Quapropter subjecit Flandrensis Comes : Fac ergo , Princeps , quod te facturum jactas. nam si verbum tuum effectus sequetur , chlamydem meam pro certo tibi ero daturus : sin autem , tuam mihi dabis. Pactoque itaque utrimque concessio atque firmato , mox Boamundus accipiens cereum ex obliquo illum cultello , quem antea libraverat , semel ictu percutiens , per medium secuit. Cumque cereus ita divisus fuisset , mirabile dictu pars inferior à semetipsa ardere cœpit , sicut & superior. Quo viso miraculo omnes qui aderant , in stuporem versi sunt : unde & ipse Boamundus plurimum terretur. Deinde discurrente per populum hujusmodi fama , ex omni atrio , omnique officina cuncti ad videndum accurrunt , quorum corda præ magnitudine signi non possunt expleri cernendo. Adhuc autem stupentibus illis at-

que mirantibus, ille cereus qui subito igne accensus fuerat, subito quoque extinguitur. Hoc itaque prodigio ab aruspibus tunc portendebatur, quod si cera & flamma simul finem in ardendo fecissent, longa hereditas, longaque successio generis usque ad finem sæculi perducenda Boamundo promitteretur. Quia vero ignis subito in cera ardens subito extinctus est, futuræ sobolis spes, sed mox finiendæ pollicebatur. Quod ita in nece Boamundi junioris filii ejus completum vidimus: qui dum ad illam ætatem pervenisset, qua principatum Antiochenum ex successione paterna regere debuisset, non multo post, cum ad quoddam oppidum ingens atque munitissimum illud recepturus paucis comitatus iret, divergit in locum quemdam: ubi dum se omnino securum cum suis esse putaret, à Turcis subito insilientibus circumventus, post multos agones atque triumphos, quos jam in eis utpote adolescentulus exercuerat, capite gladio plexus cum pluribus suorum interiit. Visa itaque tanta prodigii novitate Boamundus stupefactus chlamydem, quam Comes Flandrensis ei jure debebat, non solum non exigit, verum etiam munere illum, eo quod in quibusdam egebat, plurimo donat.

CVII. Denique cœna latissime & copiosissime finita, cum alternatim tam de prodigii novitate, quam de Boamundi largitate nimium mirati fuissent, inspirati sancto Spiritu, quo inflammati tot labores graviter susceperant, decernunt, quatinus imago Salvatoris auro ex purissimo efficiatur. Ad cujus exprimendam figuram omnis populus, secundum quod unusquisque voluerit, aurum, vel argentum, vel gemmas, vel aliud quid, quod operi ipsi necessarium fuerit, offerat. Hujus itaque consilii Arnulfus præ ceteris auctor prædicabat omnibus, quatinus ad constructionem ejusdem imaginis, quam fiendam proposuerant, operam darent. Ordinato itaque ad suscipiendum munera Marchanensi Episcopo, cum unusquisque oblatum veniret, ipse manum dexteram elevans salutari signo eos benedicebat. Cumque opus celeriter consummatum fuisset, decretum est, ut eadem imago, cum ad Sepulcrum Domini accederent, communi voto ibidem offerenda deportaretur.

CVIII. Jam quartus mensis obsidionis inchoabatur, cum Princeps tantarum morarum pœnitet, pudetque eos tamdiu frustra excubasse circa oppidulum illud, propter quod Je-

rusalemiter, pro quo magis venerant, ita negligeretur. Quocirca obsidionem illam supervacuam penitus dimittentes, Jerusalem, pro qua magis peregrinati fuerant, adire unanimiter ex toto proponunt, à gentilibus illam Domino cooperante liberaturi.

CIX. Tancredus pernox castra movet ante lucanum, socios prævenit, Jerusalem pervenit, muros circumvenit. Post hæc Bethleem veniens, à gentiliū eam obsidione liberat, quæ per legatum ut sibi succurreretur pridie ad eum clamaverat. Deinde Jerusalem eminus videns, positis in terram gentibus eam gaudens salutat. Ave, inquit, Jerusalem, tu quæ es gloria mundi, in qua Christus patiēdo salutem nostram invenit, qui etiam per eandem passionem & resurrectionem Adam omnesque justos ab inferis traxit. Post hæc ad montem Oliveti respiciens, eo quod in eo Christus cælos ascendit, illum similiter collaudans salutat. Nec mora cum & sanctam Sion vidisset, eo quod in ea Spiritus-sanctus repente veniens discipulorum Christi corda replevit, similiter salutando adorat. Denique ad vallem Josaphat oculos figens, Virginis Matris Christi sepulcrum, quod in ea erat, capite inclinato supplici corde veneratur.

CX. Post hæc autem inde movens, veniensque ad illam partem, quæ Turri Daviticæ vicinior erat, castra sua ibi figi præcepit. Deinde solus sine armigero ac sine comite equitans, ad montem Oliveti, quo Christus ad Patrem ascendit, ausus est pergere. Cum ergo illuc pervenisset, Josaphat valle tantum distante ab ipso monte, civitatem totam perspicacius considerabat. Inspiciebat enim populum per urbem discurrentem, turres armatas, milites frementes, civitatem vero cunctam propter exercitum jam imminētem ejulatu, strepitu, clangore intonantem. Mirabatur pulcrā & arduā rotunditatem Templi Domini, insolitam longitudinem Salomonici Templi, gyrum spatiosæ porticus, quæ ita sibi videbatur, ut quasi altera urbs esset in urbe. Sæpius vero ad Calvariam, basilicamque Domini Sepulcri oculos reducebat: quod licet remotius esset, tamen ex celsitudine sua patulum videbatur. Ipse namque cum loci positione sublimior staret, illud tamen corde suspirans, caputque sæpius inclinans humiliter adorat.

CXI. Erat enim in eodem monte tunc quidam Dei ser-

vus, qui in turri quadam pro divino amore solitarius manebat. Quem cum vidisset Tancredus, sciscitatus est ab eo, quatinus sibi digito ostenderet ubi pretorium Cayphæ fuerit, ubi Judas se laqueo suspenderit, quæ porta dicebatur aurea; quæ speciosa, ubi Petrus claudum curavit: de quo loco Jacobus in præceptus datus est; ubi etiam Stephanus protomartyr lapidibus obrutus est. Cumque hæc & alia singillatim ei indicasset, interrogavit eum, quis esset, vel unde venisset, vel cujus stirpe processerit, seu quo nomine vocaretur, sive cujus patriæ, vel sectæ existeret. At ille: Christianus, inquit, sum, genereque Normannus, atque Roberti Guiscardi Ducis Apuliæ nepos ex sorore illius genitus, nomen habens videlicet Tancredus. Verum ille cum de tanti Ducis genere illum fore cognovisset, stupuit, ac diligentius ipsum intueri cœpit dicens: Vere de sanguine magno illius Ducis es, quem velut fulmen tota Græcia tremuit, quem dum bellaret Alexius Imperator fugit, cujus imperio tota Bulgaria usque Bardal paruit. Primo quidem obstupui, quod solus sine cohorte armatus huc ascendisti, sed nunc te cognito stupor abscessit, quia sanguinis natura illius te ad hoc præsumendum coegit. Unde non miror si stupenda feceris, immo multum est mirandum si ea non egeris. Te quippe ex illa ortum progenie ad nulla peragenda terreri condecet. Illis itaque alternatim seminocinantibus, Tancredus à civitate visus exploratum venisse creditur. Quam ob rem quinque milites Sarracenorum de porta bene armati exierunt, ut ad illum expugnandum seu capiendum venirent: qui tanto fiducialius accelerabant, quanto illum alterius societate non uti cernebant. Quorum alius alium prævenire cupiebat, quatinus illum prius extinguens, spolia ejus primus diriperet. At solitarius conspiciens equites, protinus monuit eum ut ibi attenderet, ne ab eis sibi repertus in aliquo læderetur. Tunc Tancredus vale dicens illi, continuo ab eo recessit. Et ecce unus ex illis equo celerius cursitans armatus illum insequabatur. Ad quem Tancredus conversus, in eumque exiliens lancea perforavit, atque sine mora extinxit. Veniens ergo alter putans ferire Tancredum, antequam eum attingeret, equo pede lapsa confestim cum ipso corruit. At ille non intendens ad eum qui ceciderat, tertio jam imminente, qui sequebatur, occurrens, simili nece prostravit. Duo quoque alii, qui sequebantur, videntes suos ita

prostratos , exterriti valde retro fugam expetunt , ad urbem perneciter regredientes. Verum ille eos ad portam usque infecutus est : sicque mox victor reversus , de spoliis eorum , quos prostraverat , non curans , suos repetit , eisque quid vel quale quantumque egerit per ordinem pandit. Nempe illi longo ipsius abscessu multum contristati fuerant , verentes ne quid ei sinistri contigisset : sed reverso eo incolumi , maestitia eorum à mente gaudio subsequenti deterfa est.

CXII. His ita peractis ; Principes exercituum , qui sequebantur , adveniunt , urbemque Jerusalem quo ordine obsidere debeant prius decernunt. Normannus itaque & Flandrensis Comites ei portæ opponuntur , quæ adhuc sancti Stephani dicitur esse. A dextris istorum Tancredus imminet , cui illa pars urbis expugnanda contigit , qua turris quædam ab ipso expugnata , usque hodie turris Tancredi appellatur. At vallis quædam Gottifredi Ducis castra suscipit , cujus frons Tancredi vicinia pertingebat. Porro Raymundus Comes ad obsidendum montem Sion constituitur , remotus ab Jerusalem solo obice muri ipsius. At vallis Josaphat remansit libera. Siquidem pars illa penitus non timebat , eo quod valle reducta , aggere arduo muroque inexpugnabili muniebatur.

CXIII. Verum exercitus peregrinus , partim bellis , partimque morbis attritus ; præsertim Gallorum Comitum , videlicet Stephani , Hugonis Magni , necnon Boamundi Principis absentia in tantum minoratus erat , ut non dicam turres natura munitas tentaret obsidione cingere , sed etiam ad expugnandum murum humiliorem non sufficiebat. Tribus itaque portis tantum deputata est obsidio , quarum scilicet portarum duæ e regione erant , tertia vero , id est occidentalis , erat ex obliquo : quarum subiecta vallis ab occurribus obsidentium faciebat liberum ; illa vero vicina planitie assultibus oportune ministrabantur. Erat autem tunc mensis Junii. Castra denique fame , sole , labore , bellis , vigiliis acrius laborabant : illos autem , qui erant in civitate , saties , umbra , quies tenebat.

CXIV. Igitur quia milites Christi quietis jam habendæ avidissimi erant , labori insistebant , quærentes solliciti ligna , unde machinæ fierent , quibus proximo die veneris muri civitatis , quia humiliores erant , scandi valerent : quo scilicet die scansionem illam prædictus solitarius potius fieri mandavit.

vit. Unde perlustrata circumquaque vicinia, nullum inventum est lignum siccum vel viride, ut ad scalarum fabricam posset proficere. Cumque Tancredus lignum quodlibet per regionem illam in circuitu reperiri non posse vidisset, secedens aliquantulum longius, invenit latebras quasdam, infra quas aliquantæ trabes celabantur, quæ quidem ipsius animum fallere nequiverunt. At ille pro his quæ invenerat gaudens, confestim illas inde abstrahi & afferri fecit, quibus dumtaxat scala una efficitur. Qua quoque peracta, ad fabricandum aliam spatium non dabatur: quoniam dies veneris, qui ad ascendendum civitatis murum à prædicto monacho institutus fuerat, in biduo jam propinquare cernebatur.

CXV. Veniente igitur veneris die, quamquam machinas aliasque scalas non præparaverint, nolentes præterire verbum senis, cum secundum dictum illius melius præparari debuissent, ultra modum præsumentes, scalam illam solam mœnibus applicuerunt. Tancredus ergo cum primus omnium toto mentis conamine per illam ascendere vellet, à Principibus ne se mortis præcipitio daret vix retinetur. nam turba gentiliū illuc ad murum tuendum tota confluerat. Erat autem in eadem expeditione juvenis quidam miles, nomine Raymbaldus, mente & corpore robustissimus, genere nobilis, Francigena de civitate Carnoto. Is statim ad subeundum murum libenter se offerens, per scalam manu tenens gladium intrepidus graditur. Cumque sursum ascendens manum jam ad apprehendendum murum extendisset, mox eadem manus subcissa demergi illum compellit, omnibusque de sui membri succisione magnum mœrorem incussit, quippe qui antea, sicut dictum est, vir illustris, milesque valentissimus fuerat. Ducitur itaque ad castra curandus, non jam amplius militaturus. Scala vero, quæ muro apposita fuerat, aufertur: quæ tamdiu servatur, donec & aliæ, quæ ad opus illud sufficiant, efficerentur. Statuitur ergo à Principibus, ut ubique perscrutaretur, si forte undecumque ligna afferri possent inveniretur. Cumque ad hoc reperendum omnes laborarent, nec desiderium eorum sequeretur effectus; Tancredus tamen à suo non est fraudatus desiderio. Mirum namque quod narrabimus esse videtur, quod tu si bene consideras, actum divinitus non negabis.

CXVI. Sane tunc Tancredus graviter fluxu ventris tor-

quebatur. Cumque ad ligna quærenda vix equo insidens equitando sibi non parceret, pestis illa crebro eum secessum petere compellebat. Sæpe autem dum hac molestaretur angustia cum sodalibus, qui quæsitum ligna frustra laboraverant, labori cedere revertique disponebat, cum ecce labore ipso gravatus, ab aliis elongatus, equo descendit. Cumque descendens fociorum oculos ob verecundiam se evasisse putaret, ecce respiciens comperit se non esse evasum. qui rursus latebras alibi quærens, alios denuo passim per agros aspicit vagantes. Cumque jam sic ter, vel quater locum mutasset, tandem secessum longum petens, sub rupe cavata, quæ erat circum clausa arboribus umbrisque horrentibus, quiete invenit. Mira dicturus sum.

CXVII. Jam mox, ubi secessum peregit, huc illucque per speluncam inspicens, trabes quatuor intio latentes vidit, quæ proposito operi aptissimæ esse videbantur. Fertur namque quod hæ ipsæ trabes fuerunt, quarum ope Rex Ægyptius Jerusalem expugnans ceperat. Quibus visis, Tancredus mox hilarescit. qui tamen nec sibi, nec oculis adhuc credens surgit, palpat, rem diligentius prospicit. Reperto itaque desiderio suo, Heus heus, inquit, ò focii, huc huc accurrite, clamat. En Deus plus quam petimus donat. Quæsimus rude, ecce reperimus fabrefactum. Tunc socii vocati continuo adsunt, undequæ gemuerant gaudent. At ille mox mittit nuncium, per quem exercitum adhuc tristantem de lignorum repertione consolari festinet. Promulgato itaque per populum gaudio inventionis trabium, vox lætitiæ & exultationis fit in tabernaculis Francorum: ex quibus pars maxima, sicut in letaniis, cantando obviam afferentibus illa procedunt.

CXVIII. Sed quia trabes prædictæ ad opus ipsum faciendum aliorum lignorum supplementis egebant, eligitur Robertus Comes Flandrigenorum: quatinus eidem artificio insistens, ipse solus in capite suo illud efficeret, ceteri vero obsidioni operam darent. Tunc ille comitantibus eum ducentis loricis cum aliquantis fabris lignariis, ad nemus quoddam ultra Neapolim, quæ olim Sebastia, ante autem Sichar dicta est, contemptis circummanentibus hostibus equitavit. Dum ergo reperto loco sub militum tuitione ligna cæderentur, Comes interim venatum pergens, carnem ferinam copiose afferebat, qua fabri ut magis labor exerceretur epulabantur.

Itaque labor ille & Comiti erat cum utilitate voluptas, & artificibus parata sine metu refectio. Ut autem ligna sufficienter succisa fuissent, Comes sapienter cum commilitonibus suis armis præmunit vulgus, & ligna dum redeunt tuctur. Reversus itaque ad castra nil sinistri, dum iret, ibique moraretur atque rediret, licet undique circumstarent hostes, se habuisse denunciât. Quapropter favorem maximum, laudemque ingentem ab omnibus confestim meretur. Dum ergo turris lignea fabricaretur, consilium Principum erat, quatinus eam præparatam paulatim impellendo transferrent: ut dum illi qui erant de intus contra eam suam erigerent, ipsi subito, ubi inferior murus videbatur, inopinantibus illis, & suam attraherent.

CXIX. Interea dum molimen illud præparando mora ageretur, bellum ab Ægypto & Arabia, à Palæstinis & Damasco per eos, qui minabantur, jam instare sentiebant. Ipse etiam exercitus panis inopia & aquæ plurimum constringebatur. Terra autem per circuitum tota depopulata omne jam alimenti subsidium illis negabat. Sed & ipsis ad quærendum utcumque cibos, à castris nec ad horam recedere propter hostes jam imminentes licebat. Quid ergo agerent, cum nil præter mortem viderent? Quid dicerent, cum ipsi obsidentes Jerusalem ab aliis multo plus in proximo jam obsidendi essent? Unicus quidem planctus per universum erat exercitum, dicens: Frustra Romanix bella, frustra Antiochiæ famem, frustra reliquos labores nunc usque perpeSSI superavimus, cum nos modo in litore positos jam totum pelagus naufragos facit. Fuerunt namque nonnulli ex eis, qui muros Jerusalem, tamquam citius morituri brachiis amplectentes, osculari præveniebant: in quorum scilicet oscula, modo ferrum, modo saxa, interdum sudes necem subitam de super ruentia inferebant. Verum nec sic devotio illorum semel incepta potuit terreri. Nam alii mortis illorum exemplum sumentes ad osculandum similiter muros, ut vel sic morerentur priusquam ab hostibus occuparentur, desiderantes præcurrunt. Jam triginta quinque dies ab exordio obsidionis, mense Julio intrante, evoluti erant, cum jam opus prædictum consummatum esset. Cumque in eo loco, quo civitas fortior erat, adhuc machina posita esset, subito quadam nocte constituta, nescientibus illis, in eandem partem, qua murus urbis humilior esse videbatur, paulatim im-

impellendo molimen illud transferunt. At illi qui erant de intus, cum clarescente die machinam illam, ubi non putabatur, translatam vidissent, nimio mærore affecti sunt, quod eos suam quam jam patrauerant oportebat destruere, iterumque in ea parte illam reficere, qua contraria exteriori machinæ existere posset. Dum ergo illi ad reparandum opus suum operam darent, forensis exercitus ad custodiendum machinam suam totus transfertur, eamque in quibus necesse erat ex toto præparare accelerant. Cum ergo & ipsi suam præparassent, cœperunt utrique inter se pugnare. Isti cum ariete muros & turres impellentes, quassant: illi contra arietem mœnia terebrantem petras ejiciunt. Denique saxa, sagittæ ex utraque parte volant: scuta, galeæ, crates, muri adacti utrorumque remugiunt. Sonitus vero utrimque intorquentium jacula ita maximus erat, ut ex eo aures omnium repletæ vicissim non intelligerentur.

CXX. Interim dum hæc utrimque sic gererentur, moles lignea paulatim movendo approximat: at ubi illuc usque appropriatum est, ut alternæ lanceæ jam inter se ferro tinnirent; aries lignæ turri adstans antemuralis objectione, quod vulgo barbicanus dicitur, procedere eam non permittit. At vero machina, quæ sequebatur arietem, retrocedere prohibebat: dextrorsum autem, seu sinistrorsum divertiefectus ipsius negabat. Quid ergo agerent Christicolæ, cum eorum machinam ultra tendere nequirent? Datur ergo consilium, ut aries ipse totus combustus viam transituræ machinæ daret. Cumque ad hoc intenderent ut igne combureretur, videntes hoc qui erant de intus, ut illum exstingerent, aquas projiciendo in illum operam dabant, qui prius pice, & sulfure, & face, ne prævalere posset, ab illis ustulatus fuerat. At ille cum propter aquarum affluentiam maneret illæsus, ecce iterum Christicolæ sumpto igne illum incendunt. At hæc Machomicolæ rursus amphoras aquæ à machina sua jactantes, ignem ardere incipientem ne ardere possit præpediunt. Quid moror in verbis? ad ultimum Christiani, dum Deo cooperante aquis fluentibus instantius obstarent, aries totus incenditur. unde Christo victori laudes referuntur. Parente namque aditu, qui prius ab ipso ariete impediabatur, machina semel atque iterum feliciter procedit: deinde cum tertio moveretur, quæ antea felix ibat, nunc flebilis redditur. Nam molimen illud ex

parte maxima lignis recentibus operatum atque connexum, sub onere fatiscens jam vergere incipit, quod ita pede uno læso immobile stabat, ut nec ultra progredi, nec retrocedere quiret. Ecce iterum dolor maximus ex tanto casu accidens Christi milites arripit. Quid enim facerent penitus nesciebant, nam illam destruere, iterumque reparare, propter instantiam hostium, nec temporis spatium nec facultas dabatur. Qui quoque tanta circumvallati angustia, Bene, inquit, hoc nobis contigit, quia cum illud sine dubio futurum credebamus, ab eo ne nobis accideret in primis nos custodire negleximus. Inter hos tamen gemitus præparaverunt perticam sufficienter longam, in cujus culmine falcem efficacissimam affixere. Quam cum ipsi ad funes usque, quibus molimen illorum innexum erat, quo lapides mitrebantur, extenderent; ab ea comprehensi, fortiusque abstracti continuo succiduntur: quibus succisis ligna quæ eorum nexibus alligata fuerant, statim dissolvuntur, dissoluta vero ad terram ruunt.

CXXI. Erant enim duæ turres, quarum una stans ad dexteram, alia vero ad sinistram, nullum solatium eis, qui erant in machina, in proximo jam periclitaturis præstare poterant: eo quod unam illarum paululum remotiorem Tancredus; aliam vero, quæ erat propior, Comes Normanniæ fundarum balearium jactibus instanter fatigabant. Quam ob rem illi quicquid tuebantur, ad hoc ipsum solummodo intenti, aliis succurrere non valebant. Cumque illi de machina jactus suos succisis funibus non haberent, tremefacti valde, faccis paleis plenis mœnibus innexis à volatu lapidum ea defendunt. Francis itaque sine effectu laborantibus planctus plurimus, immo risus nullus erat in eis. Quod cum presbyteri, qui erant inter ipsos, vidissent, nullaque Christicolæ victoria sequeretur; continuo in albis & stolis flentes & psallentes, atque *Kyrieleyson* cantantes, machinam, quæ ante moveri non poterat, impellentes movent. Tunc milites, qui præ labore casso, quem antea passi sunt, in castris torpere videbantur, confidentiam presbyterorum ipsorum intuentes, mox redeunt, illosque cum eisdem ipsis *Kyrieleyson* cantantes adjuvare contendunt. Quid amplius dicemus? Benedictus Deus, qui non derelinquit confidentes in se. Spem bonam illorum considerans, statim modo consolatus est illos, atque ubi jam spes exciderat, illuc machina sine magno labore ab illis advecta est. Transvecta itaque mole illa ad locum, quem

jam longe præviderant , illi , sicut supra dictum est , cum saccis paleis plenis muros a jactibus illorum tuebantur. At Franci sagittas ignitas ab arce lignea trahentes, saccos perforantes accendunt. Verum turricolæ ejusdem incendii vires non ferentes, cedunt flammis , qui nec jaculis ante cesserant , nec balistis. Cumque muri propter ignem tutoribus vacuarentur , exteriores hostes securius scalas mox mœnibus applicant. Sed & trabe continuo inter murum & machinam posita , sine mora juvenes fervidi manibus pedibusque hac ope repunt in urbem, à multis procellis eruti, portum quietis jam adepturi.

CX XII. Horum primus quidam miles strenuissimus, Bernardus nomine , cognomento de sancto Valerico, clarus genere , tenens manu gladium , trabem prædictam inter duo femora transmeavit , simulque alii, videlicet duo fratres , quorum unus vocabatur Letholdus, alter vero Ingelbertus, ambo Flandrigenæ , sine mora per scalas murum ascendentes, Bernardum mox præveniunt, atque à mœnibus enses strictim gerentes intra urbem descendunt. Quos Bernardus sequens, & ipse introgressus est : deinde alii atque alii amo do audaciores , videntes illos ascendisse , strictis ensibus, loricis muniti, galeis capita cooperti illos subsecuntur. Cumque Bernardus unam tenens viam ab illis duobus fratribus divideretur, sequentibus se aliis cœpit obvios quosque quosdam repellere, alios ferire, alios vero trucidare. Illi vero duo fratres per alteram partem civitatis euntes, sequentibus aliis eadem agebant. Bernardus denique cum quemdam gentilem audacter resistentem obvium habuisset , animo accensus, viribusque collectis ceruicem ense percutiens, caput cum scapula per medium ab alia divisit: ita ut dum caput cum scapula cadens in terra jaceret , truncus cum altera adhuc rectus staret. Fit strepitus magnus in urbe , magnusque timor arripit omnes. Tunc nonnulli Sarracenorum, metu Christianorum cogente, ut mortem evaderent arces ascendunt : alii, quamvis frustra, insequentibus se resistere tentant,

CX XIII. Alii vero Christiani milites , & populi omnes, qui erant in castris, non valentes per muros ascendere , accedentes ad portam vallis Josaphat, quæ eis vicinior erat , solis humeris à cardine illam extrahentes evertunt. Tunc patefacto aditu Principes , omnisque plebs militaris & pedestris intrantes urbem capiunt. Verum gentiles intrantibus illis non valen-

res obsistere, quidam huc, alii illuc fugiunt: nonnulli vero sursum, alii vero deorsum terga vertentes tendunt. Plures autem per sata, alii per sæpes, quidam per tecta, plerique per arva, alii vero per * mortis periculum trepidantes diffugiunt, sed frustra. Nam ubicumque ibi inveniebantur, penitus interficiebantur. At Christiani quique secundum quod animus illorum desiderabat, ad hoc tantum sibi capiendum intenti erant. Nam quidam aurum vel argentum, alii gemmas, alii purpuram, alii aurichalcum, alii servos vel domos, alii autem equos, vel quodlibet aliquid animal sumebant: alii quoque nihil horum desiderantes, panes, vinum, aquas, eo quod multum esurierant vel sitierant, tantum quærebant. Nobiles vero viri ad nihil aliud intendunt, nisi ut cædere possint: vulgus vero non ad hoc, sed ut spoliare possint omnino laborant: milites uero ad effundendum gentilium sanguinem solummodo intendunt: duces vero ad exhortandum & urgendum suos ad stragem insistere non desinunt. Illinc Robertus Normanniæ, isthinc alius Robertus Comes Flandrigenarum stabant: hinc Gottifredus Dux celeberrimus, illinc Raymundus magnanimus Comes sancti Ægidii consistunt, singuli suos incitantes, quatinus Sarracenorum cædi omnino intenderent. Qui videlicet Raymundus turrem David cum suis circumdedit, non sine multorum nece, qui refugi de muris ad arcem illam tuendi gratia se traxerant.

* f. hortos.

CXXIV. Verum Tancredus, qui non sicut homo, sed tamquam rugiens leo furebat, venit ad Templum Salomonis, ad quod tota pæne multitudo gentilium confluxerat, videlicet palatium spatiosum, capacissimum, mœnibus altis circumdatum, quod etiam quindecim magnas domus infra se continebat. Qui vi fractis ingreditur portis, atque quos obvios habuit, mox percutiens trucidavit. At vulgus ipsum Sarracenorum metu ipsius introrsum recedens, in ipsis prædictis domibus januis ferratis, obicibusque firmatis se claudunt. Hoc quidem Templum tam amplum per circuitum erat, ut quasi alia urbs intra Jerusalem esse videretur. Tunc Tancredus reminiscens totum æs Sarracenorum reconditum esse in templo Domini, interim relictis illis, qui ita se clauserant, illuc se tota agilitate vertit, ne forte, ipso quoquo modo morante; alius ad illum diripiendum eum præveniret. Paresfacto itaque Templo, ille ingressus, ecce videt simulacrum argenteum Machumeth, quod

erat fusile, stans in excelsa throno, quod videlicet tanti ponderis erat, ut vix sex viri fortissimi ad portandum, vix etiam decem ad levandum sursum sufficerent. Quod curiosius Tancredus intuens, Pro pudor, inquit, quid sibi vult præfens imago, quæ stat in sublimi? quid sibi vult hæc effigies? quid gemma, quid aurum, quid sibi vult ostrum? Erat quippe ipse Machumeth omnibus his redimitus. Rursusque ait: Numquid enim hæc figura Christi est? Non. Nam Christus cum in ligno suspensus fuisset, pedes ejus clavis affixi sunt, latus vero illius lancea perfossum. ergo non est hic Christus, sed est pravus Machumeth pristinus Antichristus. O si ille Antichristus, qui futurus est, hic esset cum isto! ambo vere pedibus meis cito nunc supprimerentur. heu dolor! Machumeth quomodo apud inferos torquetur, nunc in templo Domini per imaginem ipsius dominari videtur! qui vernaculus est baratri, nunc in templo Dei, tamquam sit Deus, sedere conspicitur! Dixitque ad suos circumstantes: Ascendite ergo cito, eumque deorsum mittite. quod utinam jam dudum factum fuisset. nam ita ipse superbus stare videtur, ac si Deus nos absorbere vellet. Tunc milites jussu ipsius audientes confestim ascendunt, abripiunt, trahunt, dirumpunt, atque obtruncant. Mox ergo metallum, quod erat carum materia & forma vile, postquam dissectum est, de vili factum est pretiosum. Denique interior paries templi Domini per circuitum ad honorem ipsius Machumeth lamina argenti radiabat, quæ fere uno cubito lata, atque quasi pollice uno densa cernebatur: pondus vero ipsius erat quasi septem milia marcæ. Hoc quoque vir sapiens Tancredus, quasi segne & inutile manens, convertit in usum. Nam hinc & nudos vestivit, & pavit egentes: hinc & inermes armavit, hinc & militiæ numerum auxit. Reperiuntur & ibi quingentæ caldariæ de argento diversæ quantitatis, quæ ad officium Machumeth deputatæ fuerant: sed & diversa vasa argentea absque numero, quæ illic servabantur, reperta sunt, quæ cuncta ab eo accipiuntur. Paries & columnæ templi sub gemmis, multaque alia sub auro & argento latitabant, quæ excrustata à Tancredo diripiuntur. Sed & alia quæque pretiosa, quæ longo tempore ibi clausa fuerant, sub oculis omnium ad lucem prodeunt, quæ ipse rursus omnia accepit.

CXXV. Igitur dum hæc fierent, fremitu belli resonante per urbem plures Christianorum ad templum Salomonis conveniunt:

veniunt: quorum alios spes cædendi, alios autem amor lucrandi
 impellerat. Qui etiam vi * prælii fractis intrantes, alii jugu- * f. portis.
 labant senes, alii parvulos: aliis quoque fuit cura gemmas
 in aures à quorundam auribus violenter dirimere. Quod cum
 fieri milia Sarracenorum vidissent, non sufferentes, sine nu-
 mero & ordine à latebris suis prodeuntes exiliunt, spicula
 mille in Christianos se insequentes jaciunt, eisque resistunt.
 E contra grex Francorum, quia pusillus erat, non valentes
 tanto numero obviare, cedunt. At illi videntes eos terga
 præbere, magis cedentibus instant. Rursus & illi animum
 resumentes vertunt se ad illos, eosque retrocedere cogunt.
 Itemque illi, eo quod numero prævalebant, contra illos re-
 deunt, eisque obsistunt. Contra quos Christicolæ, dum mo-
 ri non timent, iterum vertuntur, eosque rursus cedere com-
 pellunt. Cumque sic hi, & illi totiens versa vice cederent;
 ad ultimum bellatores Christi, quia numero & armis deficie-
 bant, instantibus illis retroire jam ex toto coguntur. Quos
 cum cecidisse Hebrardus Pusiatis, vir bellicosissimus, illuc
 veniens comperisset, quem non casus, sed Dei voluntas ad-
 duxit, clara voce arguit eos dicens: Quid est hoc quod agitis
 recedendo? nonne ad bellandum venistis? certe ut video, sicut
 pueri vos ludere putatis: vel ita vos agitis, ac si puellæ in choro
 rotare videremini. Numquid non estis viri Franci? nonne
 propter mortem subeundam venistis? auferte ergo à vobis
 metum, patriasque vires resumite, meque cito revertentes sequi-
 mini. At illi hoc audito mox conantur, eumque corde uno
 eademque voluntate, licet sine clypeis essent, illum sequun-
 tur. Tunc ille clypeo protectus & galea, dextra ensi tenens,
 obicit se multitudini gentilium, eos solus repellit: cujus ex-
 emplo alii qui sequebantur provocati, hoc ipsum similiter
 peragunt, ipso tamen præcedente. Facta est ergo ibi magna strage-
 ges, in tantum ut Sarracenorum milia ab eis cæsa referantur.

CXXXVI. At Tancredus dispositis omnibus, quæ dispo-
 nenda ex his videlicet rebus, quas in templo invenerat, ab ipso
 mox templo regreditur, eosque quos in templo Salomonis ad
 tempus dimiserat repetit. Qui cum interiores domus, quibus
 milia gentilium latebant, penetrasset, sine ulla miseratione
 cum suis in eos irruens cædit: quorum alius per caput, alius
 per ventrem, alius per ilia, alius per coxas, alius per collum
 alius vero per dorsum gladio percussus prosternitur. Quippe

ipsa multitudinis eorum constipatio seipsam persequabatur. Nam dum alii alios constipantur, perimunt. Ipsa quippe corpora sauciata sanos in se ruentes sternebant: & quanto magis vulgus ipsum densabatur, tanto plus debilitabatur. Nam cadens stantem, & stans cadentem suffocat. Facta est ergo ibi tam ingens cædes, adeo ut nec unus ex tam magna multitudine vivus superstes remanserit. Sanguine vero occisorum in tantum domorum illarum universa spatiositas repletur, ut nostri quis in eum submersus usque ad genua per pavimentum ire non posset. Sed & limina, maceries, tabulata, atque columnæ sanguine cuncta madebant. Quibus quoque deleris, quis enarrare sufficiat quanta gaudia Christianorum fuerint, cum de tantis damnis gentilium tanta eis commoda surgerent? Quis verbis potest exprimere, quanta tunc eis lætitia, cum illi, qui Christum in suis membris aliquando dilaceraverant, modo in suis corporibus taliones ab ipsis excipiunt? Gaudebant etiam, quod cursum itineris peregrinationis, quem devoverant, jam consummatum esse cernebant, gratias agentes Deo, qui eis in cunctis misericordia ejus præveniente atque subsequente cooperator extiterit.

CXXVII. Civitate ergo à paganorum dominio expurgata, sola turris Davitica expugnanda restabat. Nam adhuc Sarraceni in ea commorantes erant, qui eam ad custodiendam susceperant. Hi videntes urbem esse comprehensam, consilium quomodo evadere possint exquirunt. Miserunt itaque ad Raymundum sancti Ægidii Comitem, qui à principio turrem eandem obsederat, dicentes: Nos tibi eo pacto arcem istam trademus, quatinus nos securos, liberosque usque ad Ascalonem conduci facias. Quo audito, ille securitate eis pollicita atque jurejurando firmata, arcem illam suscepit: sicque eos, ut illis promiserat, securos abire suorum conductu fecit. Capta est ergo civitas die Iduum Julii, sexta feria, videlicet ab obsidionis exordio tricesimo nono die, ab incarnatione autem Christi millesimo nonagesimo nono. Constitutum est itaque ab omnibus, atque firmatum, ut prædictus dies captio- nis, immo liberationis Jerusalem, singulis annis in memoria habitus sollemniter celebretur. Post hæc autem inter Principes adversus Tancredum orta est invidia, eo quod ipsi uni abundaverit Deus, quorum quidem invidia Arnulfus occasione accepta, super eo cunctis proceribus congregatis valde conquestus est,

quod thesauros templi contra se, qui templi ejusdem ceterarumque ibi ecclesiarum minister erat, abstulit. Querelæ autem, quas auribus ipsorum Principum de eo ingerebat, tali modo proferebantur. Vos me, inquit, o Patres, de humili in sublime promovistis, vos de ignoto sublimem exhibuistis: vos me quasi unum ex vobis creastis: & hæc quidem non meis meritis, sed gratia vestra. At Tancredus solus me persequitur, in me tyrannides exercet, in me omnino sævit. Quod communis mihi assensus vester confirmaverat, solus etiam ipse derogat. Vos mihi jura Pontificis dedistis, ipse aufert: vos me investistis, ipse spoliat. Tuemini igitur, o fortissimi Proceres, jus vestrum, ulciscimini injuriam vestram, punite injuriæ illatorem. Nemo putet hanc contumeliam meam solummodo esse, sed vestram. Mihi quidem res imminuta est, sed vobis aucta injuria. Ad me damnum redundat, ad vos dedecus. Nam qui dispensationem divinam conculcat, nempe vestram omnino dispensationem damnat. Scriptum est enim: Qui contemnit legem, spernit regem. Cur autem vos non spernet, qui Deum spernit? Cur vobis parceret, qui altaribus non pepercit? Cur vos patitur ægros, qui templum Domini excrustavit? At non est mirum, si Tancredus hoc fecit: secutus est enim patrum suorum vestigia. Quis inter amplexus & oscula compatrem suum à mœnibus castri sui rotando dejecit? nempe Robertus Guiscardus. Quis vivus pro mortuo ad tumulandum in monasterio montis Casini prolatus est? utique Robertus Guiscardus. Quis nepotem suum ad concordiam persuasum, prius calida, deinde mox gelida aqua perfudit? isdem ipse Robertus Guiscardus, qui tamen fertur ecclesiarum fuisse fundator, non subversor; nec alias ecclesias aliquando denudasse, sed multas ditasse.

CXXVIII. Cumque hæc & alia plurima contra eum locutus fuisset, Tancredus ad hæc rationem reddens, sic ait: Scitis, o Proceres, studium meum, quia militia tantum fuit, non verborum persuasio, nec linguositas me promovit, sed ensis, & lancea. Proinde indulgendum mihi est, si positus in loquendo rationem excessero, si rudis & ineloquens aut minus, aut plus dicam. Hic quidem, ut opinor, adversarius meus Arnulfus me lædendum consideravit, quia meum sermonem Imperitum attendit. Sicut enim scorpius in cauda, ita quoque ille omnem suam malitiam habet in lingua. Vere inquam,

vere lingua ipsius cauda est scorpionis. Audistis vos ipsi, quod viperino dente genus meum corroserit. Roberto Guiscardo, tanto Duci, videlicet secundo Alexandro, nunc detraxit homo, de cujus germine Princeps quispiam numquam descendisse visus est. Quippe Roberti Guiscardi ad i nota sunt cuncto orbi: non est ergo qui ei possit detrachere. Quid? quod iste infamat me templum excrussasse, quod videlicet est pauperibus opitulari, delicias necessitati postponere, captivorum vitam redimere, concubare gentiles hostes, ad pugnandum milites creare. Nonne hic est qui laudari appetens, alios clamare facit ea certe quæ ipse nequaquam agit? Nempe ego ad reipublicæ tutelam, ad infideles debellandos, urgente periculo, instante bello, necessitate coactus es, quod in templo vacabar, & quasi dormiebat, excitavi, ut gentilibus quibus servierat fulgens, melius nobis serviret bellans. Non illud abstuli, ut inde nepotibus meis murenulas cuderem. Res sane, quæ sine commodo manebant, ad proficuum commune transtuli, eas non consumpsi, sed promovi, ut fructum multiplicent: si non ita moverentur, in augmentum aliorum non surgerent. Seminavi ut metam, & ut creditori meo decuplum persolvam.

CXXIX. Cumque hæc, & alia verborum plurimorum dissonantia auribus Principum intonuisset, ipsi jam ad respondendum unanimes redditi, sopita invidia, justitiam scrutantur, videlicet quiddam tale inveniunt, quo nec incassum Arnulfus reclamaverit, nec paratis proprio sudore opibus frustraretur Tancredus. Judicant ergo ubera non debere relinqui arida, quæ tantum lactis effuderint: cum præsertim Tancredi liberalitas aliis Dei non desit ecclesiis. sed & hanc præcipue ecclesiam, id est templum Domini, quæ ipsum indigentem ditavit, debet & ipse versa vice fovere illum indigentem. Quid plura? consilio ergo principum Tancredus septingentas marcas templo libens redonat: atque sic pace conjunguntur ipsi duo, qui abjuncti discordiâ fuerant, ambo videlicet viri conspicui, ambo potentes, ambo aliorum omnium invidia, cum eorum neuter cuilibet nisi forte alterutrum invidet.

CXXX. Post hæc autem ortum est inter procures consilium, quis eorum in civitate Jerusalem Rex haberetur. Non enim decebat, ut amodo tanta talisque civitas sine rectore maneret. Interrogatur ergo Robertus Comes Normanniæ, utrum velit pro divino amore in eadem urbe regni jura tenere,

At ille respondens, Non enim, inquit, Comitatum meum, quamvis pro Deo huc venerim, omnino dimisi, ut hic manere debeam. Nunc itaque quia votum meum complevi, si Dominus dederit, ad meos reverti desidero. Ad Ducem autem Gottifredum cum ventum fuisset, sciscitatur ab eo, si regnum Jerusalem pro Dei dilectione & Christianitate ibi augenda accepturus esset. At ille, Ego, inquit, Ducatum meum ea intentione reliqui, ut huc veniens, illuc ultra remeare non debeam. Nunc igitur si voluntati Dei vestraeque placitum est, Jerusolymitanum regnum, non pro meo honore meaue voluntate utenda, sed ob Christi amorem, simulque honorem solummodo accipere consentiam. Quibus auditis, mox omnes uno voto, eodemque animo illum in Regem eligentes, civitatem ei subdiderunt. Qui tamen, ut fertur, quamdiu vixit in corpore, adeo humiliatus est, ut in capite suo corona numquam usus sit, præ illius reverentia, qui spineam in capite coronam ibi gestavit.

CXXXI. Nec mora, Rex Ægypti comperiens urbem Jerusalem à Christianis esse invasam, conturbatus est valde. qui timens sibi, misit trecenta sexaginta milia equitum Sarracenorum, ac peditum numerum velut arenam maris, quatinus advenas hostes bello comprimentes expellerent. At ubi de adventu illorum nunciatum est Francis, antequam illi Sarraceni ad illos accessissent, eis ad Ascalonem occurrerunt, belloque inito Deo cooperante datur victoria Francis. Nam eorum alios fauciant, alios trucidant, alios vero fugam subire compellunt.

CXXXII. Denique Ascalonitæ cernentes illos, quorum auxilio tueri putabantur, oppressos atque superatos fuisse, antequam à Francis obsessi invaderentur, consilium evadendi alterutrum expetunt. Miserunt ergo ad Comitem sancti Ægidii, ab eo obnixè flagitantes, ut sicut turris Daviticæ custodibus fecerat, eadem & ipsis fierent, videlicet ut Ascalone ei dedita, illis ob hanc causam omnibus parceretur. Quod cum comperisset, libentissime quod quæsierant, annuit: sicque posito super turrem vexillo suo Ascalonem obtinuit.

CXXXIII. Rex quoque Gottifredus, alique procures, cognito quod Raymundus Ascalonem adeptus sit, læti effecti dixerunt ad illum: Glorificetur Deus, qui tibi Ascalonem subdidit. Nunc ergo volumus, & precamur, ut quia urbs ea-

dem juri Jerusalem pertinet, regi ipsius Gortifredo, quod æquum esse videtur, restituatur. Si autem tibi hoc fieri displicuerit, eaque potiri volueris, Jerusolymitano Regi subdaris, eamque ab illo inantea tenere te recognoscas. Non enim decet, nec etiam consentiendum est, ut duo Reges alterutrum divisi hic habeantur: sed unus Rex, quod justum esse cernitur, & tibi ceterisque omnibus præsit. At ille audito de subditione sui, indignatus est valde, eisque respondit dicens: Potius Ascalonem eis, quorum fuit, restituam, quam Gortifredo, qui compar meus est, summittar. Quapropter continuo mittens Ascalonem gentilibus reddidit: sicque urbs neophyta in apostasiam reversa, à Sarracenis nunc usque possidetur. Unde Raymundus in redditione illius plurimum peccavit, quoniam cunctis Jerusalem petentibus nimis impedit iter. Hæc enim civitas euntibus illuc, & redeuntibus peregrinis portus rectus esse solebat.

CXXXIV. Nec multo post ambo Roberti comites, sicut mente conceperant, ad suos redeunt, atque de omni multitudine illa vix ducentæ galeæ remanserunt. Raymundus vero Comes cum quadringentis viris belligeris inter pedites & equites Tripolim pergens eam obsedit, mirabile dictu, tam parvo numero contra tot milia pugnaturus. Qui quoque tantæ audaciæ fuit, ut eo solummodo fretus numero, licet illi resisterent, colliculum quemdam urbi vicinum muro & turribus muniret, quem etiam nunc usque Montem peregrinum vocant. Erat autem civitas valde inclita, mari adjacens, mœnibus fortibus munita, turribusque excelsis circumcincta, opibusque ditissima. Comes ergo in prædicto monticulo, quem contra eam munierat, cum suis residens, illam crebris assultibus tamdiu infestavit, quousque vi capta ab ipso obtineretur. Verum Tancredus pro divino amore ac Christianitate ibi augenda, simulque tuenda, sub novo Rege Jerusolymitano militare non dedignatur. qui assumptis ex illis ducentis equitibus, qui remanserant, octoginta; cum eis ipsis huc & illuc prælia Domini exercebat. Nam centum viginti in urbe Jerusalem ad custodiendum eam remanserunt. Igitur Tancredus, zelo Dei tantummodo ductus, aliquando Damascum, aliquando in Arabiam, & ubicumque posset prædatum pergens, Jerusalem spoliis, quæ obsidione jam pauperata fuerat, ditabat. Qui postmodum locum quemdam aptum ad inferen-

das usquequaque prædas invenit, qui nunc *Bizan*, olim Bethsamis, ut in primo Regum legitur, appellatus est. Hunc quoque locum sibi ille aggere valde præmuniens, cuncta municipia cunctasque urbes per circuitum prædando, vel mercatoribus sive venditoribus viam tollendo, atrociter arcebat. Per quem etiam locum urbs Cayphas munitissima multis plagis ab eo afflictæ, ad ultimum, quamvis muris turribusque sæpiebatur, tamen obsidetur: multisque ballearibus tormentis obruta, per funes & scalas immixtis militibus capitur.

CXXXV. His diebus Boamundus, & Baldoynus Gottifredi Regis frater, de quo supra dictum est, votum eundi Jerusalem complere cupientes, cum non parva militum manu iter arripiunt. Qui dum per vallem Camelæ & Damasci viciniam, necnon per Cæsaream Philippi incederent, mirabile dictu, per medios hostes, qui circumquaque exploraturi discurrebant, liberi transierunt. Erat autem quadragesimalis jejunii tempus. Qui cum Jerusalem properassent, gaudia ibi paschalia cum rege Gottifredo celebrarunt. Quo videlicet tempore Daybertus Pisanorum episcopus, vir in litteris potentissimus atque eloquentissimus, qui in multis navibus Joppem aggressus fuerat, eodem Boamundo juvante in Patriarchatum Jerusalem sublimatur. Arnulfus autem, magnæ indolis vir, quamquam dignitatis hujus electione donatus fuerat, tamen libentissime annuit, sperans Christianitatem ibi magis in illo, quam in se profuturam. Ordinantur ibi quatuor Episcopi, scilicet Roggerius Tharsi, Mamystæ Bartholomæus, Bernardus Artasii, Benedictus Edeffæ, qui cum Boamundo, & Baldoyno in presbyteratus officio positi venerant. Expleta itaque sollemnitate paschali, Boamundus cum tribus suis patribus revertitur, reddens singulis civitatibus Præsules suos. Baldoynus quoque cum suo archiepiscopo Benedicto Edeffam, cujus ipse Comitatum tenebat, rediit.

Anno
1100.

CXXXVI. Nec mora Boamundus ipse, cum audisset à relatoribus, urbem Meletianam Turcorum armis circumdatam esse, quæ decem dierum itinere aut plus ab Antiochia distabat, coacto in unum exercitu, ad liberandum eam ire conatur. Verum Turci cognoscentes illum jam in proximo adesse, obsidionem ex industria dimituentes, ut eorum est consuetudo, recesserunt. Magis enim ipsi ad tempus vel horam terga vertendo, quam accedendo prævalent. Nam & fugiendo

spicula eiciunt, se seque insequentes taliter vulnerant. Boamundus ergo cum civitati appropinquans Turcorum aciem non reperisset, consultum est sibi à suis, quatinus urbem ingressus paululum ibi prius requiesceret; ac sic postea quiete refotis viribus suis, contra Turcos ad bellandum exiret. Qui non credidit eorum consiliis, sed ex stulta audacia immoderantèr præsumens, Absit, inquit, ut Boamundus quod numquam fecisse meminit, modo facturus sit. Hoc enim faciunt vulpes, quæ mox ubi latrantes canes audierint, latebras quærentes absconduntur. Jvit igitur post Turcos: eosque inveniens, cum eis prælium, quod utinam numquam inisset, mox inchoavit. Cumque hi, & illi simul præliarentur, Boamundus retinetur, ligatur, Machumicolis magnum gaudium, vix miserabile Christianis facturus. Qui deinde in Romaniam ad Anisimam Regem vinculis mancipandus perducitur: de cujus post captione Anthiochia misera facta ita manebat, ut non esset qui adjuvaret eam, neque consolaretur.

CXXXVI. Sequitur e vestigio miserrimus casus, quo Jerusalem non minori luctu affligebatur. Nam Gottifredus, Rex optimus & timens Deum, capto mox Boamundo ex hac luce migravit. Erat jam annus unus evolutus ex quo regnare cœperat, cum ad obitum pervenisset. Qui tamen antequam præsentī luce caruisset, dum corporis infirmitate teneretur, ad se Patriarcham Daybertum atque Arnulfum, ceterosque accersiri jubet. quibus ille: Ecce, inquit, viam universæ terræ ingredior. Modo ergo me adhuc vivente consilium inter vos habeatur, & quis vice mei in Jerusalem regnare debeat prævideatur. At illi respondentes, Nos, inquit, magis hoc in tua providentia ponimus, & quem nobis ad hoc ipsum elegeris, ei proculdubio subdemur. At ille: Si, inquit, in mea dispositione statuitur, Balduinum fratrem meum ad hoc culmen suscipiendum idoneum judico. At illi Balduinum audientes, continuo unanimiter consentiunt, laudant, eique jurejurando fidelitate firmata subduntur: quoniam illum virum liberalem pecuniæ, studiosum militiæ, affatu humilem, magnanimitate sublimem cognoverant. Hæc quippe omnia natura ipsa, ut ita dicamus, in eo manu propria exculperat. Erat enim ille, sicut superius dictum est, in Rages, quæ & Edessa dicitur, Dux constitutus, ibique tunc morabatur.

CXXXVIII. Interea casu accidente Tancredus solito more prædatum iverat. Qui denique comperiens Regem ob-

isse

iisse, nesciens, quod Balduinus in regnum electus fuisset, Jerusalem reversus est. Qui antequam portæ civitatis appropinquasset, ea sibi continuo clauditur, nec valuit ingredi. At ille ammirans dixit: Quid sibi vult quod porta mihi seratur? commisi ergo aliquid propter quod intrare non debeam? Mox ergo sibi responsum est, quod non ob aliud aditus ei negatus est, nisi quia Balduinum elegerant, eique fidelitatem jurejurando firmatam fecerant. Nunc ergo si tibi intrare placuerit, securitatem prius sacramento roboratam Baldoyno, cui omnes juravimus, facias. Alioquin civitatis hujus introitum non obtinebis. At ille indignans potius intrare neglexit, quam Baldoyno sacramento subiceretur. Quod utique non casu, sed divina voluntate hoc actum esse cernitur. Nam statim illis pro Baldoyno mittentibus, ecce Antiocheni procures ad Tancredum miserunt, dicentes: Veni ad nos properanter, quoniam nostro domino Boamundo capto, consilio tuo, quid super hoc agere debeamus, perfrui cupimus. quo audito ille tristis effectus iter arripuit. Qui cum aliquantum itineris spatium peregisset, ecce Baldoynus veniebat; vidensque Tancredum, mox ab eo divertit, qui Jerusalem ut missum fuerat festinabat. At ille diversionem ejus vilipendens, nec paulum substitit, sed iter, ac si eum non vidisset, incessanter agebat. Ita quidem tanti procures alterutrum transierunt, ut nec unus cum altero, similitate pristina recordata, vel modicum loqueretur.

CXXXIX. Tancredus itaque cum Antiochiam pervenisset, portæ mox illi clauduntur. Qui cum accedens intrare nequisset, ammirans valde, ait: Cur ergo vocatus accessi, si portæ mihi serari debuerunt? At illi de intus responderunt dicentes: Non ob aliud civitatem clausimus, quia volumus ut prius te Boamundo fidelem jurejurando exhibeas, sicque postea ingrediaris. Quod cum fecisset, ingressus urbem, omnibus volentibus Antiochia ei ad custodiendum e fidelitate Boamundi traditur, quousque ipse à captione libertatis rediret. Balduinus vero Jerusolymam veniens, in ea mox consensu ac voluntate omnium, sicut jam ab ipsis conjuratum fuisse vivente Gottifredo præscribitur, Rex constituitur, cunctis hostibus undique magnum timorem incutiens. Verum Boamundus tribus annis vinculis tentus, tandem vix centum milibus miliciorum, quos Antiochia pro eo dedit, redemptus, liber regreditur, urbemque suam Tancredo fideliter cedente recepit.

CXL. Sed quia Boamundi acta, quæ nunc usque gefit, recolimus, debemus & ipsius finem qualiter habitus sit vel summam referare. Itaque non multo post Boamundus reminiscitur votum, quod Deo, & beato Leonardo, dum in vinculis teneretur, voverat: videlicet, ut si Deus per merita & intercessionem ejusdem Confessoris eum de captione illa eriperet, ipse in Galliam ad ecclesiam ipsius, qua corpus ejus quiescebat, proficisceretur, oblaturus ei bolas argenteas ad instar earum editas, quibus victus fuerat. Ex cujus scilicet itineris occasione, & ipse gentium nonnullos Gallicanarum incitaret, quatinus secum trans mare pergentes, contra gentiles & Imperatorem Alexium, quibus tunc incessanter infestabantur, pugnaturi essent. Accersitis itaque Tancredoceterisque proceribus, aperuit illis desiderium quod animo ejus insidebat: sicque Tancredo principatum Antiochenum eo tenore sub jurejurando commisit, ut aut sibi redeunti, aut heredi ejus, quem de conjuge legitima habiturus esset, ejusdem principatus civitatis restitueretur. Sumpto itaque Boamundus Dayberto patriarcha Jerusolymitano, cujus superius mentio habita est, mare ingressus est: sicque in conspectu classis, quam isdem Imperator contra ipsum suosque pugnaturam direxerat propter Laodiciam, aliasque urbes, quas sibi Tancredus, dum in vinculis Boamundus ipse haberetur, abstulerat, decem liburnis, tribusque aliis ratibus, quæ vulgo sandaliæ vocantur, advectus, Barim reversus est. Qui dum postea in Gallias iter ageret, à pluribus urbibus per Italiam cum processione & laudibus, tamquam verus miles martyrque Christi, prædicante illum eodem Patriarcha, viro facundissimo, suscipiebatur. Sed & omnes, per quoscumque transiturus esset, ac si ipsum Christum essent visuri, certatim illum intueri inhiabant. Cum ergo Romam petiisset, dimisso, nescimus qua causa, Dayberto patriarcha, ex præcepto Paschalis Papæ secundi, qui tunc Romanam regebat ecclesiam, adhibitus est vir vitæ venerabilis atque eloquentissimus Bruno Signiensis episcopus, cujus ipse in tam longo itinere prudentia, consiliisque fultus cuncta bene esset facturus. Qui dein veniens, ut proposuerat, ad monasterium sancti Leonardi Confessoris, votum suum perfecit, videlicet supra memoratas bolas, aliaque ibi præclara munera offerens.

CXLI. Sed inde pergens in Franciam, filiam Philippi regis

Francorum duxit uxorem, sollicitans etiam omnes, quatinus veris redeunte tempore pro divino amore trans mare secum abirent, gentilium multitudinem obpugnaturi. Facta itaque in ultramontanis regionibus tanta incitatione, cum conjuge sua, quam acceperat, centum equitibus comitatus Barim regreditur.

CXLII. Quibus quidem ad constitutum terminum venientibus, non modica ad eum peditum, equitumque multitudo confluit, quos Boamundus secum postea ducens transfretavit, veniensque super Durachii urbem, illam obsedit. Imperator vero Alexius audiens Boamundum super se irruisse, missis nunciis ab eo inquit, cur contra se bellum inisset. Qui respondens dicebat, quod bellum ideo contra illum ageretur, quoniam jusjurandum, quod olim sibi aliisque Principibus de securitate fecerat, ab eo violatum fuerat, cunctisque Jerusalem petere desiderantibus contrarius extiterat. Quibus auditis Imperator promisit ei sub jurejurando cuncta emendatum. quod videlicet jusjurandum & alii nonnulli de suis majores secum pariter essent acturi. Unde etiam postulabat eum, ut ad quemdam locum ad hoc aptum ambo convenirent, atque securitate alterutrum renovata inter se, & illum, & cunctos Jerusalemipetas, præsentes & futuros, pax perpetua conservaretur. Placuit itaque hoc Boamundo. Convenientes ergo utrique ad locum conditum, foederis pactum secundum quod præordinatum fuerat, constituentes, sacramentis interpositis, illud confirmaverunt. Quin etiam Imperator Boamundum in filium sibi adoptans, quam plurima magnificaque ei munera ad ultimum contulit. His ita peractis Boamundus Barim revertitur, Græciam vel Antiochiam ulterius non revisurus. Alii autem, qui cum eo iverunt, pars, qui poterant, Jerusalem ad sepulcrum Domini oraturi eunt: pars vero sumptus non habentes, eo quod diu pro Dyrachio obsidendo retenti fuerant, in Galliis redire compelluntur. Denique ei nati sunt duo filii, quorum primo defuncto alter superfuit, cui ab eo impositum est nomen suum Boamundum. Nec multo post languore correptus obiit: cujus corpus Canusium delatum, in ecclesia sancti Sabini honorifice sepultum est. Tancredus autem in fidelitate filii Boamundi Antiochiam servans, post multos agones plurimasque victorias, atque oppidorum, urbiumque multarum aggressiones, quæ nimia sunt ad memorandum, ex hac luce

subtractus est, Antiochiam Roggerio, filio Riccardi, nepoti suo, sub eadem fidelitate, quam ipse servaverat filio Boamundi, relinquens. Puer autem Boamundus, cum adolevisset, venissetque ad ætatem illam, qua principatum Antiochenum regere posset, Antiochiam mare transiens perrexit. qui ex successione paterna Princeps in eadem urbe mox constituitur. Deinde cum patris strenuitatem contra gentiles dimicans imitari cœpisset, secundum prodigium, quod superius dictum est, cito vitam finivit. Ceterum Baldoynus regno Ierosolymitano voluntate omnium, sicut jam prædictum est, accepto, quomodo in eo se egerit, vel quot prælia vicerit, seu quot urbes invaserit, quantas virtutesque alias exercuerit, quoniam proprio indigent volumine, prætermittere cogimur. Scripta sunt autem ista tantum ad excitationem fidelium futurorum, & ad laudem Domini nostri JESU CHRISTI, qui tantam suis victoriam præstitit, cui est honor & gloria in sæcula sæculorum, amen.

OBSERVATIO.

AD levandum studiosorum laborem, quod tam opera pretium visum est observare singularia loca præcipua, quæ in superiore historia referuntur, atque in primo auctore, quem inter Gesta Dei per Francos editum diximus, desiderantur. Initium historia a pag. 131 ad 139 deest apud illum Epitomatores. Item quæ num. XXXV, XXXVII, XLV, XLVI, XLVII, & LI. Quædam item ex num. LII sub finem. Ad hæc integra sectiones LV, LVI, LVII, LX & LXI. Nonnulla insuper ex num. LXIII sub finem, & ex num. LXVI & LXVII, LXXXIV, LXXXVIII & XCIII. Præter ea totum deest a num. XCIX usque ad finem: ubi de Ierosolymitana expugnatione multa scitu digna, quæ fere aliis intacta sunt, commemorantur. Denique nomina propria Epitomator nonnumquam omittit, ut num. LXXXVI & XCVI. In ceteris crebra omissiones: varia item lectiones permulta, quas retinere malimus quam corrigere, sicubi nostri exemplaris lectio dubia erat, ut ejus rei potestas esset penes studiosum lectorem. Neque illud silendum, quod Auctor noster scribit tum de Episcopis Remensi, Belvacensi, & Tarentino, tum de VVilhelmo eremita. Quippe num. C & CII superiores tres Episcopos ait in illa expeditione versatos fuisse. Qui fuerint illi Remensis atque Belvacensis antistites, alibi non legimus. Susplicamur Remensem Pontificem, cujus hic mentio, esse Manassen eo nomine primum, qui, teste Guiberto, huc illuc-

que oberrans, sine communione postremo defungitur: *Rogerrum vero Belvacensem illum episcopum, qui Synodo Clermontana pro sacra illa expeditione interfuit. Porro Willelmus eremita, de quo num. XCIX & deinceps agitur, haud dubie occasum dedit iter Ierosolymitanum affugendi Guillelmo Aquitaniae Duci, ut in ejus actis apud Bollandum. Hac satis in specimen de promissa Historia, cujus stilus primigenium auctorem sapit; atque inde majore conciliatur auctoritas.*

*His succedet primo loco Stephani Comitis Carnotensis epistolae ad Adelam uxorem suam, superius a nobis promissa ex codice Christina regina: deinde quaedam epistola formata, quas nobis pro sua benevolentia concessit cum multo honore nominandus Leander Colloredus, tunc Oratorii Romani presbyter, nuper a sanctissimo Pontifice Innocentio XI purpura cardinalitia ornatus. Subsequetur ex ejusdem Oratorii Bibliotheca Synodus Verulanensis sub Paschale secundo, & Læto Verulanensi episcopo, de quo vide sis Italiae sacra tomum 1. col. * 292.*

EPISTOLA STEPHANI COMITIS Carnotensis ad Adelam uxorem suam, scripta ex castris obsidionis Nicænæ.

Stephanus Comes A. Comitissæ, dulcissimæ amicæ, uxori suæ, quidquid mens sua melius aut benignius cogitare potest. Notum sit dilectioni vestræ, Romam me cum omni honore omnique corporea sospitate iter beatum tenere. Vitæ meæ ac peregrinationis seriem à Constantinopoli litteratorie tibi mandare curavi: sed ne legato illi aliquod infortunium contigerit, tibi has rescribo litteras. Ad urbem Constantinopolim cum ingenti gaudio Dei gratia perveni. Imperator vero digne & honestissime, & quasi filium suum me diligentissime suscepit, & amplissimis ac pretiosissimis donis dotavit, & in toto Dei exercitu non est Dux, neque Comes, neque aliqua potens persona, cui magis credat vel faveat quam mihi. Vere, mihi dilecta, ejus imperialis dignitas me persæpe movuit & monet, ut unum ex filiis nostris ei commendemus: ipse vero ei tantum tamque præclarum honorem se ei attributurum promissit, quod nostro minime invidet. In veritate tibi dico, hodie talis vivens homo non est sub celo. Ipse enim

omnes Principes nostros largissime ditat, milites cunctos donis relevat, pauperes omnes dapibus recreat.

Prope Nicæam civitatem est castrum, nomine *Civitas*, juxta quod maris currit brachium, per quod naves propriæ Imperatoris die noctuque usque Constantinopolim currunt, quæ inde pauperum cibos usque ad castrum ferunt, qui eis innumeris quotidie distribuuntur. Nostris quoque temporibus, ut nobis videtur, non fuit princeps universa morum honestate adeo præclarus. Pater, mi dilecta, tuus multa & magna tradidit, sed ad hunc pæne nihil fuit. Hæc parva de eo tibi scribere dilexi, ut paululum quis esset cognoscere.

Post dies vero decem, per quos me secum venerabilissime habuit, ab eo quasi à patre discessi. Ipse vero mihi naves præcepit præparari, per quas tranquillum maris brachium, quod eandem circumdat urbem, citissime transivi. Quidam illud Constantinopolitanum maris brachium sævum ac periculosum dicebant. quod falsum est. nam in eo, plusquam in Marna & Sequana, minime dubitandum est.

Inde ad aliud, quod sancti Georgii brachium dicitur. Illud quidem, quia navium copiam reperire minime potuimus, ascensu superavimus. Ad Nicomediam urbem desolatam à Turcis, in qua beatus martyr Pantaleon pro Christo passus est, ubi prædictum maris brachium caput & finem habet, iter nostrum direximus. Deinde ad maximam urbem Nicæam, Deum benedicentes cucurrimus. Nicæam autem, mi dilecta, plusquam trecentæ altæ turres cum muris mirificis claudunt. Turcos in ea audaces propugnatores invenimus: ubi infinitum Dei exercitum per quatuor septimanas cum Nicænis mortiferum conflictum habere reperimus. Solimannus Turcorum princeps, paulo antequam nos ad exercitum veniremus, cum magno exercitu in nostros, paratus ad bellum, subito irruerat, æstimans se quodam impetu posse irrumpere in urbem, ut subveniret suis. quæ prava intentio aliter, quam putavit, Dei misericordia evenit. Nostri autem velocissime parati, Turcos animis ferocibus receperunt: qui statim vertentes terga, se in fugam omnes dederunt. Nostri eos acerrime insequentes, multos de eis interfecerunt, & per magnum spazium terræ vulnerando, occidendo eos fugarunt: & nisi essent ardui montes nostris innoti, eadem die in magnum & in inedicabile damnum corruissent. De nostris omnibus nemo ta-

men perit : sed postea noſter communis magnus exercitus multos acerrimosque congregatus exercuit : cum balistis & arcubus multos ex Turcis , etiam de majoribus , interfecit. De noſtris quidam occiſi ſunt , ſed vere non multi : nominativus Miles nullus , niſi Flandrenſis Balduinus Comes de *Ganz*.

Videntes igitur Deo digni Principes noſtri Nicæam adeo , ut diximus , terrigeratam , armis tantum non poſſe ſuperari ; ligneas altiffimas turres cum propugnaculis & diverſis inſtrumentis grandi labore conſtruxere. Quod Turci aſpicientes , timore ſubaſti , urbem Imperatori per nuntios reddiderunt , ea conditione , ut nudos de civitate eis liceret per conductum exire , & vivi in Imperatoris vinculis haberentur. Quod audiens venerabilis Imperator , ad nos uſque prope pervenit : in ſuam autem Nicæam civitatem intrare minime audens , ne eum infinita turba populorum , quem tamquam patrem pium venerabantur , exultando opprimeret.

In marina quadam inſula prope nos ſeceſſit : ad quam omnes Principes noſtri , præter me & Comitem ſancti Ægidii , cucurrerunt , ut cum eo de tanta victoria congratularentur. quos omnes nimio , ut debuit , affectu recepit. Et quia ne caſu ſuperveniret civitati & exercitui noſtro inimiciſſima Turcorum turba , me remanſiſſe apud urbem gaviſus eſt valde : altius vero atque levius quod tunc remanſi , ipſe recepit quaſi aureum montem ex prædis factis. In eadem qua manebat inſula magnus Imperator de ſpoliis Nicææ urbis ſic ordinavit pretioſiora , ut ſcilicet aurum , gemmas , argentum , pallia , equos , & huiusmodi , milites habeant : omnia vero victualia peditibus diſtribuantur : Principes cunctos de propriis theſauris ſuis ſe ditaturum diſpoſuit.

Sic , ut prædiximus , Deo triumphante reddita eſt maxima Nicæa XIII. Kal. Julii. Legitur in primitiva Eccleſia , ſanctos Patres apud Nicæam ſanctam Synodum celebraviſſe , & ibi Arriana hæreſi deſtructa , ſanctæ Trinitatis fidem Spiritu-ſancto ducente eos confirmaviſſe : & quæ peccatis paſtorum exigentibus facta fuerat magiſtra erroris , nunc Deo propitiant per peccatores ſervos ſuos facta eſt diſcipula veritatis. Dico tibi , mi dilecta , quia de sæpe dicta Nicæa uſque Jeruſalem per quinque ſeptimanas perveniemus , niſi Antiochia obſtiterit nobis . Valere.

EPISTOLÆ FORMATÆ.

I.

IN nomine Patris, & Filii, & Spiritus-sancti, reverendissimo, omnique sacra veneratione colendo patri Andreae sanctæ Mediolanensis ecclesiæ archiepiscopo, Regembertus sanctæ Vercellensis ecclesiæ humilis episcopus, præsentem & æternam in Domino felicitatem. Quia sacris apicibus nostris Vvalfredus ecclesiæ nostræ subdiaconus vobis consacratus ecclesiæ Hyporediensis ad votum cleri & populi præsul expetitur: nefas à nobis aliquid sanctis petitionibus denegari existimantes, juxta morem & reverentiam canonicæ definitionis usque ad gradum subdiaconi nostrorum prædecessorum sollicitudine promotum, paternitati vestræ ad episcopalem cathedram Domino amminiculante concedimus promovendum. Ne ergo de ipsius transacta conversatione, sive præsentis concessione quippiam almitati vestræ necesse sit ambigere; præsentibus humilitatis nostræ litteris eum prosecuti sumus, quibus illum in sacrosancta religione, in quantum audivimus, & cognovimus, atque humana fragilitas existimare sufficit, hætenus conversatum fuisse testificamur, eumque ad id ministerium peragendum satis profitemur idoneum. De cujus etiam commendatione ut omnis ambiguitas abstergatur, græca elementa cum proprii subputatione numeri dignum duximus inferenda, Patris scilicet & Filii, & Spiritus-sancti primas; Petri Apostoli primam litteram, nominis quoque nostri primam, vestri secundam, fratris proficiscentis tertiam, civitatis nostræ quartam: quarum numerus in summa ductus ipsis habetur litteris consequenter adjunctus. Sed & numerum præsentis Indictionis eidem subputationi, sicut ratio dicat, credimus adjiciendum. Addimus præterea nonagenarium & nonum numeros, quibus Divini figura jurisjurandi sine dubio patenter exprimitur. Datum ill. anno incarnationis Domini nostri Jesu-Christi illo, indictione illa.

II.

Virtutum omnium privilegio fulgoranti domno ill. Papiensis ecclesiæ venerando episcopo, Radaldus, quamvis indignus Aquilegensis cathedræ humilis patriarcha, æternæ felicitatis gaudium, & præsentis vitæ obsequia. Dum fratrum necessitatibus

necessitatibus ac dignis petitionibus quispiam suffragari studet, proculdubio divini complet mandata præcepti. Quisque tamen tanto acutius subjectorum curam gerere debet, quanto se honoris culmine eminere cognoscit, atque in moderamine & institutis sanctarum ecclesiarum, non solum sua, sed etiam ceterorum religiosorum fratrum consulta petere. Proinde vos latere nolumus, Tridentinum clerum & plebem proprio manere privatam pastore, bonæ memoriæ ill. confratre nostro Episcopo ab luce sublato. Nos autem sanctorum Patrum instituta sectantes, collegium ipsius ecclesiæ cribro canonicæ inquisitionis excussimus, si forte aliquis huic idoneus officio reperiri valeret. quod non invenientes, petitorias litteras paternitati vestræ mittere decrevimus, quo nobis ex gremio vestræ ecclesiæ ill. sacerdotem ad hujus honoris infulas promovendum mittere non differatis: quem non solum relatu aliorum, sed collatione propria cognoscimus morum probitate pollentem, litteratoria doctrina expolitum, sed etiam cunctarum virtutum culmine renitentem: quem ad votum cleri & populi instanter poscimus consecrandum.

III.

Sagacitatis amplitudine sublimato domno O. superno nutu sanctæ L. E. præfuli eximio. D. sanctæ N. E. Æquum nos vestris parere mandatis, penitusque obedire præceptis. Nam vestræ paternitatis animus nostris alimentis educatus à cunabulis, in robur evaserat viriliter habitudinis. Vestræ igitur largifluxæ bonitatis devotissimæ reminiscentes ill. subd. vestræ diocesis, pro quo nobis preces dirigere studuistis, libentissimè vestræ dilectioni more canonico subjicimus, atque ad ejus securitatem has nostræ humilitatis commendaticias conscribi jussimus, ei dantes in mandatis, quatenus vestro Pontificatui in omnibus negotiis animo subjectus existat, veluti nostro hætenus: in subdiaconatus vero officii ministerio, quo nunc nititur, in vestra diocesi militare annuimus. Cumque ad diaconatus, vel presbyteratus honorem cum vobis provehere libuerit, hac nostra auctoritate proculdubio collata promovendi eum vobis sit facultas. Si quid vero, quod non credimus, adversus eum emerferit querimoniæ, vestri Pontificatus sententia diffiniatur. Ut igitur nullius interpellationis obscuracionisve nebula hæc nostra promulgatio fuscata censeatur, secundum statuta sanctorum Patrum græca elementa cum suis

subputationibus subter adnotari, & sigillo nostri patroni iussimus insigniri.

IV.

In nomine Π. & Υ. & Α. Confessor fidei suæ Π. apostoli, Episcopoꝝ A. confratri & coepiscopo salutem æternam. Præsentem apicum latorem Θ. noveritis expetisse parvitatem nostram, quemadmodum ex nostra auctoritate, & absque ulla inquietudine successorum in civitate sedis nostræ Α. vobis eum recipere, sacrumque suscipere ordinem a vobis, & ei vobiscum perseverare liceat: quia apud nos educatus est, comamque capitis in nostra parochia totondit, atque ibidem Deo se servitutum delegavit. Sed nunc rationabili, immo inevitabili necessitate cogente, ut certum per auctoritatem harum litterarum agimus, secundum instituta sanctorum Patrum facerem. . . . Quia igitur adhibita consideratione non incongruum visum est ei ad sensum præbere, hanc formatam ei scribere iussimus, Indictionis continentem numerum. V.

In nomine Patris Π. & Filii Υ. & Spiritus-sancti Α. sacratissimo sanctæ Mediolanensis ecclesiæ Archipræsuli, Amelricus divino respectu Taurinensis episcopatus Pontifex, debitæ venerationis devotum in Christo famulatum. Sollertiam vestram nulla volumus ambiguitate detineri, quin paratissimi continue inveniamur obsequi vobis in omnibus, quæ & possibilitas subministrat, & ecclesiastica censura monendo confirmat. Concedimus igitur ecclesiæ vestræ Ingonem, quem petitis, nostri Episcopatus ministram, ita ut ea lege Archiepiscopatui vestro subdatur, qua Episcopatui nostro subdi videbatur: sicque vobis liceat promovere, veluti si haberet tonsuram vestræ ecclesiæ. Hanc denique concessionem, quam sacri canones formatam appellant, secundum instituta sanctorum Patrum, ita ordinare studuimus, ut in principio prima elementa de nomine Patris, & Filii, & Spiritus-sancti poneremus.

SYNODUS VERULANENSIS

In causa Grimaldi Archicanonici.

ANno Dominicæ Incarnationis M C X I. domino Papa Paschale II. præsidente, domino Grimaldo, sancti Paterniani Archicanonico, fidem & obedientiam suæ matri ecclesiæ, suoque Episcopo pro privilegio accepto spiritu superbiæ

commoto negante; Episcopo vero bis terque domino Papæ proclamante: ipse autem præcepit, quatenus eum, ut clericum suum, ad se revocaret: sin autem obedire renueret, excommunicationis gladio eum percuteret: asserens se eum pro excommunicato habere, si ab Episcopo excommunicatus foret. His aliisque causis præcepto domini Papæ congregata est Synodus apud Berulas sub domino pontifice LÆTO, confedentibus cum eo jussu domini Papæ domino GREGORIO Cardinale sanctorum Apostolorum, & OGDONE Anagnino præfule, necnon domino AUGUSTINO Ferentinate episcopo. In qua denique Synodo prædictus Grimaldus Archicanonicus vocatus, coram prædictis Patribus & sancto conventu confessus est se peccasse, & contra matrem suam ecclesiam de interdicta obedientia fecisse. Unde præfati Patres decreverunt, ut omne episcopale jus suæ matri ecclesiæ, & debitam obedientiam suo Episcopo ulterius non negaret. Quod si negaret; Episcopus, sicut dominus Papa præceperat, libere suum officium faceret. Quapropter præsidentibus prædictis Patribus & toto conventu, fidem & obedientiam, sicut sui prædecessores fecerunt, ecclesiæ sancti Andreæ, suoque Episcopo deinceps se debere spondit. Placuit hoc prædictis Patribus & sancto conventui: assensum præbuit Episcopus & clerus ejus.

GRÆCORUM CONFESSIO

De verbis consecrationis & transubstantiatione, A BESSARIONE exposita in Concilio Florentino.

Die Dominica, quinta Julii M cccc xxxviii. in generali Congregatione, præsidente in eadem sanctissimo domino nostro domino Eugenio, divina providentia Papa quarto, præsentibus reverendissimis, reverendisq; Patribus & dominis sanctæ Romanæ Ecclesiæ Cardinalibus, Patriarchis, Archiepiscopis, Episcopis, Abbatibus, Doctoribus, & Magistris, tam Latinis, quam Græcis, reverendus Pater dominus Archiepiscopus Nicænus, suo ac aliorum Patrum Ecclesiam orientalem repræsentantium nomine, publice, alta & intelligibili voce exposuit in hæc verba, vel eis in effectum similia. Beatissime Pater, vosque reverendissimi Patres & domini hic præsentibus. Quoniam in præcedentibus congregationibus nostris

inter alias differentias nostras ortum est dubium de consecratione sacratissimi Sacramenti Eucharistiæ; & aliqui suspicati sunt, nos & ecclesiam nostram non credere illud pretiosissimum Sacramentum per verba Salvatoris Domini nostri JESU-CHRISTI confici; propter hanc causam assumus coram vestra beatitudine, omnibusque aliis hic astantibus, qui pro parte sanctæ Romanæ ecclesiæ sunt, ad certificandum vestram beatitudinem & alios Patres & dominos hic præsentés de hac dubitatione, & dicimus breviter: Nos usos fuisse Scripturis & sententiis sanctorum Patrum, cognoscentes & animadvertentes fragilitatem humani sensus, volumus adhærere sententiis sanctorum Patrum & rationibus, spretis humanis inventis; qua quidem de re, Pater beatissime, cum in omnibus aliis auctoritatibus Patrum sanctorum usi sumus, etiam his in præsentī dubitatione utimur. Et quoniam ab omnibus sanctis Doctoribus Ecclesiæ, præsertim ab illo beatissimo Joanne Chrysostomo, qui nobis notissimus est, audimus verba Dominica esse illa, quæ mutant & transubstantiant panem & vinum in corpus verum Christi & sanguinem; & quod illa verba divina Salvatoris omnem virtutem transubstantiationis habent; nos ipsum sanctissimum Doctorem, & illius sententiam sequimur de necessitate. De hac quæstione breviter diximus & sufficienter, & vestram beatitudinem de nostra intentione certam reddimus. ARNOLDUS NOTARIUS.

Ego Nicolaus Sagudineus Euripontinus, omnium superscriptorum verborum interpres, & de græco in latinum traductor, fateor omnia sic ad litteram per prædictum dominum Nicænum, modo ut supra, græce dicta fuisse, & a me fideliter in latinum conversa. In cuius rei testimonium & fideiussionem requisitus hic manu propria scripsi, & in hanc redegi formam. Florentiæ, die xxvii. mensis Augusti, anno Dominicæ Nativitatis MCCCXXXVIII. ARNOLDUS NOTARIUS.

Quod & ego Bartholomæus Johannes de Lyd, clericus Leodiensis diocesis, publicus apostolica & imperiali auctoritatibus ac sacri Florentini ycumenici Concilii Notarius, quia prædictorum verborum prolationi, expositioni, confessioni, omnibusque aliis & singulis præmissis una cum præfatis reverendissimis, reverendisque Patribus & connotario infra scripto interfui, eaque sic fieri vidi & audiui; idcirco hoc præsens publicum instrumentum per præfatum interpretem

GRÆCORUM CONFESS. DE EUCHARIS. 245

fideliter de græco in latinum traductum subcripti, signoque & nomine meis solitis & consuetis signavi rogatus & requisitus in testimonium præmissorum.

Ergo Arnoldus Liudolphi de *Beverwoych*, clericus Traiectensis diocesis, publicus apostolica & imperiali auctoritatibus Notarius, quia verborum prædictorum prolationi & confessioni, omnibusque aliis præmissis, dum, sicut præmittitur, per reverendissimum Patrem dictum Archiepiscopum Nicænum agentur, proponerentur, & fierent, una cum reverendissimis, reverendisque Patribus & dominis præfatis ac connotario meo superscripto præsens interfui, eaque sic fieri vidi & audivi, ideo hoc præsens publicum instrumentum, per interpretem hujus sacri ycumenici Concilii subscriptum, una cum dicto connotario subscripsi, & in hanc publicam formam redegi, signo & nomine meis solitis & consuetis signavi rogatus & requisitus in fidem & testimonium præmissorum.

Ego Julianus, tituli sanctæ Sabinæ presbyter Cardinalis, sancti Angeli vulgariter nuncupatus, præsens fui omnibus prædictis, & recognosco litteram scriptam manu præfati Nicolai Sagudinei, communis interpretis Latinorum & Græcorum, & ad perpetuam rei memoriam propria manu subscripsi.

OBSERVATIONES.

P Remissa versionis autographum in thesauro serenissimi Magnæ Hetruriae Ducis asservatur, cum authenticis litteris unionis, Latinos inter atque Græcos facta in Concilio Florentino. Hanc versionem cum legissemus, illust. Antonium Magliabecum, quocum tunc eramus, rogavimus, ut ejus nobis copiam fieri pro sua in nos humanitate curaret. Id quod diligentissime præstitit, adhibito viro clarissimo Gastruzzio, qui illud ipsum autographum peritissime imitatus est. Prædicta Græcorum Confessio non levis est momenti ad persuadendam Græcorum de Eucharistia fidem, de qua tot & tanta controversiæ à Calvinistis nuper excitatæ sunt. Confessio hac duas habet partes, nempe consecrationem verbis Christi Domini confici, non precibus illis, quæ post verba sacra fiunt à Græcis: atque his verbis panem & vinum in Christi corpus & sanguinem mutari & transsubstantiari. Et si vero de priori assertionem aliqua fuit concertatio inter Bessarionem Nicænum episcopum superioris formulæ præconem, interque Marcum Ephesium; nulla tamen prorsus inter eos de posteriori disceptatio

246 GRÆCORUM CONFESS. DE EUCHARIS.

agitata est. Id patet ex oratione Bessarionis tum Cardinalis de Eucharistia: quain oratione eandem doctrinam, quæ in superiori Confessione proposita est, egregie tuctur adversus contra sentientes, in primis contra Marcum Ephesinum: cuius objecta, ex dictis Nicolai Cabasilæ desumpta, refellit. Ex quibus manifeste intelligitur, in illa controversa nequaquam litem fuisse de transubstantiatione, quam uterque pro indubitata Græcorum doctrina habebat. sed de verbis, quibus consecratio perficitur. Præmissa vero Græcorum Confessio, per Bessarionem in frequenti Concilio proposita, eo majoris est momenti, quod is illam comprobantibus aliis Græcis, uno forsitan excepto Marco Ephesino, qui ejus perpetuus adversarius existit, in frequenti Concilio exposuit, cum nondum esset Cardinalis. Hujus porro Confessionis mentio fit in ipsis Concilii actis cap. ix. paullo ante mortem Iosephi Patriarchæ: ubi utrumque, nimirum & verba consecrationis, & transubstantiatio, disertis verbis adstruitur. Deinde post recitatam ejusdem mortem illud ipsum denuo repetitur. Ceterum quod attinet ad Patres græcos, maxime Chrysostomum, quorum sententiam sequi se in prædicta formula Græci per Bessarionem confitentur: eorum testimonia refert idem Bessarion in prelaudata oratione de Eucharistia. Chrysostomi loca citantur ex homilia LXXXII super Matthæum, ex XXVII super primam ad Corinthios, ex homilia de predicatione traditoris, & Sacramentorum traditione.

Haud scio an Nicolaus ille Sagudineus Euripontinus, qui superiorem Confessionem latine vertit, idem sit atque Nicolaus Euboicus, de quo ita scribit Matthæus Palmerius in libro de Temporibus ad annum M cccc xxxix. Nicolaus Euboicus, latinæ & græcæ linguæ atque elegantix princeps laudatissimus habetur: qui in frequenti Concilio medius assistens, multis & eruditis viris audientibus, me quoque teste vidente audienteque, disputantium verba atque sententias, tum græce, tum latine prolatas, mira celeritate ultro citroque in utramque linguam fidelissime & summo ornatu reddebat. Ita ille, qui eodem in loco Ambrosium, Camaldulensis Ordinis abbatem generalem, in Concilio item clarum fuisse subiungit.

Quæ sequuntur acta sanctorum Martyrum Nicandri & Marciiani, ex Veteri codice Valliscellano Romani Oratorii descriptimus. Eadem ad varios codices a se collata nobiscum communicavit eruditus Vaticana Bibliotheca custos alter Laurentius de Zaccagnis, qui eadem acta græce exstare in Vaticano codice nobis asseruit.

ACTA SANCTORUM MARTYRUM *Nicandri & Marciani.*

I. **G**loriosa sanctorum martyrum NICANDRI & MARCIANI certamina, quæ adversus diabolum habuerunt, exponere properabo. Nam memorati viri inter armatos quidem hujus sæculi militantes armis veræ justitiæ communiti, totius hujus mundi gloria derelicta ad cælestem militiam Christi gratia se contulerunt. Statim igitur veluti nefaria perpetrantes in judicium deferuntur. Ad quos Præses MAXIMVS, cui hujuscemodi cura fuerat injuncta: Si non ignoratis, inquit, Nicander & Marciane, Imperatorum præcepta, quibus vos diis præcipiunt sacrificare, accedite, & imperata complete. Ad hæc Nicander, Volentibus, inquit, sacrificare hæc præceptio constituta est: nos verò Christiani sumus, & hujuscemodi præcepto teneri non possumus. Maximus dixit: Quare vel vestræ merita non accipitis dignitatis? Nicander dixit: Quia pecuniæ impiorum contagium sunt viris Deum colere institutis. Maximus dixit: Ture tantum deos Nicander honorato. Nicander dixit: Quomodo potest homo Christianus lapides & ligna colere, Deo relicto immortalis, qui omnia fecit ex nihilo, quem colimus, qui & me, & omnes in eum sperantes poterit conservare?

II. Uxor verò sancti Nicandri, nomine DARIA, præfens virum proprium verbis hujuscemodi animabat, dicens: Cave, domine, ne id facias; cave domine, ne Dominum nostrum JESUM-CHRISTUM neges. Intuere cælum, & in eo ipsum videbis, cui fidem & conscientiam servas. Ipse enim est tuus adjutor. Ad quam Maximus: Malum, inquit, caput mulieris, cur virum tuum mori festinas? Illa verò: Ut vivat, inquit, apud Deum, & numquam moriatur. Et Maximus: Non ita est, sed quia robustiori viro desideras copulari; ideo hunc hac vita citius privari festinas. Illa verò: Si suspicaris, inquit, me animo cogitare, atque id me esse facturam, primam me propter Christum occidito, si tamen id etiam de mulieribus tibi mandatum est. Tum Maximus: De mulieribus quidem hoc mihi minime est injunctum: neque enim faciam quod cupis. verumtamen eris in carcere.

III. Deducta illa in carcerem, Maximus ita cœpit ad Nicandrum: Noli ad verba tuæ uxoris attendere, neque alicujus hujusmodi persuasionem audire, ne cito luce priveris. sed, si vis, accipito intervallum, atque in eo deliberato, utrum melius sit vivere, an mori. Et ad eum Nicander: Spatium quod te daturum promittis, jam putato completum, ac me deliberasse cognosce, atque id in animum induxisse, ut nihil aliud cupiam præ salute. Præses vero sublata voce dicebat: Gratias Deo. Et Nicander una cum eo dicebat: Etiam gratias Deo. Putabat enim præses Christi Martyrem de hac vita atque hujuscemodi servanda salute dixisse; &, quod sacrificaturum eum putaret, nimium lætabatur. Itaque gaudens cum LEUCONE consiliario incedebat. Nicander verò factus in spiritu, cœpit Deo gratias agere, atque cum voce orare clarissima, ut à labe atque à temptatione hujus sæculi liberaretur. Quod cum Maximus cognovisset, ita dixit ad eum: Quomodo qui nunc vivere velle dixisti, nunc iterum desideras mori? Nicander dixit: Ego æternam vitam opto vivere, non hujus sæculi temporalem. & propterea in corpus meum tibi potestatem feci. Fac igitur quod vis: ego Christianus sum. Hinc præses ad MARCIANUM: Quid tu, inquit, Marciane? Marcianus dixit: Eadem quæ commilito meus etiam ego affirmo. Præses: Ergo simul etiam in carcerem ambo trademini, pœnam sine dubio subituri.

IV. In carcerem verò missi, post viginti dies iterum ad præsidem adducuntur. Ad quos præses: Sufficit, inquit, vobis, Nicander & Marciane, tempus ad monendum, ut imperialibus statutis parere velitis. Ad quem Marcianus: Multitudo verborum tuorum neque nos à Fide faciet recedere, neque negare Deum. Præsentem enim eum videmus, & quo vocat cognoscimus. Noli ergo nos retinere. Hodie enim fides nostra in Christo completur. sed mitte nos cito, ut videamus Crucifixum, quem vos ore nefario maledicere non dubitatis, quem nos veneramur & colimus. Ad hæc præses: Ecce pro desiderio, inquit, vestro morti trademini. Tunc Marcianus: Per salutem tibi, inquit, petimus Imperatorum, ut nos citius mittas. nec enim suppliciorum formidine id te ut facias adjuramus, sed ut cito nostro desiderio potiamur. Tunc Maximus: Mihi non contradicitis, inquit. neque enim ego vos persequor, sed Imperatorum præcepta. unde alienus sum ac mundus.

mundus à vestro sanguine. Si autem fecitis vos bene ituros, gratulor vobis: vestrum desiderium compleatur. Hæc dicens sententiam in eos pronunciat capitalem. Sancti verò Christi Martyres, quasi una voce ac lingua, dixerunt: Pax tecum præses humane.

V. Ibant ergo gaudentes & benedicentes Deum. Et Nicandrum quidem sequebatur uxor ejus, ac PAPIANUS frater martyris PASICRATIS, filium Nicandri portans infantem, atque ei gratulans de salute: Marcianum verò sequebantur cognati, atque uxor ejus veste conscissa, quæ talia profundebat. Hæc, inquiens, sunt, Marciane, quæ tibi dicebam in carcere, id timens, atque id plorans. Væ mihi: non mihi respondes? miserator esto mei domine: aspice filium tuum dulcissimum: convertere ad nos, noli nos spernere. Quid festinas? quo tendis? cur nos odisti? veluti ovis ad victimam es sublat. Marcianus verò convertit se, atque eam acerbius intuebatur dicens: Quamdiu satanas mentem tuam atque animum obcæcavit? separa te à nobis: concede mihi, ut martyrium Deo perficiam.

VI. Zoticus verò quidam Christianus manum ejus sustentans dicebat: Bono animo esto, domine frater. Bonum certamen luctatus es: nobis verò infirmis unde talis fides? Veniant tibi in mente promissiones, quas Deus polliceri dignatus est, quas nunc vobis reddet Dominus. Verè vos perfecti Christiani, & beati estis. Uxor verò ejus se ingerebat plorans, atque eum retro trahens. Tum Marcianus ad Zoticum: Tene, inquit, uxorem meam. quam Zoticus martyre dimisso continuit. Postquam verò ad locum venisset, circumspexit Marcianus, ac de multitudine Zoticum ad se vocavit, atque ei dixit, ut uxorem suam ad eum adduceret. quæ cum fuisset adducta, osculatus est eam, & dixit: Recede in Domino. Non potes enim me martyrium celebrantem aspicere, mente tua semel à maligno subrepta. Infantem verò osculatus, & cælum intuens dixit: Domine Deus omnipotens, tibi sit hujus cura. Tunc martyres se se invicem complectuntur, & paulisper à se perficiendi causa martyrii discesserunt.

VII. Marcianus vero circumspexit, & vidit uxorem Nicandri, quod præ multitudine ad eum accedere non posset. Manu itaque ei porrecta, eam ad virum suum adduxit. Ad quam Nicander: Deus, inquit, sit tecum. Illa verò juxta eum con-

250 ACTA NICANDRI ET MARCIANI.

sistens dicebat: Bone domine, bono animo esto. Ostende tuum certamen. Decem annos in patria sine te feci, ac momentis omnibus à Deo ut te viderem optabam: nunc verò vidi, & gratulor ad vitam proficiscenti. Ecce nunc clarius exclamabo & gloriabor, uxor Martyris constituta. Bono animo esto, domine, ac redde martyrium Deo, ut me etiam de morte perpetua liberes.

VIII. Post hæc percussor orariis oculis martyrum circumdatis, injecto gladio finem martyrio conquisivit. Et sic eodem genere martyrii in hoc mundo interempti, ambo victores & triumphatores martyres Christi ad æterna gaudia migraverunt in cælis, qui pro amore Dei minas hominum & verbera contemnentes, Christi amici effecti sunt in regno cælorum.

IX. Dignis itaque honoribus sunt venerandi sèpissime, ut eorum precibus mereamur consequi cælorum regna ac præmia largissime. Qui in pluribus locis Christo operante multa beneficia præstant. Susceperunt martyrium sexto-decimo Kalendas Julias, regnante Domino nostro Jesu-Christo, cui est honor & gloria per infinita sæcula sæculorum. Amen.

In alio codice hæc habentur, quæ in græco desunt. Requieverunt autem Christi martyres Nicander & Marcianus, & Daria uxor Nicandri cum filio suo, in civitate Venafro. Tunc Christiani abstulerunt corpora eorum, & sepelierunt ea prope locum, in quo decollati fuerant: in quo loco fabricata est basilica ad honorem nominum ipsorum. Sub altare ejusdem basilicæ quædam stilla manat, de qua infirmi multotiens sanitate recepta usque in hodiernum diem potant, qui in singulis locis suis, Christo operante, multa beneficia præstant. Susceperunt autem martyrium xv. Kal. Julii regnante Domino nostro J. C. &c.



AUGUSTINI PATRICII EPISCOPI

Pientini , in vitam optimi ac integerrimi viri Fabiani Bencii Politianensis , sacrorum Canonum Professoris clarissimi :

Ad Bartholomæum Pagaruccium , Iuriconsultum peritissimum , ejusdem Fabiani affinem atque concivem.

I. **E** Tſi ſciam mancos ac debiles laudatores pſus de claris viris mereri , quam invidos detractores ; tuis tamen precibus pulſatus , negare non potui , quin in Fabiani Bencii , viri clariffimi , & de me optime meriti , vitam aliquid ſcriberem. Recuſaſſem proſecto hanc provinciam rei magnitudine & temporis anguſtia deterritus , niſi ingrati- tudinis vitium ſubire , & rem tibi moleſtam efficere timuiſſem. Atque ideo malui potius rudis atque indoctus judicari , quam difficilis aut ingratus. Poterunt alii doctrina , eloquentia , ſententiarum gravitate , & ornatu verborum me longe ſuperare : at benivolentia , fide , & veritate in hac re certe non ſuperabunt. Accipe igitur quæ à nobis nude ſcribuntur in meliorem partem , bonique conſule ; & non tam eloquentiam , quam mentem meam metire.

II. Fabianus Bencius natus eſt Politiani anno ſalutis M CCCC XXI. parentibus non obſcuris , ſed tenui fortuna. Primæ ſuæ juventutis rudimenta domi egit , ubi grammaticem didicit : & ſacris initiatus , ad ſacerdotium rite promotus eſt. Inde Senas ad publicum gymnaſium proſectus , per ſeptennium juri pontificio ſumma diligentia operam dedit : ita ut communi totius Senenſis collegii voto inter ſacrorum canonum profeſſores ſit adſcriptus. Tum domum reverſus , virtutum ſuarum experimenta traditurus , ſub Nicolao v. Pont. max. ad Romanam curiam advolavit , & in nobiliſſimi viri Marini Urſini , archiepiſcopi Tarentini , Legati apoſtolici in Brittaniam deſignati , familiaritatem receptus , cum eo in Angliam (ita enim hodie Brittaniam appellant) transfretavit , cauſarum auditor , & particeps conſiliorum.

III. Legatione illius finita in curiam reverſus , mox à Jacobo Peruſinorum antiſtite , qui inter aulicos Pontificis tunc præ-

cipuus connumerabatur, cum amplissima potestate Vicarius Perusiam mittitur: quem magistratum annos circiter v. maxima omnium laude gessit. ubi cum Alexandro Saxoferraten- si Augustinensium præfecto, theologo insigni, Perusii tunc docente, conciliata non levi amicitia, ab eo haud multo post in Cardinalem assumpto in curiam tractus, inter ejus dome- sticos familiares adscriptus est.

I V. Sed illo deinde brevi fatis functo, à Pio 11. Pont. max. ob integritatem & ceteras ejus mirificas virtutes, inter caros habitus, Genuam ad societatem belli Torconici illi populo suadendam, & classem in hostes catholicæ Fidei instruendam legatur: crevisserque mirum in modum Fabianus sub illo Pon- tifice, nisi Deus Christianorum peccatis iratus, Pium pontifi- cem e medio sustulisset. Reversus in curiam iterum Fabianus, à Paulo 11. qui Pio in pontificatu successerat, benigne suscep- tus, ad componendas gravissimas contentiones & bella inter Spoletinos, Narnienses, Cassianos, & plerosque alios Ro- manæ ecclesiæ populos mittitur: quibus ad pacem redactis, & recognita Pontificis jussu illorum administratione, qui sub Pio magistratus gesserant, Vetrallæ & ceteris oppidis, quæ Ponti fex à tyrannica Evertensium dominatione nuper eripue- rat, præfectus, provinciam feliciter administravit.

V. Cooptatus deinde est collegio clericorum cameræ apo- stolicæ: qui magistratus curam gerit pontificalis ærarii, & om- nium, quæ ad provinciarum Romanæ ecclesiæ administratio- nem spectant. Neque tamen interea tantisper cessare permittus est. Nam cum ad sedandas hominum perturbationes ob mixtæ ejus ingenium, doctrinam, & naturæ bonitatem aptissimus ju- dicaretur, jussus est sæpius ire ad diversas populorum seditio- nes, litesque componendas ac decidendas. Testes sunt Barba- rinii, Vianii, Bledensesque, quos acriter pro rebus utrinque ablatis contententes facile composuit. Item Vetrallenses ac Bledenses litigantes invicem de finibus, suo judicio acquies- cere persuasit. Reconciliavit nobiles Farnesios Tuscanensi- bus: Gallestios magno Hospitalario piissimi xenodochii san- cti Spiritus de Urbe, & Vassianos Ortanis de proprietate agri inter se altercantes. Et cum Viterbienses, Tiburtini, Corne- tani, ac Nepesini in administranda eorum republica & magi- stratibus deligendis inter se non parum dissiderent, jussus est Fabianus ad eos cum potestate proficisci. qui prudentia & sol-

lertia sua seditiones omnes sustulit, & omnibus satisfecit. Quibus rebus feliciter absolutis, Paulus Pont. sapientiam, industriam, integritatem ac fidem hujus viri admiratus, illum ad majora subeunda munia destinaverat.

VI. Georgitius Pogiebratius Bohemorum Rex, qui nuper ob damnatam hæresim à Sede apostolica regno privatus fuerat, morte sua tyrannicæ dominationi modum imposuit. Ad ejus regnum obtinendum Matthias Hungariæ, & Cazimirus Poloniæ vicini Reges aspirabant. Veritus igitur Paulus Pont. ne potentissimi Principes ob eam rem in bellum ruerent, quod sine christianæ reip. maximo detrimento esse non poterat; Fabianum Bencium legatum ad pacificandos Reges designavit: sed ante Pontifex rebus humanis subtractus est, quam Fabianus in provinciam proficisceretur.

VII. Non tamen Sixtus quartus, qui Paulo subrogatus est, Fabianum neglexit. Verum prudentia viri atque ejus dexteritate ingenii admodum delectatus, illum Emilix, quam Romandiolam vocant, thesaurarium creavit, ceterisque provinciæ quæstoribus præfecit. Quo munere finito, Fanum-fortunæ, urbem in Piceno præclaram, ei commisit regendam: & mox generali ecclesiæ Romanæ thesaurario aliis rebus occupato, Fabianum ad tempus suffecit, qui deinde Honoratum Gajetanum, Sermonetæ principem, cum Setinis dissidentem, Pontificis jussu composuit. Exinos in Picentibus pro administratione publica laborantes sedavit: & demum missus Anconam, graves ac diuturnas delevit contentiones, quæ illi populo de finibus cum Auximanis viguerant, tanta omnium gratia, ut maximo provincialium favore totius Piceni quæstor ac thesaurarius per biennium sit declaratus.

VIII. His magistratibus felicissime confectis, cum jam ob nimios labores ac assiduas curas variis ac gravioribus morbis in dies magis ac magis vexaretur; (nam & podagra sæpius afflictabatur, ac laterum dolore; profluvium vero capitis, quo etiam periit, continuo fere patiebatur:) Romam reversus, quantum per valitudinem licebat, apostolicæ cameræ negotiis insudavit. Obiit Romæ prid. Kal. Decemb. anno salutis MCCC LXXXI. vixit annis LVIII. mensibus... diebus... Ægrataverat autem Fabianus per autumnum non levi morbo Politiani. Inde non plene adhuc reassumptis viribus in curiam reversus, debili ac varia usus est valitudine usque ad extremum.

IX. Pridie vero quam vitam finiret, in basilica Principis Apostolorum sacris vespertinis & matutinis interfuit. Erat enim Canonicus illius basilicæ. Deinde ut summo diluculo rem divinam operatus est, repentino morbo correptus, in cubiculum per posticum templi a suis delatus, circa horam tertiam, cum Sacramenta oportuna more Christiano prius religiosissime suscepisset, spiritum Creatori reddidit, relicto omnibus curialibus atque ipsi summo Pontifici maximo de se desiderio. Aderam ego in sacello divi Andreæ apostoli, cujus festa tunc Pontifex in ipsa basilica celebrabat, cum tristis de Fabiani morte nuntius allatus est. Vidisses Sixtum Pont. Cardinales, ac reliquos Patres omnes, veluti in publica clade mæstos & conlacrimantes. Nemo fuit, qui tanti viri jactura acriter non doleret. Sepultus est dein in ipsa basilica summo honore.

X. Paulo ante mortem testamentum edidit, quod ante duos annos signaverat. In eo post institutionem bibliothecæ, quam in patria apud archipresbyteralem ecclesiam, cui præerat, non vulgarem erexerat, & plurima alia legata pietatis causa, heredem suum universalem instituit Nicolaum, ex Lisa sorore sibi nepotem. Testamenti vero sui executores reverendissimum Cardinalem sancti Marci, quem vivens unice observaverat, & plerisque alios minoris ordinis viros: inter quos me etiam nominavit, quem non ut discipulum (nam dum Senis litterarum studiis incubuit, sub ejus disciplina sedulo vixi) sed ut filium semper amavit.

XI. Fuit Fabianus in Deum ac parentes pietate insignis. Nam crebris sacrificiis, munditia vitæ, & quotidianis precibus, ut pios sacerdotes decet, ab ineunte ætate religioni semper satisfecit. Sacerdotia, quibus præfuit, ornavit & auxit, ut optimus testis esse potest collegium Politianensis ecclesiæ, quod ex tenui fortuna, sua opera ad pinguiorem evexit. Patrem Bartholomæum, & matrem Helenam, me etiam teste, maxime honoravit, & coluit: sororem unicam Lysam, & ejus conjugem Puccium, virum nempe nobilem ac probum, vehementer dilexit. Femellas quatuor ex eis natas, neptes suas, ære suo dotavit, ac nuptui tradidit viris primariis civitatis suæ. Urbana optima mulier, harum prima, quæ in sinu meo, ut ita dicam, nata est, tibi ut digniori cessit: quintam adhuc puellulam morte præventus collocare non potuit. Nicolao tamen nepoti ejus curam demandavit. Modestia fuit, ac pu-

dore pene virginali, ita ut nullum unquam verbum turpe ex ejus ore audiretur. Sui non prodigus, alieni vero minime appetens, temperatus in rebus omnibus; prospera atque adversa æquanimiter tulit. Justitiæ, integritatis, ac prudentiæ ejus documento sunt tot magistratus à variis Pontificibus sine intermissione illi commissi. Munera non accepit, nisi esculenta & poculenta, & ea quidem permodeste. Doctrina non contemnenda, forma corporis honesta, statura mediocri, sermone gravi & sedato, affabilis, mitis, & in omnes benivolus & gratus, moribus omni ex parte compositis & probatis, ac denique tanta virtute præditus, ut maximo quoque honore dignus ab omnibus censeretur.

XII. Hæc habui, optime Bartholomæe, quæ de clarissimi atque integerrimi viri Fabiani Bencii vita & moribus, ut mihi in hac temporis angustia occurrere potuerunt, summatim perscriberem: reliqua, quæ multa esse non dubito, ex his qui majorem illarum rerum notitiam, floridioremque eloquendi vim habeant, exigit. Vale.

A D N O T A T I O.

Augustinus Patricius, præmissæ vitæ scriptor, quam ex Florentino Angelorum cenobio eruimus, primum ceremoniarum sub Innocentio VIII magister, dein ab anno M CCCC LXXXIII episcopus Pientinus; alius fuit ab Augustino Patricio, Francisci Piccolomini Cardinalis Senensis in conventu Ratisponensi Secretario, qui acta ejusdem conventus litteris mandavit. Hujus meminit Vossius in libro de Historicis latinis, non alterius, cujus est libellus superior de vita Fabiani Bencii. Neque etiam Vghellus ullam hujusce operis mentionem facit in Catalogo Episcoporum Pientinorum, tamen si Augustinum non prætermisit. Ejusdem auctoris est libellus sequens de adventu Friderici tertii in Urbem, à nobis descriptus ex bibliotheca Vallicellana. Hujus libelli quadam fragmenta retulit Odoricus Raynaldus. Habemus & aliud ejusdem Augustini opus de ritibus ecclesiæ Romanæ, quod Deo dante in lucem edituri sumus in collectione Ritualium Romanorum.

AUGUSTINI PATRICII SENENSIS

*Descriptio adventus Friderici III. Imperatoris ad
Paulum Papam II.*

Augustinus Patricius Senensis Johanni Manello Cremano S. P. D. Etsi non dubito te vel fama vulgari intellexisse, quæ superioribus diebus hic sunt gesta in adventum Friderici III. Romanorum Imperatoris : quia tamen his omnibus interfui ex officio, vidique plane vel minima quæque ; ea ad te statui perscribere, quem ex amicis omnibus & solidiorem, & officiosorem semper inveni. Capies enim, ni fallor, ex hac mea lucubratiuncula duplicem fructum. Nam & pulcherrimarum rerum, ac fere novarum ordinem intelliges, & divi Pauli II. Pontificis nostri gloriam, ac magnificentiam facile cognosces. Non enim parum accessit honoris ac laudis summo Pontifici, Cæsarem usque ex Germania ad ejus sacros pedes osculandos advenisse : Pontificem hospitio Cæsarem suscepisse, eumque atque ejus omnem comitatum, qui equitibus supra quingentis continebatur, diebus compluribus, suis sumptibus aluisse rerum omnium maxima abundantia & copia. In qua quidem re non magis liberalitas Pontificis in rebus ad victum oportunis suppetendis, quam prudentia & comitas in eo honorando est laudata. siquidem Pontifex, postquam intellexit Cæsarem religiosæ peregrinationis gratia Romam adventare, numquam destitit ea parare, quæ ad tanti hospitis exceptionem digna sibi viderentur, nihil parcens sumptibus. Nam ut obmittam vina optima, quæ abundantissime sunt effusa, & aliarum rerum profusionem magis quam abundantiam ; pullos gallinaceos quadringentos singulis quibusque diebus consumpsere. Taceo animantium genera, tum quadrupedum, tum volatilium. Taceo aromatici omnis generis confectiones, quoniam fidem superare videntur. Nihil enim prætermissum est, quod ad magnificentiam lautitiamque mensarum posset desiderari. Ea tantum tibi enarrabo, quæ ad honorandum Cæsarem ipse Pontifex & excogitavit provide, & perfecit prudenter. Lege igitur & rerum seriem, bonique consule, si etiam minus digna videar profecutus. Placuit enim etiam quæque minutissima adnotare, ut posterius scire possent,

possent, quo honore, quibusque modis Paulus Pontifex maximus Fridericum Cæsarem hospitio susceperit. Vale, & me ama ut soles. Romæ idibus Januarii M CCCC LX VIII anno a Christi nativitate.

II. Cum igitur audisset Pontifex, Fridericum Cæsarem Italiam ingressum jam Casenam appulisse, equites duos nobiles Fulginium usque præmisit, qui illi Pontificis nomine de prospero ejus adventu congratularentur. Ordinaverat tamen prius, ut quam primum Cæsar Romanæ ecclesiæ agrum attigisset, a locorum Præfectis ubique honorifice exciperetur, alereturque cum omni comitatu ex ærario pontificali. Misit post hos ex numero Judicum causarum curiæ, quos Auditores sacri palatii vocant, duos, & consistoriales Advocatos totidem ad idem opus usque Spoletum. Quos sequi jussit duos Archiepiscopos, & Episcopos duos ex suis assistentibus, qui Cæsari apud Narniam se obviam præbuere. Designavit præterea Pontifex apostolicæ sedis legatos duos, Guillelmum scilicet episcopum Ostiensem Cardinalem Rotomagensem; & Franciscum sancti Eustachii diaconum Cardinalem Senensem, datis mandatis, ut Cæsari, si per Umbriam, Narniæ; si vero per Etruriam, Viterbii obviarent. Ii tantum biduo antequam Imperator urbem ingrederetur, acceperunt iter, cum ad id tempus de adventu sui die fuissent incerti. Sed cum Cæsar Flaminiam, Picenum, ubi apud Lauretum templum Mariæ Virginis visitavit, Umbriamque percurrisset, properaretque magnis itineribus, ut celebritati natalis Salvatoris nostri interesset Romæ; essetque aliquantulum propter ætatem, ut opinor, lassus: ut quiescendo progrederetur, ante sub Ocriculo Tiberim est ingressus, quam legati ad eum pervenire potuissent. Scapha inde secundo flumine vectus, sequenti die circa occasum solis Valcham appulit, locum sex millibus passuum ab urbe distantem. Hic legati Cardinales diu Cæsarem expectaverant, quem e navigio exeuntem, summa hilaritate, ingentique reverentia excepere, eique Pontificis, & sacri Senatus nomine, & de ejus adventu sunt gratulati, & quæ in Pontificis essent potestate omnia contulere. Erat ille dies vigiliæ natalis Domini, qui nono Kalendas Januarias celebrari solet, & legati urbem versus Cæsarem deducebant.

III. Exierant Cæsari obviam Pontificis jussu primi Vicecamerarius Pontificis, Præfectus urbis, Senator, Conservatores,

258 FRIDERICI III. ADVENTUS ROMAM.

Cancellarii, & capita regionum, cum civibus, ac proceribus Romanis: qui omnes via Flaminia Pontem Milvium, passibus circiter mille transierunt. Senator & Cancellarii cum suis equis, induti erant habitu quo utuntur, cum ante initium jejunii Quadragesimalis ludi fiunt agonales, aut in campo, quem Testaceum appellant, quem nonnulli hodie ex vulgo putant veterum senatorum gestamen exstitisse. Is est hujusmodi. Sagum induunt Cancellarii sericeum auro contextum, crurium tenus protensum, quod limbum habet in extremitatibus, ubique palmo latum, ex pellibus albis, quas varios appellant: Senator vero supra vestem auro purpuraque distinctam, cucullum habet parvulum ejusdem texturæ, qui humeros tegit, & ejus summitas pendet a cervice. In capite autem, tam ipse, quam Cancellarii pillea gestant fere quadrata a parte superiori. Cucullus duplicatus erat iisdem pellibus albis, & pillea tecta. Hos sequebantur ordines omnes curiæ duce Episcopo Urbinatæ Pontificis domestico, qui apud pontem Cæsarem expectabant. Prælati deinde Pontificis domestici, cum omnibus aulicis, cumque proceribus, ac nobilibus compluribus, tertio loco processere, in pratis Imperatori obviam se se daturi. Horum dux erat Archiepiscopus Spalatensis Pontificis Thesaurarius. Postremo sacer Cardinalium senatus extra portam passibus fere quingentis Cæsaris adventum præstolabatur.

IV. Sed pulcherrimum rerum ordinem a Pontifice institutum, & magnificam pompam longa Cæsaris retardatio magna ex parte impedivit. Hora enim noctis jam secunda erat, cum pontem transivit Cæsar. Obviam tamen, ut præstitutum erat, omnes processere, servato ordine, quantum pro temporis angustia licuit. Quique suo & Pontificis nomine de prospero ejus adventu gaudentes, Cæsari gratulabantur. Lucebant omnia accensis funalibus, & noctem frequentissima lumina vincebant. Incedebat Imperator medius inter duos apostolicos Legatos, pullis vestibus indutus, sequentibus Prælati suo ordine, & aliis togatis. Illum præcedebant primo mixtæ curialium familiæ cum ejus militibus, tum Nobiles, ac Barones aliqui; inde Conservatores, & Cancellarii Urbis cum suo ornatu: deinde Regum ac Principum Oratores, qui aderant. Postremo Præfectus Urbis, & Senator. Præfectus rubro paludamento, quod pluviale vocant, indutus, apertu-

ra tamen supra dextrum humerum existente incedebat, pileum in capite gestans oblongum, vittis ab aure pendentibus in modum tiaræ pontificalis; coloris autem rubei, ac signis quibusdam in longum porrectis distinctum: vehebaturque equo, sericeo panno ejusdem coloris testo. Inter Præfectum vero & Imperatorem equitabat Cæsareus armiger, nudum enssem manu præferens.

V. Cum verò ad portam jam ventum esset, Cardinales omnes Cæsari simul se obviam dedere, eique gratulati sunt, verba faciente Bessarione Cardinale Nicæno, qui Episcopus Cardinalis existens, inter alios antiquitate primum obtinebat locum. Imperator hinc medius incessit inter ipsum Nicænum, & Cardinalem Rotomagensem ob vetustatem secundum locum sibi vindicantem. Hos alii Cardinales sequebantur suo ordine, & Prælati reliqui. Primores autem cives umbraculum hic supra Cæsaris caput protensum ferre cœperunt: funalia vero ardentia ante Cæsarem præferebant proceres nobiliores, & Pontificis quidam aulici. atque ita Urbem ingressi per viam, qua itur ad sanctum Marcum primo; deinde per viam sacram, quæ Papæ dicitur, usque ad ædes Maximi, vadentes ad sinistram, versi per campum Floræ; rursus ad dexteram pergentes, recto itinere ad beati Petri basilicam pervenerunt. Ibi pro foribus ædis sacræ clerus Urbis cum reliquiis sanctorum & cruce sacratissima, sacris ipse vestibus ornatus Cæsari se se obtulit. Qui cruce reverenter osculata, per vicarium templi illi oblata, basilicam ingressus est hora noctis jam quinta.

VI. Pontifex autem, qui jam dudum in basilicam descenderat Cæsarem suscepturus, dum ille moras necit, ne tempus tereretur frustra; vespertas primum, tum completorium, & matutinas horas a clero Urbis ibi Cæsarem expectante jusserat decantari. Venit tandem Imperator, dum laudes matutinales decantarentur: & ingressus majoris aræ inferiores cancellos, aliis Cardinalibus comitatus, duos ibi presbyteros & diacones quatuor Cardinales offendit: qui ex campo Floræ pompam a Pontifice præmoniti relinquentes, ad eum prævenerant. Ii paratam apud confessionem Apostolorum, ubi sancta ossa quiescunt, inclinatoriam sellam, quod faldistorium vocant, Cæsari ostendentes, illum dum ibi oraret, præstolabantur. Alii Cardinales ad sua quique sedilia discesserant. Cæsar fal-

260 FRIDERICI III. ADVENTUS ROMAM.

distorio incumbens , flexis genibus preces suas omnipotenti Deo , ac beatissimis Apostolis effudit , solvitque concepta vota. Erat autem id faldistorium hujusmodi. Sella erat super instrato tapete posita , ad illarum formam , quibus utuntur Prælati , cum rem divinam faciunt. Ea purpura fuit tecta ad terram usque , exstantibus tantum aureis pomis ad quatuor angulos. Supra pulvinar non magnum erat sericeum , & sub-rubei coloris , quod pavonatum hodie vocant. Scabellum ad ejus pedes appositum habebat parvulum , pictum colore viridi , & super id pulvinar aliud priori simile , super quo genua flectens Cæsar pectore faldistorio incumbebat. Facta igitur ad Deum oratione , versus ad dexteram Cæsar ad aram ascendit : ubi cum Pontificem maximum in alto folio sedentem cerneret , ei genua flectens ad gradus excelsi throni accessit , rursusque ibi terram genu attingens , ascendit solium , pedesque Pontificis in honorem salvatoris nostri Jesu-Christi osculatus est. At Pontifex lætissimo vultu Cæsarem intuens , illum ad manus primo , deinde ad utriusque genæ osculum , summa benignitate suscepit ; surgensque aliquantulum eum quam familiariter est amplexatus. Jussit deinde illum sedere in præparatam ei ad dexteram sedem , inter se & Episcopos Cardinales locatam. Erat imperialis sedes cum reclinatorio suo viridi panno sericeo auro intexto tecta , scabellumque habebat , ut faldistorium superius. Altitudo sedis ita erat instituta , ut non altior esset locus ubi federet Imperator , quam ubi Pontifex teneret pedes.

VII. Postquam autem aliquantulum quievit Cæsar , surgens , a duobus diaconibus Cardinalibus ad dextrum altaris cornu deductus , in ostiolo cancelli superioris , quod ad septentrionem vergit , super faldistorio e loco inferiori delato procumbens diu oravit. Interim cantores Pontificis hujusmodi sacra carmina decantabant : & primo omnes pariter , *Elegit cum Dominus , & excelsum fecit illum præ Regibus terræ* : deinde duo tantum dixerunt , *Glorificavit illum in conspectu Regum*. Responsum est ab universo choro , *Et non confundetur*. Hinc surgens Pontifex detecto capite , altiori voce inquit , *Pater noster* , & secrete orationem dominicam profecutus , eadem voce dixit , *Et ne nos inducas in tentationem*. Respondit Chorus , *sed libera nos a malo*. Tum additæ sunt hæ preces Pontifice exorante , & respondente Choro. Pontifex , *Deus judicium tuum*

FRIDERICI III. ADVENTUS ROMAM. 261

*Regi da : Chorus , Et iustitiam tuam Filio Regis. Pontifex , Sal-
vum fac Domine servum tuum Fridericum Imperatorem nostrum :
Chorus , Deus meus sperantem in te. & rursus Pontifex , Adiute
ei Domine auxilium de sancto : Chorus Et de Sion tuere eum. Pon-
tifex , Nihil proficiat inimicus in eo : Chorus , Et filius iniqui-
tatis non apponat nocere ei. Pontifex , Fiat pax in virtute tua :
Chorus , Et abundantia in turribus tuis. Pontifex , Domine ex-
audi orationem meam : Chorus , Et clamor meus ad te veniat.
Pontifex , Dominus vobiscum : Chorus , Et cum spiritu tuo. Con-
tinenti deinde voce astantes ad orationem invitans inquit
Pontifex :*

Oremus.

*Deus , qui beato Petro Apostolo tuo collatis clavibus regni celestis
animas ligandi , atque solvendi pontificium tradidisti : concede ,
ut intercessionis ejus auxilio famulus hic tuus Fridericus Imperator
noster à nexibus peccatorum suorum liberetur. Per Dominum nostrum
Iesum Christum filium tuum , qui tecum vivit & regnat in uni-
tate Spiritus-sancti Deus per omnia secula seculorum. Et
Choro respondente , Amen , rursus ait Pontifex :*

Oremus.

*Præstende Domine quasumus famulo tuo Imperatori nostr Friderico
dexteram celestis auxilii , ut te toto corde perquirat , & quæ digne
& humiliter postulat , assequi mereatur .*

*Omnipotens sempiterne Deus , Christiani Imperii protector &
conservator , da servo tuo Friderico Imperatori nostro tua virtutis
invictæ triumphum : ut ad nostram & Ecclesia tua sancta atque fide-
lium omnium unitatem & pacem , subditas illi facias universas bar-
baras nationes. Per Dominum nostrum Iesum-Christum filium tuum ,
qui tecum vivit & regnat in unitate Spiritus-sancti Deus per
omnia secula seculorum. Et a Choro responsum est , Amen.*

VIII. His peractis, surrexit e faldistorio Imperator; & Pontifex e folio descendens, Cæsarem rursus amplexatus, manu sinistra ejus dexteram tenens, in superius palatium perduxit: & simul cum eo sacellum divi Nicolai ingressus, quod in prima superiori aula a dextris existit, ad præparatum illi cubiculum in parte palatii, ubi coronationis suæ tempore olim diverterat, dimisit, non sine multis verbis caritate & honore plenis: jussitque Cardinales omnes illum ad cubiculum usque deducere. Ipse vero per aliam sacelli portam ad cubiculum suum reversus est. Prætermittæ sunt hac die pontificales vespere propter serum Im-

262 FRIDERICI III. ADVENTUS ROMAM.

peratoris adventum, & solemnem compotatio, quam Pontifex cum Cardinalibus & primoribus curiæ post vesperras quocannis celebrare solet. Hora enim undevigesima erat, cum ordines curiæ ut Cæsari obviarent equitarunt. Cum autem domum redire, hora erat prope septima.

IX. Postquam quieti ac somno aliquantulum indulgere, Pontifex hora ut prædixerat undecima e cubili suo egressus, purpureo pallio, eoque amplissimo induitur: & Cardinalibus atque aliis ordinibus ex more comitatus, in sacellum palatii, quam capellam majorem vocant, sine mitra accessit, celebraturus ibi justis cærimoniis matutinales horas, & alia sacra, ut in Natali Salvatoris nostri nocte Christiani est moris. Superiores enim matutinæ non tam ad satisfaciendum officio, quam ad tempus honeste conterendum fuerant decantatæ. Advenit eo Cæsar cum jam inceptæ essent matutinæ: facta oratione super faldistorio, quo in basilica usus erat, illi ad sinistram pontificalis faldistorii præparato, paulo tamen inferius, cum prius inclinato capite Pontifici reverentiam exhibuisset, ad sedem suam, ut in basilica diximus, ornaram ascendit, seditque innuente Pontifice.

X. Sedium autem ordo ita erat institutus, ut Cardinalium subsellia Cæsaris scabellum altitudine æquarent: Cæsaris vero sedes Pontificis throni scabellum: reclinatorium cæsareæ sedis pontificali reclinatorio longe erat humilior. Surgit enim pontificale thronum omnibus palatii locis tribus gradibus, qui planum conficiunt in forma pæne quadrata latitudinis palmorum circiter decem. In medio plani parieti aulæis ornato nititur sedes, panno sericeo auro intexto semper cooperta, post se pannum habens illi, qui sedem ornat, omnino similem. Hæc tamen ornamenta mutantur secundum mutationem colorum sacrarum vestium. Scabellum præterea magnum ad pedes solii hæret, quod simul cum plano quadrato coccineo panno tegitur, super quo tenebat Pontifex pedes. Apponitur huic scabello scabellum aliud parvulum detectum, sed pictum rubeo colore, quo utitur Pontifex ad ascendendum pro gradu. Inter planum autem throni pontificalis, & Cardinalium prima subsellia, quæ a dextris sunt, elevabatur Imperialis sedes ex solo plani pontificalis throni altitudine fere æquali, latitudine vero & longitudine palmorum quatuor. Jungebatur solum hoc plano throni & parieti, eratque coopertum eodem

coccineo panno , quo & planum throni : sedes vero imperialis super hoc solo constituta alioquin ornata erat , ut in basilica diximus. Postquam in sede sua locatus est Imperator , diaconi Cardinales , qui hinc & inde sedem pontificalem mediam habentes sedere solent , parieti & sedi inhaerentes super scabellis rubeis pro cornibus primi gradus throni sedere. Circa thronum vero super gradus incumbabant Præfectus , Senator , ac Conservatores urbis , alique proceres , tum Germani , tum Latini. Ad pedes autem Cæsaris sedebant Laventinus Episcopus , qui est ab ejus secretis , & alii.

XI. Consueto quoque loco cantabantur psalmodiæ matutinæ. Et primas quidem quatuor lectiones , qui alias , cantaverè. Primam scilicet cæremoniarum magister , alteram acolythus unus , tertiam unus ex auditoribus , quartam ultimus presbyterorum Cardinalium , quintam vero extra ordinem penultimus presbyter Cardinalis. Hanc siquidem cantare solet , qui benedicto ense ea nocte donatur , aut cameræ apostolicæ clericus ejus loco. Ense autem donatus est hac nocte Cæsar. Sexta lectio cedit ex consuetudine subdiacono apostolico. Septimam , quæ principium habet Evangelii secundum Lucam , ubi scribitur , *Exiit edictum a Cæsare Augusto , ut describeretur universus orbis* , Cæsar ipse cantavit his cæremoniis. Primo descendens e sede Imperator juvantibus diaconibus cardinalibus , qui Pontifici ministrabant ; supra togam , qua quotidie utebatur , indutus est lineam tunicam , quam nonnulli cottam , aliqui superpellicium vocant. Post hæc stolam accepit in morem diaconi super humerum sinistram religatam sub dextro : sed cum paludamentum deinde album illi imponerent , aptarentque ejus aperturam ab humero dextro , ut aliis non initiatis fieri solet , renuit Imperator , aptavitque illud cum apertura ante pectus , asserens Cæsarem pluviale & stolam ad morem sacerdotum gestare oportere , atque ita ut in magno Cæsareo sigillo sculptum vidimus , ubi Imperator in majestate sedens paludamento sacerdotali , & subtus stola in crucis modum ante pectus ornatus impremitur. Cum diaconi stolam , ut ille dixerat , vellent componere , respondit Cæsar , non opus esse quicquam immutari , quoniam id videret nemo. Gladium vero sacrum , quo eum volebant accingi , non accinxit : sed armigero suo jussit dari , & pilleum cuidam ex astantibus. Donatur enim & pilleum quoddam cum ense , ut nosti. Im-

264 FRIDERICI III. ADVENTUS ROMAM.

perator post hæc ante Pontificis thronum accedens, delecto capite strictum ensẽ ex armigeri manu accipiens, eum tertio vibrat, redditque statim armigero: vadensque deinde ad ornatum pluteum, quo liber sustinebatur, inclinato capite benedictionem petit à Pontifice: qua accepta, cantavit Evangelium usque ad principium homeliæ: homeliã vero persecutus est Cardinalis diaconus, qui ministrabat à sinistris. Evangelio lecto Imperator sacras exuit vestes: & inclinata rursum cervice coram Pontifice, ad sedem suã rediit. Ille autem qui gladium tenebat sacrum, eum in aurea vagina condidit, superposuitque pilleum.

XII. Reliquæ carimonie ordinẽ consueto peractæ sunt, & in matutinis, & Missa nocturna: sed quotiens Pontifex per assistentem Cardinalem incensabatur, incensabatur etiam post eum ilico Imperator per primum ex Archiepiscopis Pontifici assistentibus. Cum Pontifex ad faldistorium suum ante altare descendebat, & Cæsar simul ad proprium faldistorium accedebat. Non tamen genua super pulvinar scabelli umquam voluit flectere, quamvis sæpe monitus: sed ob Pontificis reverentiam semper in solo, simplicibus tantum pannis strato, genuflexit. Eundo autem, & redeundo Pontifex semper Cæsarem manu tenebat, ducebatque summa cum benignitate, & gratia: ille autem sequebatur devotione & reverentia plenus, impensosque honores ingenti modestia suscipiebat. Cum osculum pacis inter Missarum solennia dandum fuit, postquam Pontifex à sacrificante Cardinali per assistentem ex more pacem sumpsit; Imperator primus à Pontifice in loco suo stante pacis osculum accepit, deinde diaconi, & alii, ut alias. Peractis sacris Pontifex & Imperator ad suum quisque cubiculum rediere.

XIII. Hora deinde competenti Pontifex maximus indutus alba succincta stola ac pluviali pulcherrimo, tiaramque triplici corona redimitam gemmis lapillisque pretiosissimis onustam in capite gestans, ad basilicam sancti Petri descendit, rem divinam factururus. Astantes nobiles umbraculum sericeum super eum ferebant, & is Cæsarem secum ducebat, quem ad se venientem offenderat. In prima palatii aula Pontifex incedens, Cæsarem sinistra manu tenebat, dextera autem signans benedicebat populo. Præcedebat subdiaconus sacris vestibus indutus crucem ferens, habens ad sinistram armigerum

armigerum Cæsaris nudum ensē manu ferentem, & hinc inde acolythos ceroferarios, quos Oratores Principum antebant, & alii ex consuetudine ordines. Crucem vero sequebantur Prælati albis vestibus sacris ornati, albasque mirras gestantes in capite. Cetera omnia servata sunt, ut in Missa, quæ à Romano Pontifice celebratur, servari solent.

XIV. Imperator postquam in suo faldistorio oravit, ad paratam sibi sedem ascendit. Pontifex vero ad aliam sedem accessit: sacras vestes suscepturus, implevitque omnes solitas cærimonias. Intra Missarum solennia, cum post offertorium fit incensatio, post Pontificem primus incensum accepit Imperator à diacono Cardinali: pacis vero osculum ab ipso Pontifice, cum ex ejus manibus sacratissimum Christi corpus suscepit. Communicavit summus Pontifex altaris Sacramentum cum Imperatore, diacono, & subdiacono de pane tantum: de calice autem, etsi consuetudo sit communicantes cum Pontifice participare, propter insurgentem tamen Hussitarum ac Boëmorum damnatam hæresim, quæ calicis potationem ad salutem necessariam putat, præter Pontificem bibit nemo. Re divina peracta, Pontifex cum Imperatore & omni pompa, ad Salvatoris nostri faciem adorandam in sudario expressam, quam Veronicam appellant, processit: deinde suggestum, unde populo benediceret, supra portas basilicæ constructum ascendens, Cæsare assistente benedixit populo, plenariamque peccatorum remissionem omnibus elargitus est, per pœnitentiam ac satisfactionem merentibus. Sed cum in fine post Indulgentiarum enunciationem, quæ latino & vernaculo sermone per diacones Cardinales fieri solet, moneretur ex more populus, ut pro felici statu summi Pontificis Pauli & Romanæ ecclesiæ Deum orarent, additum est, & pro Imperatore nostro Friderico, ut Deus illi victoriam daret de hæreticis Boëmis, Turcis, ac aliis Christi nominis hostibus.

XV. Rediit deinde Pontifex ad palatium, & per inferiorem portam ingressus, qua itur ad Imperatoris diversorium, Cæsarem ipsum modeste reluctantem usque ad interius cubiculum perduxit, manu semper illum tenens: deduxissetque ulterius, nisi Cæsar alterius cubiculi ostium clam jussisset claudi. Redeunte autem Pontifice, Cæsar eum reduxit per omnes inferiores aulas usque ad ostium ante scalarum principium, neque ulterius eum transire permisit Pontifex. Qui deinde ad

cubiculum suum reversus est, & Cardinales ad sua quique rediere.

XV I. Postridie vero, hora noctis fere quarta, Cæsar uno tantum famulo cum ardenti funale præcedente, sequentibusque duobus comitibus, venit ad Pontificem. Pontifex ut rem audit, ei obviam progressus est usque ad portam aulæ, quam Papagalli vocant: eumque benigne suscipiens, secum duxit in secretum cubiculum, ubi ad octavam usque horam sine arbitris sunt collocuti. Post hæc Pontifex Cæsarem reduxit usque ad ostium, sub quo scalæ incipiunt, in capite primæ aulæ superioris, rediitque deinde quisque ad suum cubiculum. Nec multis post noctibus Pontifex ad Imperatoris cubiculum cum paucis domesticis accessit: quod non ante præsensit Imperator, quam Pontifex ad ostium interioris cubiuli jam adesset. Excepit eum Cæsar summa reverentia, eumque in redeundo deduxit usque ad ultimam aulam, cum Pontifex ulterius eum transire non permetteret. Iterum, & tertio Cæsar ad Pontificem venit: semperque Pontifex hilari vultu, & summa humanitate Cæsarem & suscepit, & est allocutus; & Imperator maxima semper cum reverentia se gessit.

XVII. Sequentibus vero diebus Cæsar sacras ædes urbis, & devotissima sanctorum facella, cujus rei gratia Romam venerat, summa pietate visitavit: viditque etiam diligenter priscorum urbis ædificiorum ruinas, neque rem publicam tamen neglexit. Nam & apud Pontificem seorsim, & in consistorio secreto coram Cardinalibus, ut audivi à nonnullis, de bello Turcis atque hæreticis Boëmis inferendo, deque re publica Christiana bene feliciterque gerenda disseruit, operamque suam omnem in ea re pollicitus est. In consistorio autem ut in capella resedit.

XVIII. Pridie vero Kalendas Januarii, cum summus Pontifex Lateranum accessisset, noctu Circumcisionis Dominicæ proximæ, vespere ibi celebratæ sunt: quibus finitis ascendit Pontifex locum, ubi apostolorum Petri & Pauli capita in pretiosissimis statuis reservantur, eaque summa devotione & vidit, & veneratus est. Intravit interim basilicam Imperator, quem diu Pontifex expectaverat: ascenditque etiam ipse ad locum, ubi simul cum Pontifice venerabiles reliquias adoravit, & divitem ornatum admiratus est. Descendentes deinde in ecclesiam, Pontifex palatium superius ascendit, ibi pernocta-

turus : & Cæsar , nonnullis Cardinalibus comitantibus , ad sancti Petri palatium rediit. Sequenti vero die cum solemnitas Circumcisionis celebranda esset, Imperator oriente sole Lateranum petiit : & capellam basilicæ majorem ingressus , Pontificem ibidem expectabat , neque unquam super sedem sibi ad dexteram pontificalis throni paratam sedere voluit absente Pontifice , quamquam Cardinales aliqui , qui ei assistebant , ut in ea sederet sedulo hortarentur. Venit hora confecta Pontifex , & Cæsar obviam illi processit usque ad majorem aram , simulque deinde ante altare in suo quique faldistorio procumbentes orare. Accessit post hæc Pontifex ad confessionem ex more faciendam cum Cardinale Bononiensi Episcopo Albano , qui eo die rem divinam erat facturus : Imperator sedem suam repetiit. Facta confessione accessit Pontifex ad solium ; & alia omnia facta sunt , ut in nocturna Missa natalis enarravimus.

XIX. Re divina absoluta , antequam Pontifex e solio descenderet , Cæsareæ domus magistrum pincernarum , virum domi nobilem ac probum , signis militaribus donavit , novæque religionis militaris , quam sancti Georgii dicunt , militiæ & ascripsit , & præfecit : sagumque illi imposuit album rubra cruce distinctum , ac vexillum assignavit ejusdem coloris , cruce etiam rubra insignitum. Astabat Cæsar dum hæc fierent , manuque assignandis insignibus Pontificem juvabat. Accessere post hæc ad ædis sacræ medium , ubi faldistoriis incumbentes Pontifex & Cæsar genibus flexis , nudatisque capitibus , Apostolorum Principum primo , deinde aliorum sanctorum complures reliquias & aspexere devote , & pie venerati sunt. Ascendere deinde palatium , & sancta sanctorum ingressi aliquantulum orare.

XX. Inde per vicinas scalas descendentes , equos conscenderunt , solemnī pompa in Vaticanum reversuri. Cæsar , ut piæ religioni satisfaceret , venerareturque pro viribus JESU-CHRISTI Vicarium , illique sese humiliarer ; cum Pontifex equum vellet inscendere , cito accurrit , staffamque equi pontificalis arripiens , tamquam unuseffet ex Pontificis servis , eam , quoad Pontifex inscenderet , tenere volebat. At Pontifex humanitatem religiosi Principis collaudans , negat se equum ascensurum , nisi prius ille discedat : pariterque & ipse inscendit equum , quem Pontifex ei dono

268 FRIDERICI III. ADVENTUS ROMAM.

dederat. Laudata est ab omnibus, & admirationi à plerisque habita ea Cæsaris in Romanum Pontificem observantia ac devotio.

XXI. Sed neque prisci Cæsares qui de Christiana religione bene senserunt, minora humanitatis officia Romanis Pontificibus præbere sunt soliti. Nam ut omittamus, quæ de magno Constantino & beato Silvestro leguntur; Justinianus secundus Constantino Romano Pontifici Constantinopolim ad se venienti, & Tiberium filium ac Cyrum patriarcham cum omni nobilitate, clero & populo obviam misit, & ipse Imperator advenienti Pontifici pedes osculatus est, qui & imperium amplissimum obtinebat etiam extra Europam, & à Romano Pontifice neque coronam, neque alia ad Imperium suffragia sperabat. Postquam vero ad Occidentales Pontificis decreto Imperium est translatum, Imperatores omnes & pedes Pontifici osculatos esse legimus, & equum etiam coronatos paludatosque freno per urbem deduxisse. Summæ autem reverentiæ atque humilitatis indicia, quæ Henricus tertius ejus nominis Imperator apud Canossum Gregorio septimo Pontifici exhibuit, & quæ Fridericus primus tertio Alexandro Venetiis, prætermittam, quando & maxima sunt, & satis nota.

XXII. Sed neque sunt contemnenda, quæ maximi aliquando Reges, & potentia Imperatoribus pæne pares, egere. Nam & Pipinus, ille magni Caroli pater, qui potentissimum Galliarum regnum possidebat, Gregorio tertio ad se venienti, contra Haistulphum regem auxilia petiture, Carolum filium ad centesimum lapidem præmisit; ipse vero ad tertium Pontifici obviavit: ubi equo descendens, sacros pedes osculatus est: & ipse pedibus deinde incedens, equumque regens freno, Pontificem in regiam usque deduxit. Et Johannes Aragoniarum rex Benedicto tertio-decimo, in Morella sacram pompam ducenti ipse diademate regioque habitu indutus, pontificalis paludamenti fimbrias post Pontificem per urbem totam tulit. Non est igitur novum neque indignum, Christianos & Imperatores, & Reges summo Pontifici, qui Dei nostri vices in terris gerit, se humiliare: atque ut maxima laude sunt digni, qui id agunt, ita execrabili odio sunt persequendi, qui superbia elati, Romani Pontificis jugum aut dedignantur, aut contemnunt, tamquam cum ipso Deo de Imperii magnitudine bellum gesturi.

FRIDERICI III. ADVENTUS ROMAM. 269

XXIII. Conscensis igitur equis Pontifex & Imperator in triumphantium morem hoc ordine in Vaticanum reversi sunt. Præcedebant primum Cardinalium, & aliorum curialium mixtae familiae, cum quatuor familia Pontificis, qui singulos saccos ex panno coccineo in equis præferbant, quas valifras vocant. Ferebantur deinde à pedestribus vexilla XIII regionum urbis: & post ea vexilla magna quatuor vehebantur à proceribus quibusdam equitibus. Ille erant populi Romani, Pontificis maximi, Ecclesiæ, & Crucis alba in rubro vexillo. Deducebantur post albi equi falerati duodecim sine sessoribus, quos sequebantur Pontificis amici: e quibus quatuor portabant singula pilea purpurea, aureo limbo circumdata. Inter eos medius erat Pontificis architriclinus, quem Senescalum vocant, pontificale pileum gerens à spatulis; & cum iis nobiles quidam minores equitabant. Post hos Secretarii, & cum eis Procurator fiscalis cum advocatis & cubiculariis cum suis cucullis circa collum: inde acolythi, clerici camerae, auditoresque causarum cum lineis rochetis & cappis amplis. Sequebantur deinde nobiles quidam majores, & proceres urbis: tum Legati Principum & Regum, qui aderant, cum Senatore & Conservatoribus urbis: sed Conservatores infimum, Senator vero supremum inter legatos obtinuit locum. Incedebat post hos subdiaconus crucem præferens, indutus alioquin ut auditores, sed & pileum in capite gestans nigrum totum præter mappulas, & chordulas aerei coloris. Hunc alii subdiaconi sine pileis medium habebant: præcedebant autem eos duo magistri ostiarii cum baculis serico tectis. Crucem vero sequebantur primo clerici pontificalis capellæ duo, quorum alter laternam cum lumine præferbat in honorem sacrae Eucharistiæ; alter vero loculum pontificalis mitræ: tum Peloponessi, quam Moream vocant, Despotus cum fratre. Inde diaconi, presbyteri, & episcopi Cardinales, inter quos diaconi duo Pontifici ministrantes ultimi erant. Post hos ducebatur equus albus, sacratissimum Christi corpus vehens in capsula ornatissima reconditum, quem præcedebat sacrista Pontificis, baculum teretem manu ferens: & supra sacram hostiam sericeum umbraculum ferebatur: circumcirca vero funalia multa accensa. Sequebatur post turba pedestris civium Romanorum nobilium, & qui regionum Capita vocantur, cum ligneis baculis; & curserum curiæ cum argenteis, & cum

270 FRIDERICI III. ADVENTUS ROMAM.

his cohors prætorii ad custodiam corporis Pontificis. Inter hos incedebat Pontifex albo equo vectus, indutus pluviali albo auro margaritisque ornato, mitram gestans in capite pretiosam; sinistra manu adequitantem Cæsarem aurea toga indutum, quam illi dono dederat, tenens; dextrâ vero populum benedicens. Prætendebatur super eos sericeum umbraculum, quod nobiles ferebant cives. Cæsarem anteibat armiger suus parvo intervallo nudum ensẽ præferens. Sequebantur mox cubicularii Pontificis secreti duo, medium tenentes Auditorem, qui mitram servare consuevit. Tum Prælati quidam, Imperatoris, & Pontificis medicus. Ferebatur deinde ab uno e servientibus, ut aiunt, armorum, ex vetusta consuetudine umbella crocei rubei que coloris, & is armatus, eques erat. post hos Archiepiscopi, Episcopi, & Prælati alii suo ordine & postremo clerici curiales reliqui mixtim, ac turmatim sequebantur.

XXIV. Ubi autem ad pontem sub Mole Adriani perventum est, Cæsar ibi subsistens cum Pontifice & Cardinalibus, nobiles viros supra centum Germanos, fere omnes, militaribus insignibus donavit, nudo ac plano ense quemque ter verberans levissime. Post hæc ad palatium pervenere Vaticani: deduxitque Imperator Pontificem usque ad cubiculum primum, & ipse deinde à compluribus Cardinalibus comitatus ad suum diversorium rediit. Venit & alias Cæsar cum Pontifice ad rem divinam audiendam, & cærimoniarum eadem servatæ sunt.

XXV. Magna fuit humanitas, quam Pontifex Cæsari ubique præbuit: & eo major est habitus, quo pontificalis auctoritas nulla ex parte priscis temporibus nunc est inferior; potestas autem atque vires longè sunt superiores. Ecclesia enim Romana, Deo bene volente, imperio & divitiis, Pontificum diligentia, & præsertim Pauli nostri, aucta eo usque processit, ut maximis quibusque regnis sit comparanda. Contra autem Imperii Romani & auctoritas, & vires adeo sunt diminutæ atque attritæ, ut præter nomen Imperii pæne nihil remanserit. Neque me latet, nonnullos Romanos Pontifices superioribus Cæsaribus, & nonnunquam Regibus officiosos se se aliquando præstitisse. Nam & Vitalianus pontifex, qui Eugenio primo successit, Constantino Imperatori Constantini filio Romam petenti ad sextum lapidem cum clero & populo obviavit, deduxitque eum in Vaticanum. Et Constantinus

FRIDERICI III. ADVENTUS ROMAM. 271

etiam Pontifex à Justiniano secundo, ut diximus, Constantinopolim vocatus ire non recusavit : Adrianus autem primus Carolum Francorum regem, nondum imperatorem designatum, (nam Leo ejus successor illum postea Imperatorem appellavit) Romam venientem ad gradus basilicæ beati Petri suscepit, & post pedis osculum ad altare perduxit. Adrianus item quartus Friderico primo apud Satrium obviavit, deduxit Romam, atque imperiali diademate coronavit. Sed magna erat etiam tunc Romani Imperii potestas, magnæ Imperatorum & Caroli vires, quando in Italia, & extra satis diffundebatur : Pontificis autem tanta erat potentia, quanta à Principibus permittebatur. Nunc vero cum rerum fere mutatio sit, parvulum quodque humanitatis officium pro maximo reputandum est. Non autem minima aut parvula exhibuit Friderico Paulus, sed magna admodum. Nam & bis ad Imperatoris cubiculum paucis comitatus descendit, & semper, cum simul eundum fuit, manu sinistra eum tenebat, aliquando etiam dextra; parique gradu ut incederet jubebat : cum erat sedendum, ut eodem tempore assideret invitabat; aliaque omnia officia præstabat, quæ inter se pares præstare solent.

XXVI. Statuerat etiam Pontifex Cæsarem abeuntem usque ad palatii portas deducere : sed ille hoc recusans, ante constitutam horam equitavit. Discessit namque Cæsar Germaniam repetiturus quinto Idus Januariæ summo diluculo eumque Cardinales, alique extra Urbem deduxerunt. nam reliqui nimis Cæsaris festinatione præventi sunt. Ille enim ante Urbem exiverat, quam aliqui vel id rescissent.

XXVII. Omni hoc tempore, quo Cæsar Romæ fuit, & quamdiu Ecclesiæ Romanæ agrum peragravit, Pontifex illum & omnem ejus comitatum hospitio victuque suo ære continuo excepit, magna liberalitate & rerum omnium ingenti copia. Non equis, non hominibus quicquam defuit : ubique benigne comiterque omnes habiti sunt : gratias spirituales, quas plurimas & magnas à Pontifice impetrarunt omnes, sine pecuniis redemit. Omnia enim Pontifex gratis jussit expediri. Donatus est præterea Cæsar à Pontifice albo equo falerato, & aurea toga, quibus in solemni pompa usus est ; & præter hæc decentibus quibusdam munusculis, lapillis, unionibusque pretiosissimis ornatis, quæ sup a duum millium aureorum nummum æstimata sunt. Atque ita persolutis votis Im-


272 FRIDERICI III. ADVENTUS ROMAM.

perator lætus domum versus arripuit iter, Cardinale Reatino, & Vicecancellario eum Viterbium usque comitantibus, & quatuor Prælati, qui Narniam iverant, aliquot diebus ultra eum deducuntibus. Hæc habui quæ ad te scriberem, mi Johannes, ut amicitia nostræ officio satisfacerem. Tuum officium erit amici munusculum benigne suscipere, & non tam rem ipsam, quam mentem metiri. Vale. Romæ &c.



MUSEI ERRATA SIC CORRIGENDA.

P Ag. 10 *lin* 37 lege suæ. 19 *lin*. 23 *l*. lumen. 26 *lin*. 35 & 36 sic e virge interpunctiones. Magis illos. Usque ad Christi cognitionem fas fuerit nos errasse. Post susceptum Christum cavendum est &c. 43. *lin*. 25 *l*. per eum eadem. 35 *lin*. 18 *l*. collocentur. 39 *lin*. 11 humanitate, *l*. humilitate. 48 *lin*. 20 fidei iustiores aut dele aut. 55 *in*. 20 *l*. secundum. 58 *lin*. 38. *distingue sic*, vendidit ea. 86 *lin*. 28. inter se, . interfuisse. 114 *in*. 37. *l*. Tertionæ. 131. *in*. 21. *l*. omni. 141 *lin*. 3. *l*. transire . . . transferre. 153 *lin*. 7 *l*. ingrati. 155 *lin*. 30 vel . ut. 158 *lin*. 27 Boamundo *l*. Balduino. 161 *lin*. 34 *sc*. pone commat, habebant & exeuntes &c. 178 *lin*. 3. *l*. eo tenore. 179 *i n*. 1 *l*. sibi & nostris. 183. *i n*. 13. *l*. Franica. 184 *i n*. 31 *l*. suæ tantæ virtuti. 196 *lin*. 36 *l*. confestim & sponte. 197 *i n*. 37. exivit, *l*. existit. 204 *l n*. 19 *l*. ceperunt. 205 *in* 18 *l*. Babylonæ. 212 *lin*. 30 pactoque *l*. pacto 215 *lin*. 31 *l*. sibi . . . ibi. 232 . cxxxv. 1. 274 *l n*. 22 post illam *l*. ante illam. 293 *col*. 1 *in ul*. *l*. item. 294 *col*. 1 *lin ut*. *l*. apostolorum chorum. 296 *col*. 2 *in*. 21 *l*. indulge 299 *col*. 2 *lin*. 28 *l*. Mariam. 300 *col*. 1 *i n*. 17 *l*. timore *l n* *in* Nota *l*. in Missali Gothico. 347 *co*. 2 *in* 3 pone b *l* *id*. *lin*. 5. *l*. spiritus. 350 *col* 1 *lin* 24 *l*. noli quærere solutionem. Solutus es ab uxore ? noli quærere uxorem. 359 *col* 2 *lin*. 31. *l*. vocatis. 363 *i n*. ult. nota, vivis & mortuis. 365. Nota b, *l*. Missa. 359 *col*. 1 *lin*. 24. denum.



INDEX

TOMI I. MUSEI ITALICI.

A

- A** Eba-Cyrus, 85
 Abbatisſa benedictio, 387
 Accera, 140
 Accuſato ſpatium conceſſum, 122
 Acolythorum ab exorciftis differen-
 tia & munus deferendi ſacramenta,
 74
 Acra urbs, 205
 Adalhardi abbatis Corbeienſis placi-
 tum, 54
 Adela uxor Stephani Comitis Car-
 notenſis, 237
 Adelarſus Veronenſis episcopus, 88
 Adelhais mater archiepiſcopi Ma-
 naſſa, 118
 Adriani I. Papæ vita, 38
 & ſeqq.
 Adventus Miſſæ, 238
 & ſeqq.
 Africanæ Miſſæ ritus, 274, 275, 278
 Africanorum mos Chriſtina confi-
 ciendi, 73
 Agni Paſchalis benedictio, 390
 Agulani populi, 154, 177, 180
 Aios in Miſſa, 281, 282
 Albara urbs, 198, 199
 Alberedus de Cagnano, 144, 162
 Aleph civitas, 183
 & ſeqq.
 Alexander Saxoferratenſis Cardina-
 lis, 252
 Alexius Imperator CP. 131 & ſeqq.
 135, 143 & ſeqq. 213, 235, 237,
 238
 Allo Sculdaſ, 52
 Altaria ſeptem Romæ ſabbato Paſ-
 chæ conſecrari ſolita, 74
 Amaneus de Lubens miles, 203
 Amazonia flumina, 182, 183
 Ambroſianum myſterium, 106, 107
 Ambroſianum officium, 95 & ſeqq.
 Ordo 96, 97 Ritus 99 & ſeqq.
 Ambroſii dies obitus & annus, 115,
 116
 Ambroſio tributi libri de ſacramen-
 tis locus notatus, 7, 8
 Ambroſius preſbyter, 96
 Ambroſius Camaldulenſis, 246
 Amelricus Taurinenſis episcopus,
 242
 Ammirarius Babylonæ, 151
 & ſeqq.
 Amolo Taurinenſis episcopus, 86
 & ſeqq.
 Amphilochius auctor vitæ S. Baſilii,
 83
 Anabatni Pſalmi, graduales, 104
 Anaſtaſia ſamula Dei, 85
 Anaſtaſii Bibliothecarii verſiones,
 77. prologi, 80 & ſeqq.
 Andreas Mediolanenſis archiepiſco-
 pus, 240
 Andronopolis vallis, 144
 Anſima Rex Romanæ, 232
 Anſcharius marchio, 65
 Anſellus heros Chriſtianus, 210,
 211
 Anſelmus Mediolanenſis clericus,
 96
 Anſelmus de Ribodimonte miles,
 205
 Antiochia civitas, 159
 & ſeqq.
 Antonius Brixienſis epiſc. 8
 Apologia peccatorum, 37

I N D E X

Apostolorum epistolæ ad XII Tribus
& ad Gentes, 283, 358 & *seqq.*
Apparum, 57, 58
Arche castrum, 203, 204
Arenæ castrum Antiochiæ, 168
Arnulfus Vicepræsul, 210, 211, 213,
226, fit episc. Jerosol. 227
Ascalon urbs, 229, 230
Assumptio B. Mariæ in Januario, 273,
297
Astum quid, 61
Athenasî populi, 147
Athenia urbs, 158
Augustini scripturæ locus varius,
294
Augustinus episc. Ferentinus, 243
Augustinus Patricius episc. Pientinus,
251 & *seqq.*
Aventinum monasterium, 58
Augustodunense Concilium, 117, 120
Aurium apertio prævia traditioni
symboli 310 & *seqq.*
Auspicia initio anni, 19, 26
Austaldus an Gastaldus, 45
Azymitæ populi, 177, 180
Azo abbas de Aventino, 58

B

B Abilla, Babylon & Landoglado
civitates quid significant, 377,
378
Babylonius Rex, 206 & *seqq.*
Balduinus frater Gotifredi Ducis,
140, 143 & *seqq.* Comes Edessæ,
231, Rex Jerosolymitanus 132
Balduinus Montensis, 140
Balduinus Comes de Ganz Flandren-
sis, 219
Baptismi ordo, 323 & *seqq.*
Baptismi ritus, 69 & *seqq.*
Baptisterii basilica, 104
Barbacanus, aries lignæ turri ad-
stans, 220
Bardarus fluvius, 145
Barnabas apostolus an primus Me-
diolanensium episcopus, 19

Barruhec urbs, 205
Bartholomæus Mamystr episcopus,
232
Bartholomæus Paganuccius, 251
Basilii vita per Anastasium, 81, 82
Beatrix abbatissa Plumbariolæ, 36
Beatrix de Hainaco, 118
Bego della Rivera miles, 203
Benedictiones, 387 & *seqq.*
S. Benedicti abbatis Missa & præfatio
propria, 108 commemoratio in
canone 276, 280 ecclesia in ther-
mis Alexandrinis, 59
Benedictus Campaninus auctor mo-
nasterii S. Cosmæ & Damiani in
Mica-aurea, 58
Benedictus abbas B. Mariæ Farfensis,
54
Benedictus Edessæ episc. 231
Benedictus Protoferiniarius, 87
Benedictus presbyter tituli Damasi,
88
Bernardus Attasii episcopus, 232
Bernardus abbas Casinensis, 36
Beraldus abbas Farfensis, 62, 63
Bernardus de S. Valerico miles stre-
nuissimus, 212
Bernardus de Pardilo, 173
Bernardus Valvensis, 130
Bertrannus de Scabrica legatus, 151
Bertulfus, Elderatus & Munubertus
scriptores Bobienses, 276
Bessarion Cardinalis archiep. Nicæ-
nus, 243, 245, 246, 259
Bethlon castrum, 205
Bizan seu Bethsamis, 231
Boamundus Princeps, 135 & *seqq.*
Boamundus Junior Antiochiæ Prin-
ceps, 23, 235
Bobiense monasterium, 275 Biblio-
theca & Liturgiæ codex antiquissi-
mus, *ibid.* & *seqq.*
Boellus sive Hoellus Canotenonen-
sis, 144
Bolæ argenteæ, 233, 234
Bonifacius Consiliarius, 84

I N D E X

Bononiensis Cardinalis, 267
 Bonosus Narniensis episc. 88
 Brotenbroth vallis, 157
 Brachium S. Georgii, maris sinus
 prope CP. 140, 141, 142, 143
 Bray flumen in Asia, 205
 Bruno Signiensis episcopus, 234
 Brunonis secessus causa, 117, 121
 Bucinat castrum, 147

C

C Adulus Comes, 59
 Caliphas Turcorum Apostoli-
 cus, 180, 183
 Camela urbs, 203
 Cameracensibus Clericis scripta epi-
 stola, 128
 Camerinus Gastaldus, 52
 Campo abbas Farfensis, 57
 Capharda urbs, 202
 Capitularia Regum a Pontifice &
 Synodo commendata, 88
 Capitularia tria, 44 & *seqq.*
 Caroli M. via versus CP. 140
 C. ssianum palatium Antiochiæ, 189
 C. ssianus ammirarius Antiochiæ, 170
 180 & *seqq.*
 Castoria urbs, 145
 Cautio Episcoporum, 106, 116
 Cayphas castrum, 205, urbs, 232
 Cerei Paschalis benedictio, 321
 Cervolus & vitola, 394
 Choreia castellum prope Antio-
 chiam, 162
 Chorpalasius, 146
 Chrismaris confectio Presbyteris
 Africanis qui indulta, 73
 Chrisma in feminino, 324
 Christi caro sanctificata pastus, san-
 guis potus, 303. Christi imago,
 176. Christi sanctitas qui proficit,
 25

Christiani Martyres, 174, 175
 Circada vel cercata nomen sæculo ix
 ineunte in usu, 49
 Civitatis munimen pietas Christiano-

rum, 14, 15
 Civitor castrum, 238
 Clamator, 47
 Claromontanum Concilium, 132
 Clerici ne negotientur, 29, 30
 Clericorum continentia, 391, 393
 Clericorum filii, 128 & *seqq.* Cle-
 ricorum translationes, 241, 242
 Climactera sæculi, 378
 Cluniacensi abbati commissum Ar-
 chiepiscopi iudicium, 119, 126
 Comani populi, 147
 Communio, sancta sanctorum, 306
 Communio sub unica specie ob Huf-
 sitarum errores, 265
 Communio sanctorum omissa in
 Symbolo, 397
 Concilium Romanum de Formoso,
 85 & *seqq.*
 Conciones quoti lianæ, 105
 Constantinopolis, 140 & *seqq.*
 Constantini & Irene August. divalis
 sacra, 40
 Contra-mandandi litteræ, 119, 120
 Corbanas princeps militiæ Soldani
 Persæ, 170 & *seqq.* 180 & *seqq.*
 Mulier ejus, 183, 184

Corosanam, urbs Turcorum, 142
 & *seqq.*

S. Cosma & Damiani, in Mica-au-
 rea monasterium, 57 & *seqq.*

Crucis signum in scapulis, &c. 133,
 & *seqq.* 139

Crucis iudicium, 48, 49

Cunradus Rex, 97, 99

Cursuum ecclesiasticorum ratio, 395

Curtæ populi, 180 seu Curti, 203

Cynediæ Reginæ concessum privi-
 legium, 37

Cyri & Johannis passio, 8; reliquiæ,
 84

D

D Aia uxor Nicandri martyris;
 247 & *seqq.*

Datus archiepiscopus Mediolanen-
 sis,

TOMI I. MUSEI.

sis, 107
 Daybertus Pisanorum episcopus, 231
 fit Patriarcha Jerosolymitanus,
ibid. 132, 133
 De locationis ritus diversi, 354
 De sanctorum Spiritus orationibus
 adjuti, 385, 386
 Denotum pro densatum, 22
 Derationare, 122
 Dertonense sanctorum Petri & Mar-
 tiani monasterium, 89, 90
 Desiderius Langobardorum rex, 39,
 50
 Deventare, 175
 Deverare, recusare, 202
Deus lo vuls: belli signum 144,
 179
Die stante mense Decembri 163 *in-*
trante, 180
 S. Dionysii Mediolan. monasterium,
 95
 Diurni Romanorum Pontificum sup-
 plementum, 32 & *seqq.*
 Domini corpus post mortem, 31
 Domnolina Abbatisa S. Georgii
 Reate, 51
 Donat episcopi vita per Anastasium,
 83
 Dyrachium urbs, 135, 143, 147,
 235

E

F Belona urbs, 144
 Ecclesia qui Lunæ comparata, 20
 cur gallinæ, 15
 Ecclesiæ consecratio, 32, 33
 Eleemossynæ & jejunii defensio, 14,
 16 eleemossynæ proventus, 29
 Elisei virtutes & orationis vires, 10
 & *seqq.*
 Elymæ cæcatio Simoni mago tribu-
 ta, 20, 21
 Emma soror Boamundi Principis, 136
Ephiphania pro Epiphania, 296
 Episcopi petrius & examen, 32
 Episcopi Regii 120

Mus. Ital. Tom. I.

Episcopi in custodiam ne tradantur,
 83
 Episcopi captivi, 207, 209
 Evangelii lectio ex variis locis con-
 flata, 296. Evangelica lectio à
 Cæsare cantata, 263
 Eucharistia, immolatus panis & san-
 guis, 315. Eucharistiæ oblatio in
 usum sanctuarii, 389. Eucharistia
 servata pro Viatico, 105, 394.
 Eucharistiæ neglecta aut amissa
 pœna, 393, 394. Eucharistica tur-
 ris, patenæ, & calicis benedictio,
 389
 Eugenia virgo Romana, 276, 281,
 289
 Eugenius transmontanus episcopus,
 106, 107
 Euria civitas Syriæ, 85
 Eustachius Comes Boleæ, 133
 S. Eustasii in Platana ecclesia, 39
 Exaleisus, sororis filius, 136
Exorcidio pro exorcizo, 323, 324
 Exorcismum, 386

F

F Abii Bencii Politianensis vita,
 251, & *seqq.*
Farfar flumen Antiochiæ, 160, 202
 Farfense monasterium, 57 & *seqq.*
 Farfenses Abbates, 63 & *seqq.*
 Farnesii nobiles, 252
 Febre quartana laborantes opes. Si-
 gismundi Regis sanati, 144
 Fidei Christianæ miracula, 207, 208,
 209
 Flandriæ dores, 134
 Flebilis, id est debilis, 220
 Flebotomare equos, 147
 Florentini Concilii fragmentum, 243
 Forcapium, 46
 Formosi causa Romanum Conci-
 lium, 86
 Formata epistolæ, 240 & *seqq.*
 Franciæ regnum qui intellectum, 124,
 125

E e c

I N D E X.

Franciæ Synodus ,	88	secratioms & transsubstantiatione	
Franci naturaliter milites ,	155	in Concilio Florentino exposita ,	
Franciscus Cardinalis Senensis ,	257		243
Fratellus abbas ,	54	Guillelmus de Montepislerio ,	173 ,
Friderici III. Imp. Romam adven-			200
tus ,	256 & seqq.	Gregorius Cardinalis ,	243
Fulcoius subdiaconus Meldensis poë-		Gregorius Terracinenis episcopus ,	
ra ,	118		130

G

G Alemarius Judex ,	52	Guillelmus de Grandemufneda ,	186
Galferius <i>Daflurs</i> vel de Lastu-		Guillelmus Marchusi filius ,	143 , 155
res miles ,	173 , 196 , 200	Guillelmus Picchardus miles ,	205
Gallicanus Ordo seu Gallicanum sa-		Guillelmus de Supera ,	173
cramentarium ,	273 & seqq.	Guinichis Dux ,	55
Gamati, percussiones ,	47	<i>Gybel</i> urbs ,	211
Gamenulfus Mutinensis episc. 88		Gyrifalcus , accipiter ,	140
Gasto de Bearno ,	173		
Gauderici episc. Veliterni epistola ,	78		
Gebehardus presbyter tum episc.			
Ratisponensis una cum Paulo ,	95		
& seqq. ad 100			
Georgius martyr ,	138 , 155		
S. Georgii milites & militia ,	267 , 270		
S. Georgii brachium maris ,	238		
S. Georgii Reatinense monast.	50		
Georgirius Pogiebratius ,	253		
Gervasius archiepisc. Remensis ,	118		
Gezo abbas sanctorum Petri & Mar-			
tiani Dertonensis , 89. Opus ejus			
de Corpore & sanguine Domini.			
<i>ibid.</i> & seqq.			

Gibellum urbs ,	204
Girardus Malafayda ,	173
Gisarma ,	140
Giseprandus Episc. Dertonensis ,	89
90.	
Goffridus Comes de Rossilione vel	
Ruscignolo ,	144 , 145
Goffridus de Montescabioso ,	144 ,
155	
Gottifredus Dux Lothariæ ,	133 &
seqq.	
Gradigis Episcopus ,	54
Græci ignes ,	200
Græcorum confessio de verbis con-	

H

H eretici quomodo vulpes ,	15 ,
28 Eorum simonia ,	<i>ibid.</i>
Haribannum ,	47
Hebrardus Pusiatis miles ,	225
Heccideus Dux ,	55
Hemirandus venator ,	200
Heraclea civitas .	157 , 211
Hermannus de Cannis ,	162
Hermelinda uxor Luponis Ducis	
Spoleteni ,	50
Hilarius ex Turco Christianus ,	167
Hifemundus episcopus ,	54
Honoratus Gaieranus Sermonetæ	

TOMI I. MUSEI.

princeps ,	253
Hieronius Darius iudex ,	60
Hugo Dieris episcopus & apostolica sedis Legatus ,	118 & <i>seqq.</i>
Hugo Forlonea miles ,	189
Hugo Magnus Comes frater Philippus Francorum Regis ,	133 & <i>seqq.</i>
Hugo abbas ,	59
Hussitarum ac Boëmonum errores communionem sub unica specie firmanunt ,	265

I

I acobi & Johannis apostolorum festum post natale Domini ,	293
Jacobus episcopus Perusinus ,	251
Januarii Kalendæ ,	394
Iconia civitas ,	157
Jejunii Missa , 304 Quadragesimalis obligatio ,	305
Jerusalem civitatis obsidio , 216 & <i>seqq.</i> ei Rex impositus , 228 & <i>seqq.</i>	
J esu nomini DOMINI vocabulum semper præmissum Ambrosii xvo. 105	
Ignis paschalis miraculum , 209, 210	
Il legemio Lauensis episc. 37	
Immo Gestaldus ,	51, 52
Ingelbertus Flander miles ,	222
Inchorealis , ejusdem provincie ,	57
Invasiticum ,	49
Inundatio Romæ ,	64
Joffius de Montescabiofo ,	189
S Johannis missa, idest sollempnitas , 340 & <i>seqq.</i>	
Johannis Eleemosynarii vita ,	81
Johannis Pape synodus ,	86
Johannes episc. Aretinus , 86 & <i>seqq.</i>	
Johannes Gallianus episcopus ,	88
Johannes Mutinensis episc. 88	
Johannes Tuscanensis episc. 88	
Johannes Velitranus episc. 88	
Johannis S. R. E. Diaconi epistola , 69 & <i>seqq.</i> alia opera , 77, 78, cognomen , <i>ibid.</i> V. Præfat.	
Johannes [Aragonix rex ,	268

Johannes abbas Farfensis ,	58
Johannes Grammaticus & monachus Farfensis ,	62, 63
Johannes advocatus monasterii Farfensis ,	55
Johannes Manellus C. emanus ,	156
Joseph Patriarcha ,	246
Josephus Vicecomes ,	100
Josephus M. Carus Thomastus ,	178
Iforia in Syria ,	85
Judicis recusandi rationes ,	120
Juramenti divini figura numero xcv. expressa ,	240
S Justi de Tuscania monasterium ,	57

K

K alenis Januarii cur natus Dominus ,	17
Kalendarum superstitiones ,	18
Kephalia urbs ,	202

L

L ac & mel in calicem missa sab- bato Paschæ ,	75
Latus episcopus Verulanus ,	243
Lambertus cæcus ,	58
Landulfus senior Mediolanensis . 106, 107	
Langobarda sub lege monasterium , 59, 60, 61	
Latissa urbs ,	136
<i>Launegildæ</i> , pretium venditionis , 52, 56	
Laurentius Mediolanensis episcopi tempus , 116, 117	
Leo Archiepiscopus S. R. E. 60, 61	
Leo iudex Regis ,	54
Leo Vassus domini Regis ,	56
S. Leonardi monasterium ,	234
Leonardo confessori votum à Boamundo captivo nuncupatum redditumque ,	233, 234
Lerholdus Flander miles ,	222
Leuco consiliarius præsidis Maximi , 248	
Lichea urbs ,	204

INDEX

Litaniarum legenda & Missa , 334 & *seqq.*
 Litterarum formatarum ratio , 240
 & *seqq.*
 Locus lucidus & refrigerii defun-
 ctorum , 386
 Lombardi à Longobardis distincti ,
 140 , 141
 Lugdunense Concilium , 119 , 120
 Lugduni quæ auctoritas Regi Fran-
 cia , 124
 Lunæ defectus & varii effectus , 19 ,
 20
 Luponis Ducis Spoletani Placita
 duo , 50 & *seqq.*

M

M Achomaria , 171 , 173 *P. Ma-*
humeria.
 Magorum munera , 26
 Mahumeria , Moskeæ , 132
 Mahumeris simulacrum argenteum ,
 223 , 224
 Mala-corona , 178
 Maillum , conventus , 47
 Mamistra urbs , 158
 Manassis archiepiscopi Remensis
 apologia , 117 & *seqq.* 130 , 236
 Manasses Calvus Comes , de Roceio ,
 118
 Manasses clericus Remensis , 117 , 121
 Manganella , 172
 Mannire , 47 , 49
 Mantuanum Placitum , 47
 Marasim urbs , 119
 Marciani & Nicandri martyrum ac-
 ta , 247 & *seqq.*
 Marchanensis episcopus , 213
 Marchusius Princeps , 136
 Marcus Ephesinus in Concilio Flo-
 rentino , 245
 Marecla urbs , 204
 S. Mariæ Virginis assumptionis festum
 mense Januario , 297 , 298 & *seqq.*
 corporalis ejus assumptio , 300 , 301
 Mariæ Deiparæ virginitas , 23 , 24

S. Mariæ Trans-Tibetini monasterii
 abbas Anastasius , 82
 S. Mariæ & S. Michaelis monaste-
 rium , 52
 S. Mariæ in Minione Cella , 57
 Marinus Ursinus Legatus apostoli-
 cus , 251
 Matotta abbatissa Plumbarolæ , 36
 Marra urbs , 16 , 199
 Martinus S. Ambrosii Thesaurarius ,
 95 , & *seqq.* Ejus epistola , 98
 Martyrum confessoria , 248 & *seqq.*
 Martyribus & confessoribus cur dica-
 ta altaria , 354
 Martyres qui cæsi in bello contra
 ethnicos , 344
 Maximi episc. Taurinensis humilia ,
 3 & *seqq.*
 Maximus prætor , 247 & *seqq.*
 Maximus Gattaldus , 51 , 56
 Mediolanensem episcoporum cata-
 logus , 95 , 109 & *seqq.* Ejusdem
 ecclesiæ turbatio , 98
 Meletania urbs , 251
 Mercurius martyr , 138 , 155
 Michaeli , moneta genus , 233
 Milo decanus Parisiensis , 118
 Miscetor , pro militot 289
 Missæ ordo Ambrosianus , 104
 Missa Romensis quotidiana , 274 ,
 279. Missa quotidiana , 273. Missa
 cotidiana dominicalis , 283 in de-
 positione sacerdotis , 384. Missa uni-
 ca in Natali Domini , 107. Missa
 Jejunii , 304 , 305 , 306 , 307. Missa
 in inventione S. Crucis , 333. Missa
 in honore S. Michaelis , 355 , 356.
 Missa in depositione S. Martini ,
 348 & *seqq.* Missa privatis in ædi-
 bus celebrata , 364. Missa pro Re-
 gibus , 378
 Monacharum consecratio , 387
 Monasteria à Saracenis vastata , 57
 Monasterium a diocesano Episco-
 po exemptum , 33
 Mortui orationibus juvandi , 385

TOMI I. MUSEI.

N

N Aves Liburnæ & sandalix.	234
Natali dominico missa unica.	290
Nicæa civitas.	139, 141, 150. & <i>segg.</i>
	237, 238
Nicandri & Martiani martyrum acta.	247 & <i>segg.</i>
Nicolaus Euboicus an idem cum Euripontino.	246
Nicolaus Sagudineus Euripontinus.	244, interpres Concilii Florentini.
	245, 246
Nicomia an Nicomediæ civitas.	141, 150
Ninguere.	138
Nomina vivorum & mortuorum super sanctum altare scripta.	363
Nonantulanum monasterium.	41
Norantula sepultus Hadrianus I. Papa.	41
Noviomensium Clericorum epistola.	128 & <i>segg.</i>
Naptiorum benedictio.	388 & quidem fecundatum.
	389

O

O Donis versus de sacramento altaris.	92
Officia divina cur instituta.	355
Officium Ambrosianum.	95 & <i>segg.</i>
Ogdo Anagninus episcopus.	243
Olei fons.	82
Olei exorcismus & benedictio.	392
Orarium.	86
Orariis velati martyrum oculi.	250
Orationes ad faciendum Christianum.	322
Orationes pro mortuis.	385
Ordo Gallicanus.	273 & <i>segg.</i>
Orulius.	192
Orus exercitus.	50

P

P Acanus contra Porphyrium.	77
Palagonia regio.	145
Palma & oliva benedictio.	390
Pantaleon martyr Nicomediæ.	138
Papagalli aula pontificis.	256
Papianus frater Paficæ martyris.	249
<i>Paralitur</i> non <i>paralitur</i> habent veteres codices.	37
Parasceves die singulis horis Passio lecta.	317 & <i>segg.</i>
Pares.	199
Paschæ Missa.	118 & <i>segg.</i>
Paschalis episcopus.	86 & <i>segg.</i>
Paschasti Ratberti liber ad Placidum.	91
Pasirates martyr.	249
Patenæ benedictio.	389
Paulus Papa II.	255 & <i>segg.</i>
Pauli & Gebehardi Ratiponensium presbyterorum epistola.	255 & <i>segg.</i>
Pavonatus color.	260
Pecuniæ impiorum contagium colentibus Deum.	247
Pedum lotio in baptismo.	125
Pentecostes <i>Quinquagesimum</i> dicta.	337, 338
Personare, æstimare.	106
Petri & Papæ privilegium.	127
S. Petri cathedræ festum mense Januario.	297. S. Petrus caput Ecclesiæ.
	<i>ibid.</i>
Petri & Pauli natale.	323. Petrus in fundamentum Ecclesiæ locatus.
	<i>ibid.</i> Quomodo S. Paulus <i>par</i> ipsi dicitur.
	<i>ibid.</i>
Petrus Albanensis episcopus.	86 & <i>segg.</i>
Petri Alexandrini vita.	80
Petrus Gaviensis episcopus.	80
Petrus S. R. E. presbyter.	40
Petrus Presbyter tituli Eudoxiæ.	88
Petrus abbas S. Sabæ.	40
Petrus Bartholomæus.	187

INDEX.

- Petrus de Castellone,** 173
Petrus Eremita, Cruciferorum dux,
 131, 132, 140, 142, 164, 165, 192
Petrus de Picca Legatus, 151
Petrus Raimundi de Pullo, 166, 173
Petrus de Stillone miles, 203
Petrus miles, 159
Philippi regis filia Boamundo nup-
ta, 235
Piarynæ epitaphium, Vide Prefat.
Plenitudo an planities, 145
Plumbariolense territorii Aquinensis
monasterium & privilegium, 33
& seqq.
Podienfis Episcopus, 135 *& seqq.*
Pœnitentiale Gallicanum vetus, 392
& seqq.
Pomorum benedictio, 390
Poncius clericus Remensis, 117, 121
Poncius de Balau miles, 265
Poncius milis & Rainaldus ejus fra-
ter, 147
Pontificum sepultura, 41 decretum
confirmationis, 42
Presbyterum alterius nemo recipiat.
 46
Presbyteris Africanis indulta Chris-
matis confectio, 73
Privilegia apostolicæ potestatis, 33
Privilegia Luxoviensium, Agaunen-
sium & Lirinensium, 60
Provincialium gens non prodiga,
 134
Psalmorum libri quinque, 397
Publicani populi, 177, 180, 203
Purpurati, monetæ genus, 164
Purei benedictio, 389
Pyrrhus Ammirarius, 177, 178
- Q & R**
- Q**uadragesimæ initium seu ca-
 put, Dominica, 301
Radaldus Aquilegiensis patriarcha,
 240
Raimbalus miles de Carnoto, 217
Ramora urbs, 205
- Ramusculi manibus gestati a redeu-**
ribus ex augurio, 9
Ratfredus abbas Farferfis, 57
Ratruda Rarchisi Ducis filia, 36
Raymundus Comes S. Ægiliti, 133
& seqq.
Raimundus Vicecomes de Taurina
seu Torina, 196, 103, 173
Raimundus Pileus miles, 196, 203
Raynaldus Lombardorum & Lon-
gobardorum dominus, 141
Raynaldus frater Richardi de Princi-
paru, 144
Raynaldus Porchitus, 171, 174
Raynerius Marchio, 59
Regembertus Vercellensis episc. 240
Regum erga Romanum pontificem
cultus & reverentia, 267, 268
Reliquiæ terra quæ levandæ, 35
Renatus vir spectabilis, 69
Riccardus filius Comitis Raynulf,
 144
Riccardus de Principatu, 144 *& seqq.*
Ritus Ambrosianus, 99 *& seqq.*
Robertus de Ansa, 154
Robertus Comes Flandrensis, 133 *&*
seqq.
Robertus Guiscardus Dux Apuliæ,
 135, 136, 213, 227
Robertus Comes Normanniæ, 133
& seqq.
Robertus Girardi filius, signifer, 144
 154 *& seqq.* 169
Robertus filius Trosteri, 144
Robertus de Sordavalle, 144
Rodesto urbs, 148
Roga Imperatoris, 145
Rogierus episc. Bellovacensis, 237
Rogierus Tarsi episcopus, 232
Rogierus Dux Apuliæ, 135
Rogierus Siciliensis Comes, 136,
 144
Rogierus filius Riccardi, Antiochiæ
præfectus, 236
Rogierus de Barnavilla, 151, 181
Romæ septem altaria sabbato Pas-

TOMI I. MUSEI.

cha consecrari solita, 74
 Romanus canon Missæ, 229. Ro-
 mana Synodus, ubi actum deritu
 Ambrosiano, 106. Romanum
 Concilium in causa Formosi, 86.
 Romanorum ordinum pompa,
 269. Romanis Pontificibus utilis
 ac necessaria moderatio in Galli-
 canos præfules, 127. Romano-
 rum Senatorum & Cancellariorum
 habitus, 258
 Russa urbs, 146, 148, 201.

S

S Abbati sancti preces, 319, ora-
 tiones, 320, 326
 Sabbati jejunium, 75
 Sacra quotidiana ab Ambrosio cele-
 brata, 105
 Sacramentarium Gallicanum, 273
& seqq.
 Sacramentarium, liber missalium
 orationum, 97
 Sacramentorum liber in canone sa-
 cro, 397
 Sagata urbs, 205
 Salibæ, 140
 Salis exorcismus, 386, benedictio,
ibid. 387
 Sanctorum consortium, 11
 Sanctorum suffragia in Missa, 348
 Sanctum argenteum prope CP.
 147
 Saracenorum impetus, 57
 Scerogorgo castrum, 141
 Schedare, 57
 Schiphati, 206
 Scripturæ sacræ vetus canon, 396
 Sculdais, 49
 Sebastia seu Neapolis & Sichar,
 218
 Senarius vir illust. 69
 Sensadolum filius Ammirarii Antio-
 chiæ, 170
 Sepulcri Dominici via, 132 *& seqq.*

Sepulcrorum violatores puniti, 41
 Serra urbs, 146
 Sicardus miles, 203
 S. Sigismundi regis Missa, 273, 276,
 344, miracula, *ibid.*
 Sigualdus episcopus, 54
 Silvester Portuensis episcopus, 86
& seqq.
 Silvester abbas S. Cosmæ in Mica
 aurea, 58
 Simon magus sumtus pro Elyna,
 20, 21
 Soldanus miles, 183
 Solidus per XII denarios per totam
 Salicam, 49
 Solimanus Dux Turcorum, 156
 Solimannus Turcorum princeps,
 238
 Sophronius episcopus Jerosolymita-
 nus scriptor passionis Cyri & Jo-
 hannis martyrum, 83, 84
 Sortes per libros sacros, 393
 Spinum Lamberri, 41
 Spiritus sancti processio ex Patre Fi-
 lioque, 44, 313, 376
 Spoletani Duces, 63 *& seqq.*
 Stephani Papæ synodus, 86, 88
 Stephanus Ostiensis an Otrientis epis-
 copus, 87 *& seqq.*
 Stephanus presbyter, 186
 Stephanus Comes Carnotensis, 130
 & Blefensis, 131, 133 *& seqq.* Ejus
 epistola, 237
 Strenæ &c. Kalendis Januarii, 18
 Subdiaconus de Armario, 87
 Subrea urbs, 199
 Suffragia sanctorum in Missa, 348
 Suppo Comes palatii, 55
 Symbolum Apostolorum, 396. Sym-
 bolum ad aurium apertionem, 310
& seqq. Ejus expositio, 312, 313
 Symbolum in Missa non recitatum,
 282. Symbolum competentibus tra-
 ditum, 104
 Symeon miles, 158

INDEX

T

T Alamaniz urbs ,	196
Talpa vitis ,	173
Tancredus Marchusi filius ,	136 & seqq. 214 & seqq. 223.
Talia Ratchisi Ducis uxor ,	35 , 36
Tenda, tentoria ,	139 , 164 , 165
Thalami benedictio ,	388
Tarsis urbs ,	157
Theodorus martyr	138 , 155
Theodori Papæ Synodus ,	86
Theodorus Primitivus, defensor ecclesie Romanæ ,	84
Therma Alexandrina ,	59
Tonsuræ benedictio ,	389
Tortosa urbs ,	203 , 204
Traditionis ecclesiarum ratio ,	74 , diversitas , 75
Transitio vel cessio per baculum ,	62
Tractatus Patrum qui ,	34
Tripolis urbs ,	204
Turci naturaliter milites ,	155 Dicunt se esse de genere Francorum , <i>ibid.</i>
Fugam sinulari soliti in prælio ,	231
Turcopoli & Piccinasi ,	143
Turris pro Eucharistia benedictio ,	389
Turris Davidica ,	226
Tutoare pro titubare ,	295

V

V Alentinus episc. Centum-cellensis ,	58
--	----

Valonia urbs .	211
Vasorum pollutorum benedictio ,	390
Venerandus ex monacho Farfensi ,	57 abbas S. Cosinæ , 58
Veronica Christi imago ,	265 vide Præfationem.
Verulanensis Synodus ,	242
Ugo de Bellis-fayre . Cruce signatorum legatus ,	15
Vicarius Dei Papa ,	81
Victoris Capuani episcopi opera ,	77
Viduar benedictio ,	388
Virginitas baptismatis ,	23
Unfridus filius Rau ,	144
Urbanus Papa II. 13 , 132 , 139	
Urbani II. epistola encyclica ,	42
Votiva missa ,	362 & seqq.
Ursinianus notarius Caroli & Bernardi regum ,	56
Urso subd. perperam tributa S. Basilii vita ,	81 , 82
Ursus pseudiepiscopus Barensis ,	207
Uti, populi ,	147
Usuræ pœna ,	393
VValfredus Hyporediensis episc. 240	
VVillelmus abbas Mettensis ,	117 , 118

Z

Z Ebari urbs ,	205
Zinzicla ,	141
Zoticus Christianus ,	249

P A R I S I I S ,

Typis JOHANNIS BAPTISTÆ COIGNARD,
Regis Typographi,

Ristampe Offset a cura di:

BIBLIOPOLA

VIVARELLI & GULLÀ

ROMA - PIAZZA DI PIETRA, 26

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

BX
880
M3
1687a
t.1

Mabillon, Jean
Museum italicum

